

MARTIAL

EPIGRAMMES (9369 vers)

- M1_1 v.1 Hic est quem legis ille, quem requiris,
 2 toto notus in orbe Martialis
 3 argutis epigrammaton libellis :
 4 cui, lector studiose, quod dedisti
 5 viventi decus atque sentienti,
 6 rari post cineres habent poetae.
- M1_2 v.1 Qui tecum cupis esse meos ubicumque libellos
 2 et comites longae quaeris habere viae,
 3 hos eme, quos artat brevibus membrana tabellis :
 4 scrinia da magnis, me manus una capit.
 5 Ne tamen ignores ubi sim venalis et erres
 6 urbe vagus tota, me duce certus eris :
 7 libertum docti Lucensis quaere Secundum
 8 limina post Pacis Palladiumque forum.
- M1_3 v.1 Argiletanas mavis habitare tabernas,
 2 cum tibi, parve liber, scrinia nostra vacent.
 3 Nescis, heu, nescis dominae fastidia Romae :
 4 crede mihi, nimium Martia turba sapit.
 5 Majores nusquam rhonchi : juvenesque senesque
 6 et pueri nasum rhinocerotis habent.
 7 Audieris cum grande sophos, dum basia jactas,
 8 ibis ab excusso missus in astra sago.
 9 Sed tu ne totiens domini patiare lituras
 10 neve notet lusus tristis harundo tuos,
 11 aetherias, lascive, cupis volitare per auras :
 12 i, fuge ; sed poteras tutior esse domi.
- M1_4 v.1 Contigeris nostros, Caesar, si forte libellos,
 2 terrarum dominum pone supercilium.
 3 Consuevere jocos vestri quoque ferre triumphi,
 4 materiam dictis nec pudet esse ducem.
 5 Qua Thymelen spectas derisoremque Latinum,
 6 illa fronte precor carmina nostra legas.
 7 Innocuos censura potest permittere lusus :
 8 lasciva est nobis pagina, vita proba.
- M1_5 v.1 Do tibi naumachiam, tu das epigrammata nobis :
 2 vis, puto, cum libro, Marce, natate tuo.
- M1_6 v.1 Aetherias aquila puerum portante per auras
 2 inlaesum timidus unguibus haesit onus :
 3 nunc sua Caesareos exorat praeda leones
 4 tutus et ingenti ludit in ore lepus.
 5 Quae majora putas miracula ? summus utrisque
 6 auctor adest : haec sunt Caesaris, illa Jovis.

- M1_7 v.1 Stellae delictum mei columba,
2 Verona licet audiente dicam,
3 vicit, Maxime, passerem Catulli.
4 Tanto Stella meus tuo Catullo
5 quanto passere major est columba.
- M1_8 v.1 Quod magni Thraseae consummatique Catonis
2 dogmata sic sequeris salvos ut esse velis,
3 pectore nec nudo strictos incurris in ensis,
4 quod fecisse velim te, Deciane, facis.
5 Nolo virum facili redemit qui sanguine famam,
6 hunc volo, laudari qui sine morte potest.
- M1_9 v.1 Bellus homo et magnus vis idem, Cotta, videri :
2 sed qui bellus homo est, Cotta, pusillus homo est.
- M1_10 v.1 Petit Gemellus nuptias Maronillae
2 et cupit et instat et precatur et donat.
3 Adeone pulchra est ? Immo foedius nil est.
4 Quid ergo in illa petitur et placet ? Tussit.
- M1_11 v.1 Cum data sint equiti bis quina nomismata, quare
2 bis decies solus, Sextiliane, bibis ?
3 Jam defecisset portantis calda ministros,
4 si non potares, Sextiliane, merum.
- M1_12 v.1 Itur ad Herculei gelidas qua Tiburis arces
2 canaque sulphureis Albula fumat aquis,
3 rura nemusque sacrum dilectaque jugera Musis
4 signat vicina quartus ab urbe lapis.
5 Hic rudis aestivas praestabat porticus umbras,
6 heu quam paene novum porticus ausa nefas !
7 Nam subito conlapsa ruit, cum mole sub illa
8 gestatus bijugis Regulus esset equis.
9 Nimirum timuit nostras Fortuna querelas,
10 quae par tam magnae non erat invidiae.
11 Nunc et damna juvant ; sunt ipsa pericula tanti :
12 stantia non poterant tecta probare deos.
- M1_13 v.1 Casta suo gladium cum traderet Arria Paeto,
2 quem de visceribus strinxerat ipsa suis,
3 "Si qua fides, vulnus quod feci non dolet," inquit,
4 "sed tu quod facies, hoc mihi, Paete, dolet."
- M1_14 v.1 Delicias, Caesar, lususque jocosque leonum
2 vidimus - Hoc etiam praestat harena tibi -
3 cum pressus blando totiens a dente rediret
4 et per aperta vagus curreret ora lepus.
5 Unde potest avidus captae leo parcere praedae ?
6 Sed tamen esse tuus dicitur : ergo potest.
- M1_15 v.1 O mihi post nullos, Juli, memorande sodales,
2 si quid longa fides canaque jura valent,
3 bis jam paene tibi consul tricentus instat,
4 et numerat paucos vix tua vita dies.
5 Non bene distuleris videas quae posse negari,
6 et solum hoc ducas, quod fuit, esse tuum.

- 7 Expectant curaeque catenatique labores,
8 gaudia non remanent, sed fugitiva volant.
9 Haec utraque manu complexuque adsere toto :
10 saepe fluunt imo sic quoque lapsa sinu.
11 Non est, crede mihi, sapientis dicere "Vivam" :
12 sera nimis vita est crastina : vive hodie.
- M1_16 v.1 Sunt bona, sunt quaedam mediocria, sunt mala plura
2 quae legis hic : aliter non fit, Avite, liber.
- M1_17 v.1 Cogit me Titus actitare causas
2 et dicit mihi saepe "Magna res est."
3 Res magna est, Tite, quam facit colonus.
- M1_18 v.1 Quid te, Tucca, juvat vetulo miscere Falerno
2 in Vaticanis condita musta cadis ?
3 Quid tantum fecere boni tibi pessima vina ?
4 Aut quid fecerunt optima vina mali ?
5 De nobis facile est, scelus est jugulare Falernum
6 et dare Campano toxica saeva mero.
7 Convivae meruere tui fortasse perire :
8 amphora non meruit tam pretiosa mori.
- M1_19 v.1 Si memini, fuerant tibi quattuor, Aelia, dentes :
2 expulit una duos tussis et una duos.
3 Jam segura potes totis tussire diebus :
4 nil istic quod agat tertia tussis habet.
- M1_20 v.1 Dic mihi, quis furor est ? Turba spectante vocata
2 solus boletos, Caeciliane, voras.
3 Quid dignum tanto tibi ventre gulaque precabor ?
4 Boletum qualem Claudius edit, edas.
- M1_21 v.1 Cum peteret regem, decepta satellite dextra
2 ingessit sacris se peritura focus.
3 Sed tam saeva pius miracula non tulit hostis
4 et raptum flammis jussit abire virum :
5 urere quam potuit contempto Mucius igne,
6 hanc spectare manum Porsena non potuit.
7 Major deceptae fama est et gloria dextrae :
8 si non errasset, fecerat illa minus.
- M1_22 v.1 Quid nunc saeva fugis placidi, lepus, ora leonis ?
2 Frangere tam parvas non didicere feras.
3 Servantur magnis isti cervicibus ungues
4 nec gaudet tenui sanguine tanta sitis.
5 Praeda canum lepus est, vastos non implet hiatus :
6 non timeat Dacus Caesaris arma puer.
- M1_23 v.1 Invitas nullum nisi cum quo, Cotta, lavaribus
2 et dant convivam balnea sola tibi.
3 Mirabar quare numquam me, Cotta, vocasses :
4 jam scio me nudum displicuisse tibi.
- M1_24 v.1 Aspicias incomptis illum, Deciane, capillis,
2 cujus et ipse times triste supercilium,
3 qui loquitur Curios adsertoresque Camillos ?

- 4 Nolito fronti credere : nupsit heri.
- M1_25 v.1 Ede tuos tandem populo, Faustine, libellos
2 et cultum docto pectore profer opus,
3 quod nec Cecropiae damnent Pandionis arces
4 nec sileant nostri praetereantque senes.
5 Ante fores stantem dubitas admittere Famam
6 teque piget curae praemia ferre tuae ?
7 Post te victurae per te quoque vivere chartae
8 incipiant : cineri gloria sera venit.
- M1_26 v.1 Sextiliane, bibis quantum subsellia quinque
2 solus : aqua totiens ebrius esse potes ;
3 nec consessorum vicina nomismata tantum,
4 aera sed a cuneis ulteriora petis.
5 Non haec Paelignis agitur vindemia prelis
6 uva nec in Tuscis nascitur ista jugis,
7 testa sed antiqui felix siccatur Opimi,
8 egerit et nigros Massica cella cados.
9 A copone tibi faex Laletana petatur,
10 si plus quam decies, Sextiliane, bibis.
- M1_27 v.1 Hesterna tibi nocte dixeramus,
2 quincunces puto post decem peractos,
3 cenares hodie, Procille, mecum.
4 Tu factam tibi rem statim putasti
5 et non sobria verba subnotasti
6 exemplo nimium periculoso :
7 miso mnamona sumpotan, Procille.
- M1_28 v.1 Hesterno fetere mero qui credit Acerram,
2 fallitur : in lucem semper Acerra bibit.
- M1_29 v.1 Fama refert nostros te, Fidentine, libellos
2 non aliter populo quam recitare tuos.
3 Si mea vis dici, gratis tibi carmina mittam :
4 si dici tua vis, hoc eme, ne mea sint.
- M1_30 v.1 Chirurgus fuerat, nunc est vispillo Diaulus :
2 coepit quo poterat clinicus esse modo.
- M1_31 v.1 Hos tibi, Phoebe, vovet totos a vertice crines
2 Encolpos, domini centurionis amor,
3 grata Pudens meriti tulerit cum praemia pili.
4 Quam primum longas, Phoebe, recide comas,
5 dum nulla teneri sordent lanugine voltus
6 dumque decent fusae lactea colla jubae ;
7 utque tuis longum dominusque puerque fruuntur
8 muneribus, tonsum fac cito, sero virum.
- M1_32 v.1 Non amo te, Sabidi, nec possum dicere quare :
2 hoc tantum possum dicere, non amo te.
- M1_33 v.1 Amissum non flet cum sola est Gellia patrem,
2 si quis adest jussae prosiliunt lacrimae.
3 Non luget quisquis laudari, Gellia, quaerit,
4 ille dolet vere qui sine teste dolet.

- M1_34 v.1 Incustoditis et apertis, Lesbia, semper
 2 liminibus peccas nec tua furta tegis,
 3 et plus spectator quam te delectat adulter
 4 nec sunt grata tibi gaudia si qua latent.
 5 At meretrix abigit testem veloque seraque
 6 raraque Submemmi fornice rima patet.
 7 A Chione saltem vel ab Iade disce pudorem :
 8 abscondunt spurcas et monumenta lupas.
 9 Numquid dura tibi nimium censura videtur ?
 10 deprendi veto te, Lesbia, non futui.
- M1_35 v.1 Versus scribere me parum severos
 2 nec quos praelegat in schola magister,
 3 Corneli, quereris : sed hi libelli,
 4 tamquam conjugibus suis mariti,
 5 non possunt sine mentula placere.
 6 Quid si me jubeas thalassionem
 7 verbis dicere non thalassionis ?
 8 Quis Floralia vestit et stolatum
 9 permittit meretricibus pudorem ?
 10 Lex haec carminibus data est jocosis,
 11 ne possint, nisi pruriant, juvare.
 12 Quare deposita severitate
 13 parcas lusibus et jocis rogamus,
 14 nec castrare velis meos libellos :
 15 Gallo turpius est nihil Priapo.
- M1_36 v.1 Si, Lucane, tibi vel si tibi, Tulle, darentur
 2 qualia Ledaevi fata Lacones habent,
 3 nobilis haec esset pietatis rixa duobus,
 4 quod pro fratre mori vellet uterque prior,
 5 diceret infernas et qui prior isset ad umbras :
 6 "Vive tuo, frater, tempore, vive meo."
- M1_37 v.1 Ventris onus misero, nec te pudet, excipis auro,
 2 Basse, bibis vitro : carius ergo cacas.
- M1_38 v.1 Quem recitas meus est, o Fidentine, libellus :
 2 sed male cum recitas, incipit esse tuus.
- M1_39 v.1 Si quis erit raros inter numerandus amicos,
 2 quales prisca fides famaue novit anus,
 3 si quis Cecropiae madidus Latiaeque Minervae
 4 artibus et vera simplicitate bonus,
 5 si quis erit recti custos, mirator honesti
 6 et nihil arcano qui roget ore deos,
 7 si quis erit magnae subnixus robore mentis :
 8 dispeream si non hic Decianus erit.
- M1_40 v.1 Qui ducis vultus et non legis ista libenter,
 2 omnibus invidias, livide, nemo tibi.
- M1_41 v.1 Urbanus tibi, Caecili, videris :
 2 non es, crede mihi. Quid ergo ? verna,
 3 hoc quod Transtiberinus ambulator
 4 qui pallentia sulphurata fractis

- 5 permutat vitreis, quod otiosae
6 vendit qui madidum cicer coronae,
7 quod custos dominusque viperarum,
8 quod viles pueri salariorum,
9 quod fumantia qui tomacla raucus
10 circumfert tepidis cocus popinis,
11 quod non optimus urbicus poeta,
12 quod de Gadibus improbus magister,
13 quod bucca est vetuli dicax cinaedi.
14 Quare desine jam tibi videri,
15 quod soli tibi, Caecili, videris,
16 qui Gabbam salibus tuis et ipsum
17 posses vincere Tettium Caballum.
18 Non cuicumque datum est habere nasum :
19 ludit qui stolida procacitate,
20 non est Tettius ille, sed caballus.
- M1_42 v.1 Conjugis audisset fatum cum Porcia Bruti
2 et subtracta sibi quaereret arma dolor,
3 "Nondum scitis" ait "mortem non posse negari ?
4 Credideram fatis hoc docuisse patrem."
5 Dixit et ardentis avido bibit ore favillas.
6 I nunc et ferrum, turba molesta, nega.
- M1_43 v.1 Bis tibi triceni fuimus, Mancine, vocati
2 et positum est nobis nil here praeter aprum ;
3 non quae de tardis servantur vitibus uvae
4 dulcibus aut certant quae melimela favis ;
5 non pira quae longa pendent religata genesta
6 aut imitata brevis Punica grana rosas ;
7 rustica lactantis nec misit Sassina metas
8 nec de Picenis venit oliva cadis :
9 nudus aper, sed et hic minimus qualisque necari
10 a non armato pumilione potest.
11 Et nihil inde datum est ; tantum spectavimus omnes :
12 ponere aprum nobis sic et harena solet.
13 Ponatur tibi nullus aper post talia facta,
14 sed tu ponaris cui Charidemus apro.
- M1_44 v.1 Lascivos leporum cursus lususque leonum
2 quod major nobis charta minorque gerit
3 et bis idem facimus, nimium si, Stella, videtur
4 hoc tibi, bis leporem tu quoque pone mihi.
- M1_45 v.1 Edita ne brevibus pereat mihi cura libellis,
2 dicatur potius "Ton de Apameibomenos".
- M1_46 v.1 Cum dicis "Propero, fac si facis," Hedyle, languet
2 protinus et cessat debilitata Venus.
3 Expectare jube : velocius ibo retentus.
4 Hedyle, si properas, dic mihi ne properem.
- M1_47 v.1 Nuper erat medicus, nunc est vispillo Diaulus :
2 quod vispillo facit, fecerat et medicus.
- M1_48 v.1 Rictibus his taurus non eripere magistri,
2 per quos praeda fugax itque reditque lepus ;

3 quodque magis mirum, velocior exit ab hoste
 4 nec nihil a tanta nobilitate refert.
 5 Tutior in sola non est cum currit harena,
 6 nec cavea tanta conditur ille fide.
 7 Si vitare canum morsus, lepus improbe, quaeris,
 8 ad quae confugas ora leonis habes.

M1_49 v.1 Vir celtiberis non tacende gentibus
 2 nostraeque laus Hispaniae,
 3 videbis altam, Liciniane, Bilbilin,
 4 equis et armis nobilem,
 5 senemque Cajum nivibus, et fractis sacrum
 6 Vadaveronem montibus,
 7 et delicati dulce Boterdi nemus,
 8 Pomona quod felix amat.
 9 Tepidi natabis lene Congedi vadum
 10 mollesque Nympharum lacus,
 11 quibus remissum corpus adstringes brevi
 12 Salone, qui ferrum gelat.
 13 Praestabit illic ipsa figendas prope
 14 Voberca prandenti feras ;
 15 aestus serenos aureo franges Tago
 16 obscurus umbris arborum ;
 17 avidam rigens Dercenna placabit sitim
 18 et Nutha, quae vincit nives.
 19 At cum December canus et bruma impotens
 20 Aquilone rauco mugiet,
 21 aprica repetes Tarraconis litora
 22 tuamque Laletaniam.
 23 Ibi inligatas mollibus dammas plagis
 24 mactabis et vernas apros
 25 leporemque forti callidum rumpes equo,
 26 cervos relinques vilico.
 27 Vicina in ipsum silva descendet focum
 28 infante cinctum sordido ;
 29 vocabitur venator et veniet tibi
 30 conviva clamatus prope ;
 31 lunata nusquam pellis et nusquam toga
 32 olidaeque vestes murice ;
 33 procul horridus Liburnus et querulus cliens,
 34 imperia viduarum procul ;
 35 non rumpet altum pallidus somnum reus,
 36 sed mane totum dormies.
 37 Mereatur alius grande et insanum sophos :
 38 miserere tu felicitium
 39 veroque fruire non superbus gaudio,
 40 dum Sura laudatur tuus.
 41 Non inpudenter vita quod relicum est petit,
 42 cum fama quod satis est habet.

M1_50 v.1 Si tibi Mistyllos cocus, Aemiliane, vocatur,
 2 dicatur quare non Taratalla mihi ?

M1_51 v.1 Non facit ad saevos cervix, nisi prima, leones :
 2 quid fugis hos dentes, ambitiose lepus ?
 3 Scilicet a magnis ad te descendere tauris
 4 et quae non cernunt frangere colla velis.

- 5 Desperanda tibi est ingentis gloria fati :
6 non potes hoc tenuis praeda sub hoste mori.
- M1_52 v.1 Commendo tibi, Quintiane, nostros -
2 nostros dicere si tamen libellos
3 possum, quos recitat tuus poeta - :
4 si de servitio gravi queruntur,
5 adsertor venias satisque praestes,
6 et, cum se dominum vocabit ille,
7 dicas esse meos manumque missos.
8 Hoc si terque quaterque clamitaris,
9 inpones plagiario pudorem.
- M1_53 v.1 Una est in nostris tua, Fidentine, libellis
2 pagina, sed certa domini signata figura,
3 quae tua traducit manifesto carmina furto.
4 Sic interpositus villo contaminat uncto
5 urbica Lingonicus Tyrianthina bardocucullus,
6 sic Arretinae violant crystallina testae,
7 sic niger in ripis errat cum forte Caystri,
8 inter Ledaeos ridetur corvus olores,
9 sic ubi multisona fervet sacer Atthide lucus,
10 inproba Cecropias offendit pica querelas.
11 Indice non opus est nostris nec iudice libris,
12 stat contra dicitque tibi tua pagina "Fur es."
- M1_54 v.1 Si quid, Fusce, vacas adhuc amari -
2 nam sunt hinc tibi, sunt et hinc amici -,
3 unum, si superest, locum rogamus,
4 nec me, quod tibi sim novus, recuses :
5 omnes hoc veteres tui fuerunt.
6 Tu tantum inspice qui novus paratur
7 an possit fieri vetus sodalis.
- M1_55 v.1 Vota tui breviter si vis cognoscere Marci,
2 clarum militiae, Fronto, togaeque decus,
3 hoc petit, esse sui nec magni ruris arator,
4 sordidaque in parvis otia rebus amat.
5 Quisquam picta colit Spartani frigora saxi
6 et matutinum portat ineptus Have,
7 cui licet exuviis nemoris rurisque beato
8 ante focum plenas explicuisse plagas
9 et piscem tremula salientem ducere saeta
10 flavaque de rubro promere mella cado ?
11 pinguis inaequales onerat cui vilica mensas
12 et sua non emptus praeparat ova cinis ?
13 Non amet hanc vitam quisquis me non amat, opto,
14 vivat et urbanis albus in officiis.
- M1_56 v.1 Continuis vexata madet vindemia nimbis :
2 non potes, ut cupias, vendere, copo, merum.
- M1_57 v.1 Qualem, Flacce, velim quaeris nolimque puellam ?
2 nolo nimis facilem difficilemque nimis.
3 Illud quod medium est atque inter utrumque probamus :
4 nec volo quod cruciat nec volo quod satiat.

- M1_58 v.1 Milia pro puero centum me mango poposcit :
 2 risi ego, sed Phoebus protinus illa dedit.
 3 Hoc dolet et queritur de me mea mentula secum
 4 laudaturque meam Phoebus in invidiam.
 5 Sed sestertiolum donavit mentula Phoebus
 6 bis decies : hoc da tu mihi, pluris emam.
- M1_59 v.1 Dat Baiana mihi quadrantes sportula centum :
 2 inter delicias quid facit ista fames ?
 3 Redde Lupi nobis tenebrosaque balnea Grylli :
 4 tam male cum cenem, cur bene, Flacce, laver ?
- M1_60 v.1 Intres ampla licet torvi lepus ora leonis,
 2 esse tamen vacuo se leo dente putat.
 3 Quod ruet in tergum vel quos procumbet in armos,
 4 alta juvencorum volnera figet ubi ?
 5 Quid frustra nemorum dominum regemque fatigas ?
 6 Non nisi delecta pascitur ille fera.
- M1_61 v.1 Verona docti syllabas amat vatis,
 2 Marone felix Mantua est,
 3 censetur Aponi Livio suo tellus
 4 Stellaque nec Flacco minus,
 5 Apollodoro plaudit imbrifer Nilus,
 6 Nasone Paeligni sonant,
 7 duosque Senecas unicumque Lucanum
 8 facunda loquitur Corduba,
 9 gaudent jocosae Canio suo Gades,
 10 Emerita Deciano meo :
 11 te, Liciniane, gloriabitur nostra
 12 nec me tacebit Bilbilis.
- M1_62 v.1 Casta nec antiquis cedens Laevina Sabinis
 2 et quamvis tetrico tristior ipsa viro
 3 dum modo Lucrino, modo se demittit Averno,
 4 et dum Baianis saepe fovetur aquis,
 5 incidit in flammas : juvenemque secuta relicto
 6 conjugae Penelope venit, abit Helene.
- M1_63 v.1 Ut recitem tibi nostra rogas epigrammata. Nolo :
 2 non audire, Celer, sed recitare cupis.
- M1_64 v.1 Bella es, novimus, et puella, verum est,
 2 et dives, quis enim potest negare ?
 3 Sed cum te nimium, Fabulla, laudas,
 4 nec dives neque bella nec puella es.
- M1_65 v.1 Cum dixi ficus, rides quasi barbara verba
 2 et dici ficos, Caeciliane, jubes.
 3 Dicemus ficus, quas scimus in arbore nasci,
 4 dicemus ficos, Caeciliane, tuos.
- M1_66 v.1 Erras, meorum fur avare librorum,
 2 fieri poetam posse qui putas tanti,
 3 scriptura quanti constet et tomus vilis :
 4 non sex paratur aut decem sophos nummis.
 5 Secreta quaere carmina et rudes curas

- 6 quas novit unus scrinioque signatas
7 custodit ipse virginis pater chartae,
8 quae trita duro non inhorruit mento :
9 mutare dominum non potest liber notus.
10 Sed pumicata fronte si quis est nondum
11 nec umbilicis cultus atque membrana,
12 mercare : tales habeo ; nec sciet quisquam.
13 Aliena quisquis recitat et petit famam,
14 non emere librum, sed silentium debet.
- M1_67 v.1 Liber homo es nimium" dicis mihi, Ceryle, semper.
2 In te quis dicit, Ceryle : "Liber homo es ?"
- M1_68 v.1 Quidquid agit Rufus, nihil est nisi Naevia Rufo.
2 Si gaudet, si flet, si tacet, hanc loquitur.
3 Cenat, propinat, poscit, negat, innuit : una est
4 Naevia ; si non sit Naevia, mutus erit.
5 Scriberet hesternae patri cum luce salutem,
6 "Naevia lux" inquit "Naevia lumen, have."
7 Haec legit et ridet demisso Naevia vultu.
8 Naevia non una est : quid, vir inepte, furis ?
- M1_69 v.1 Coepit, Maxime, Pana qui solebat,
2 nunc ostendere Canium Tarentos.
- M1_70 v.1 Vade salutatum pro me, liber : ire juberis
2 ad Proculi nitidos, officiose, lares.
3 Quaeris iter, dicam. Vicinum Castora canae
4 transibis Vestae virgineamque domum ;
5 inde sacro veneranda petes Palatia clivo,
6 plurima qua summi fulget imago ducis.
7 Nec te detineat miri radiata colossi
8 quae Rhodium moles vincere gaudet opus.
9 Flecte vias hac qua madidi sunt tecta Lyaei
10 et Cybeles picto stat Corybante tholus.
11 Protinus a laeva clari tibi fronte Penates
12 atriaque excelsae sunt adeunda domus.
13 Hanc pete : ne metuas fastus limenque superbum :
14 nulla magis toto janua poste patet,
15 nec propior quam Phoebus amet doctaeque sorores.
16 Si dicet "Quare non tamen ipse venit ?",
17 sic licet excuses "Quia qualiacumque leguntur
18 ista, salutator scribere non potuit".
- M1_71 v.1 Laevia sex cyathis, septem Justina bibatur,
2 quinque Lycas, Lyde quattuor, Ida tribus.
3 Omnis ab infuso numeretur amica Falerno,
4 et quia nulla venit, tu mihi, Somne, veni.
- M1_72 v.1 Nostris versibus esse te poetam,
2 Fidentine, putas cupisque credi ?
3 Sic dentata sibi videtur Aegle
4 emptis ossibus Indicoque cornu ;
5 sic quae nigrior est cadente moro,
6 cerussata sibi placet Lycoris.
7 Hac et tu ratione qua poeta es,
8 calvus cum fueris, eris comatus.

- M1_73 v.1 Nullus in urbe fuit tota qui tangere vellet
2 uxorem gratis, Caeciliane, tuam,
3 dum licuit : sed nunc positis custodibus ingens
4 turba fututorum est : ingeniosus homo es.
- M1_74 v.1 Moechus erat : poteras tamen hoc tu, Paula, negare.
2 Ecce vir est : numquid, Paula, negare potes ?
- M1_75 v.1 Dimidium donare Lino quam credere totum
2 qui mavolt, mavolt perdere dimidium.
- M1_76 v.1 O mihi curarum pretium non vile mearum,
2 Flacce, Antenorei spes et alumne laris,
3 Pierios differ cantusque chorosque sororum ;
4 aes dabit ex istis nulla puella tibi.
5 Quid petis a Phoebos ? nummos habet arca Minervae ;
6 haec sapit, haec omnes fenerat una deos.
7 Quid possunt hederiae Bacchi dare ? Pallados arbor
8 inclinat varias pondere nigra comas.
9 Praeter aquas Helicon etserta lyrasque dearum
10 nil habet et magnum, sed perinane sophos.
11 Quid tibi cum Cirrha ? Quid cum Permesside nuda ?
12 Romanum propius divitiusque forum est.
13 Illic aera sonant : at circum pulpita nostra
14 et steriles cathedras basia sola crepant.
- M1_77 v.1 Pulchre valet Charinus et tamen pallet.
2 Parce bibit Charinus et tamen pallet.
3 Bene concoquit Charinus et tamen pallet.
4 Sole utitur Charinus et tamen pallet.
5 Tingit cutem Charinus et tamen pallet.
6 Cunnum Charinus lingit et tamen pallet.
- M1_78 v.1 Indignas premeret pestis cum tabida fauces
2 inque ipsos vultus serperet atra lues,
3 siccis ipse genis flentes hortatus amicos
4 decrevit Stygios Festus adire lacus.
5 Nec tamen obscuro pia polluit ora veneno
6 aut torsit lenta tristia fata fame,
7 sanctam Romana vitam sed morte peregit
8 dimisitque animam nobiliore rogo.
9 Hanc mortem fatiis magni praeferre Catonis
10 fama potest : hujus Caesar amicus erat.
- M1_79 v.1 Semper agis causas et res agis, Attale, semper :
2 est, non est quod agas, Attale, semper agis.
3 Si res et causae desunt, agis, Attale, mulas.
4 Attale, ne quod agas desit, agas animam.
- M1_80 v.1 Sportula, Cane, tibi suprema nocte petita est.
2 Occidit puto te, Cane, quod una fuit.
- M1_81 v.1 A servo scis te genitum blandequae fateris,
2 cum dicis dominum, Sosibiane, patrem.
- M1_82 v.1 Haec quae pulvere dissipata multo

- 2 longas porticus explicat ruinas,
 3 en quanto jacet absoluta casu !
 4 Tectis nam modo Regulus sub illis
 5 gestatus fuerat recesseratque,
 6 victa est pondere cum suo repente,
 7 et, postquam domino nihil timebat,
 8 securo ruit incruenta damno.
 9 Tanta, Regule, post metum querelae
 10 quis curam neget esse te deorum,
 11 propter quem fuit innocens ruina ?
- M1_83 v.1 Os et labra tibi lingit, Manneia, catellus :
 2 non miror, merdas si libet esse cani.
- M1_84 v.1 Uxorem habendam non putat Quirinalis,
 2 cum velit habere filios, et invenit
 3 quo possit istud more : futuit ancillas
 4 domumque et agros implet equitibus vernis.
 5 Pater familiae verus est Quirinalis.
- M1_85 v.1 Venderet excultos colles cum praeco facetus
 2 atque suburbani jugera pulchra soli,
 3 "Errat" ait "si quis Mario putat esse necesse
 4 vendere : nil debet, fenerat immo magis."
 5 "Quae ratio est igitur ?" - "Servos ibi perdidit omnes
 6 et pecus et fructus ; non amat inde locum."
 7 Quis faceret pretium nisi qui sua perdere vellet
 8 omnia ? Sic Mario noxius haeret ager.
- M1_86 v.1 Vicinus meus est manumque tangi
 2 de nostris Novius potest fenestris.
 3 Quis non invideat mihi putetque
 4 horis omnibus esse me beatum,
 5 juncto cui liceat frui sodale ?
 6 Tam longe est mihi quam Terentianus,
 7 qui nunc Niliacam regit Syenen.
 8 Non convivere, nec videre saltem,
 9 non audire licet, nec urbe tota
 10 quisquam est tam prope tam proculque nobis.
 11 Migrandum est mihi longius vel illi.
 12 Vicinus Novio vel inquilinus
 13 sit, si quis Novium videre non volt.
- M1_87 v.1 Ne gravis hesterno fragres, Fescennia, vino,
 2 pastillos Cosmi luxuriosa voras.
 3 Ista linunt dentes jantacula, sed nihil obstant,
 4 extremo ructus cum redit a barathro.
 5 Quid quod olet gravius mixtum diapasmate virus
 6 atque duplex animae longius exit odor ?
 7 Notas ergo nimis fraudes deprensaque furta
 8 jam tollas et sis ebria simpliciter.
- M1_88 v.1 Alcime, quem raptum domino crescentibus annis
 2 Labicana levi caespite velat humus,
 3 accipe non Pario nutantia pondera saxo,
 4 quae cineri vanus dat ruitura labor,
 5 sed faciles buxos et opacas palmitis umbras

- 6 quaeque virent lacrimis roscida prata meis
7 accipe, care puer, nostri monimenta doloris :
8 hic tibi perpetuo tempore vivet honor.
9 Cum mihi supremos Lachesis perneverit annos,
10 non aliter cineres mando jacere meos.
- M1_89 v.1 Garris in aurem semper omnibus, Cinna,
 2 garrire et illud teste quod licet turba.
 3 Rides in aurem, quereris, arguis, ploras,
 4 cantas in aurem, judicas, taces, clamas,
 5 adeoque penitus sedit hic tibi morbus,
 6 ut saepe in aurem, Cinna, Caesarem laudes.
- M1_90 v.1 Quod numquam maribus junctam te, Bassa, videbam
 2 quodque tibi moechum fabula nulla dabat,
 3 omne sed officium circa te semper obibat
 4 turba tui sexus, non adeunte viro,
 5 esse videbaris, fateor, Lucretia nobis :
 6 at tu, pro facinus, Bassa, fututor eras.
 7 Inter se geminos audes committere cunnos
 8 mentiturque virum prodigiosa Venus.
 9 Commenta es dignum Thebano aenigmate monstrum,
 10 hic ubi vir non est, ut sit adulterium.
- M1_91 v.1 Cum tua non edas, carpis mea carmina, Laeli.
 2 Carpere vel noli nostra vel ede tua.
- M1_92 v.1 Saepe mihi queritur non siccis Cestos ocellis,
 2 tangi se digito, Mamuriane, tuo.
 3 Non opus est digito : totum tibi Ceston habeto,
 4 si dest nil aliud, Mamuriane, tibi.
 5 Sed si nec focus est nudi nec sponda grabati
 6 nec curtus Chiones Antiopesve calix,
 7 cerea si pendet lumbis et scripta lacerna
 8 dimidiasque nates Gallica paeda tegit,
 9 pasceris et nigrae solo nidore culinae
 10 et bibis imundam cum cane pronus aquam :
 11 non culum, neque enim est culus, qui non cacat olim,
 12 sed fodiam digito qui superest oculum ;
 13 nec me zelotypum nec dixeris esse malignum.
 14 Denique pedica, Mamuriane, satur.
- M1_93 v.1 Fabricio junctus fido requiescit Aquinus,
 2 qui prior Elysias gaudet adisse domos.
 3 Ara duplex primi testatur munera pili :
 4 plus tamen est, titulo quod brevioris legis :
 5 "Junctus uterque sacro laudatae foedere vitae,
 6 fama quae quod raro novit, amicus erat."
- M1_94 v.1 Cantasti male, dum fututa es, Aegle.
 2 Jam cantas bene : basianda non es.
- M1_95 v.1 Quod clamas semper, quod agentibus obstrepis, Aeli,
 2 non facis hoc gratis : accipis, ut taceas.
- M1_96 v.1 Si non molestum est teque non piget, scazon,
 2 nostro rogamus pauca verba Materno

- 3 dicas in aurem sic ut audiat solus.
 4 Amator ille tristium lacernarum
 5 et baeticatus atque leucophaeatus,
 6 qui coccinatos non putat viros esse
 7 amethystinasque mulierum vocat vestes,
 8 nativa laudet, habeat et licet semper
 9 fuscus colores, galbinos habet mores.
 10 Rogabit unde suspicer virum mollem.
 11 Una lavamur : aspicit nihil sursum,
 12 sed spectat oculis devorantibus draucos
 13 nec otiosis mentulas videt labris.
 14 Quaeris quis hic sit ? Excidit mihi nomen.
- M1_97 v.1 Cum clamant omnes, loqueris tunc, Naevole, tantum,
 2 et te patronum causidicumque putas.
 3 Hac ratione potest nemo non esse disertus.
 4 Ecce, tacent omnes : Naevole, dic aliquid.
- M1_98 v.1 Litigat et podagra Diodorus, Flacce, laborat.
 2 Sed nil patrono porrigit : haec cheragra est.
- M1_99 v.1 Non plenum modo vicies habebas,
 2 sed tam prodigus atque liberalis
 3 et tam lautus eras, Calene, ut omnes
 4 optarent tibi centies amici.
 5 Audit vota deus precesque nostras
 6 atque intra, puto, septimas Kalendas
 7 mortes hoc tibi quattuor dederunt.
 8 At tu sic quasi non foret relictum,
 9 sed raptum tibi centies, abisti
 10 in tantam miser esuritionem,
 11 ut convivia sumptuosiora,
 12 toto quae semel apparas in anno,
 13 nigrae sordibus explices monetae,
 14 et septem veteres tui sodales
 15 constemus tibi plumbea selibra.
 16 Quid dignum meritis precemur istis ?
 17 Optamus tibi milies, Calene.
 18 Hoc si contigerit, fame peribis.
- M1_100 v.1 Mammis atque tatas habet Afra, sed ipsa tatarum
 2 dici et mammarum maxima mamma potest.
- M1_101 v.1 Illa manus quondam studiorum fida meorum
 2 et felix domino notaque Caesaribus,
 3 destituit primos viridis Demetrius annos :
 4 quarta tribus lustris addita messis erat.
 5 Ne tamen ad Stygias famulus descenderet umbras,
 6 ureret implicitum cum scelerata lues,
 7 cavimus et domini jus omne remisimus aegro :
 8 munere dignus erat convaluisse meo.
 9 Sensit deficiens sua praemia meque patronum
 10 dixit ad infernas liber iturus aquas.
- M1_102 v.1 Qui pinxit Venerem tuam, Lycori,
 2 blanditus, puto, pictor est Minervae.

- M1_103 v.1 "Si dederint superi decies mihi milia centum"
 2 dicebas nondum, Scaevola, justus eques,
 3 "qualiter o vivam, quam large quamque beate !"
 4 Riserunt faciles et tribuere dei.
 5 Sordidior multo post hoc toga, paenula pejor,
 6 calceus est sarta terque quaterque cute :
 7 deque decem plures semper servantur olivae,
 8 explicat et cenas unica mensa duas,
 9 et Veientani bibitur faex crassa rubelli,
 10 asse cicer tepidum constat et asse Venus.
 11 In jus, o fallax atque infitiator, eamus :
 12 aut vive aut decies, Scaevola, redde deis.
- M1_104 v.1 Picto quod juga delicata collo
 2 pardus sustinet improbaeque tigres
 3 indulgent patientiam flagello,
 4 mordent aurea quod lupata cervi,
 5 quod frenis Libyci domantur ursi
 6 et, quantum Calydon tulisse fertur,
 7 paret purpureis aper capistris,
 8 turpes esseda quod trahunt visontes
 9 et molles dare jussa quod choreas
 10 nigro belua non negat magistro :
 11 quis spectacula non putet deorum ?
 12 Haec transit tamen, ut minora, quisquis
 13 venatus humiles videt leonum,
 14 quos velox leporum timor fatigat.
 15 Dimittunt, repetunt, amantque captos,
 16 et securior est in ore praeda,
 17 laxos cui dare perviosque rictus
 18 gaudent et timidos tenere dentes,
 19 mollem frangere dum pudet rapinam,
 20 stratis cum modo venerint juvencis.
 21 Haec clementia non paratur arte,
 22 sed norunt cui serviant leones.
- M1_105 v.1 In Nomentanis, Ovidi, quod nascitur arvis,
 2 accepit quotiens tempora longa, merum
 3 exuit annosa mores nomenque senecta :
 4 et quidquid voluit, testa vocatur anus.
- M1_106 v.1 Interponis aquam subinde, Rufe,
 2 et si cogeris a sodale, raram
 3 diluti bibis unciam Falerni.
 4 Numquid pollicita est tibi beatam
 5 noctem Naevia sobriasque mavis
 6 certae nequitias fututionis ?
 7 Suspiras, retices, gemis : negavit.
 8 Crebros ergo licet bibas trientes
 9 et durum jugules mero dolorem.
 10 Quid parcis tibi, Rufe ? dormiendum est.
- M1_107 v.1 Saepe mihi dicis, Luci carissime Iuli,
 2 "Scribe aliquid magnum : desidiosus homo es."
 3 Otia da nobis, sed qualia fecerat olim
 4 Maecenas Flacco Vergilioque suo :
 5 condere victuras temptem per saecula curas

- 6 et nomen flammis eripuisse meum.
 7 In steriles nolunt campos juga ferre juvenci :
 8 pingue solum lassat, sed juvat ipse labor.
- M1_108 v.1 Est tibi - sitque precor multos crescatque per annos -
 2 pulchra quidem, verum Transtiberina domus :
 3 at mea Vipsanas spectant cenacula laurus,
 4 factus in hac ego sum jam regione senex.
 5 Migrandum est, ut mane domi te, Galle, salutem :
 6 est tanti, vel si longius illa foret.
 7 Sed tibi non multum est unum si praesto togatum :
 8 multum est, hunc unum si mihi, Galle, nego.
 9 Ipse salutabo decuma te saepius hora :
 10 mane tibi pro me dicet havere liber.
- M1_109 v.1 Issa est passere nequior Catulli,
 2 Issa est purior osculo columbae,
 3 Issa est blandior omnibus puellis,
 4 Issa est carior Indicis lapillis,
 5 Issa est deliciae catella Publi.
 6 Hanc tu, si queritur, loqui putabis ;
 7 sentit tristitiamque gaudiumque.
 8 Collo nixa cubat capitque somnos,
 9 ut suspiria nulla sentiantur ;
 10 et desiderio coacta ventris
 11 gutta pallia non fefellit ulla,
 12 sed blando pede suscitatur toroque
 13 deponi monet et rogat levare.
 14 Castae tantus inest pudor catellae,
 15 ignorat Venerem ; nec invenimus
 16 dignum tam tenera virum puella.
 17 Hanc ne lux rapiat suprema totam,
 18 picta Publius exprimit tabella,
 19 in qua tam similem videbis Issam,
 20 ut sit tam similis sibi nec ipsa.
 21 Issam denique pone cum tabella :
 22 aut utramque putabis esse veram,
 23 aut utramque putabis esse pictam.
- M1_110 v.1 Scribere me quereris, Velox, epigrammata longa.
 2 Ipse nihil scribis : tu breviora facis.
- M1_111 v.1 Cum tibi sit sophiae par fama et cura deorum,
 2 ingenio pietas nec minor ipsa tuo :
 3 ignorat meritis dare munera, qui tibi librum
 4 et qui mitatur, Regule, tura dari.
- M1_112 v.1 Cum te non nossem, dominum regemque vocabam ;
 2 nunc bene te novi : jam mihi Priscus eris.
- M1_113 v.1 Quaecumque lusi juvenis et puer quodam
 2 apinasque nostras, quas nec ipse jam novi,
 3 male conlocare si bonas voles horas
 4 et invidere otio tuo, lector,
 5 a Valeriano Pollio petes Quinto,
 6 per quem perire non licet meis nugis.

- M1_114 v.1 Hos tibi vicinos, Faustine, Telesphorus hortos
 2 Faenius et breve rus udaque prata tenet.
 3 Condidit hic natae cineres nomenque sacravit
 4 quod legis Antullae, dignior ipse legi.
 5 Ad Stygias aequum fuerat pater isset ut umbras :
 6 quod quia non licuit, vivat, ut ossa colat.
- M1_115 v.1 Quaedam me cupit," invide, Procille !"
 2 Loto candidior puella cycno,
 3 argento, nive, lilio, ligustro :
 4 sed quandam volo nocte nigriorem,
 5 formica, pice, graculo, cicada.
 6 Jam suspendia saeva cogitabas :
 7 si novi bene te, Procille, vives.
- M1_116 v.1 Hoc nemus aeterno cinerum sacravit honori
 2 Faenius et culti jugera pulchra soli.
 3 Hoc tegitur cito rapta suis Antulla sepulcro,
 4 hoc erit Antullae mixtus uterque parens.
 5 Si cupit hunc aliquis, moneo, ne speret agellum :
 6 perpetuo dominis serviet iste suis.
- M1_117 v.1 Occurris quotiens, Luperce, nobis,
 2 "Vis mittam puerum" subinde dicis,
 3 "cui tradas epigrammaton libellum,
 4 lectum quem tibi protinus remittam ?"
 5 Non est quod puerum, Luperce, vexes.
 6 Longum est, si velit ad Pirum venire,
 7 et scalis habito tribus, sed altis.
 8 Quod quaeris propius petas licebit.
 9 Argi nempe soles subire Letum :
 10 contra Caesaris est forum taberna
 11 scriptis postibus hinc et inde totis,
 12 omnis ut cito perlegas poetas :
 13 illinc me pete. Nec roges Atrectum -
 14 hoc nomen dominus gerit tabernae - ;
 15 de primo dabit alterove nido
 16 rasum pumice purpuraque cultum
 17 denaris tibi quinque Martialem.
 18 "Tanti non es" ais ? Sapis, Luperce.
- M1_118 v.1 Cui legisse satis non est epigrammata centum,
 2 nil illi satis est, Caediciane, mali.
- M2_1 v.1 Ter centena quidem poteras epigrammata ferre,
 2 sed quis te ferret perlegeretque, liber ?
 3 At nunc succincti quae sint bona disce libelli.
 4 Hoc primum est, brevior quod mihi charta perit ;
 5 deinde, quod haec una peragit librarius hora,
 6 nec tantum nugis serviet ille meis ;
 7 tertia res haec est, quod si cui forte legeris,
 8 sis licet usque malus, non odiosus eris.
 9 Te conviva leget mixto quincunce, sed ante
 10 incipiat positus quam tepuisse calix.
 11 Esse tibi tanta cautus brevitate videris ?
 12 Ei mihi, quam multis sic quoque longus eris !

- M2_2 v.1 Creta dedit magnum, majus dedit Africa nomen,
2 Scipio quod victor quodque Metellus habet ;
3 nobilius domito tribuit Germania Rheno,
4 et puer hoc dignus nomine, Caesar, eras.
5 Frater Idumaeos meruit cum patre triumphos :
6 quae datur ex Chattis laurea, tota tua est.
- M2_3 v.1 Sexte, nihil debes, nil debes, Sexte, fatemur :
2 debet enim, si quis solvere, Sexte, potest.
- M2_4 v.1 O quam blandus es, Ammiane, matri !
2 Quam blanda est tibi mater, Ammiane !
3 fratrem te vocat et soror vocatur.
4 Cur vos nomina nequiora tangunt ?
5 Quare non juvat hoc quod estis esse ?
6 Lusum creditis hoc jocumque ? Non est :
7 matrem, quae cupit esse se sororem,
8 nec matrem juvat esse nec sororem.
- M2_5 v.1 Ne valeam, si non totis, Deciane, diebus
2 et tecum totis noctibus esse velim.
3 Sed duo sunt quae nos disjungunt milia passum :
4 quattuor haec fiunt, cum rediturus eam.
5 Saepe domi non es ; cum sis quoque, saepe negaris :
6 vel tantum causis vel tibi saepe vacas.
7 Te tamen ut videam, duo milia non piget ire ;
8 ut te non videam, quattuor ire piget.
- M2_6 v.1 I nunc, edere me jube libellos.
2 Lectis vix tibi paginis duabus
3 spectas eschatocollion, Severe,
4 et longas trahis oscitationes.
5 Haec sunt, quae relegente me solebas
6 rapta exscribere, sed Vitellianis ;
7 haec sunt, singula quae sinu ferebas
8 per convivia cuncta, per theatra ;
9 haec sunt aut meliora si qua nescis.
10 Quid prodest mihi tam macer libellus,
11 nullo crassior ut sit umbilico,
12 si totus tibi triduo legatur ?
13 Numquam deliciae supiniore.
14 Lassus tam cito deficis viator,
15 et cum currere debeas Bovillas,
16 interjungere quaeris ad Camenas ?
17 I nunc, edere me jube libellos.
- M2_7 v.1 Declamas belle, causas agis, Attice, belle ;
2 historias bellas, carmina bella facis ;
3 componis belle mimos, epigrammata belle ;
4 bellus grammaticus, bellus es astrologus,
5 et belle cantas et saltas, Attice, belle ;
6 bellus es arte lyrae, bellus es arte pilae.
7 Nil bene cum facias, facias tamen omnia belle,
8 vis dicam quid sis ? Magnus es ardalio.

- M2_8 v.1 Si qua videbuntur chartis tibi, lector, in istis
 2 sive obscura nimis sive latina parum,
 3 non meus est error : nocuit librarius illis
 4 dum properat versus adnumerare tibi.
 5 Quod si non illum sed me peccasse putabis,
 6 tunc ego te credam cordis habere nihil.
 7 "Ista tamen mala sunt." Quasi nos manifesta negemus !
 8 Haec mala sunt, sed tu non meliora facis.
- M2_9 v.1 Scripsi, rescripsit nil Naevia, non dabit ergo.
 2 Sed puto quod scripsi legerat : ergo dabit.
- M2_10 v.1 Basia dimidio quod das mihi, Postume, labro,
 2 laudo : licet demas hinc quoque dimidium.
 3 Vis dare majus adhuc et inenarrabile munus ?
 4 Hoc tibi habe totum, Postume, dimidium.
- M2_11 v.1 Quod fronte Selium nubila vides, Rufe,
 2 quod ambulator porticum terit seram,
 3 lugubre quiddam quod tacet piger voltus,
 4 quod paene terram nasus indecens tangit,
 5 quod dextra pectus pulsat et comam vellit :
 6 non ille amici fata luget aut fratris,
 7 uterque natus vivit et precor vivat,
 8 salva est et uxor sarcinaeque servique,
 9 nihil colonus vilicusque decoxit.
 10 Maeroris igitur causa quae ? Domi cenat.
- M2_12 v.1 Esse quid hoc dicam quod olent tua basia murram
 2 quodque tibi est numquam non alienus odor ?
 3 Hoc mihi suspectum est, quod oles bene, Postume, semper :
 4 Postume, non bene olet qui bene semper olet.
- M2_13 v.1 Et iudex petit et petit patronus :
 2 solvas censeo, Sexte, creditori.
- M2_14 v.1 Nil intemptatum Selius, nil linquit inausum,
 2 cenandum quotiens jam videt esse domi.
 3 Currit ad Europen et te, Pauline, tuosque
 4 laudat Achilleos, sed sine fine, pedes.
 5 Si nihil Europe fecit, tunc Saeptha petuntur,
 6 si quid Phillyrides praestet et Aesonides.
 7 Hinc quoque deceptus Memphitica templa frequentat,
 8 adsidet et cathedris, maesta juvenca, tuis.
 9 Inde petit centum pendentia tecta columnis,
 10 illinc Pompei dona nemusque duplex ;
 11 nec Fortunati spernit nec balnea Fausti,
 12 nec Grylli tenebras Aeoliamque Lupi :
 13 nam thermis iterumque iterumque iterumque lavatur.
 14 Omnia cum fecit, sed renuente deo,
 15 lotus ad Europes tepidae buxeta recurrit,
 16 si quis ibi serum carpat amicus iter.
 17 Per te perque tuam, vector lascive, puellam,
 18 ad cenam Selium tu, rogo, taure, voca.
- M2_15 v.1 Quod nulli calicem tuum propinas

- 2 humane facis, Horne, non superbe.
- M2_16 v.1 Zoilus aegrotat : faciunt hanc stragula febrem.
2 Si fuerit sanus, cocchina quid facient ?
3 quid torus a Nilo, quid Sidone tinctus olenti ?
4 ostendit stultas quid nisi morbus opes ?
5 Quid tibi cum medicis ? Dimitte Machaonas omnis.
6 Vis fieri sanus ? Stragula sume mea.
- M2_17 v.1 Tonstrix Suburae faucibus sedet primis,
2 cruenta pendent qua flagella tortorum
3 Argique Letum multus obsidet sutor :
4 sed ista tonstrix, Ammiane, non tondet,
5 non tondet, inquam. Quid igitur facit ? Radit.
- M2_18 v.1 Capto tuam, pudet heu, sed capto, Maxime, cenam,
2 tu captas aliam : jam sumus ergo pares.
3 Mane salutatum venio, tu diceris isse
4 ante salutatum : jam sumus ergo pares.
5 Sum comes ipse tuus tumidique anteambulo regis,
6 tu comes alterius : jam sumus ergo pares.
7 Esse sat est servum, jam nolo vicarius esse.
8 Qui rex est regem, Maxime, non habeat.
- M2_19 v.1 Felicem fieri credis me, Zoile, cena ?
2 Felicem cena, Zoile, deinde tua ?
3 Debet Aricino conviva recumbere clivo,
4 quem tua felicem, Zoile, cena facit.
- M2_20 v.1 Carmina Paulus emit, recitat sua carmina Paulus.
2 Nam quod emas possis jure vocare tuum.
- M2_21 v.1 Basia das aliis, aliis das, Postume, dextram.
2 Dicis "Utrum mavis ? Elige." Malo manum.
- M2_22 v.1 Quid mihi vobiscum est, o Phoebe novemque sorores ?
2 ecce nocet vati Musa jocosa suo.
3 Dimidio nobis dare Postumus ante solebat
4 basia, nunc labro coepit utroque dare.
- M2_23 v.1 Non dicam, licet usque me rogetis,
2 qui sit Postumus in meo libello,
3 non dicam : quid enim mihi necesse est
4 has offendere basiationes,
5 quae se tam bene vindicare possunt ?
- M2_24 v.1 "Si det iniqua tibi tristem fortuna reatum,
2 squalidus haerebo pallidiorque reo :
3 si jubeat patria damnatum excedere terra,
4 per freta, per scopulos exulis ibo comes."
5 Dat tibi divitias : ecquid sunt ista duorum ?
6 Das partem ? Multum est ? Candide, das aliquid ?
7 Mecum eris ergo miser : quod si deus ore sereno
8 adnuerit, felix, Candide, solus eris.
- M2_25 v.1 Das numquam, semper promittis, Galla, roganti :
2 si semper fallis, jam rogo, Galla, nega.

- M2_26 v.1 Quod querulum spirat, quod acerbum Naevia tussit,
2 inque tuos mittit sputa subinde sinus,
3 jam te rem factam, Bithynice, credis habere ?
4 Erras : blanditur Naevia, non moritur.
- M2_27 v.1 Laudantem Selium cenae cum retia tendit
2 accipe, sive legas sive patronus agas :
3 "Effecte ! graviter ! cito ! nequiter ! euge ! beate !"
4 - "Hoc volui ! Facta est jam tibi cena, tace."
- M2_28 v.1 Rideto multum qui te, Sextille, cinaedum
2 dixerit et digitum porrigito medium.
3 Sed nec pedico es nec tu, Sextille, fututor,
4 calda Vetustinae nec tibi bucca placet.
5 Ex istis nihil es fateor, Sextille : quid ergo es ?
6 Nescio, sed tu scis res superesse duas.
- M2_29 v.1 Rufe, vides illum subsellia prima terentem,
2 cujus et hinc lucet sardonichata manus
3 quaeque Tyron totiens epotavere lacernae
4 et toga non tactas vincere jussa nives,
5 cujus olet toto pinguis coma Marcelliano
6 et splendent volso bracchia trita pilo,
7 non hesterna sedet lunata lingula planta,
8 cocchina non laesum pingit aluta pedem,
9 et numerosa linunt stellantem splenia frontem.
10 Ignoras quid sit ? Splenia tolle, leges.
- M2_30 v.1 Mutua viginti sestertia forte rogabam,
2 quae vel donanti non grave munus erat :
3 quippe rogabatur felixque vetusque sodalis
4 et cujus laxas arca flagellat opes.
5 Is mihi "Dives eris, si causas egeris" inquit.
6 Quod peto da, Gai : non peto consilium.
- M2_31 v.1 Saepe ego Chrestinam futui. Det quam bene quaeris ?
2 Supra quod fieri nil, Mariane, potest.
- M2_32 v.1 Lis mihi cum Balbo est, tu Balbum offendere non vis,
2 Pontice. Cum Licino est : hic quoque magnus homo est.
3 Vexat saepe meum Patrobas confinis agellum :
4 contra libertum Caesaris ire times.
5 Abnegat et retinet nostrum Laronia servum :
6 respondes "Orba est, dives, anus, vidua."
7 Non bene, crede mihi, servo servitur amico :
8 sit liber, dominus qui volet esse meus.
- M2_33 v.1 Cur non basio te, Philaeni ? Calva es.
2 Cur non basio te, Philaeni ? Rufa es.
3 Cur non basio te, Philaeni ? Lusca es.
4 Haec qui basiat, o Philaeni, fellat.
- M2_34 v.1 Cum placeat Phileros tota tibi dote redemptus,
2 tres pateris natos, Galla, perire fame.
3 Praestatur cano tanta indulgentia cunno
4 quem nec casta potest jam decuisse Venus.

- 5 Perpetuam di te faciant Philerotis amicam,
6 o mater, qua nec Pontia deterior.
- M2_35 v.1 Cum sint crura tibi similent quae cornua lunae,
2 in rhytio poteris, Phoebe, lavare pedes.
- M2_36 v.1 Flectere te nolim, sed nec turbare capillos ;
2 splendida sit nolo, sordida nolo cutis ;
3 nec mitratorum nec sit tibi barba reorum :
4 nolo virum nimium, Pannyche, nolo parum.
5 Nunc sunt crura pilis et sunt tibi pectora saetis
6 horrida, sed mens est, Pannyche, volsa tibi.
- M2_37 v.1 Quidquid ponitur hinc et inde verris,
2 mammae suminis imbricemque porci
3 communemque duobus attagenam,
4 mullum dimidium lupumque totum
5 muraenaeque latus femurque pulli
6 stillantemque alica sua palumbum.
7 Haec cum condita sunt madente mappa,
8 traduntur puero domum ferenda :
9 nos accumbimus otiosa turba.
10 Ullus si pudor est, reponere cenam :
11 cras te, Caeciliane, non vocavi.
- M2_38 v.1 Quid mihi reddat ager quaeris, Line, Nomentanus ?
2 Hoc mihi reddit ager : te, Line, non video.
- M2_39 v.1 Coccina famosae donas et ianthina moechae :
2 vis dare quae meruit munera ? Mitte togam.
- M2_40 v.1 Uri Tongilius male dicitur hemitritaeo.
2 Novi hominis fraudes : esurit atque sitit.
3 Subdola tenduntur crassis nunc retia turdis,
4 hamus et in mullum mittitur atque lupum.
5 Caecuba saccentur quaeque annus coxit Opimi,
6 condantur parco fusca Falerna vitro.
7 Omnes Tongilium medici jussere lavari :
8 o stulti, febrem creditis esse ? Gula est.
- M2_41 v.1 "Ride si sapis, o puella, ride"
2 Paelignus, puto, dixerat poeta :
3 sed non dixerat omnibus puellis.
4 Verum ut dixerit omnibus puellis,
5 non dixit tibi : tu puella non es,
6 et tres sunt tibi, Maxima, dentes,
7 sed plane piceique buxeique.
8 Quare si speculo mihi que credis,
9 debes non aliter timere risum,
10 quam ventum Spanius manumque Priscus,
11 quam cretata timet Fabulla nimum,
12 cerussata timet Sabella solem.
13 Voltus indue tu magis severos,
14 quam conjunx Priami nurusque major ;
15 mimos ridiculi Philistionis
16 et convivia nequiora vita
17 et quidquid lepida procacitate

- 18 laxat perspicuo labella risu.
 19 Te maestae decet adsidere matri
 20 lugentique virum piumve fratrem,
 21 et tantum tragicis vacare Musis.
 22 At tu iudicium secuta nostrum
 23 plora, si sapis, o puella, plora.
- M2_42 v.1 Zoile, quid solium subluto podice perdis ?
 2 Spurcius ut fiat, Zoile, merge caput.
- M2_43 v.1 Koina Philon haec sunt, haec sunt tua, Candide, Koina,
 2 quae tu magnilocus nocte dieque sonas :
 3 te Lacedaemonio velat toga lota Galaeso
 4 vel quam seposito de grege Parma dedit :
 5 at me, quae passa est furias et cornua tauri,
 6 noluerit dici quam pila prima suam.
 7 Misit Agenoreas Cadmi tibi terra lacernas :
 8 non vendes nummis coccina nostra tribus.
 9 Tu Libycos Indis suspendis dentibus orbis :
 10 fulcitur testa fagina mensa mihi.
 11 Inmodici tibi flava tegunt chrysendeta nulli :
 12 concolor in nostra, cammare, lance rubes.
 13 Grex tuus Iliaco poterat certare cinaedo :
 14 at mihi succurrit pro Ganymede manus.
 15 Ex opibus tantis veteri fidoque sodali
 16 das nihil et dicis, Candide, Koina philon ?
- M2_44 v.1 Emi seu puerum togamve pexam
 2 seu tres, ut puta, quattuorve libras,
 3 Sextus protinus ille fenerator,
 4 quem nostis veterem meum sodalem,
 5 ne quid forte petam timet cavetque,
 6 et secum, sed ut audiam, susurrat :
 7 "Septem milia debeo Secundo,
 8 Phoebos quattuor, undecim Phileto,
 9 et quadrans mihi nullus est in arca."
 10 O grande ingenium mei sodalis !
 11 Durum est, Sexte, negare, cum rogaris :
 12 quanto durius, antequam rogeris !
- M2_45 v.1 Quae tibi non stabat praecisa est mentula, Glypte.
 2 Demens, cum ferro quid tibi ? Gallus eras.
- M2_46 v.1 Florida per varios ut pingitur Hybla colores,
 2 cum breve Sicaniae ver populantur apes,
 3 sic tua subpositis conlucent prela lacernis,
 4 sic micat innumeris arcula synthesibus,
 5 atque unam vestire tribum tua candida possunt,
 6 Apula non uno quae grege terra tulit.
 7 Tu spectas hiemem succincti lentus amici
 8 pro scelus ! et lateris frigora trita tui.
 9 Quantum erat, infelix, pannis fraudare duobus -
 10 quid renuis ? - non te, Naevole, sed tineas ?
- M2_47 v.1 Subdola famosae moneo fuge retia moechae,
 2 levior o conchis, Galle, Cytheriacis.
 3 Confidis natibus ? Non est pedico maritus ;

- 4 quae faciat duo sunt : irrumat aut futuit.
- M2_48 v.1 Coponem laniumque balneumque,
 2 tonsorem tabulamque calculosque
 3 et paucos, sed ut eligam, libellos :
 4 unum non nimium rudem sodalem
 5 et grandem puerum diuque levem
 6 et caram puero meo puellam :
 7 haec praesta mihi, Rufe, vel Butuntis,
 8 et thermas tibi habe Neronianas.
- M2_49 v.1 Uxorem nolo Telesinam ducere : quare ?
 2 Moecha est. Sed pueris dat Telesina : volo.
- M2_50 v.1 Quod fellas et aquam potas, nil, Lesbia, peccas :
 2 qua tibi parte opus est, Lesbia, sumis aquam.
- M2_51 v.1 Unus saepe tibi tota denarius arca
 2 cum sit et hic culo tritior, Hylle, tuo,
 3 non tamen hunc pistor, non auferet hunc tibi copo,
 4 sed si quis nimio pene superbus erit.
 5 Infelix venter spectat convivium culi,
 6 et semper miser hic esurit, ille vorat.
- M2_52 v.1 Novit loturos Dasius numerare : poposcit
 2 mammosam Spatalen pro tribus ; illa dedit.
- M2_53 v.1 Vis fieri liber ? Mentiris, Maxime, non vis :
 2 sed fieri si vis, hac ratione potes.
 3 Liber eris, cenare foris si, Maxime, nolis,
 4 Veientana tuam si domat uva sitim,
 5 si ridere potes miseri chrysendeta Cinnae,
 6 contentus nostra si potes esse toga,
 7 si plebeia Venus gemino tibi vincitur asse,
 8 si tua non rectus tecta subire potes.
 9 Haec tibi si vis est, si mentis tanta potestas,
 10 liberior Partho vivere rege potes.
- M2_54 v.1 Quid de te, Line, suspicetur uxor
 2 et qua parte velit pudiciorem,
 3 certis indiciis satis probavit,
 4 custodem tibi quae dedit spadonem.
 5 Nil nasutius hac maligniusque.
- M2_55 v.1 Vis te, Sexte, coli : volebam amare.
 2 Parendum est tibi : quod jubes, coleris ;
 3 sed si te colo, Sexte, non amabo.
- M2_56 v.1 Gentibus in Libycis uxor tua, Galle, male audit
 2 inmodicae foedo crimine avaritiae.
 3 Sed mera narrantur mendacia : non solet illa
 4 accipere omnino. Quid solet ergo ? Dare.
- M2_57 v.1 Hic quem videtis gressibus vagis lentum,
 2 amethystinatus media qui secat Saepa,
 3 quem non lacernis Publius meus vincit,
 4 non ipse Cordus alpha paenulorum,

- 5 quem grex togatus sequitur et capillatus
6 recensque sella linteisque lorisque,
7 oppigneravit modo modo ad Cladi mensam
8 vix octo nummis anulum, unde cenaret.
- M2_58 v.1 Pexatus pulchre rides mea, Zoile, trita.
2 Sunt haec trita quidem, Zoile, sed mea sunt.
- M2_59 v.1 Mica vocor : quid sim cernis, cenatio parva :
2 ex me Caesareum prospicis ecce tholum.
3 Frange toros, pete vina, rosas cape, tinguere nardo :
4 ipse jubet mortis te meminisse deus.
- M2_60 v.1 Uxorem armati futuis, Puer Hylle, tribuni,
2 supplicium tantum dum puerile times.
3 Vae tibi ! Dum ludis, castrabere. Jam mihi dices
4 "Non licet hoc". Quid ? tu quod facis, Hylle, licet ?
- M2_61 v.1 Cum tibi vernarent dubia lanugine malae,
2 lambebat medios improba lingua viros.
3 Postquam triste caput fastidia vispillonum
4 et miseri meruit taedia carnificis,
5 uteris ore aliter nimiaque aerugine captus
6 adlatras nomen quod tibi cumque datur.
7 Haereat inguinibus potius tam noxia lingua :
8 nam cum fellaret, purior illa fuit.
- M2_62 v.1 Quod pectus, quod crura tibi, quod bracchia vellis,
2 quod cincta est brevibus mentula tonsa pilis,
3 hoc praestas, Labiene, tuae - quis nescit ? - amicae.
4 Cui praestas, culum quod, Labiene, pilas ?
- M2_63 v.1 Sola tibi fuerant sestertia, Miliche, centum,
2 quae tulit e sacra Leda redempta via.
3 Miliche, luxuria est si tanti dives amares.
4 "Non amo" jam dices : haec quoque luxuria est.
- M2_64 v.1 Dum modo causidicum, dum te modo rhetora fingis
2 et non decernis, Laure, quid esse velis,
3 Peleos et Priami transit et Nestoris aetas
4 et fuerat serum jam tibi desinere.
5 Incipe, tres uno perierunt rhetores anno,
6 si quid habes animi, si quid in arte vales.
7 Si schola damnatur, fora litibus omnia fervent,
8 ipse potest fieri Marsua causidicus.
9 Heia age, rumpe moras : quo te sperabimus usque ?
10 Dum quid sis dubitas, jam potes esse nihil.
- M2_65 v.1 Cur tristiozem cernimus Saleianum ?
2 "An causa levis est ?" inquis, "extuli uxorem."
3 O grande fati crimen ! O gravem casum !
4 Illa, illa dives mortua est Secundilla,
5 centena decies quae tibi dedit dotis ?
6 Nollem accidisset hoc tibi, Saleiane.
- M2_66 v.1 Unus de toto peccaverat orbe comarum
2 anulus, incerta non bene fixus acu :

- 3 hoc facinus Lalage speculo, quo viderat, ulta est,
4 et cecidit saevis icta Plecusa comis.
5 Desine jam, Lalage, tristes ornare capillos,
6 tangat et insanum nulla puella caput.
7 Hoc salamandra notet vel saeva novacula nudet,
8 ut digna speculo fiat imago tua.
- M2_67 v.1 Occurris quocumque loco mihi, Postume, clamas
2 protinus et prima est haec tua vox "Quid agis ?"
3 Hoc, si me decies una conveneris hora,
4 dicis : habes puto tu, Postume, nil quod agas.
- M2_68 v.1 Quod te nomine jam tuo saluto,
2 quem regem et dominum prius vocabam,
3 ne me dixeris esse contumacem :
4 totis pillea sarcinis redemi.
5 Reges et dominos habere debet
6 qui se non habet atque concupiscit
7 quod reges dominique concupiscunt.
8 Servom si potes, Ole, non habere,
9 et regem potes, Ole, non habere.
- M2_69 v.1 Invitum cenare foris te, Classice, dicis :
2 si non mentiris, Classice, dispeream.
3 Ipse quoque ad cenam gaudebat Apicius ire :
4 cum cenaret, erat tristior ille, domi.
5 Si tamen invitus vadis, cur, Classice, vadis ?
6 "Cogor" ais : verum est ; cogitur et Selius.
7 En rogat ad cenam Melior te, Classice, rectam :
8 grandia verba ubi sunt ? Si vir es, ecce, nega.
- M2_70 v.1 Non vis in solio prius lavari
2 quemquam, Cotile : causa quae, nisi haec est,
3 undis ne fovearis irrumatis ?
4 Primus te licet abluas : necesse est
5 ante hic mentula quam caput lavetur.
- M2_71 v.1 Candidius nihil est te, Caeciliane. Notavi,
2 si quando ex nostris disticha pauca lego,
3 protinus aut Marsi recitas aut scripta Catulli.
4 Hoc mihi das, tamquam deteriora legas,
5 ut conlata magis placeant mea ? Credimus istud :
6 malo tamen recites, Caeciliane, tua.
- M2_72 v.1 Hesterna factum narratur, Postume, cena
2 quod nollem - quis enim talia facta probet ? -
3 (Os tibi percisum quanto non ipse Latinus
4 vilia Panniculi percutit ora sono :
5 quodque magis mirum est, auctorem criminis hujus
6 Caecilium tota rumor in urbe sonat.
7 Esse negas factum : vis hoc me credere ? credo.
8 Quid quod habet testes, Postume, Caecilius ?
- M2_73 v.1 Quid faciat volt scire Lyris. Quid ? Sobria fellat.
- M2_74 v.1 Cinctum togatis post et ante Saufeium,
2 quanta reduci Regulus solet turba,

- 3 ad alta tonsum templa cum reum misit,
4 Materne, cernis ? Invidere nolito :
5 comitatus iste sit precor tuus numquam.
6 Hos illi amicos et greges togatorum
7 Fuficulus praestat et Faventinus.
- M2_75 v.1 Verbera securi solitus leo ferre magistri
2 insertamque pati blandus in ora manum
3 dedidicit pacem subito feritate reversa,
4 quanta nec in Libycis debuit esse jugis.
5 Nam duo de tenera puerilia corpora turba,
6 sanguineam rastris quae renovabat humum,
7 saevus et infelix furiali dente peremit :
8 Martia non vidit majus harena nefas.
9 Exclamare libet : "Crudelis, perfide, praedo,
10 a nostra pueris parcere disce lupa !"
- M2_76 v.1 Argenti libras Marius tibi quinque reliquit,
2 cui nihil ipse dabas : hic tibi verba dedit ?
- M2_77 v.1 Cosconi, qui longa putas epigrammata nostra,
2 utilis unguendis axibus essepotes.
3 Hac tu credideris longum ratione colosson
4 et puerum Bruti dixeris esse brevem.
5 Disce quod ignoras : Marsi doctique Pedonis
6 saepe duplex unum pagina tractat opus.
7 Non sunt longa quibus nihil est quod demere possis,
8 sed tu, Cosconi, disticha longa facis.
- M2_78 v.1 Aestivo serves ubi piscem tempore, quaeris ?
2 In thermis serva, Caeciliane, tuis.
- M2_79 v.1 Invitas tunc me cum scis, Nasica, vocasse.
2 Excusatum habeas me rogo : ceno domi.
- M2_80 v.1 Hostem cum fugeret, se Fannius ipse peremit.
2 Hic, rogo, non furor est, ne moriari, mori ?
- M2_81 v.1 Laxior hexaphoris tua sit lectica licebit :
2 cum tamen haec tua sit, Zoile, sandapila est.
- M2_82 v.1 Abscisa servom quid figis, Pontice, lingua ?
2 Nescis tu populum, quod tacet ille, loqui ?
- M2_83 v.1 Foedasti miserum, marite, moechum,
2 et se, qui fuerant prius, requirunt
3 trunci naribus auribusque voltus.
4 Credis te satis esse vindicatum ?
5 Erras : iste potest et irrumare.
- M2_84 v.1 Mollis erat facilisque viris Poeantius heros :
2 volnera sic Paridis dicitur ultra Venus.
3 Cur lingat cunnum Siculus Sertorius, hoc est :
4 abs hoc occisus, Rufe, videtur Eryx.
- M2_85 v.1 Vimine clausa levi niveae custodia coctae,
2 hoc tibi Saturni tempore munus erit.

- 3 Dona quod aestatis misi tibi mense Decembri
4 si quereris, rasam tu mihi mitte togam.
- M2_86 v.1 Quod nec carmine glorior supino
2 nec retro lego Sotaden cinaedum,
3 nusquam Graecula quod recantat echo
4 nec dictat mihi luculentus Attis
5 mollem debilitate galliambon,
6 non sum, Classice, tam malus poeta.
7 Quid si per gracilis vias petauri
8 invitum jubeas subire Ladan ?
9 Turpe est difficiles habere nugas
10 et stultus labor est ineptiarum.
11 Scribat carmina circulis Palaemon,
12 me raris juvat auribus placere.
- M2_87 v.1 Dicis amore tui bellas ardere puellas,
2 qui faciem sub aqua, Sexte, natantis habes.
- M2_88 v.1 Nil recitas et vis, Mamerce, poeta videri :
2 quidquid vis esto, dummodo nil recites.
- M2_89 v.1 Quod nimio gaudes noctem producere vino
2 ignosco : vitium, Gaure, Catonis habes.
3 Carmina quod scribis Musis et Apolline nullo
4 laudari debes : hoc Ciceronis habes.
5 Quod vomis, Antoni : quod luxuriaris, Apici.
6 Quod fellas, vitium dic mihi cujus habes ?
- M2_90 v.1 Quintiliane, vagae moderator summe juventae,
2 gloria Romanae, Quintiliane, togae,
3 vivere quod propero pauper nec inutilis annis,
4 da veniam : properat vivere nemo satis.
5 Differat hoc patrios optat qui vincere census
6 atriaque inmodicis artat imaginibus :
7 me focus et nigros non indignantia fumos
8 tecta juvant et fons vivus et herba rudis.
9 Sit mihi verna satur, sit non doctissima conjunx,
10 sit nox cum somno, sit sine lite dies.
- M2_91 v.1 Rerum certa salus, terrarum gloria, Caesar,
2 sospite quo magnos credimus esse deos,
3 si festinatis totiens tibi lecta libellis
4 detinuere oculos carmina nostra tuos,
5 quod fortuna vetat fieri permitte videri,
6 natorum genitor credar ut esse trium.
7 Haec, si displicui, fuerint solacia nobis ;
8 haec fuerint nobis praemia, si placui.
- M2_92 v.1 Natorum mihi jus trium roganti
2 Musarum pretium dedit mearum
3 solus qui poterat. Valebis, uxor :
4 non debet domini perire munus.
- M2_93 v.1 Primus ubi est" inquis "cum sit liber iste secundus ?"
2 Quid faciam, si plus ille pudoris habet ?
3 Tu tamen hunc fieri si mavis, Regule, primum,

4 unum de titulo tollere iota potes.

- M3_1 v.1 Hoc tibi quidquid id est longinquis mittit ab oris
2 Gallia Romanae nomine dicta togae.
3 Hunc legis et laudas librum fortasse priorem :
4 illa vel haec mea sunt, quae meliora putas.
5 Plus sane placeat domina qui natus in urbe est :
6 debet enim Gallum vincere verna liber.
- M3_2 v.1 Cujus vis fieri, libelle, munus ?
2 Festina tibi vindicem parare,
3 ne nigram cito raptus in culinam
4 cordylas madida tegas papyro
5 vel turis piperisve sis cucullus.
6 Faustini fugis in sinum ? Sapisti.
7 Cedro nunc licet ambules perunctus
8 et frontis gemino decens honore
9 pictis luxurieris umbilicis,
10 et te purpura delicata velet,
11 et cocco rubeat superbus index.
12 Illo vindice nec Probum timeto.
- M3_3 v.1 Formonsam faciem nigro medicamine celas,
2 sed non formonso corpore laedis aquas.
3 Ipsam crede deam verbis tibi dicere nostris :
4 "Aut aperi faciem, aut tu tunicata lava."
- M3_4 v.1 Romam vade, liber : si, veneris unde, requiret,
2 Aemiliae dices de regione viae ;
3 si, quibus in terris, qua simus in urbe, rogabit,
4 Corneli referas me licet esse Foro.
5 Cur absim, quaeret ; breviter tu multa fatere :
6 "Non poterat vanae taedia ferre togae."
7 "Quando venit ?" dicet ; tu respondeto : "Poeta
8 exierat : veniet, cum citharoedus erit."
- M3_5 v.1 Vis commendari sine me cursurus in urbem,
2 parve liber, multis ? An satis unus erit ?
3 Unus erit, mihi crede, satis, cui non eris hospes,
4 Julius, adsiduum nomen in ore meo.
5 Protinus hunc primae quaeres in limine Tectae :
6 quos tenuit Daphnis, nunc tenet ille lares.
7 Est illi conjunx, quae te manibusque sinuque
8 excipiet, tu vel pulverulentus eas.
9 Hos tu seu pariter sive hanc illumve priorem
10 videris, hoc dices "Marcus havere jubet",
11 et satis est. Alios commendet epistola : peccat
12 qui commendandum se putat esse suis.
- M3_6 v.1 Lux tibi post Idus numeratur tertia Maias,
2 Marcelline, tuis bis celebranda sacris.
3 Imputat aetherios ortus haec prima parenti,
4 libat florentes haec tibi prima genas.
5 Magna licet dederit jucundae munera vitae,

- 6 plus numquam patri praestitit ille dies.
- M3_7 v.1 Centum miselli jam valete quadrantibus,
2 anteambulonis congiarium lassi,
3 quos dividebat balneator elixus.
4 Quid cogitatis, o fames amicorum ?
5 Regis superbi sportulae recesserunt.
6 "Nihil stropharum est : jam salarium dandum est."
- M3_8 v.1 Thaida Quintus amat." "Quam Thaida ?" "Thaida luscam."
2 Unum oculum Thais non habet, ille duos.
- M3_9 v.1 Versiculos in me narratur scribere Cinna :
2 non scribit, cujus carmina nemo legit.
- M3_10 v.1 Constituit, Philomuse, pater tibi milia bina
2 menstrua perque omnis praestitit illa dies,
3 luxuriam premeret cum crastina semper egestas
4 et vitiis essent danda diurna tuis.
5 Idem te moriens heredem ex asse reliquit :
6 exheredavit te, Philomuse, pater.
- M3_11 v.1 Si tua nec Thais nec lusca est, Quinte, puella,
2 cur in te factum distichon esse putas ? -
3 Sed simile est aliquid. - Pro Laide Thaida dixi ?
4 Dic mihi, quid simile est Thais et Hermione ?
5 Tu tamen es Quintus : mutemus nomen amantis ;
6 si non volt Quintus, Thaida Sextus amet.
- M3_12 v.1 Unguentum, fateor, bonum dedisti
2 convivis here, sed nihil scidisti.
3 Res salsa est bene olere et esurire.
4 Qui non cenat et unguitur, Fabulle,
5 hic vere mihi mortuus videtur.
- M3_13 v.1 Dum non vis pisces, dum non vis carpere pullos
2 et plus quam putri, Naevia, parcis apro,
3 accusas rumpisque cocum, tamquam omnia cruda
4 attulerit. Numquam sic ego crudus ero.
- M3_14 v.1 Romam petebat esuritor Tuccius
2 profectus ex Hispania.
3 Occurrit illi sportularum fabula :
4 a ponte rediit Mulvio.
- M3_15 v.1 Plus credit nemo tota quam Cordus in urbe.
2 "Cum sit tam pauper, quomodo ?"Caecus amat.
- M3_16 v.1 Das gladiatores, sutorum regule, Cerdo,
2 quodque tibi tribuit subula, sica rapit.
3 Ebrius es : neque enim faceres hoc sobrius umquam,
4 ut velles corio ludere, Cerdo, tuo.
5 Lusisti corio : sed te, mihi crede, memento
6 nunc in pellicula, Cerdo, tenere tua.
- M3_17 v.1 Circumlata diu mensis scribilita secundis
2 urebat nimio saeva calore manus ;

- 3 sed magis ardebat Sabidi gula : protinus ergo
 4 sufflavit buccis terque quaterque suis.
 5 Illa quidem tepuit digitosque admittere visa est,
 6 sed nemo potuit tangere : merda fuit.
- M3_18 v.1 Perfrixisse tuas questa est praefatio fauces :
 2 cum te excusaris, Maxime, quid recitas ?
- M3_19 v.1 Proxima centenis ostenditur ursa columnis,
 2 exornant fictae qua platanona ferae.
 3 Hujus dum patulos adludens temptat hiatus
 4 pulcher Hylas, teneram mersit in ora manum :
 5 vipera sed caeco scelerata latebat in aere
 6 vivebatque anima deteriore fera.
 7 Non sensit puer esse dolos, nisi dente recepto
 8 dum perit. O facinus, falsa quod ursa fuit !
- M3_20 v.1 Dic, Musa, quid agat Canius meus Rufus :
 2 utrumque chartis tradit ille victuris
 3 legenda temporum acta Claudianorum,
 4 an quae Neroni falsus adstruit scriptor ?
 5 An aemulatur inprobi jocos Phaedri ?
 6 Lascivus elegis an severus herois ?
 7 An in cothurnis horridus Sophocleis ?
 8 An otiosus in schola poetarum
 9 lepore tinctos Attico sales narrat ?
 10 Hinc si recessit, porticum terit templi
 11 an spatia carpit lentus Argonautarum ?
 12 an delicatae sole rursus Europae
 13 inter tepentes post meridiem buxos
 14 sedet ambulatve liber acribus curis ?
 15 Titine thermis an lavatur Agrippae
 16 an inpudici balneo Tigillini ?
 17 An rure Tulli fruitur atque Lucani ?
 18 An Pollionis dulce currit ad quartum ?
 19 An aestuantis jam profectus ad Baias
 20 piger Lucrino nauculatur in stagno ?
 21 "Vis scire quid agat Canius tuus ? Ridet."
- M3_21 v.1 Proscriptum famulus servavit fronte notatus :
 2 non fuit haec domini vita, sed invidia.
- M3_22 v.1 Dederas, Apici, bis trecenties ventri,
 2 sed adhuc supererat centies tibi laxum.
 3 Hoc tu gravatus ut famem et sitim ferre,
 4 summa venenum potione perduxti.
 5 Nihil est, Apici, tibi gulosius factum.
- M3_23 v.1 Omnia cum retro pueris obsonia tradas,
 2 cur non mensa tibi ponitur a pedibus ?
- M3_24 v.1 Vite nocens rosa stabat moriturus ad aras
 2 hircus, Bacche, tuis victima grata focus ;
 3 quem Tuscus mactare deo cum vellet aruspex,
 4 dixerat agresti forte rudique viro
 5 ut cito testiculos et acuta falce secaret,
 6 taeter ut imundae carnis abiret odor.

- 7 Ipse super virides aras luctantia pronus
8 dum resecat cultro colla premitque manu,
9 ingens iratis apparuit hirnea sacris.
10 Occupat hanc ferro rusticus atque secat,
11 hoc ratus antiquos sacrorum poscere ritus
12 talibus et fibris numina prisca coli.
13 Sic, modo qui Tuscus fueras, nunc Gallus aruspex,
14 dum jugulas hircum, factus es ipse caper.
- M3_25 v.1 Si temperari balneum cupis fervens,
2 Faustine, quod vix Julianus intraret,
3 roga lavetur rhetorem Sabineium :
4 Neronianas is refrigerat thermas.
- M3_26 v.1 Praedia solus habes et solus, Candide, nummos,
2 aurea solus habes, murrina solus habes,
3 Massica solus habes et Opimi Caecuba solus,
4 et cor solus habes, solus et ingenium.
5 Omnia solus habes (nec me puta velle negare)
6 uxorem sed habes, Candide, cum populo.
- M3_27 v.1 Numquam me revocas, venias cum saepe vocatus :
2 ignosco, nullum si modo, Galle, vocas.
3 Invitas alios : vitium est utriusque. "Quod ?" inquis.
4 Et mihi cor non est et tibi, Galle, pudor.
- M3_28 v.1 Auriculam Mario graviter miraris olere.
2 Tu facis hoc : garris, Nestor, in auriculam.
- M3_29 v.1 Has cum gemina compede dedicat catenas,
2 Saturne, tibi Zoilus, anulos priores.
- M3_30 v.1 Sportula nulla datur ; gratis conviva recumbis :
2 dic mihi, quid Romae, Gargiliane, facis ?
3 Unde tibi togula est et fuscae pensio cellae ?
4 unde datur quadrans ? unde vir es Chiones ?
5 Cum ratione licet dicas te vivere summa,
6 quod vivis, nulla cum ratione facis.
- M3_31 v.1 Sunt tibi, confiteor, diffusi jugera campi,
2 urbanique tenent praedia multa lares,
3 et servit dominae numerosus debitor arcae,
4 sustentatque tuas aurea massa dapes.
5 Fastidire tamen noli, Rufine, minores :
6 plus habuit Didymos, plus Philomelus habet.
- M3_32 v.1 An possim vetulam quaeris, Matrinia : possum
2 et vetulam, sed tu mortua, non vetula es :
3 possum Hecubam, possum Niobam, Matrinia, sed si
4 nondum erit illa canis, nondum erit illa lapis.
- M3_33 v.1 Ingenuam malo, sed si tamen illa negetur,
2 libertina mihi proxuma condicio est.
3 Extremo est ancilla loco : sed vincet utramque,
4 si facie nobis haec erit ingenua.
- M3_34 v.1 Digna tuo cur sis indignaque nomine, dicam.

- 2 Frigida es et nigra es : non es et es Chione.
- M3_35 v.1 Artis Phidiacae toreuma clarum
 2 pisces aspicias : adde aquam, natabunt.
- M3_36 v.1 Quod novus et nuper factus tibi praestat amicus,
 2 hoc praestare jubes me, Fabiane, tibi :
 3 horridus ut primo semper te mane salutem
 4 per mediumque trahat me tua sella lutum,
 5 lassus ut in thermas decuma vel serius hora
 6 te sequar Agrippae, cum laver ipse Titi.
 7 Hoc per triginta merui, Fabiane, Decembres,
 8 ut sim tiro tuae semper amicitiae ?
 9 Hoc merui, Fabiane, toga tritaque meaque,
 10 ut nondum credas me meruisse rudem ?
- M3_37 v.1 Irasci tantum felices nostis amici.
 2 Non belle facitis, sed juvat hoc : facite.
- M3_38 v.1 Quae te causa trahit vel quae fiducia Romam,
 2 Sexte ? Quid aut speras aut petis inde ? refer.
 3 "Causas" inquis "agam Cicerone disertior ipso
 4 atque erit in triplici par mihi nemo foro."
 5 Egit Atestinus causas et Civis - utrumque
 6 noras - ; sed neutri pensio tota fuit.
 7 "Si nihil hinc veniet, pangentur carmina nobis :
 8 audieris, dices esse Maronis opus."
 9 Insanis : omnes gelidis quicumque lacernis
 10 sunt tibi, Nasones Vergiliosque vides.
 11 "Atria magna colam."Vix tres aut quattuor ista
 12 res aluit ; pallet cetera turba fame.
 13 "Quid faciam ? Suade : nam certum est vivere Romae."
 14 Si bonus es, casu vivere, Sexte, potes.
- M3_39 v.1 Iliaco similem puerum, Faustine, ministro
 2 lusca Lycoris amat. Quam bene lusca videt !
- M3_40 v.1 Inserta phialae Mentoris manu ducta
 2 lacerta vivit et timetur argentum.
- M3_41 v.1 Mutua quod nobis ter quinquagena dedisti
 2 ex opibus tantis, quas gravis arca premit,
 3 esse tibi magnus, Telesine, videris amicus.
 4 Tu magnus, quod das ? Immo ego, quod recipis.
- M3_42 v.1 Lomento rugas uteri quod condere temptas,
 2 Polla, tibi ventrem, non mihi labra linis.
 3 Simpliciter pateat vitium fortasse pusillum :
 4 quod tegitur, majus creditur esse malum.
- M3_43 v.1 Mentiris juvenem tinctis, Laetine, capillis,
 2 tam subito corvus, qui modo cycnus eras.
 3 Non omnes fallis ; scit te Proserpina canum :
 4 personam capiti detrahet illa tuo.
- M3_44 v.1 Occurrit tibi nemo quod libenter
 2 quod, quacumque venis, fuga est et ingens

- 3 circa te, Ligurine, solitudo,
4 quid sit, scire cupis ? Nimis poeta es.
5 Hoc valde vitium periculosum est.
6 Non tigris catulis citata raptis,
7 non dipsas medio perusta sole,
8 nec sic scorpios improbus timetur.
9 Nam tantos, rogo, quis ferat labores ?
10 Et stanti legis et legis sedenti,
11 currenti legis et legis cacanti.
12 In thermas fugio : sonas ad aurem.
13 Piscinam peto : non licet natate.
14 Ad cenam propero : tenes euntem.
15 Ad cenam venio : fugas edentem.
16 Lassus dormio : suscitatas jacentem.
17 Vis, quantum facias mali, videre ?
18 Vir justus, probus, innocens timeris.
- M3_45 v.1 Fugerit an Phoebus mensas cenamque Thyestae
2 ignoro : fugimus nos, Ligurine, tuam.
3 Illa quidem lauta est dapibusque instructa superbis,
4 sed nihil omnino te recitante placet.
5 Nolo mihi ponas rhombos mullumve bilibrem
6 nec volo boletos, ostrea nolo : tace.
- M3_46 v.1 Exigis a nobis operam sine fine togatam :
2 non eo, libertum sed tibi mitto meum.
3 "Non est" inquis "idem." Multo plus esse probabo :
4 vix ego lecticam subsequar, ille feret.
5 In turbam incideris, cunctos umbone repellat :
6 invalidum est nobis ingenuumque latus.
7 Quidlibet in causa narraveris, ipse tacebo :
8 at tibi tergeminum mugiet ille sophos.
9 Lis erit, ingenti faciet convicia voce :
10 esse pudor vetuit fortia verba mihi.
11 "Ergo nihil nobis" inquis "praestabis amicus ?"
12 Quidquid libertus, Candide, non poterit.
- M3_47 v.1 Capena grandi porta qua pluit gutta
2 Phrygiumque Matris Almo qua lavat ferrum,
3 Horatiorum qua viret sacer campus
4 et qua pusilli fervet Herculis fanum,
5 Faustine, plena Bassus ibat in reda,
6 omnis beati copias trahens ruris.
7 Illic videres frutice nobili caules
8 et utrumque porrum sessilesque lactucas
9 pigroque ventri non inutiles betas ;
10 illic coronam pinguibus gravem turdis
11 leporemque laesum Gallici canis dente
12 nondumque victa lacteum faba porcum ;
13 nec feriatas ibat ante carrucam,
14 sed tuta faeno cursor ova portabat.
15 Urbem petebat Bassus ? Immo rus ibat.
- M3_48 v.1 Pauperis extruxit cellam, sed vendidit Olus
2 praedia : nunc cellam pauperis Olus habet.
- M3_49 v.1 Veientana mihi misces, ubi Massica potas :

- 2 olfacere haec malo pocula quam bibere.
- M3_50 v.1 Haec tibi, non alia, est ad cenam causa vocandi,
 2 versiculos recites ut, Ligurine, tuos.
 3 Deposui soleas, adfertur protinus ingens
 4 inter lactucas oxygarumque liber :
 5 alter perlegitur, dum fercula prima morantur :
 6 tertius est, nec adhuc mensa secunda venit :
 7 et quartum recitas et quintum denique librum.
 8 Putidus est, totiens si mihi ponis aprum.
 9 Quod si non scombris scelerata poemata donas,
 10 cenabis solus jam, Ligurine, domi.
- M3_51 v.1 Cum faciem laudo, cum miror crura manusque,
 2 dicere, Galla, soles "Nuda placebo magis",
 3 et semper vitas communia balnea nobis.
 4 Numquid, Galla, times ne tibi non placeam ?
- M3_52 v.1 Empta domus fuerat tibi, Tongiliane, ducentis :
 2 abstulit hanc nimium casus in urbe frequens.
 3 Conlatum est deciens. Rogo, non potes ipse videri
 4 incendisse tuam, Tongiliane, domum ?
- M3_53 v.1 Et voltu poteram tuo carere
 2 et collo manibusque cruribusque
 3 et mammis natibusque clunibusque,
 4 et, ne singula persequi laborem,
 5 tota te poteram, Chloe, carere.
- M3_54 v.1 Cum dare non possim quod poscis, Galla, rogantem,
 2 multo simplicius, Galla, negare potes.
- M3_55 v.1 Quod, quacumque venis, Cosmum migrare putamus
 2 et fluere excusso cinnama fusa vitro,
 3 nolo peregrinis placeas tibi, Gellia, nugis.
 4 Scis, puto, posse meum sic bene olere canem.
- M3_56 v.1 Sit cisterna mihi quam vinea malo Ravennae,
 2 cum possim multo vendere pluris aquam.
- M3_57 v.1 Callidus imposuit nuper mihi copo Ravennae :
 2 cum peterem mixtum, vendidit ille merum.
- M3_58 v.1 Baiana nostri villa, Basse, Faustini
 2 non otiosis ordinata myrtetis
 3 viduaque platano tonsilique buxeto
 4 ingrata lati spatia detinet campi,
 5 sed rure vero barbaroque laetatur.
 6 Hic farta premitur angulo Ceres omni
 7 et multa fragrat testa senibus autumnis ;
 8 hic post Novembres imminente jam bruma
 9 seras putator horridus refert uvas.
 10 Truces in alta valle mugiant tauri
 11 vitulusque inermi fronte prurit in pugnam.
 12 Vagatur omnis turba sordidae chortis,
 13 argutus anser gemmeique pavones
 14 nomenque debet quae rubentibus pinnis

- 15 et picta perdix Numidicaeque guttatae
 16 et impiorum phasiana Colchorum ;
 17 Rhodias superbi feminas premunt galli ;
 18 sonantque turres plausibus columbarum,
 19 gemit hinc palumbus, inde cereus turtur.
 20 Avidi secuntur vilicae sinum porci
 21 matremque plenam mollis agnus expectat.
 22 Cingunt serenum lactei focum verna
 23 et larga festos lucet ad lares silva.
 24 Non segnis albo pallet otio caupo,
 25 nec perdit oleum lubricus palaestrita,
 26 sed tendit avidis rete subdolum turdis
 27 tremulave captum linea trahit piscem
 28 aut inpeditam cassibus refert dammam.
 29 Exercet hilares facilis hortus urbanus,
 30 et paedagogo non jubente lascivi
 31 parere gaudent vilico capillati,
 32 et delicatus opere fruitur eunuchus.
 33 Nec venit inanis rusticus salutator :
 34 fert ille ceris cana cum suis mella
 35 metamque lactis Sassinate de silva ;
 36 somniculosos ille porrigit glires,
 37 hic vagientem matris hispidae fetum,
 38 alius coactos non amare capones ;
 39 et dona matrum vimine offerunt texto
 40 grandes proborum virgines colonorum.
 41 Facto vocatur laetus opere vicinus ;
 42 nec avara servat crastinas dapes mensa :
 43 vescuntur omnes ebrioque non novit
 44 satur minister invidere convivae.
 45 At tu sub urbe possides famem mundam
 46 et turre ab alta prospicis meras laurus,
 47 furem Priapo non timente securus ;
 48 et vinitorem farre pascis urbano
 49 pictamque portas otiosus ad villam
 50 holus, ova, pullos, poma, caseum, mustum.
 51 Rus hoc vocari debet, an domus longe ?
- M3_59 v.1 Sutor Cerdo dedit tibi, culta Bononia, munus,
 2 fullo dedit Mutinae : nunc ubi copo dabit ?
- M3_60 v.1 Cum vocer ad cenam non jam venalis ut ante,
 2 cur mihi non eadem quae tibi cena datur ?
 3 Ostrea tu sumis stagno saturata Lucrino,
 4 sugitur inciso mitulus ore mihi ;
 5 sunt tibi boleti, fungos ego sumo suillos ;
 6 res tibi cum rhombo est, at mihi cum sparulo.
 7 Aureus inmodicis turtur te clunibus implet,
 8 ponitur in cavea mortua pica mihi.
 9 Cur sine te ceno cum tecum, Pontice, cenem ?
 10 Sportula quod non est prosit : edamus idem.
- M3_61 v.1 Esse nihil dicis quidquid petis, inprobe Cinna :
 2 si nil, Cinna, petis, nil tibi, Cinna, nego.
- M3_62 v.1 Centenis quod emis pueros et saepe ducenis,
 2 quod sub rege Numa condita vina bibis,

- 3 quod constat decies tibi non spatiosa supellex,
 4 libra quod argenti milia quinque rapit,
 5 aurea quod fundi pretio carruca paratur,
 6 quod pluris mula est quam domus empta tibi :
 7 haec animo credis magno te, Quinte, parare ?
 8 Falleris : haec animus, Quinte, pusillus emit.
- M3_63 v.1 Cotile, bellus homo es : dicunt hoc, Cotile, multi.
 2 Audio : sed quid sit, dic mihi, bellus homo ?
 3 "Bellus homo est, flexos qui digerit ordine crines,
 4 balsama qui semper, cinnama semper olet ;
 5 cantica qui Nili, qui Gaditana susurrat,
 6 qui movet in varios bracchia volsa modos ;
 7 inter femineas tota qui luce cathedras
 8 desidet atque aliqua semper in aure sonat ;
 9 qui legit hinc illinc missas scribitque tabellas ;
 10 pallia vicini qui refugit cubiti ;
 11 qui scit quam quis amet, qui per convivia currit,
 12 Hirpini veteres qui bene novit avos."
 13 Quid narras ? hoc est, hoc est homo, Cotile, bellus ?
 14 Res pertriosa est, Cotile, bellus homo.
- M3_64 v.1 Sirenas hilarem navigantium poenam
 2 blandasque mortes gaudiumque crudele,
 3 quas nemo quondam deserebat auditas,
 4 fallax Ulixes dicitur reliquisse.
 5 Non miror : illud, Cassiane, mirarer,
 6 si fabulantem Canium reliquisset.
- M3_65 v.1 Quod spirat tenera malum mordente puella,
 2 quod de Corycio quae venit aura croco ;
 3 vinea quod primis cum floret cana racemis,
 4 gramina quod redolent, quae modo carpsit ovis ;
 5 quod myrtus, quod messor Arabs, quod sucina trita,
 6 pallidus Eoo ture quod ignis olet ;
 7 gleba quod aestivo leviter cum spargitur imbre,
 8 quod madidas nardo passa corona comas :
 9 hoc tua, saeve puer Diadumene, basia fragrant.
 10 Quid si tota dares illa sine invidia ?
- M3_66 v.1 Par scelus admisit Phariis Antonius armis :
 2 abscidit voltus ensis uterque sacros.
 3 Illud, laurigeros ageres cum laeta triumphos,
 4 hoc tibi, Roma, caput, cum loquereris, erat.
 5 Antoni tamen est pejor quam causa Pothini :
 6 hic facinus domino praestitit, ille sibi.
- M3_67 v.1 Cessatis, pueri, nihilque nostis,
 2 Vaterno Rasinaque pigriores,
 3 quorum per vada tarda navigantes
 4 lentos tinguitis ad celeuma remos.
 5 Jam pronos Phaetonte sudat Aethon
 6 exarsitque dies et hora lassos
 7 interjungit equos meridiana :
 8 at vos tam placidas vagi per undas
 9 tuta luditis otium carina.
 10 Non nautas puto vos, sed Argonautas.

- M3_68 v.1 Huc est usque tibi scriptus, matrona, libellus.
 2 Cui sint scripta rogas interiora ? Mihi.
 3 Gymnasium, thermas, stadium est hac parte : recede.
 4 Exuimur : nudos parce videre viros.
 5 Hinc jam deposito post vina rosasque pudore,
 6 quid dicat nescit saucia Terpsichore :
 7 schemate nec dubio, sed aperte nominat illam
 8 quam recipit sexto mense superba Venus,
 9 custodem medio statuit quam vilicus horto,
 10 opposita spectat quam proba virgo manu.
 11 Si bene te novi, longum jam lassa libellum
 12 ponebas, totum nunc studiosa leges.
- M3_69 v.1 Omnia quod scribis castis epigrammata verbis
 2 inque tuis nulla est mentula carminibus,
 3 admiror, laudo ; nihil est te sanctius uno :
 4 at mea luxuria pagina nulla vacat.
 5 Haec igitur nequam juvenes facilesque puellae,
 6 haec senior, sed quem torquet amica, legat :
 7 at tua, Cosconi, venerandaque sanctaque verba
 8 a pueris debent virginibusque legi.
- M3_70 v.1 Moechus es Aufidiae, qui vir, Scaevine, fuisti ;
 2 rivalis fuerat qui tuus, ille vir est.
 3 Cur aliena placet tibi, quae tua non placet, uxor ?
 4 Numquid securus non potes arrigere ?
- M3_71 v.1 Mentula cum doleat puero, tibi, Naevole, culus,
 2 non sum divinus, sed scio quid facias.
- M3_72 v.1 Vis futui nec vis mecum, Saufeia, lavari :
 2 nescio quod magnum suspicor esse nefas.
 3 Aut tibi pannosae dependent pectore mammae
 4 aut sulcos uteri prodere nuda times
 5 aut infinito lacerum patet inguen hiatus
 6 aut aliquid cunni prominet ore tui.
 7 Sed nihil est horum, credo, pulcherrima nuda es.
 8 Si verum est, vitium pejus habes : fatua es.
- M3_73 v.1 Dormis cum pueris mutuniatis,
 2 et non stat tibi, Phoebe, quod stat illis.
 3 Quid vis me, rogo, Galle, suspicari ?
 4 Mollem credere te virum volebam,
 5 sed rumor negat esse te cinaedum.
- M3_74 v.1 Psilothro faciem levas et dropace calvam :
 2 numquid tonsorem, Gargiliane, times ?
 3 Quid facient ungues ? Nam certe non potes illos
 4 resina Veneto nec resecare luto.
 5 Desine, si pudor est, miseram traducere calvam :
 6 hoc fieri cunno, Gargiliane, solet.
- M3_75 v.1 Stare, Luperce, tibi jam pridem mentula desit,
 2 luctaris demens tu tamen arrigere.
 3 Sed nihil erucae faciunt bulbique salaces,
 4 improba nec prosunt jam satureia tibi.

- 5 Coepisti puras opibus corrumpere buccas :
6 sic quoque non vivit sollicitata Venus.
7 Mirari satis hoc quisquam vel credere possit,
8 quod non stat, magno stare, Luperce, tibi ?
- M3_76 v.1 Arrigis ad vetulas, fastidis, Basse, puellas,
2 nec formonsa tibi, sed moritura placet.
3 Hic, rogo, non furor est, non haec est mentula demens ?
4 Cum possis Hecaben, non potes Andromachen !
- M3_77 v.1 Nec mullus nec te delectat, Baetice, turdus,
2 nec lepus est umquam nec tibi gratus aper ;
3 nec te liba juvant nec sectae quadra placentae,
4 nec Libye mittit nec tibi Phasis aves :
5 capparin et putri cepas allece natantis
6 et pulpam dubio de petasone voras,
7 teque juvant gerres et pelle melandrya cana ;
8 resinata bibis vina, Falerna fugis.
9 Nescio quod stomachi vitium secretius esse
10 suspicor : ut quid enim, Baetice, saprophagis ?
- M3_78 v.1 Minxisti currente semel, Pauline, carina.
2 Meiere vis iterum ? Jam Palinurus eris.
- M3_79 v.1 Rem peragit nullam Sertorius, inchoat omnes :
2 hunc ego, cum futuit, non puto perficere.
- M3_80 v.1 De nullo quereris, nulli maledicis, Apici :
2 rumor ait linguae te tamen esse malae.
- M3_81 v.1 Quid cum femineo tibi, Baetice galle, barathro ?
2 Haec debet medios lambere lingua viros.
3 Abscisa est quare Samia tibi mentula testa,
4 si tibi tam gratus, Baetice, cunnus erat ?
5 Castrandum caput est : nam sis licet inguine gallus,
6 sacra tamen Cybeles decipis : ore vir es.
- M3_82 v.1 Conviva quisquis Zoili potest esse,
2 Summemmianas cenet inter uxores
3 curtaque Ladae sobrius bibat testa :
4 hoc esse levius puriusque contendo.
5 Jacet occupato galbinatus in lecto
6 cubitisque trudit hinc et inde convivas
7 effultus ostro Sericisque pulvillis.
8 Stat exoletus suggeritque ructanti
9 pinnas rubentes cuspidisque lentisci,
10 et aestuanti tenue ventilat frigus
11 supina prasino concubina flabello,
12 fugatque muscas myrtea puer virga.
13 Percurrit agili corpus arte tractatrix
14 manumque doctam spargit omnibus membris ;
15 digiti crepantis signa novit eunuchus
16 et delicatae sciscitator urinae
17 domini bibentis ebrium regit penem.
18 At ipse retro flexus ad pedum turbam
19 inter catellas anserum exta lambentis
20 partitur apri glandulas palaestritis

- 21 et concubino turturum natis donat ;
 22 Ligurumque nobis saxa cum ministrentur
 23 vel cocta fumis musta Massilitanis,
 24 Opimianum morionibus nectar
 25 crystallinisque murrinisque propinat ;
 26 et Cosmianis ipse fusus ampullis
 27 non erubescit murice aureo nobis
 28 dividere moechae pauperis capillare.
 29 Septunce multo deinde perditus stertit :
 30 non accubamus et silentium rhonchis
 31 praestare jussi nutibus propinamus.
 32 Hoc Malchionis patimur inprobi fastus,
 33 nec vindicari, Rufe, possumus : fellat.
- M3_83 v.1 Ut faciam breviora mones epigrammata, Corde.
 2 "Fac mihi quod Chione" : non potui brevius.
- M3_84 v.1 Quid narrat tua moecha ? Non puellam
 2 dixi, Gongylion. Quid ergo ? Linguam.
- M3_85 v.1 Quis tibi persuasit naris abscidere moecho ?
 2 non hac peccatum est parte, marite, tibi.
 3 Stulte, quid egisti ? Nihil hic tibi perdidit uxor,
 4 cum sit salva tui mentula Deiphobi.
- M3_86 v.1 Ne legeres partem lascivi, casta, libelli,
 2 praedixi et monui : tu tamen, ecce, legis.
 3 Sed si Panniculum spectas et, casta, Latinum,
 4 (non sunt haec mimis improbiora,) lege.
- M3_87 v.1 Narrat te rumor, Chione, numquam esse fututam
 2 atque nihil cunno purius esse tuo.
 3 Tecta tamen non hac, qua debes, parte lavaris :
 4 si pudor est, transfer subligar in faciem.
- M3_88 v.1 Sunt gemini fratres, diversa sed inguina lingunt :
 2 dicite, dissimiles sunt magis an similes ?
- M3_89 v.1 Utere lactucis et mollibus utere malvis :
 2 nam faciem durum, Phoebe, cacantis habes.
- M3_90 v.1 Volt, non volt dare Galla mihi ; nec dicere possum,
 2 quod volt et non volt, quid sibi Galla velit.
- M3_91 v.1 Cum peteret patriae missicius arva Ravennae,
 2 semiviro Cybeles cum grege junxit iter.
 3 Huic comes haerebat domini fugitivus Achillas
 4 insignis forma nequitiaque puer.
 5 Hoc steriles sensere viri : qua parte cubaret
 6 quaerunt. Sed tacitos sensit et ille dolos :
 7 mentitur, credunt. Somni post vina petuntur :
 8 continuo ferrum noxia turba rapit
 9 exciduntque senem spondae qui parte jacebat ;
 10 namque puer pluteo vindice tutus erat.
 11 Subpositam quondam fama est pro virgine cervam,
 12 at nunc pro cervo mentula subposita est.

- M3_92 v.1 Ut patiar moechum rogat uxor, Galle, sed unum.
2 Huic ego non oculos eruo, Galle, duos ?
- M3_93 v.1 Cum tibi trecenti consules, Vetustilla,
2 et tres capilli quattuorque sint dentes,
3 pectus cicadae, crus colorque formicae ;
4 rugosiore cum geras stola frontem
5 et araneorum cassibus pares mammas ;
6 cum comparata rictibus tuis ora
7 Niliacus habeat corcodilus angusta,
8 meliusque ranae garriant Ravennates,
9 et Atrianus dulcius culix cantet,
10 videasque quantum noctuae vident mane,
11 et illud oleas quod viri capellarum,
12 et anatis habeas orthopygium macrae,
13 senemque Cynicum vincat osseus cunnus ;
14 cum te lucerna balneator extincta
15 admittat inter bustuarias moechas ;
16 cum bruma mensem sit tibi per Augustum
17 regelare nec te pestilentia possit :
18 audes ducentas nuptuire post mortes
19 virumque demens cineribus tuis quaeris
20 prurire. Quid si Sattiae velit saxum ?
21 Quis conjugem te, quis vocabit uxorem,
22 Philomelus aviam quam vocaverat nuper ?
23 Quod si cadaver exiget tuum scalpi,
24 sternatur Acori de triclinio lectus,
25 halassionem qui tuum decet solus,
26 tustorque taedas praeferat novae nuptae :
27 intrare in istum sola fax potest cunnum.
- M3_94 v.1 Esse negas coctum leporem poscisque flagella.
2 Mavis, Rufe, cocum scindere quam leporem.
- M3_95 v.1 Numquam dicis have sed reddis, Naevole, semper,
2 quod prior et corvus dicere saepe solet.
3 Cur hoc expectas a me, rogo, Naevole, dicas :
4 nam, puto, nec melior, Naevole, nec prior es.
5 Praemia laudato tribuit mihi Caesar uterque
6 natorumque dedit jura paterna trium.
7 Ore legor multo notumque per oppida nomen
8 non expectato dat mihi fama rogo.
9 Est et in hoc aliquid : vidit me Roma tribunum
10 et sedeo qua te suscitatur Oceanus.
11 Quot mihi Caesareo facti sunt munere cives,
12 nec famulos totidem suspicor esse tibi.
13 Sed pedicaris, sed pulchre, Naevole, ceves.
14 Jam jam tu prior es, Naevole, vincis : have.
- M3_96 v.1 Lingis, non futuis meam puellam
2 et garris quasi moechus et fututor.
3 Si te prendero, Gargili, tacebis.
- M3_97 v.1 Ne legat hunc Chione, mando tibi, Rufe, libellum :
2 carmine laesa meo est, laedere et illa potest.
- M3_98 v.1 Sit culus tibi quam macer, requiris ?

- 2 Pedicare potes, Sabelle, culo.
- M3_99 v.1 Irasci nostro non debes, Cerdo, libello :
 2 ars tua, non vita, est carmine laesa meo.
 3 Innocuos permitte sales. Cur ludere nobis
 4 non liceat, licuit si jugulare tibi ?
- M3_100 v.1 Cursorem sexta tibi, Rufe, remisimus hora
 2 carmina quem madidum nostra tulisse reor :
 3 imbribus inmodicis caelum nam forte ruebat.
 4 Non aliter mitti debuit iste liber.
- M4_1 v.1 Caesaris alma dies et luce sacratior illa
 2 conscia Dictaeum qua tulit Ida Jovem,
 3 longa, precor, Pyllioque veni numerosior aevo
 4 semper et hoc voltu vel meliore nite.
 5 Hic colat Albano Tritonida multus in auro
 6 perque manus tantas plurima quercus eat ;
 7 hic colat ingenti redeuntia saecula lustro
 8 et quae Romuleus sacra Tarentos habet.
 9 Magna quidem, superi, petimus, sed debita terris :
 10 pro tanto quae sunt inproba vota deo ?
- M4_2 v.1 Spectabat modo solus inter omnes
 2 nigris munus Horatius lacernis,
 3 cum plebs et minor ordo maximusque
 4 sancto cum duce candidus sederet.
 5 Toto nix cecidit repente caelo :
 6 albis spectat Horatius lacernis.
- M4_3 v.1 Aspice quam densum tacitarum vellus aquarum
 2 defluat in voltus Caesaris inque sinus.
 3 Indulget tamen ille Jovi, nec vertice moto
 4 concretas pigro frigore ridet aquas,
 5 sidus Hyperborei solitus lassare Bootae
 6 et madidis Helicen dissimulare comis.
 7 Quis siccis lascivit aquis et ab aethere ludit ?
 8 Suspikor has pueri Caesaris esse nives.
- M4_4 v.1 Quod siccae redolet palus lacunae,
 2 crudarum nebulae quod Albularum,
 3 piscinae vetus aura quod marinae,
 4 quod pressa piger hircus in capella,
 5 lassi vardaicus quod evocati,
 6 quod bis murice vellus inquinatum,
 7 quod jejunia sabbatariarum,
 8 maestorum quod anhelitus reorum,
 9 quod spurcae moriens lucerna Ledaе,
 10 quod ceromata faece de Sabina,
 11 quod volpis fuga, vipera cubile,
 12 mallem quam quod oles olere, Bassa.

- M4_5 v.1 Vir bonus et pauper linguaque et pectore verus,
 2 quid tibi vis urbem qui, Fabiane, petis ?
 3 qui nec leno potes nec comissator haberi,
 4 nec pavidos tristi voce citare reos,
 5 nec potes uxores cari corrumpere amici,
 6 nec potes argentes arrigere ad vetulas,
 7 vendere nec vanos circa Palatia fumos,
 8 plaudere nec Cano, plaudere nec Glaphyro :
 9 unde miser vives ? - Homo certus, fidus amicus." -
 10 Hoc nihil est : numquam sic Philomelus eris.
- M4_6 v.1 Credi virgine castior pudica
 2 et frontis tenerae cupis videri,
 3 cum sis inprobior, Malisiane,
 4 quam qui compositos metro Tibulli
 5 in Stellae recitat domo libellos.
- M4_7 v.1 Cur, here quod dederas, hodie, puer Hylle, negasti,
 2 durus tam subito qui modo mitis eras ?
 3 Sed jam causaris barbamque annosque pilosque.
 4 O nox quam longa es quae facis una senem !
 5 Quid nos derides ? Here qui puer, Hylle, fuisti,
 6 dic nobis, hodie qua ratione vir es ?
- M4_8 v.1 Prima salutantes atque altera conterit hora,
 2 exercet raucos tertia causidicos,
 3 in quintam varios extendit Roma labores,
 4 sexta quies lassis, septima finis erit,
 5 sufficit in nonam nitidis octava palaestris,
 6 imperat extractos frangere nona toros :
 7 hora libellorum decuma est, Eupheme, meorum,
 8 temperat ambrosias cum tua cura dapes
 9 et bonus aetherio laxatur nectare Caesar
 10 ingentique tenet pocula parca manu.
 11 Tunc admitte jocos : gressu timet ire licenti
 12 ad matutinum nostra Thalia Jovem.
- M4_9 v.1 Sotae filia clinici, Labulla,
 2 deserto sequeris Clytum marito,
 3 et donas et amas : Echeis Asotos.
- M4_10 v.1 Dum novus est nec adhuc rasa mihi fronte libellus,
 2 pagina dum tangi non bene sicca timet,
 3 i, puer, et caro perfer leve munus amico
 4 qui meruit nugas primus habere meas.
 5 Curre, sed instructus : comitetur Punica librum
 6 spongea : muneribus convenit illa meis.
 7 Non possunt nostros multae, Faustine, liturae
 8 emendare jocos : una litura potest.
- M4_11 v.1 Dum nimium vano tumefactus nomine gaudes
 2 et Saturninum te, miser, esse pudet,
 3 impia Parrhasia movisti bella sub ursa,
 4 qualia qui Phariae conjugis arma tulit.
 5 Excideratne adeo fatum tibi nominis hujus,
 6 obruit Actiaci quod gravis ira freti ?
 7 An tibi promisit Rhenus quod non dedit illi

- 8 Nilus, et Arctois plus licuisset aquis ?
 9 Ille etiam nostris Antonius occidit armis,
 10 qui tibi conlatus, perfide, Caesar erat.
- M4_12 v.1 Nulli, Thai, negas ; sed si te non pudet istud,
 2 hoc saltem pudeat, Thai, negare nihil.
- M4_13 v.1 Claudia, Rufe, meo nubit Peregrina Pudenti :
 2 macte esto taedis, o Hymenaeae, tuis.
 3 Tam bene rara suo miscentur cinnama nardo,
 4 Massica Theseis tam bene vina favis ;
 5 nec melius teneris junguntur vitibus ulmi,
 6 nec plus lotos aquas, litora myrtus amat.
 7 Candida perpetuo reside, Concordia, lecto,
 8 tamque pari semper sit Venus aequa jugo :
 9 diligat illa senem quondam, sed et ipsa marito
 10 tum quoque, cum fuerit, non videatur anus.
- M4_14 v.1 Sili, Castalidum decus sororum,
 2 qui perjuria barbari furoris
 3 ingenti premis ore perfidosque
 4 astus Hannibalis levisque Poenos
 5 magnis cedere cogis Africanis :
 6 paulum seposita severitate,
 7 dum blanda vagus alea December
 8 incertis sonat hinc et hinc fritillis
 9 et ludit tropha nequiore talo,
 10 nostris otia commoda Camenis,
 11 nec torva lege fronte, sed remissa
 12 lascivis madidos jocis libellos.
 13 Sic forsitan tener ausus est Catullus
 14 magno mittere Passerem Maroni.
- M4_15 v.1 Mille tibi nummos hesternae luce roganti
 2 in sex aut septem, Caeciliane, dies
 3 "Non habeo" dixi : sed tu, causatus amici
 4 adventum, lancem paucaque vasa rogas.
 5 Stultus es ? An stultum me credis, amice ? negavi
 6 mille tibi nummos, milia quinque dabo ?
- M4_16 v.1 Privignum non esse tuae te, Galle, novercae
 2 rumor erat, conjunx dum fuit illa patris.
 3 Non tamen hoc poterat vivo genitore probari :
 4 jam nusquam pater est, Galle, noverca domi est.
 5 Magnus ab infernis revocetur Tullius umbris
 6 et te defendat Regulus ipse licet,
 7 non potes absolvi : nam quae non desinit esse
 8 post patrem, numquam, Galle, noverca fuit.
- M4_17 v.1 Facere in Lyciscam, Paule, me jubes versus,
 2 quibus illa lectis rubeat et sit irata.
 3 O Paule, malus es : irrumare vis solus.
- M4_18 v.1 Qua vicina pluit Vipsanis porta columnis
 2 et madet adsiduo lubricus imbre lapis,
 3 in jugulum pueri, qui roscida tecta subibat,
 4 decidit hiberno prae-gravis unda gelu :

- 5 cumque peregisset miseri crudelia fata,
6 tabuit in calido volnere mucro tener.
7 Quid non saeva sibi voluit Fortuna licere ?
8 Aut ubi non mors est, si jugulatis, aquae ?
- M4_19 v.1 Hanc tibi Sequanicae pinguem textricis alumnam,
2 quae Lacedaemonium barbara nomen habet,
3 sordida, sed gelido non aspernanda Decembri
4 dona, peregrinam mittimus endromida : -
5 seu lentum ceroma teris tepidumque trigona
6 sive harpasta manu pulverulenta rapis,
7 plumea seu laxi partiris pondera follis
8 sive levem cursu vincere quaeris Athan -
9 ne madidos intret penetrabile frigus in artus
10 neve gravis subita te premat Iris aqua.
11 Ridebis ventos hoc munere tectus et imbris,
12 nec sic in Tyria sindone tutus eris.
- M4_20 v.1 Dicit se vetulam, cum sit Caerellia pupa :
2 pupam se dicit Gellia, cum sit anus.
3 Ferre nec hanc possis, possis, Colline, nec illam :
4 altera ridicula est, altera putidula.
- M4_21 v.1 Nullos esse deos, inane caelum
2 adfirmat Segius : probatque, quod se
3 factum, dum negat haec, videt beatum.
- M4_22 v.1 Primos passa toros et adhuc placanda marito
2 merserat in nitidos se Cleopatra lacus,
3 dum fugit amplexus. Sed prodidit unda latentem ;
4 lucebat, totis cum tegetetur aquis :
5 condita sic puro numerantur lilia vitro,
6 sic prohibet tenuis gemma latere rosas.
7 Insilui mersusque vadis luctantia carpsi
8 basia : perspicuae plus vetuistis aquae.
- M4_23 v.1 Dum tu lenta nimis diuque quaeris
2 quis primus tibi quisve sit secundus,
3 Graium quos epigramma comparavit,
4 palmam Callimachus, Thalia, de se
5 facundo dedit ipse Bruttiano.
6 Qui si Cecropio satur lepore
7 Romanae sale luserit Minervae,
8 ille me facias, precor, secundum.
- M4_24 v.1 Omnes quas habuit, Fabiane, Lycoris amicas
2 extulit : uxori fiat amica meae.
- M4_25 v.1 Aemula Baianis Altini litora villis
2 et Phaethontei conscia silva rogi,
3 quaeque Antenoreo Dryadum pulcherrima Fauno
4 nupsit ad Euganeos Sola puella lacus,
5 et tu Ledaeo felix Aquileia Timavo,
6 hic ubi septenas Cyllarus hausit aquas :
7 vos eritis nostrae requies portusque senectae,
8 si juris fuerint otia nostra sui.

- M4_26 v.1 Quod te mane domi toto non vidimus anno,
2 vis dicam quantum, Postume, perdiderim ?
3 Tricenos, puto, bis, vicanos ter, puto, nummos.
4 Ignosces : togulam, Postume, pluris emo.
- M4_27 v.1 Saepe meos laudare soles, Auguste, libellos.
2 Invidus ecce negat : num minus ergo soles ?
3 Quid quod honorato non sola voce dedisti
4 non alius poterat quae dare dona mihi ?
5 Ecce iterum nigros conrodit lividus ungues :
6 da, Caesar, tanto tu magis, ut doleat.
- M4_28 v.1 Donasti tenero, Chloe, Luperco
2 Hispanas Tyriasque coccinasque,
3 et lotam tepido togam Galaeso,
4 Indos sardonychas, Scythas zmaragdos,
5 et centum dominos novae monetae :
6 et quidquid petit usque et usque donas.
7 Vae glabraria, vae tibi misella :
8 nudam te statuet tuus Lupercus.
- M4_29 v.1 Obstat, care Pudens, nostris sua turba libellis
2 lectoremque frequens lassat et implet opus.
3 Rara juvant : primis sic major gratia pomis,
4 hibernae pretium sic meruere rosae ;
5 sic spoliatricem commendat fastus amicam
6 janua nec juvenem semper aperta tenet.
7 Saepius in libro numeratur Persius uno
8 quam levis in tota Marsus Amazonide.
9 Tu quoque de nostris releges quemcumque libellis,
10 esse puta solum : sic tibi pluris erit.
- M4_30 v.1 Baiano procul a lacu, monemus,
2 piscator, fuge, ne nocens recedas.
3 Sacris piscibus hae natantur undae,
4 qui norunt dominum manumque lambunt
5 illam, qua nihil est in orbe majus.
6 Quid quod nomen habent et ad magistri
7 vocem quisque sui venit citatus ?
8 Hoc quondam Libys impius profundo,
9 dum praedam calamo tremente ducit,
10 raptis luminibus repente caecus
11 captum non potuit videre piscem,
12 et nunc sacrilegos perosus hamos
13 Baianos sedet ad lacus rogator.
14 At tu, dum potes, innocens recede
15 jactis simplicibus cibus in undas,
16 et pisces venerare delicatos.
- M4_31 v.1 Quod cupis in nostris dicique legique libellis
2 et nonnullus honos creditur iste tibi,
3 ne valeam si non res est gratissima nobis
4 et volo te chartis inseruisse meis.
5 Sed tu nomen habes averso fonte sororum
6 inpositum, mater quod tibi dura dedit ;
7 quod nec Melpomene, quod nec Polyhymnia possit
8 nec pia cum Phoebos dicere Calliope.

- 9 Ergo aliquod gratum Musis tibi nomen adopta :
10 non semper belle dicitur "Hippodame".
- M4_32 v.1 Et latet et lucet Phaethontide condita gutta,
2 ut videatur apis nectare clusa suo.
3 Dignum tantorum pretium tulit illa laborum :
4 credibile est ipsam sic voluisse mori.
- M4_33 v.1 Plena laboratis habeas cum scrinia libris,
2 emittis quare, Sosibiane, nihil ?
3 "Edent heredes" inquis "mea carmina". Quando ?
4 Tempus erat jam te, Sosibiane, legi.
- M4_34 v.1 Sordida cum tibi sit, verum tamen, Attale, dicit,
2 quisquis te niveam dicit habere togam.
- M4_35 v.1 Frontibus adversis molles concurrere dammas
2 vidimus et fati sorte jacere pari.
3 Spectavere canes praedam, stupuitque superbus
4 venator cultro nil superesse suo.
5 Unde leves animi tanto caluere furore ?
6 Sic pugnant tauri, sic cecidere viri.
- M4_36 v.1 Cana est barba tibi, nigra est coma : tinguere barbam
2 non potes (haec causa est) et potes, Ole, comam.
- M4_37 v.1 Centum Coranus et ducenta Mancinus,
2 trecenta debet Titius, hoc bis Albinus,
3 decies Sabinus alterumque Serranus ;
4 ex insulis fundisque tricies soldum,
5 ex pecore redeunt ter ducena Parmensi" :
6 totis diebus, Afer, hoc mihi narras
7 et teneo melius ista quam meum nomen.
8 Numeres oportet aliquid, ut pati possim ;
9 cotidianam refice nauseam nummis :
10 audire gratis, Afer, ista non possum.
- M4_38 v.1 Galla, nega : satiatur amor nisi gaudia torquent :
2 sed noli nimium, Galla, negare diu.
- M4_39 v.1 Argenti genus omne comparasti,
2 et solus veteres Myronos artes,
3 solus Praxitelus manum Scopaeque,
4 solus Phidiaci toreuma caeli,
5 solus Mentoreos habes labores.
6 Nec desunt tibi vera Gratiana
7 nec quae Callaico linuntur auro
8 nec mensis anaglypta de paternis.
9 Argentum tamen inter omne miror
10 quare non habeas, Charine, purum.
- M4_40 v.1 Atria Pisonum stabant cum stemmate toto
2 et docti Senecae ter numeranda domus,
3 praetulimus tantis solum te, Postume, regnis :
4 pauper eras et eques, sed mihi consul eras.
5 Tecum ter denas numeravi, Postume, brumas :
6 communis nobis lectus et unus erat.

- 7 Jam donare potes, jam perdere, plenus honorum,
8 largus opum : expecto, Postume, quid facias.
9 Nil facis et serum est alium mihi quaerere regem.
10 Hoc, Fortuna, placet ? "Postumus inposuit".
- M4_41 v.1 Quid recitaturus circumdas vellera collo ?
2 Conveniunt nostris auribus ista magis.
- M4_42 v.1 Si quis forte mihi possit praestare roganti,
2 audi, quem puerum, Flacce, rogare velim.
3 Niliacis primum puer hic nascatur in oris :
4 nequitas tellus scit dare nulla magis.
5 Sit nive candidior : namque in Mareotide fusca
6 pulchrior est quanto rarior iste color.
7 Lumina sideribus certent mollesque flagellent
8 colla comae : tortas non amo, Flacce, comas.
9 Frons brevis atque modus leviter sit naribus uncis,
10 Paestanis rubeant aemula labra rosis.
11 Saepe et nolentem cogat nolitque volentem ;
12 liberior domino saepe sit ille suo ;
13 et timeat pueros, excludat saepe puellas :
14 vir reliquis, uni sit puer ille mihi.
15 "Jam scio, nec fallis : nam me quoque iudice verum est.
16 Talis erat" dices "noster Amazonicus".
- M4_43 v.1 Non dixi, Coracine, te cinaedum :
2 non sum tam temerarius nec audax
3 nec mendacia qui loquar libenter.
4 Si dixi, Coracine, te cinaedum,
5 iratam mihi Pontiae lagonam,
6 iratum calicem mihi Metili :
7 juro per Syrios tibi tumores,
8 juro per Berecyntios furores.
9 Quid dixi tamen ? Hoc leve et pusillum,
10 quod notum est, quod et ipse non negabis :
11 dixi te, Coracine, cunnilingum.
- M4_44 v.1 Hic est pampineis viridis modo Vesbius umbris,
2 presserat hic madidos nobilis uva lacus :
3 haec juga quam Nysae colles plus Bacchus amavit ;
4 hoc nuper Satyri monte dedere choros ;
5 haec Veneris sedes, Lacedaemone gratior illi ;
6 his locus Herculeo nomine clarus erat.
7 Cuncta jacent flammis et tristi mersa favilla :
8 nec superi vellent hoc licuisse sibi.
- M4_45 v.1 Haec tibi pro nato plena dat laetus acerra,
2 Phoebe, Palatinus munera Parthenius,
3 ut, qui prima novo signat quinquennia lustris,
4 impleat innumeras Burrus Olympiadas.
5 Fac rata vota patris : sic te tua diligat arbor,
6 gaudeat et certa virginitate soror ;
7 perpetuo sic flore mices, sic denique non sint
8 tam longae Bromio quam tibi, Phoebe, comae.
- M4_46 v.1 Saturnalia divitem Sabellum
2 fecerunt : merito tumet Sabellus,

- 3 nec quemquam putat esse praedicatque
4 inter causidicos beatiorum.
5 Hos fastus animosque dat Sabello
6 farris semodius fabaeque fresae,
7 et turis piperisque tres selibrae,
8 et Lucanica ventre cum Falisco,
9 et nigri Syra defruti lagona,
10 et ficus Libyca gelata testa
11 cum bulbis cocleisque caseoque.
12 Piceno quoque venit a cliente
13 parcae cistula non capax olivae
14 et crasso figuli polita caelo
15 septenaria synthesis Sagunti,
16 Hispanae luteum rotae toreuma,
17 et lato variata mappa clavo.
18 Saturnalia fructuosiora
19 annis non habuit decem Sabellus.
- M4_47 v.1 Encaustus Phaethon tabula tibi pictus in hac est.
2 Quid tibi vis, dipyrum qui Phaethonta facis ?
- M4_48 v.1 Percidi gaudes, percisus, Papyle, ploras :
2 cur, quae vis fieri, Papyle, facta doles ?
3 Paenitet obscenae pruriginis ? An magis illud
4 fles, quod percidi, Papyle, desieris ?
- M4_49 v.1 Nescit, crede mihi, quid sint epigrammata, Flacce,
2 qui tantum lusus illa jocosque vocat.
3 Ille magis ludit qui scribit prandia saevi
4 Tereos aut cenam, crude Thyesta, tuam,
5 aut puero liquidas aptantem Daedalon alas,
6 pascentem Siculas aut Polyphemon ovis.
7 A nostris procul est omnis vesica libellis,
8 Musa nec insano syrmate nostra tumet.
9 "Illa tamen laudant omnes, mirantur, adorant".
10 Confiteor : laudant illa, sed ista legunt.
- M4_50 v.1 Quid me, Thai, senem subinde dicis ?
2 Nemo est, Thai, senex ad irrumandum.
- M4_51 v.1 Cum tibi non essent sex milia, Caeciliane,
2 ingenti late vectus es hexaphoro :
3 postquam bis decies tribuit dea caeca sinumque
4 ruperunt nummi, factus es, ecce, pedes.
5 Quid tibi pro meritis et tantis laudibus optem ?
6 Di reddant sellam, Caeciliane, tibi.
- M4_52 v.1 Gestari junctis nisi desinis, Hedyle, capris,
2 qui modo ficus eras, jam caprificus eris.
- M4_53 v.1 Hunc, quem saepe vides intra penetralia nostrae
2 Pallados et templi limina, Cosme, novi
3 cum baculo peraque senem, cui cana putrisque
4 stat coma et in pectus sordida barba cadit,
5 cerea quem nudi tegit uxor abolla grabati,
6 cui dat latratos obvia turba cibos,
7 esse putas Cynicum deceptus imagine ficta :

- 8 non est hic Cynicus, Cosme : quid ergo ? Canis.
- M4_54 v.1 O cui Tarpeias licuit contingere quercus
2 et meritas prima cingere fronde comas,
3 si sapis, utaris totis, Colline, diebus
4 extremumque tibi semper adesse putes.
5 Lanificas nulli tres exorare puellas
6 contigit : observant quem statuere diem.
7 Divitior Crispo, Thrasea constantior ipso,
8 lautior et nitido sis Meliore licet :
9 nil adicit penso Lachesis, fusosque sororum
10 explicat et semper de tribus una secat.
- M4_55 v.1 Luci, gloria temporum tuorum,
2 qui Caium veterem Tagumque nostrum
3 Arpis cedere non sinis disertis,
4 Argivas generatus inter urbes
5 Thebas carmine cantet aut Mycenae,
6 aut claram Rhodon aut libidinosae
7 Ledaeas Lacedaemonos palaestras :
8 nos Celtis genitos et ex Hiberis
9 nostrae nomina duriora terrae
10 grato non pudeat referre versu :
11 saevo Bilbilin optimam metallo,
12 quae vincit Chalybasque Noricosque,
13 et ferro Plateam suo sonantem,
14 quam fluctu tenui, sed inquieto
15 armorum Salo temperator ambit,
16 Tutelanque chorosque Rixamarum,
17 et convivia festa Carduarum,
18 et textis Peterin rosis rubentem,
19 atque antiqua patrum theatra Rigas,
20 et certos jaculo levi Silaos,
21 Turgontique lacus Turasiaeque,
22 et parva vada pura Tuetonissae,
23 et sanctum Buradonis illicitum,
24 per quod vel piger ambulat viator,
25 et quae fortibus excolit juvencis
26 curvae Manlius arva Vativescae.
27 Haec tam rustica, delicate lector,
28 rides nomina ? Rideas licebit,
29 haec tam rustica malo quam Butuntos.
- M4_56 v.1 Munera quod senibus viduisque ingentia mittis,
2 vis te munificum, Gargiliane, vocem ?
3 Sordidius nihil est, nihil est te spurcius uno,
4 qui potes insidias dona vocare tuas :
5 sic avidis fallax indulget piscibus hamus,
6 callida sic stultas decipit esca feras.
7 Quid sit largiri, quid sit donare docebo,
8 si nescis : dona, Gargiliane, mihi.
- M4_57 v.1 Dum nos blanda tenent lascivi stagna Lucrini
2 et quae pumiceis fontibus antra calent,
3 tu colis Argei regnum, Faustine, coloni,
4 quo te bis decimus ducit ab urbe lapis.
5 Horrida sed fervent Nemeaei pectora monstri,

- 6 nec satis est Baias igne calere suo.
7 Ergo sacri fontes et litora grata valete,
8 Nympharum pariter Nereidumque domus.
9 Herculeos colles gelida vos vincite bruma,
10 nunc Tiburtinis cedite frigoribus.
- M4_58 v.1 In tenebris lugens amissum, Galla, maritum :
 2 nam plorare pudet te, puto, Galla, virum.
- M4_59 v.1 Flentibus Heliadum ramis dum vipera repit,
 2 fluxit in obstantem sucina gemma feram :
 3 quae dum miratur pingui se rore teneri,
 4 concreto riguit vincita repente gelu.
 5 Ne tibi regali placeas, Cleopatra, sepulcro,
 6 vipera si tumulo nobiliore jacet.
- M4_60 v.1 Ardea solstitio Castranaque rura petantur
 2 quique Cleonaeo sidere fervet ager,
 3 cum Tiburtinas damnet Curiatius auras
 4 inter laudatas ad Styga missus aquas.
 5 Nullo fata loco possis excludere : cum mors
 6 venerit, in medio Tibure Sardinia est.
- M4_61 v.1 Donasse amicum tibi ducenta, Mancine,
 2 nuper superbo laetus ore jactasti.
 3 Quartus dies est, in schola poetarum
 4 dum fabulamur, milibus decem dixti
 5 emptas lacernas munus esse Pompullae,
 6 sardonycha verum lineisque ter cinctum
 7 duasque similes fluctibus maris gemmas
 8 dedisse Bassam Caeliamque jurasti.
 9 Here de theatro, Pollione cantante,
 10 cum subito abires, dum fugis, loquebaris,
 11 hereditatis tibi trecenta venisse,
 12 et mane centum, et post meridie centum.
 13 Quid tibi sodales fecimus mali tantum ?
 14 Miserere jam, crudelis, et sile tandem ;
 15 aut, si tacere lingua non potest ista,
 16 aliquando narra quod velimus audire.
- M4_62 v.1 Tibur in Herculeum migravit nigra Lycoris,
 2 omnia dum fieri candida credit ibi.
- M4_63 v.1 Dum petit a Baulis mater Caerellia Baias,
 2 occidit insani crimine mersa freti.
 3 Gloria quanta perit vobis ! Haec monstra Neroni
 4 nec jussae quondam praestiteratis, aquae.
- M4_64 v.1 Juli jugera pauca Martialis
 2 hortis Hesperidum beatiora
 3 longo Janiculi jugo recumbunt :
 4 lati collibus imminent recessus,
 5 et planus modico tumore vertex
 6 caelo perfruitur sereniora,
 7 et curvas nebula tegente valles
 8 solus luce nitet peculiari :
 9 puris leniter admoventur astris

- 10 celsae culmina delicata villae.
 11 Hinc septem dominos videre montis
 12 et totam licet aestimare Romam,
 13 Albanos quoque Tusculosque colles
 14 et quodcumque jacet sub urbe frigus,
 15 Fidenas veteres brevesque Rubras,
 16 et quod virgineo cruore gaudet
 17 Annae pomiferum nemus Perennae.
 18 Illinc Flaminiae Salariaeque
 19 gestator patet essedo tacente,
 20 ne blando rota sit molesta somno,
 21 quem nec rumpere nauticum celeuma
 22 nec clamor valet helciariorum,
 23 cum sit tam prope Mulvius sacrumque
 24 lapsae per Tiberim volent carinae.
 25 Hoc rus, seu potius domus vocanda est,
 26 commendat dominus : tuam putabis,
 27 tam non invida tamque liberalis,
 28 tam comi patet hospitalitate :
 29 credas Alcinoi pios Penates
 30 aut facti modo divitis Molorchi.
 31 Vos nunc omnia parva qui putatis,
 32 centeno gelidum ligone Tibur
 33 vel Praeneste domate pendulamque
 34 uni dedite Setiam colono,
 35 dum me iudice praeferantur istis
 36 Juli jugera pauca Martialis.
- M4_65 v.1 Oculo Philaenis semper altero plorat.
 2 Quo fiat istud quaeritis modo ? Lusca est.
- M4_66 v.1 Egisti vitam semper, Line, municipalem,
 2 qua nihil omnino vilius esse potest.
 3 Idibus et raris togula est excussa Kalendis,
 4 duxit et aestates synthesis una decem.
 5 Saltus aprum, campus leporem tibi misit inemptum,
 6 silva gravis turdos exagitata dedit,
 7 captus flumineo venit de gurgite piscis,
 8 vina ruber fudit non peregrina cadus.
 9 Nec tener Argolica missus de gente minister,
 10 sed stetit inculti rustica turba foci.
 11 Vilica vel duri compressa est nupta coloni,
 12 incaluit quotiens saucia vena mero.
 13 Nec nocuit tectis ignis nec Sirius agris,
 14 nec mersa est pelago nec fuit ulla ratis.
 15 Subposita est blando numquam tibi tessera talo,
 16 alea sed parcae sola fuere nuces.
 17 Dic ubi sit decies, mater quod avara reliquit.
 18 Nusquam est : fecisti rem, Line, difficilem.
- M4_67 v.1 Praetorem pauper centum sestertia Gaurus
 2 orabat cana notus amicitia,
 3 dicebatque suis haec tantum desse trecentis,
 4 ut posset domino plaudere justus eques.
 5 Praetor ait : "Scis me Scorpo Thalloque daturum,
 6 atque utinam centum milia sola darem."
 7 Ah ! Pudet ingratae, pudet ah ! Male divitis arcae.

- 8 Quod non das equiti, vis dare, praetor, equo ?
- M4_68 v.1 Invitas centum quadrantibus et bene cenas.
 2 Ut cenem invitator, Sexte, an ut invideam ?
- M4_69 v.1 Tu Setina quidem semper vel Massica ponis,
 2 Papyle, sed rumor tam bona vina negat :
 3 diceris hac factus caelebs quater esse lagona.
 4 Nec puto nec credo, Papyle, nec sitio.
- M4_70 v.1 Nihil Ammiano praeter aridam restem
 2 moriens reliquit ultimis pater ceris.
 3 Fieri putaret posse quis, Marulline,
 4 ut Ammianus mortuum patrem nollet ?
- M4_71 v.1 Quaero diu totam, Safroni Rufe, per urbem,
 2 si qua puella neget : nulla puella negat.
 3 Tamquam fas non sit, tamquam sit turpe negare,
 4 tamquam non liceat, nulla puella negat.
 5 Casta igitur nulla est ? Sunt castae mille. Quid ergo
 6 casta facit ? Non dat, non tamen illa negat.
- M4_72 v.1 Exigis ut donem nostros tibi, Quinte, libellos.
 2 Non habeo, sed habet bibliopola Tryphon.
 3 "Aes dabo pro nugis et emam tua carmina sanus ?
 4 Non, inquis, faciam tam fatue." Nec ego.
- M4_73 v.1 Cum gravis extremas Vestinus duceret horas
 2 et jam per Stygias esset iturus aquas,
 3 ultima volventis oravit pensa sorores,
 4 ut traherent parva stamina pulla mora,
 5 jam sibi defunctus caris dum vivit amicis.
 6 Moverunt tetricas tam pia vota deas.
 7 Tunc largas partitus opes a luce recessit,
 8 seque mori post hoc credidit ille senem.
- M4_74 v.1 Aspicis inbellis temptent quam fortia dammae
 2 proelia ? Tam timidus quanta sit ira feris ?
 3 In mortem parvis concurrere frontibus ardent.
 4 Vis, Caesar, dammis parcere ? Mitte canes.
- M4_75 v.1 O felix animo, felix, Nigrina, marito,
 2 atque inter Latias gloria prima nurus :
 3 te patrios miscere juvat cum conjuge census,
 4 gaudentem socio participique viro.
 5 Arserit Euhadne flammis injecta mariti,
 6 nec minor Alcestin fama sub astra ferat ;
 7 tu melius. Certo meruisti pignore vitae
 8 ut tibi non esset morte probandus amor.
- M4_76 v.1 Milia misisti mihi sex bis sena petenti :
 2 ut bis sena feram, bis duodena petam.
- M4_77 v.1 Numquam divitias deos rogavi
 2 contentus modicis meoque laetus :
 3 paupertas, veniam dabis, recede.
 4 Causa est quae subiti novique voti ?

- 5 Pendentem volo Zoilum videre.
- M4_78 v.1 Condita cum tibi sit jam sexagensima messis
 2 et facies multo splendeat alba pilo,
 3 discurris tota vagus urbe, nec ulla cathedra est
 4 cui non mane feras inrequietus Have ;
 5 et sine te nulli fas est prodire tribuno,
 6 nec caret officio consul uterque tuo ;
 7 et sacro decies repetis Palatia clivo
 8 Sigerosque meros Partheniosque sonas.
 9 Haec faciant sane juvenes : deformius, Afer,
 10 omnino nihil est ardalione sene.
- M4_79 v.1 Hospes eras nostri semper, Matho, Tiburtini.
 2 Hoc emis. Inposui : rus tibi vendo tuum.
- M4_80 v.1 Declamas in febre, Maron : hanc esse phrenesin
 2 si nescis, non es sanus, amice Maron.
 3 Declamas aeger, declamas hemitritaeos :
 4 si sudare aliter non potes, est ratio.
 5 "Magna tamen res est". Erras ; cum viscera febris
 6 exurit, res est magna tacere, Maron.
- M4_81 v.1 Epigramma nostrum cum Fabulla legisset,
 2 negare nullam quo queror puellarum,
 3 semel rogata bisque terque neglexit
 4 preces amantis. Jam, Fabulla, promitte :
 5 negare jussi, pernegare non jussi.
- M4_82 v.1 Hos quoque commenda Venuleio, Rufe, libellos,
 2 inputet et nobis otia parva roga,
 3 immemor et paulum curarum operumque suorum
 4 non tetrica nugas exigat aure meas.
 5 Sed nec post primum legat haec summumve trientem,
 6 sed sua cum medius proelia Bacchus amat.
 7 Si nimis est legisse duos, tibi charta plicetur
 8 altera : divisum sic breve fiet opus.
- M4_83 v.1 Securo nihil est te, Naevole, pejus ; eodem
 2 sollicito nihil est, Naevole, te melius.
 3 Securus nullum resalutas, despicias omnes,
 4 nec quisquam liber nec tibi natus homo est :
 5 sollicitus donas, dominum regemque salutas,
 6 invitas. Esto, Naevole, sollicitus.
- M4_84 v.1 Non est in populo nec urbe tota
 2 a se Thaida qui probet fututam,
 3 cum multi cupiant rogentque multi.
 4 Tam casta est, rogo, Thais ? Immo fellat.
- M4_85 v.1 Nos bibimus vitro, tu murra, Pontice. Quare ?
 2 Prodat perspicuus ne duo vina calix.
- M4_86 v.1 Si vis auribus Atticis probari,
 2 exhortor moneoque te, libelle,
 3 ut docto placeas Apollinari :
 4 nil exactius eruditiusque est,

- 5 sed nec candidius benigniusque.
6 Si te pectore, si tenebit ore,
7 nec rhonchos metues maligniorum,
8 nec scombris tunicas dabis molestas :
9 si damnaverit, ad salariorum
10 curras scrinia protinus licebit,
11 inversa pueris arande charta.
- M4_87 v.1 Infantem secum semper tua Bassa, Fabulle,
2 conlocat et lusus deliciasque vocat,
3 et, quo mireris magis, infantaria non est.
4 Ergo quid in causa est ? Pedere Bassa solet.
- M4_88 v.1 Nulla remisisti parvo pro munere dona,
2 et jam Saturni quinque fuere dies.
3 Ergo nec argenti sex scripula Septiciani
4 missa nec a querulo mappa cliente fuit,
5 Antipolitani nec quae de sanguine thynni
6 testa rubet, nec quae cottana parva gerit,
7 nec rugosarum vimen breve Picenarum,
8 dicere te posses ut meminisse mei !
9 Decipies alios verbis voltuque benigno,
10 nam mihi jam notus dissimulator eris.
- M4_89 v.1 Ohe, jam satis est, ohe, libelle,
2 jam pervenimus usque ad umbilicos.
3 Tu procedere adhuc et ire quaeris,
4 nec summa potes in schida teneri,
5 sic tanquam tibi res peracta non sit,
6 quae prima quoque pagina peracta est.
7 Jam lector queriturque deficitque,
8 jam librarius hoc et ipse dicit
9 "Ohe, jam satis est, ohe, libelle."
- M5_1 v.1 Hoc tibi, Palladiae seu collibus uteris Albae,
2 Caesar, et hinc Triviam prospicis, inde Thetin,
3 seu tua veridicae discunt responsa sorores,
4 plana suburbani qua cubat unda freti,
5 seu placet Aeneae nutrix seu filia Solis
6 sive salutiferis candidus Anxur aquis,
7 mittimus, o rerum felix tutela salusque,
8 sospite quo gratum credimus esse Jovem.
9 Tu tantum accipias : ego te legisse putabo
10 et tumidus Galla credulitate fruar.
- M5_2 v.1 Matronae puerique virginesque,
2 vobis pagina nostra dedicatur.
3 Tu, quem nequitiae procaciores
4 delectant nimius salesque nudi,
5 lascivos lege quattuor libellos :
6 quintus cum domino liber jocatur ;
7 quem Germanicus ore non rubenti
8 coram Cecropia legat puella.

- M5_3 v.1 Accola jam nostrae Degis, Germanice, ripae,
2 a famulis Histri qui tibi venit aquis,
3 laetus et attonitus viso modo praeside mundi,
4 adfatus comites dicitur esse suos :
5 "Sors mea quam fratris melior, cui tam prope fas est
6 cernere, tam longe quem colit ille deum".
- M5_4 v.1 Fetere multo Myrtale solet vino,
2 sed fallat ut nos, folia devorat lauri
3 merumque cauta fronde, non aqua, miscet.
4 Hanc tu rubentem prominentibus venis
5 quotiens venire, Paule, videris contra,
6 dicas licebit "Myrtale bibit laurum."
- M5_5 v.1 Sexte, Palatinae cultor facunde Minervae,
2 ingenio frueris qui propiore dei
3 (nam tibi nascentes domini cognoscere curas
4 et secreta ducis pectora nosse licet) :
5 sit locus et nostris aliqua tibi parte libellis,
6 qua Pedro, qua Marsus quaque Catullus erit.
7 Ad Capitolini caelestia carmina belli
8 grande cothurnati pone Maronis opus.
- M5_6 v.1 Si non est grave nec nimis molestum,
2 Musae, Parthenium rogate vestrum :
3 sic te serior et beata quondam
4 salvo Caesare finiat senectus
5 et sis invidia favente felix,
6 sic Burrus cito sentiat parentem ;
7 admittas timidam brevemque chartam
8 intra limina sanctioris aulae.
9 Nosti tempora tu Jovis sereni,
10 cum fulget placido suoque voltu,
11 quo nil supplicibus solet negare.
12 Non est quod metuas preces iniquas :
13 numquam grandia nec molesta poscit
14 quae cedro decorata purpuraque
15 nigris pagina crevit umbilicis.
16 Nec porrexeris ista, sed teneto
17 sic tamquam nihil offeras agasque.
18 Si novi dominum novem sororum,
19 ultro purpureum petet libellum.
- M5_7 v.1 Qualiter Assyrios renovant incendia nidos,
2 una decem quotiens saecula vixit avis,
3 taliter exuta est veterem nova Roma senectam
4 et sumpsit voltus praesidis ipsa sui.
5 Jam, precor, oblitus notae, Vulcane, querelae,
6 parce : sumus Martis turba, sed et Veneris ;
7 parce, pater : sic Lemniacis lasciva catenis
8 ignoscat conjunx et patienter amet.
- M5_8 v.1 Edictum domini deique nostri,
2 quo subsellia certiora fiunt
3 et puros eques ordines recepit,
4 dum laudat modo Phasis in theatro,

- 5 Phasis purpureis rubens lacernis,
6 et jactat tumido superbus ore :
7 "Tandem commodius licet sedere,
8 nunc est reddita dignitas equestris ;
9 turba non premimur, nec inquinamur " :
10 haec et talia dum refert supinus,
11 illas purpureas et adrogantes
12 jussit surgere Leitus lacernas.
- M5_9 v.1 Languēbam : sed tu comitatus protinus ad me
2 venisti centum, Symmache, discipulis.
3 Centum me tetigere manus aquilone gelatae :
4 non habui febrem, Symmache, nunc habeo.
- M5_10 v.1 Esse quid hoc dicam vivis quod fama negatur
2 et sua quod rarus tempora lector amat ?" -
3 Hi sunt invidiae nimirum, Regule, mores,
4 praeferat antiquos semper ut illa novis.
5 Sic veterem ingrati Pompei quaerimus umbram,
6 sic laudant Catuli vilia templa senes ;
7 Ennius est lectus salvo tibi, Roma, Marone,
8 et sua riserunt saecula Maeoniden ;
9 rara coronato plausere theatra Menandro ;
10 norat Nasonem sola Corinna suum.
11 Vos tamen o nostri ne festinate libelli ;
12 si post fata venit gloria, non propero.
- M5_11 v.1 Sardonychis, zmaragdosis, adamantis, iaspidis uno
2 versat in articulo Stella, Severe, meus.
3 Multas in digitis, plures in carmine gemmas
4 invenies : inde est haec, puto, culta manus.
- M5_12 v.1 Quod nutantia fronte perticata
2 gestat pondera Masclion superbus,
3 aut grandis Ninus omnibus lacertis
4 septem quod pueros levat vel octo,
5 res non difficilis mihi videtur,
6 uno cum digito vel hoc vel illo
7 portet Stella meus decem puellas.
- M5_13 v.1 Sum, fateor, semperque fui, Callistrate, pauper,
2 sed non obscurus nec male notus eques,
3 sed toto legor orbe frequens et dicitur "Hic est" ;
4 quodque cinis paucis, hoc mihi vita dedit.
5 At tua centenis incumbunt tecta columnis
6 et libertinas arca flagellat opes,
7 magnaue Niliacae servit tibi gleba Syenes,
8 tondet et innumeros Gallica Parma greges.
9 Hoc ego tuque sumus : sed quod sum non potes esse ;
10 tu quod es, e populo quilibet esse potest.
- M5_14 v.1 Sedere primo solitus in gradu semper
2 tunc, cum liceret occupare, Nanneius
3 bis excitatus terque transtulit castra,
4 et inter ipsas paene tertius sellas
5 post Gaiumque Luciumque consedit.
6 Illinc cucullo prospicit caput tectus

- 7 oculoque ludos spectat indecens uno ;
 8 et hinc miser dejectus in viam transit,
 9 subsellioque semifultus extremo
 10 et male receptus altero genu jactat
 11 equiti sedere Leitoque se stare.
- M5_15 v.1 Quintus nostrorum liber est, Auguste, jocorum
 2 et queritur laesus carmine nemo meo ;
 3 gaudet honorato sed multus nomine lector,
 4 cui victura meo munere fama datur.
 5 "Quid tamen haec prosunt quamvis venerantia multos ?"
 6 Non prosit sane, me tamen ista juvant.
- M5_16 v.1 Seria cum possim, quod delectantia malo
 2 scribere, tu causa es, lector amice, mihi,
 3 qui legis et tota cantas mea carmina Roma :
 4 sed nescis quanti stet mihi talis amor.
 5 Nam si falciferi defendere templa Tonantis
 6 sollicitisque velim vendere verba reis,
 7 plurimus Hispanas mittet mihi nauta metretas
 8 et fiet vario sordidus aere sinus.
 9 At nunc conviva est commissatorque libellus
 10 et tantum gratis pagina nostra placet.
 11 Sed non et veteres contenti laude fuerunt,
 12 cum minimum vati munus Alexis erat.
 13 "Belle" inquis "dixti : juvat et laudabimus usque."
 14 Dissimulas ? Facies me, puto, causidicum.
- M5_17 v.1 Dum proavos atavosque refers et nomina magna,
 2 dum tibi noster eques sordida condicio est,
 3 dum te posse negas nisi lato, Gellia, clavo
 4 nubere, nupsisti, Gellia, cistibero.
- M5_18 v.1 Quod tibi Decembri mense, quo volant mappae
 2 gracilesque ligulae cereique chartaeque
 3 et acuta senibus testa cum Damascenis,
 4 praeter libellos vernulas nihil misi,
 5 fortasse avarus videar aut inhumanus.
 6 Odi dolosas munerum et malas artes ;
 7 imitantur hamos dona : namque quis nescit
 8 avidum vorata decipi scarum musca ?
 9 Quotiens amico diviti nihil donat,
 10 o Quintiane, liberalis est pauper.
- M5_19 v.1 Si qua fides veris, praeferri, maxime Caesar,
 2 temporibus possunt saecula nulla tuis.
 3 Quando magis dignos licuit spectare triumphos ?
 4 quando Palatini plus meruere dei ?
 5 pulchrior et major quo sub duce Martia Roma ?
 6 sub quo libertas principe tanta fuit ?
 7 Est tamen hoc vitium sed non leve, sit licet unum,
 8 quod colit ingratas pauper amicitias.
 9 Quis largitur opes veteri fidoque sodali,
 10 aut quem prosequitur non alienus eques ?
 11 Saturnaliciae ligulam missime selibrae
 12 flammatisve togae scripula tota decem
 13 luxuria est, tumidique vocant haec munera reges :

- 14 qui crepet aureolos forsitan unus erit.
 15 Quatenus hi non sunt, esto tu, Caesar, amicus ;
 16 nulla ducis virtus dulcior esse potest.
 17 Jam dudum tacito rides, Germanice, naso
 18 utile quod nobis do tibi consilium.
- M5_20 v.1 Si tecum mihi, care Martialis,
 2 securis liceat frui diebus,
 3 si disponere tempus otiosum
 4 et verae pariter vacare vitae :
 5 nec nos atria nec domos potentum
 6 nec litis tetricas forumque triste
 7 nossemus nec imagines superbas ;
 8 sed gestatio, fabulae, libelli,
 9 campus, porticus, umbra, Virgo, thermae,
 10 haec essent loca semper, hi labores.
 11 Nunc vivit necuter sibi, bonosque
 12 soles effugere atque abire sentit,
 13 qui nobis pereunt et inputantur.
 14 Quisquam vivere cum sciat, moratur ?
- M5_21 v.1 Quintum pro Decimo, pro Crasso, Regule, Macrum
 2 ante salutabat rhetor Apollodotus :
 3 nunc utrumque suo resalutat nomine. Quantum
 4 cura laborque potest ! Scripsit et edidicit.
- M5_22 v.1 Mane domi nisi te volui meruitque videre,
 2 sint mihi, Paule, tuae longius Esquiliae.
 3 Sed Tiburtinae sum proximus accola pilae,
 4 qua videt anticum rustica Flora Jovem :
 5 alta Suburani vincenda est semita clivi
 6 et numquam sicco sordida saxa gradu,
 7 vixque datur longas mulorum rumpere mandras
 8 quaeque trahi multo marmora fune vides.
 9 Illud adhuc gravius quod te post mille labores,
 10 Paule, negat lasso janitor esse domi.
 11 Exitus hic operis vani togulaeque madentis :
 12 vix tanti Paulum mane videre fuit.
 13 Semper inhumanos habet officiosus amicos :
 14 rex, nisi dormieris, non potes esse meus.
- M5_23 v.1 Herbarum fueras indutus, Basse, colores,
 2 jura theatralis dum siluere loci.
 3 Quae postquam placidi censoris cura renasci
 4 jussit et Oceanum certior audit eques,
 5 non nisi vel cocco madida vel murice tincta
 6 vest nites et te sic dare verba putas.
 7 Quadringtonorum nullae sunt, Basse, lacernae,
 8 aut meus ante omnis Cordus haberet equum.
- M5_24 v.1 Hermes Martia saeculi voluptas,
 2 Hermes omnibus eruditus armis,
 3 Hermes et gladiator et magister,
 4 Hermes turbo sui tremorque ludi,
 5 Hermes, quem timet Helius, sed unum,
 6 Hermes, cui cadit Advolans, sed uni,
 7 Hermes vincere nec ferire doctus,

- 8 Hermes subpositicius sibi ipse,
 9 Hermes divitiae locariorum,
 10 Hermes cura laborque ludiarum,
 11 Hermes belligera superbus hasta,
 12 Hermes aequoreo minax tridente,
 13 Hermes casside languida timendus,
 14 Hermes gloria Martis universi,
 15 Hermes omnia solus et ter unus.
- M5_25 v.1 "Quadringenta tibi non sunt, Chaerestrata : surge,
 2 Leitus ecce venit : sta, fuge, curre, late."
 3 Ecquis, io, revocat discedentemque reducit ?
 4 ecquis, io, largas pandit amicus opes ?
 5 quem chartis famaeque damus populisque loquendum ?
 6 quis Stygios non volt totus adire lacus ?
 7 Hoc, rogo, non melius quam rubro pulpita nimbo
 8 spargere et effuso permaduisse croco ?
 9 quam non sensuro dare quadringenta caballo,
 10 aureus ut Scorpi nasus ubique micet ?
 11 O frustra locuples, o dissimulator amici,
 12 haec legis et laudas ? Quae tibi fama perit !
- M5_26 v.1 Quod alpha dixi, Corde, paenulatorum
 2 te nuper, aliqua cum jocarer in charta,
 3 si forte bilem movit hic tibi versus,
 4 dicas licebit beta me togatorum.
- M5_27 v.1 Ingenium studiumque tibi moresque genusque
 2 sunt equitis, fateor : cetera plebis habes.
 3 Bis septena tibi non sint subsellia tanti,
 4 ut sedeas viso pallidus Oceano.
- M5_28 v.1 Ut bene loquatur sentiatque Mamercus,
 2 efficere nullis, Aule, moribus possis :
 3 pietate fratres Curvios licet vincas,
 4 quiete Nervas, comitate Rusones,
 5 probitate Macros, aequitate Mauricos,
 6 oratione Regulos, jocis Paulos :
 7 robiginosis cuncta dentibus rodit.
 8 Hominem malignum forsitan esse tu credas :
 9 ego esse miserum credo, cui placet nemo.
- M5_29 v.1 Si quando leporem mittis mihi, Gellia, dicis :
 2 "Formonsus septem, Marce, diebus eris."
 3 Si non derides, si verum, lux mea, narras,
 4 edisti numquam, Gellia, tu leporem.
- M5_30 v.1 Varro, Sophocleo non infitiande cothurno
 2 nec minus in Calabria suspiciende lyra,
 3 differ opus nec te facundi scaena Catulli
 4 detineat cultis aut elegia comis ;
 5 sed lege fumoso non aspernanda Decembri
 6 carmina, mittuntur quae tibi mense suo :
 7 commodius nisi forte tibi potiusque videtur
 8 Saturnalicias perdere, Varro, nuces.
- M5_31 v.1 Aspice quam placidis insultet turba juvenis

- 2 et sua quam facilis pondera taurus amet.
 3 Cornibus hic pendet summis, vagus ille per armos
 4 currit et in toto ventilat arma bove.
 5 At feritas immota riget : non esset harena
 6 tutior et poterant fallere plana magis.
 7 Nec trepidant gestus, sed de discrimine palmae
 8 securus puer est sollicitumque pecus.
- M5_32 v.1 Quadrantem Crispus tabulis, Faustine, supremis
 2 non dedit uxori. "Cui dedit ergo ?" Sibi.
- M5_33 v.1 Carpere causidicus fertur mea carmina : qui sit
 2 nescio. Si sciero, vae tibi, causidice.
- M5_34 v.1 Hanc tibi, Fronto pater, genetrix Flaccilla, puellam
 2 oscula commendo deliciasque meas,
 3 parvola ne nigras horrescat Erotion umbras
 4 oraue Tartarei prodigiosa canis.
 5 Impletura fuit sextae modo frigora brumae,
 6 vixisset totidem ni minus illa dies.
 7 Inter tam veteres ludat lasciva patronos
 8 et nomen blaeso garriat ore meum.
 9 Mollia non rigidus caespes tegat ossa nec illi,
 10 terra, gravis fueris : non fuit illa tibi.
- M5_35 v.1 Dum sibi redire de Patrensibus fundis
 2 ducena clamat coccinatus Euclides
 3 Corinthioque plura de suburbano
 4 longumque pulchra stemma repetit a Leda
 5 et suscitanti Leito reluctatur,
 6 equiti superbo, nobili, locupleti
 7 cecidit repente magna de sinu clavis.
 8 Numquam, Fabulle, nequior fuit clavis.
- M5_36 v.1 Laudatus nostro quidam, Faustine, libello
 2 dissimulat, quasi nil debeat : inposuit.
- M5_37 v.1 Puella senibus dulcior mihi cycnis,
 2 agno Galaesi mollior Phalantini,
 3 concha Lucrini delicatior stagni,
 4 cui nec lapillos praeferas Erythraeos
 5 nec modo politum pecudis Indicae dentem
 6 nivesque primas liliūque non tactum ;
 7 quae crine vicit Baetici gregis vellus
 8 Rhenique nodos aureamque nitelam ;
 9 fragravat ore quod rosarium Paesti,
 10 quod Atticarum prima mella cerarum,
 11 quod sucinorum rapta de manu gleba ;
 12 cui comparatus indecens erat pavo,
 13 inamabilis sciurus et frequens phoenix,
 14 adhuc recenti tepet Erotion busto,
 15 quam pessimorum lex amara fatorum
 16 sexta peregit hieme, nec tamen tota,
 17 nostros amores gaudiumque lususque.
 18 Et esse tristem me meus vetat Paetus,
 19 pectusque pulsans pariter et comam vellens :
 20 "Deflere non te vernulae pudet mortem ?"

- 21 Ego conjugem" inquit "extuli et tamen vivo,
 22 notam, superbam, nobilem, locupletem."
 23 Quid esse nostro fortius potest Paeto ?
 24 Ducentiens accepit, et tamen vivit !
- M5_38 v.1 Calliodorus habet censum - quis nescit ? - equestrem,
 2 Sexte, sed et fratrem Calliodorus habet.
 3 "Quadringenta seca" qui dicit Suka Merizei
 4 uno credis equo posse sedere duos ?
 5 Quid cum fratre tibi, quid cum Polluce molesto ?
 6 non esset Pollux si tibi, Castor eras.
 7 Unus cum sitis, duo, Calliodore, sedebis ?
 8 Surge : Soloikismon, Calliodore, facis.
 9 Aut imitare genus Ledae : cum fratre sedere
 10 non potes, alternis, Calliodore, sede.
- M5_39 v.1 Supremas tibi triciens in anno
 2 signanti tabulas, Charine, misi
 3 Hyblaeis madidas thymis placentas.
 4 Defeci : miserere jam, Charine :
 5 signa rarius, aut semel fac illud,
 6 mentitur tua quod subinde tussis.
 7 Excussi loculosque sacculumque :
 8 Croeso divitior licet fuissem,
 9 Iro pauperior forem, Charine,
 10 si conchem totiens meam comesses.
- M5_40 v.1 Pinxisti Venerem, colis, Artemidore, Minervam :
 2 et miraris opus displicuisse tuum ?
- M5_41 v.1 Spadone cum sis evirator fluxo,
 2 et concubino mollior Celaenaeo,
 3 quem sectus ululat matris enthaeae Gallus,
 4 theatra loqueris et gradus et edicta
 5 trabeasque et Idus fibulasque censusque,
 6 et pumicata pauperes manu monstras.
 7 Sedere in equitum liceat an tibi scamnis
 8 videbo, Didyme : non licet maritorum.
- M5_42 v.1 Callidus effracta nummos fur auferet arca,
 2 prosternet patrios impia flamma lares ;
 3 debitor usuram pariter sortemque negabit,
 4 non reddet sterilis semina jacta seges ;
 5 dispensatorem fallax spoliabit amica,
 6 mercibus extractas obruet unda rates.
 7 Extra fortunam est quidquid donatur amicis :
 8 quas dederis solas semper habebis opes.
- M5_43 v.1 Thais habet nigros, niveos Laecania dentes.
 2 Quae ratio est ? Emptos haec habet, illa suos.
- M5_44 v.1 Quid factum est, rogo, quid repente factum,
 2 ad cenam mihi, Dento, quod vocanti -
 3 quis credat ? - quater ausus es negare ?
 4 Sed nec respicis et fugis sequentem,
 5 quem thermis modo quaerere et theatri
 6 et conclavibus omnibus solebas.

- 7 Sic est, captus es unctiore mensa
8 et major rapuit canem culina.
9 Jam te, sed cito, cognitum et relictum
10 cum fastidierit popina dives,
11 antiquae venies ad ossa cenae.
- M5_45 v.1 Dicis formonsam, dicis te, Bassa, puellam :
2 istud quae non est dicere, Bassa, solet.
- M5_46 v.1 Basia dum nolo nisi quae luctantia carpsi,
2 et placet ira mihi plus tua quam facies,
3 ut te saepe rogem, caedo, Diadumene, saepe :
4 consequor hoc, ut me nec timeas nec ames.
- M5_47 v.1 Numquam se cenasse domi Philo jurat, et hoc est :
2 non cenat, quotiens nemo vocavit eum.
- M5_48 v.1 Quid non cogit amor ! Secuit nolente capillos
2 Encolpos domino, non prohibente tamen.
3 Permisit flevitque Pudens : sic cessit habenis
4 audaci questus de Phaethonte pater ;
5 talis raptus Hylas, talis deprensus Achilles
6 deposuit gaudens, matre dolente, comas.
7 Sed tu ne propera (brevibus ne crede capillis !)
8 tardaue pro tanto munere, barba, veni.
- M5_49 v.1 Vidissem modo forte cum sedentem
2 solum te, Labiene, tres putavi.
3 Calvae me numerus tuae fefellit :
4 sunt illinc tibi, sunt et hinc capilli
5 quales vel puerum decere possunt ;
6 nudumst in medio caput nec ullus
7 in longa pilus area notatur.
8 Hic error tibi profuit Decembri,
9 tunc cum prandia misit Imperator :
10 cum panariolis tribus redisti.
11 Talem Geryonem fuisse credo.
12 Vites censeo porticum Philippi :
13 si te viderit Hercules, peristi.
- M5_50 v.1 Ceno domi quotiens, nisi te, Charopine, vocavi,
2 protinus ingentes sunt inimicitiae,
3 meque potes stricto medium transfigere ferro,
4 si nostrum sine te scis caluisse focum.
5 Nec semel ergo mihi furtum fecisse licebit ?
6 Inprobium nihil est hac, Charopine, gula.
7 Desine jam nostram, precor, observare culinam
8 atque aliquando meus det tibi verba cocus.
- M5_51 v.1 Hic, qui libellis praegravem gerit laevam,
2 notariorum quem premit chorus levis,
3 qui codicillis hinc et inde prolatis
4 epistolisque commodat gravem voltum
5 similis Catoni Tullioque Brutoque,
6 exprimere, Rufe, fidiculae licet cogant,
7 have Latinum, Chaire non potest Graecum.
8 Si fingere istud me putas, salutemus.

- M5_52 v.1 Quae mihi praestiteris meministi semperque tenebo.
 2 Cur igitur taceo, Postume ? Tu loqueris.
 3 Incipio quotiens alicui tua dona referre,
 4 protinus exclamat : "Dixerat ipse mihi."
 5 Non belle quaedam faciunt duo : sufficit unus
 6 huic operi : si vis ut loquar, ipse tace.
 7 Crede mihi, quamvis ingentia, Postume, dona
 8 auctoris pereunt garrulitate sui.
- M5_53 v.1 Colchida quid scribis, quid scribis, amice, Thyesten ?
 2 Quo tibi vel Nioben, Basse, vel Andromachen ?
 3 Materia est, mihi crede, tuis aptissima chartis
 4 Deucalion vel, si non placet hic, Phaethon.
- M5_54 v.1 Extemporalis factus est meus rhetor :
 2 Calpurnium non scripsit, et salutavit.
- M5_55 v.1 Dic mihi, quem portas, volucrum regina ? "Tonantem."
 2 Nulla manu quare fulmina gestat ? "Amat."
 3 Quo calet igne deus ? "Pueri." Cur mitis aperto
 4 respicis ore Jovem ? "De Ganymede loquor."
- M5_56 v.1 Cui tradas, Lupe, filium magistro
 2 quaeris sollicitus diu rogasque.
 3 Omnes grammaticosque rhetorasque
 4 devites moneo : nihil sit illi
 5 cum libris Ciceronis aut Maronis ;
 6 famae Tutilium suae relinquat ;
 7 si versus facit, abdicet poetam.
 8 Artes discere volt pecuniosas ?
 9 Fac discat citharoedus aut choraules ;
 10 si duri puer ingeni videtur,
 11 praeconem facias vel architectum.
- M5_57 v.1 Cum voco te dominum, noli tibi, Cinna, placere :
 2 saepe etiam servum sic resaluto tuum.
- M5_58 v.1 Cras te victurum, cras dicis, Postume, semper :
 2 dic mihi, cras istud, Postume, quando venit ?
 3 Quam longe cras istud ! Ubi est ? Aut unde petendum ?
 4 Numquid apud Parthos Armeniosque latet ?
 5 Jam cras istud habet Priami vel Nestoris annos.
 6 Cras istud quanti, dic mihi, possit emi ?
 7 Cras vives ? Hodie jam vivere, Postume, serum est :
 8 ille sapit quisquis, Postume, vixit heri.
- M5_59 v.1 Quod non argentum, quod non tibi mittimus aurum,
 2 hoc facimus causa, Stella diserte, tua.
 3 Quisquis magna dedit, voluit sibi magna remitti ;
 4 fictilibus nostris exoneratus eris.
- M5_60 v.1 Adlatres licet usque nos et usque
 2 et gannitibus improbis lacessas,
 3 certum est hanc tibi pernegare famam,
 4 olim quam petis, in meis libellis
 5 qualiscumque legaris ut per orbem.

- 6 Nam te cur aliquis sciat fuisse ?
7 Ignotus pereas, miser, necesse est.
8 Non derunt tamen hac in urbe forsitan
9 unus vel duo tresve quattuorve,
10 pellem rodere qui velint caninam :
11 nos hac a scabie tenemus ungues.
- M5_61 v.1 Crispulus iste quis est, uxori semper adhaeret
2 qui, Mariane, tuae ? Crispulus iste quis est ?
3 nescio quid dominae teneram qui garrit in aurem
4 et sellam cubito dexteriore premit ?
5 Per cujus digitos currit levis anulus omnis,
6 crura gerit nullo qui violata pilo ?
7 Nil mihi respondes ? "Uxor res agit" inquis
8 "iste meae." Sane certus et asper homo est,
9 procuratorem voltu qui praeferat ipso :
10 acrior hoc Chius non erit Aufidius.
11 O quam dignus eras alapis, Mariane, Latini :
12 te successurum credo ego Panniculo.
13 Res uxoris agit ? Res ullas Crispulus iste ?
14 Res non uxoris, res agit iste tuas.
- M5_62 v.1 Jure tuo nostris maneat licet, hospes, in hortis,
2 si potes in nudo ponere membra solo,
3 aut si portatur tecum tibi magna supellex :
4 nam mea jam digitum sustulit hospitibus.
5 Nulla tegit fractos (nec inanis) culcita lectos,
6 putris et abrupta fascia reste jacet.
7 Sit tamen hospitium nobis commune duobus :
8 emi hortos : plus est ; instrue tu : minus est.
- M5_63 v.1 Quid sentis" inquis "de nostris, Marce, libellis ?"
2 Sic me sollicitus, Pontice, saepe rogas.
3 Admiror, stupeo : nihil est perfectius illis,
4 ipse tuo cedit Regulus ingenio.
5 "Hoc sentis ?" inquis "faciat tibi sic bene Caesar,
6 sic Capitolinus Juppiter." Immo tibi.
- M5_64 v.1 Sextantes, Calliste, duos infunde Falerni,
2 tu super aestivas, Alcime, solve nives ;
3 pinguescat nimio madidus mihi crinis amomo
4 lassenturque rosis tempora sutilibus.
5 Tam vicina jubent non vivere Mausolea,
6 cum doceant ipsos posse perire deos.
- M5_65 v.1 Astra polumque dedit, quamvis obstante noverca,
2 Alcidae Nemees terror et Arcas aper
3 et castigatum Libycae ceroma palaestrae
4 et gravis in Siculo pulvere fusus Eryx,
5 silvarumque tremor, tacita qui fraude solebat
6 ducere non rectas Cacus in antra boves.
7 Ista tuae, Caesar, quota pars spectatur harenae ?
8 Dat majora novus proelia mane dies.
9 Quot graviora cadunt Nemeaeo pondera monstro !
10 Quot tua Maenaios conlocat hasta sues !
11 Reddatur si pugna triplex pastoris Hiberi,
12 est tibi qui possit vincere Geryonen.

- 13 Saepe licet Graiae numeretur belua Lernae,
 14 inproba Niliacis quid facit Hydra feris ?
 15 Pro meritis caelum tantis, Auguste, dederunt
 16 Alcidae cito di, sed tibi sero dabunt.
- M5_66 v.1 Saepe salutatus numquam prior ipse salutas :
 2 sic eris Aeternum, Pontiliane, vale.
- M5_67 v.1 Hibernos peterent solito cum more recessus
 2 Atthides, in nidis una remansit avis.
 3 Deprendere nefas ad tempora verna reversae
 4 et profugam volucres diripere suae.
 5 Sero dedit poenas : discerpi noxia mater
 6 debuerat, sed tunc cum laceravit Ityn.
- M5_68 v.1 Arctoa de gente comam tibi, Lesbia, misi,
 2 ut scires quanto sit tua flava magis.
- M5_69 v.1 Antoni Phario nihil objecture Pothino
 2 et levius tabula quam Cicerone nocens,
 3 quid gladium demens Romana stringis in ora ?
 4 hoc admisisset nec Catilina nefas.
 5 Impius infando miles corrumpitur auro,
 6 et tantis opibus vox tacet una tibi.
 7 Quid prosunt sacrae pretiosa silentia linguae ?
 8 Incipient omnes pro Cicerone loqui.
- M5_70 v.1 Infusum sibi nuper a patrono
 2 plenum, Maxime, centiens Syrius
 3 in sellariolis vagus popinis
 4 circa balnea quattuor peregit.
 5 O quanta est gula, centiens comesse !
 6 Quanto major adhuc, nec accubare !
- M5_71 v.1 Umida qua gelidas summittit Trebula valles
 2 et viridis cancri mensibus alget ager,
 3 rura Cleonaeo numquam temerata leone
 4 et domus Aeolio semper amica Noto
 5 te, Faustine, vocant : longas his exige messes
 6 collibus ; hibernum jam tibi Tibur erit.
- M5_72 v.1 Qui potuit Bacchi matrem dixisse Tonantem,
 2 ille potest Semelen dicere, Rufe, patrem.
- M5_73 v.1 Non donem tibi cur meos libellos
 2 oranti totiens et exigenti
 3 miraris, Theodore ? Magna causa est :
 4 dones tu mihi ne tuos libellos.
- M5_74 v.1 Pompeios juvenes Asia atque Europa, sed ipsum
 2 terra tegit Libyes, si tamen ulla tegit.
 3 Quid mirum toto si spargitur orbe ? Jacere
 4 uno non poterat tanta ruina loco.
- M5_75 v.1 Quae legis causa nupsit tibi Laelia, Quinte,
 2 uxorem potes hanc dicere legitimam.

- M5_76 v.1 Profecit poto Mithridates saepe veneno
 2 toxica ne possent saeva nocere sibi.
 3 Tu quoque cavisti cenando tam male semper
 4 ne posses umquam, Cinna, perire fame.
- M5_77 v.1 Narratur belle quidam dixisse, Marulle,
 2 qui te ferre oleum dixit in auricula.
- M5_78 v.1 Si tristi domicenio laboras,
 2 Torani, potes esurire mecum.
 3 Non derunt tibi, si soles Propinein,
 4 viles Cappadocae gravesque porri,
 5 divisis cybium latebit ovis.
 6 Ponetur digitus tenendus unctis
 7 nigra coliculus virens patella,
 8 argentem modo qui reliquit hortum,
 9 et pultem niveam premens botellus,
 10 et pallens faba cum rubente lardo.
 11 Mensae munera si voles secundae,
 12 marcentes tibi porrigentur uvae
 13 et nomen pira quae ferunt Syrorum,
 14 et quas docta Neapolis creavit,
 15 lento castaneae vapore tostae :
 16 vinum tu facies bonum bibendo.
 17 Post haec omnia forte si movebit
 18 Bacchus quam solet esuritionem,
 19 succurrent tibi nobiles olivae,
 20 Piceni modo quas tulere rami,
 21 et fervens cicero et tepens lupinus.
 22 Parva est cenula (quis potest negare ?)
 23 Sed finges nihil audiesve fictum
 24 et voltu placidus tuo recumbes ;
 25 nec crassum dominus leget volumen
 26 nec de Gadibus improbis puellae
 27 vibrabunt sine fine prurientes
 28 lascivos docili tremore lumbos ;
 29 sed quod nec grave sit nec infacetum,
 30 parvi tibia Condyli sonabit.
 31 Haec est cenula. Claudiam sequeris.
 32 Quam nobis cupis esse tu priorem ?
- M5_79 v.1 Undecies una surrexti, Zoile, cena,
 2 et mutata tibi est synthesis undecies,
 3 sudor inhaereret madida ne veste retentus
 4 et laxam tenuis laederet aura cutem.
 5 Quare ego non sudo, qui tecum, Zoile, ceno ?
 6 Frigus enim magnum synthesis una facit.
- M5_80 v.1 Non totam mihi, si vacabis, horam
 2 donec et licet inputes, Severe,
 3 dum nostras legis exigisque nugas.
 4 "Durum est perdere ferias" : rogamus
 5 jacturam patiaris hanc ferasque.
 6 Quod si legeris ista cum deserto
 7 (sed numquid sumus improbi ?) Secundo,
 8 plus multo tibi debiturus hic est
 9 quam debet domino suo libellus.

- 10 Nam securus erit, nec inquieta
11 lassi marmora Sisyphi videbit,
12 quem censoria cum meo Severo
13 docti lima momorderit Secundi.
- M5_81 v.1 Semper pauper eris, si pauper es, Aemiliane :
2 dantur opes nullis nunc nisi divitibus.
- M5_82 v.1 Quid promittebas mihi milia, Gaure, ducenta,
2 si dare non poteris milia, Gaure, decem ?
3 An potes et non vis ? Rogo, non est turpius istud ?
4 I, tibi dispereas, Gaure : pusillus homo es.
- M5_83 v.1 Insequeris, fugio ; fugis, insequor. Haec mihi mens est :
2 velle tuum nolo, Dindyme, nolle volo.
- M5_84 v.1 Jam tristis nucibus puer relictis
2 clamoso revocatur a magistro,
3 et blando male proditus fritillo,
4 arcana modo raptus e popina,
5 aedilem rogat udus aleator.
6 Saturnalia transiere tota,
7 nec munuscula parva nec minora
8 misisti mihi, Galla, quam solebas.
9 Sane sic abeat meus December :
10 scis certe, puto, vestra jam venire
11 Saturnalia, Martias Kalendas ;
12 tunc reddam tibi, Galla, quod dedisti.
- M6_1 v.1 Sextus mittitur hic tibi libellus,
2 in primis mihi care Martialis :
3 quem si terseris aure diligenti,
4 audebit minus anxius tremensque
5 magnas Caesaris in manus venire.
- M6_2 v.1 Lusus erat sacrae conubia fallere taedae,
2 lusus et immeritos exsecuisse mares.
3 Utraque tu prohibes, Caesar, populisque futuris
4 succurris, nasci quos sine fraude jubes.
5 Nec spado jam nec moechus erit te praeside quisquam :
6 at prius (o mores !) et spado moechus erat.
- M6_3 v.1 Nascere Dardanio promissum nomen Iulo
2 vera deum suboles ; nascere, magne puer,
3 cui pater aeternas post saecula tradat habenas,
4 quique regas orbem cum seniore senex.
5 Ipsa tibi niveo trahet aurea pollice fila
6 et totam Phruxi Julia nebit ovem.
- M6_4 v.1 Censor maxime principumque princeps,
2 cum tot jam tibi debeat triumphos,
3 tot nascentia templa, tot renata,

- 4 tot spectacula, tot deos, tot urbes,
5 plus debet tibi Roma quod pudica est.
- M6_5 v.1 Rustica mercatus multis sum praedia nummis ;
2 mutua des centum, Caeciliane, rogo.
3 Nil mihi respondes ? Tacitum te dicere credo
4 "Non reddes" : ideo, Caeciliane, rogo.
- M6_6 v.1 Comoedi tres sunt, sed amat tua Paula, Luperce,
2 quattuor : et "Cophon" Paula "Prosopon" amat.
- M6_7 v.1 Julia lex populis ex quo, Faustine, renata est
2 atque intrare domos jussa Pudicitia est,
3 aut minus aut certe non plus tricesima lux est,
4 et nubit decimo jam Telesilla viro.
5 Quae nubit totiens, non nubit : adultera lege est.
6 Offendor moecha simpliciore minus.
- M6_8 v.1 Praetores duo, quattuor tribuni,
2 septem causidici, decem poetae
3 cujusdam modo nuptias petebant
4 a quodam sene. Non moratus ille
5 praeconi dedit Eulogo puellam.
6 Dic, numquid fatue, Severe, fecit ?
- M6_9 v.1 In Pompeiano dormis, Laevine, theatro :
2 et quereris si te suscitatur Oceanus ?
- M6_10 v.1 Pauca Jovem nuper cum milia forte rogarem,
2 "Ille dabit" dixit "qui mihi templa dedit."
3 Templa quidem dedit ille Jovi, sed milia nobis
4 nulla dedit : pudet, ah, pauca rogasse Jovem.
5 At quam non tetricus, quam nulla nubilus ira,
6 quam placido nostras legerat ore preces !
7 Talis supplicibus tribuit diademata Dacis
8 et Capitolinas itque reditque vias.
9 Dic precor, o nostri dic conscia virgo Tonantis,
10 si negat hoc voltu, quo solet ergo dare ?
11 Sic ego : sic breviter posita mihi Gorgone Pallas :
12 "Quae nondum data sunt, stulte, negata putas ?"
- M6_11 v.1 Quod non sit Pylades hoc tempore, non sit Orestes
2 miraris ? Pylades, Marce, bibebat idem,
3 nec melior panis turdusve dabatur Orestae,
4 sed par atque eadem cena duobus erat.
5 Tu Lucrina voras, me pascit aquosa peloris :
6 non minus ingenua est et mihi, Marce, gula.
7 Te Cadmea Tyros, me pinguis Gallia vestit :
8 vis te purpureum, Marce, sagatus amem ?
9 Ut praestem Pyladen, aliquis mihi praestet Orestem.
10 Hoc non fit verbis, Marce : ut ameris, ama.
- M6_12 v.1 Jurat capillos esse, quos emit, suos
2 Fabulla : numquid illa, Paule, pejerat ?
- M6_13 v.1 Quis te Phidiaco formatam, Julia, caelo,
2 vel quis Palladiae non putet artis opus ?

- 3 Candida non tacita respondet imagine lygdos
4 et placido fulget vivus in ore decor.
5 Ludit Acidalio, sed non manus aspera, nodo,
6 quem rapuit collo, parve Cupido, tuo.
7 Ut Martis revocetur amor summique Tonantis,
8 a te Juno petat ceston et ipsa Venus.
- M6_14 v.1 Versus scribere posse te disertos
2 adfirmas, Laberi : quid ergo non vis ?
3 Versus scribere qui potest disertos,
4 conscribat, Laberi : virum putabo.
- M6_15 v.1 Dum Phaethontea formica vagatur in umbra,
2 implicuit tenuem sucina gutta feram.
3 Sic modo quae fuerat vita contempta manente,
4 funeribus facta est nunc pretiosa suis.
- M6_16 v.1 Tu qui pene viros terres et falce cinaedos,
2 jugera sepositi pauca tuere soli.
3 Sic tua non intrent vetuli pomaria fures,
4 sed puer et longis pulchra puella comis.
- M6_17 v.1 Cinnam, Cinname, te jubes vocari :
2 non est hic, rogo, Cinna, barbarismus ?
3 Tu si Furius ante dictus esses,
4 Fur ista ratione dicereris.
- M6_18 v.1 Sancta Salonini terris requiescit Hiberis,
2 qua melior Stygias non videt umbra domos.
3 Sed lugere nefas : nam qui te, Prisce, reliquit,
4 vivit qua voluit vivere parte magis.
- M6_19 v.1 Non de vi neque caede nec veneno,
2 sed lis est mihi de tribus capellis :
3 vicini queror has abesse furto.
4 Hoc judex sibi postulat probari :
5 tu Cannas Mithridaticumque bellum
6 et perjuriam Punici furoris
7 et Sullas Mariosque Muciosque
8 magna voce sonas manuque tota.
9 Jam dic, Postume, de tribus capellis.
- M6_20 v.1 Mutua te centum sestertia, Phoebe, rogavi,
2 cum mihi dixisses "Exigis ergo nihil ?"
3 Inquiris, dubitas, cunctaris meque diebus
4 teque decem crucias : jam rogo, Phoebe, nega.
- M6_21 v.1 Perpetuam Stella dum jungit Ianthida vati
2 laeta Venus, dixit "Plus dare non potui."
3 Haec coram domina ; sed nequius illud in aurem :
4 "Tu ne quid pecces, exitiose, vide.
5 Saepe ego lascivom Martem furibunda cecidi,
6 legitimos esset cum vagus ante toros ;
7 sed postquam meus est, nulla me paelice laesit :
8 tam frugi Juno vellet habere virum."
9 Dixit et arcano percussit pectora loro.
10 Plaga juvat : sed tu jam, dea, caede duos.

- M6_22 v.1 Quod nubis, Proculina, concubino
2 et, moechum modo, nunc facis maritum,
3 ne lex Julia te notare possit :
4 non nubis, Proculina, sed fateris.
- M6_23 v.1 Stare jubes semper nostrum tibi, Lesbia, penem :
2 crede mihi, non est mentula quod digitus.
3 Tu licet et manibus blandis et vocibus instes,
4 te contra facies imperiosa tua est.
- M6_24 v.1 Nil lascivius est Charisiano :
2 Saturnalibus ambulat togatus.
- M6_25 v.1 Marcelline, boni suboles sincera parentis,
2 horrida Parrhasio quem tegit ursa jugo,
3 ille vetus pro te patriusque quid optet amicus
4 accipe et haec memori pectore vota tene :
5 causa sit ut virtus nec te temerarius ardor
6 in medios enses saevaue tela ferat.
7 Bella velint Martemque ferum rationis egentes,
8 tu potes et patris miles et esse ducis.
- M6_26 v.1 Periclitatur capite Sotades noster.
2 Reum putatis esse Sotaden ? Non est.
3 Arrigere desit posse Sotades : lingit.
- M6_27 v.1 Bis vicine Nepos (nam tu quoque proxima Florae
2 incolis et veteres tu quoque Ficelias ?
3 Est tibi, quae patria signatur imagine voltus,
4 testis maternae nata pudicitiae.
5 Tu tamen annoso nimium ne parce Falerno,
6 et potius plenos aere relinque cados.
7 Sit pia, sit locuples, sed potet filia mustum :
8 amphora cum domina nunc nova fiet anus.
9 Caecuba non solos vindemia nutriat orbos :
10 possunt et patres vivere, crede mihi.
- M6_28 v.1 Libertus Melioris ille notus,
2 tota qui cecidit dolente Roma,
3 cari deliciae breves patroni,
4 hoc sub marmore Glaucias humatus
5 juncto Flaminiae jacet sepulcro :
6 castus moribus, integer pudore,
7 velox ingenio, decore felix.
8 Bis senis modo messibus peractis
9 vix unum puer adplicabat annum.
10 Qui fles talia, nil fleas, viator.
- M6_29 v.1 Non de plebe domus nec avarae verna catastae,
2 sed domini sancto dignus amore puer,
3 munera cum posset nondum sentire patroni,
4 Glaucia libertus jam Melioris erat.
5 Moribus hoc formaeque datum : quis blandior illo ?
6 Aut quis Apollineo pulchrior ore fuit ?
7 Inmodicis brevis est aetas et rara senectus.
8 Quidquid amas, cupias non placuisse nimis.

- M6_30 v.1 Sex sestertia si statim dedisses,
2 cum dixti mihi "Sume, tolle, dono,"
3 deberem tibi, Paete, pro ducentis.
4 At nunc cum dederis diu moratus,
5 post septem, puto, vel novem Kalendas,
6 vis dicam tibi veriora veris ?
7 Sex sestertia, Paete, perdidisti.
- M6_31 v.1 Uxorem, Charideme, tuam scis ipse sinisque
2 a medico futui : vis sine febre mori.
- M6_32 v.1 Cum dubitaret adhuc belli civilis Enyo
2 forsitan et posset vincere mollis Otho,
3 damnavit multo staturum sanguine Martem
4 et fodit certa pectora tota manu.
5 Sit Cato, dum vivit, sane vel Caesare major :
6 dum moritur, numquid major Othone fuit ?
- M6_33 v.1 Nil miserabilius, Matho, pedicone Sabello
2 vidisti, quo nil laetius ante fuit.
3 Furta, fugae, mortes servorum, incendia, luctus
4 adfligunt hominem, jam miser et futuit.
- M6_34 v.1 Basia da nobis, Diadumene, pressa. "Quot ?" inquis.
2 Oceani fluctus me numerare jubes
3 et maris Aegaei sparsas per litora conchas
4 et quae Cecropio monte vagantur apes,
5 quaeque sonant pleno vocesque manusque theatro
6 cum populus subiti Caesaris ora videt.
7 Nolo quot arguto dedit exorata Catullo
8 Lesbia : pauca cupit qui numerare potest.
- M6_35 v.1 Septem clepsydras magna tibi voce petenti
2 arbiter invitus, Caeciliane, dedit.
3 At tu multa diu dicis vitreisque tepentem
4 ampullis potas semisupinus aquam.
5 Ut tandem saties vocemque sitimque, rogamus
6 jam de clepsydra, Caeciliane, bibas.
- M6_36 v.1 Mentula tam magna est quantus tibi, Papyle, nasus,
2 ut possis, quotiens arrigis, olfacere.
- M6_37 v.1 Secti podicis usque ad umbilicum
2 nullas relliquias habet Charinus,
3 et prurit tamen usque ad umbilicum.
4 O quanta scabie miser laborat !
5 Culum non habet, est tamen cinaedus.
- M6_38 v.1 Aspicias ut parvus nec adhuc trieteride plena
2 Regulus auditum laudet et ipse patrem ?
3 Maternosque sinus viso genitore relinquat
4 et patrias laudes sentiat esse suas ?
5 Jam clamor centumque viri densumque corona
6 volgus et infanti Julia tecta placent.
7 Acris equi suboles magno sic pulvere gaudet,
8 sic vitulus molli proelia fronte cupit.

- 9 Di, servate, precor, matri sua vota patrique,
10 audiat ut natum Regulus, illa duos.
- M6_39 v.1 Pater ex Marulla, Cinna, factus es septem
2 non liberorum : namque nec tuus quisquam
3 nec est amici filiusve vicini,
4 sed in grabatis tegetibusque concepti
5 materna produnt capitibus suis furta.
6 Hic qui retorto crine Maurus incedit
7 subolem fatetur esse se coci Santrae ;
8 at ille sima nare, turgidis labris
9 ipsa est imago Pannychi palaestritae.
10 Pistoris esse tertium quis ignorat,
11 quicumque lippum novit et videt Damam ?
12 Quartus cinaeda fronte, candido voltu
13 ex concubino natus est tibi Lygdo :
14 percide, si vis, filium : nefas non est.
15 Hunc vero acuto capite et auribus longis,
16 quae sic moventur ut solent asellorum,
17 quis morionis filium negat Cyrtae ?
18 Duae sorores, illa nigra et haec rufa,
19 Croti choraulae vilicique sunt Carpi.
20 Jam Niobidarum grex tibi foret plenus
21 si spado Coresus Dindymusque non esset.
- M6_40 v.1 Femina praeferri potuit tibi nulla, Lycori :
2 praeferri Glycerae femina nulla potest.
3 Haec erit hoc quod tu : tu non potes esse quod haec est.
4 Tempora quid faciunt ! Hanc volo, te volui.
- M6_41 v.1 Qui recitat lana fauces et colla revinctus,
2 hic se posse loqui, posse tacere negat.
- M6_42 v.1 Etrusci nisi thermulis lavis,
2 inlotus morieris, Oppiane.
3 Nullae sic tibi blandientur undae,
4 non fontes Aponi rudes puellis,
5 non mollis Sinuessa fervidique
6 fluctus Passeris aut superbus Anxur,
7 non Phoebi vada principesque Baiae.
8 Nusquam tam nitidum vacat serenum :
9 lux ipsa est ibi longior, diesque
10 nullo tardius a loco recedit.
11 Illic Taygeti virent metalla
12 et certant vario decore saxa,
13 quae Phryx et Libys altius cecidit.
14 Siccus pinguis onyx anhelat aestus
15 et flamma tenui calent ophitae :
16 ritus si placeant tibi Laconum,
17 contentus potes arido vapore
18 cruda Virgine Marciave mergi ;
19 quae tam candida, tam serena lucet
20 ut nullas ibi suspiceris undas
21 et credas vacuam nitere lygdon.
22 Non adtendis et aure me supina
23 jam dudum quasi negligenter audis :
24 inlotus morieris, Oppiane.

- M6_43 v.1 Dum tibi felices indulgent, Castrice, Baiae
 2 canaque sulphureis nympha natatur aquis,
 3 me Nomentani confirmant otia ruris
 4 et casa jugeribus non onerosa suis.
 5 Hoc mihi Baiani soles mollisque Lucrinus,
 6 hoc vestrae mihi sunt, Castrice, divitiae.
 7 Quondam laudatas quocumque libebat ad undas
 8 currere nec longas pertimuisse vias,
 9 nunc urbis vicina juvant facilesque recessus,
 10 et satis est pigro si licet esse mihi.
- M6_44 v.1 Festive credis te, Calliodore, jocari
 2 et solum multo permaduisse sale.
 3 Omnibus adrides, dicteria dicis in omnis ;
 4 sic te convivam posse placere putas.
 5 At si ego non belle, sed vere dixero quiddam,
 6 nemo propinabit, Calliodore, tibi.
- M6_45 v.1 Lusistis, satis est : lascivi nubite cunni :
 2 permissa est vobis non nisi casta Venus.
 3 Haec est casta Venus ? Nubit Laetoria Lygdo :
 4 turpius uxor erit quam modo moecha fuit.
- M6_46 v.1 Vapulat adsiduo veneti quadriga flagello
 2 nec currit : magnam rem, Catiane, facit.
- M6_47 v.1 Nympha, mei Stellae quae fonte domestica puro
 2 laberis et domini gemmea tecta subis,
 3 sive Numae conjunx Triviae te misit ab antris
 4 sive Camenarum de grege nona venis :
 5 exolvit votis hac se tibi virgine porca
 6 Marcus, furtivam quod bibit, aeger, aquam.
 7 Tu contenta meo jam crimine gaudia fontis
 8 da secreta tui : sit mihi sana sitis.
- M6_48 v.1 Quod tam grande sophos clamat tibi turba togata,
 2 non tu, Pomponi, cena diserta tua est.
- M6_49 v.1 Non sum de fragili dolatus ulmo,
 2 nec quae stat rigida supina vena
 3 de ligno mihi quolibet columna est,
 4 sed viva generata de cupressu :
 5 quae nec saecula centiens peracta
 6 nec longae cariem timet senectae.
 7 Hanc tu, quisquis es o malus, timeto :
 8 nam si vel minimos manu rapaci
 9 hoc de palmite laeseris racemos,
 10 nascetur, licet hoc velis negare,
 11 inserta tibi ficus a cupressu.
- M6_50 v.1 Cum coleret puros pauper Telesinus amicos,
 2 errabat gelida sordidus in togula :
 3 obscenos ex quo coepit curare cinaedos,
 4 argentum, mensas, praedia solus emit.
 5 Vis fieri dives, Bitynice ? Conscius esto.
 6 Nil tibi vel minimum basia pura dabunt.

- M6_51 v.1 Quod convivaris sine me tam saepe, Luperce,
2 inveni noceam qua ratione tibi.
3 Irascor : licet usque voces mittasque rogesque ?
4 "Quid facies ?" inquis. Quid faciam ? Veniam.
- M6_52 v.1 Hoc jacet in tumulto raptus puerilibus annis
2 Pantagathus, domini cura dolorque sui,
3 nix tangente vagos ferro resecare capillos
4 doctus et hirsutas excoluisse genas.
5 Sis licet, ut debes, tellus, placata levisque,
6 artificis levior non potes esse manu.
- M6_53 v.1 Lotus nobiscum est, hilaris cenavit, et idem
2 inventus mane est mortuus Andragoras.
3 Tam subitae mortis causam, Faustine, requiris ?
4 In somnis medicum viderat Hermocraten.
- M6_54 v.1 Tantos et tantas si dicere Sextilianum,
2 Aule, vetes, junget vix tria verba miser.
3 "Quid sibi vult ?" inquis. Dicam quid suspicer esse :
4 tantos et tantas Sextilianus amat.
- M6_55 v.1 Quod semper casiaque cinnamoque
2 et nido niger alitis superbae
3 fragras plumbea Nicerotiana,
4 rides nos, Coracine, nil olentis,
5 malo quam bene olere nil olere.
- M6_56 v.1 Quod tibi crura rigent saetis et pectora villis,
2 verba putas famae te, Charideme, dare.
3 Extirpa, mihi crede, pilos de corpore toto
4 teque pilare tuas testificare natis.
5 "Quae ratio est ?" inquis. Scis multos dicere multa :
6 fac pedicari te, Charideme, putent.
- M6_57 v.1 Mentiris fictos unguento, Phoebe, capillos
2 et tegitur pictis sordida calva comis.
3 Tonsorem capiti non est adhibere necesse :
4 radere te melius spongea, Phoebe, potest.
- M6_58 v.1 Cernere Parrhasios dum te juvat, Aule, triones
2 comminus et Getici sidera pigra poli,
3 o quam paene tibi Stygias ego raptus ad undas
4 Elysiae vidi nubila fusca plagae !
5 Quamvis lassa tuos quaerebant lumina voltus
6 atque erat in gelido plurimus ore Pudens.
7 Si mihi lanificae ducunt non pulla sorores
8 stamina nec surdos vox habet ista deos,
9 sospite me sospes Latias reveheris ad urbes
10 et referes pili praemia clarus eques.
- M6_59 v.1 Et dolet et queritur sibi non contingere frigus
2 propter sescentas Baccara gausapinas,
3 optat et obscuras lucas ventosque nivesque,
4 odit et hibernos, si tepuere, dies.
5 Quid fecere mali nostrae tibi, saeve, lacernae

- 6 tollere de scapulis quas levis aura potest ?
 7 Quanto simplicius, quanto est humanius illud,
 8 mense vel Augusto sumere gausapinas !
- M6_60 v.1 Laudat, amat, cantat nostros mea Roma libellos,
 2 meque sinus omnes, me manus omnis habet.
 3 Ecce rubet quidam, pallet, stupet, oscitat, odit.
 4 Hoc volo : nunc nobis carmina nostra placent.
- M6_61 v.1 Rem factam Pompullus habet, Faustine : legetur
 2 et nomen toto sparget in orbe suum.
 3 "Sic leve flavorum valeat genus Usipiorum
 4 quisquis et Ausonium non amat imperium."
 5 Ingeniosa tamen Pompulli scripta feruntur.
 6 "Sed famae non est hoc, mihi crede, satis :
 7 quam multi tineas pascunt blattasque diserti
 8 et redimunt soli carmina docta coci !
 9 Nescio quid plus est, quod donat saecula chartis :
 10 victurus genium debet habere liber."
- M6_62 v.1 Amisit pater unicum Salanus
 2 cessas munera mittere, Oppiane ?
 3 Heu crudele nefas malaque Parcae !
 4 Cujus vulturis hoc erit cadaver ?
- M6_63 v.1 Scis te captari, scis hunc qui captat, avarum,
 2 et scis qui captat quid, Mariane, velit.
 3 Tu tamen hunc tabulis heredem, stulte, supremis
 4 scribis et esse tuo vis, furiose, loco.
 5 "Munera magna tamen misit." Sed misit in hamo ;
 6 et piscatorem piscis amare potest ?
 7 Hicine deflebit vero tua fata dolore ?
 8 Si cupis, ut ploret, des, Mariane, nihil.
- M6_64 v.1 Cum sis nec rigida Fabiorum gente creatus
 2 nec qualem Curio, dum prandia portat aranti,
 3 hirsuta peperit rubicunda sub ilice conjunx,
 4 sed patris ad speculum tonsi matrisque togatae
 5 filius, et possit sponsam te sponsa vocare :
 6 emendare meos, quos novit fama, libellos
 7 et tibi permittis felicis carpere nugas,
 8 has, inquam, nugas, quibus aurem advertere totam
 9 non aspernantur proceres urbisque forique
 10 quas et perpetui dignantur scrinia Sili
 11 et repetit totiens facundo Regulus ore,
 12 quique videt propius magni certamina Circi
 13 laudat Aventinae vicinus Sura Dianae,
 14 ipse etiam tanto dominus sub pondere rerum
 15 non dedignatur bis terque revolvere Caesar.
 16 Sed tibi plus mentis, tibi cor limante Minerva
 17 acrius et tenues finxerunt pectus Athenae.
 18 Ne valeam, si non multo sapit altius illud,
 19 quod cum panticibus laxis et cum pede grandi
 20 et rubro pulmone vetus nasisque timendum
 21 omnia crudelis lanis per compita portat.
 22 Audes praeterea, quos nullus noverit, in me
 23 scribere versiculos miseras et perdere chartas.

- 24 At si quid nostrae tibi bilis inusserit ardor,
 25 vivet et haerebit totoque legetur in orbe,
 26 stigmata nec vafra delebit Cinnamus arte.
 27 Sed miserere tui, rabido nec perditus ore
 28 fumantem nasum vivi temptaveris ursi.
 29 Sit placidus licet et lambat digitosque manusque,
 30 si dolor et bilis, si justa coegerit ira,
 31 ursus erit : vacua dentes in pelle fatiges
 32 et tacitam quaeras, quam possis rodere, carnem.
- M6_65 v.1 "Hexametris epigramma facis" scio dicere Tuccam.
 2 Tucca, solet fieri, denique, Tucca, licet.
 3 "Sed tamen hoc longum est." Solet hoc quoque, Tucca,
 licetque :
 4 si breviora probas, disticha sola legas.
 5 Conveniat nobis ut fas epigrammata longa
 6 sit transire tibi, scribere, Tucca, mihi.
- M6_66 v.1 Famae non nimium bonae puellam,
 2 quales in media sedent Suburra,
 3 vendebat modo praeco Gellianus.
 4 Parvo cum pretio diu liceret,
 5 dum puram cupit adprobare cunctis,
 6 adtraxit prope se manu negantem
 7 et bis terque quaterque basiavit.
 8 Quid profecerit osculo requiris ?
 9 Sescentos modo qui dabat negavit.
- M6_67 v.1 Cur tantum eunuchos habeat tua Caelia, quaeris,
 2 Pannyche ? Volt futui Caelia nec parere.
- M6_68 v.1 Flete nefas vestrum sed toto flete Lucrino,
 2 Naides, et luctus sentiat ipsa Thetis.
 3 Inter Baianas raptus puer occidit undas
 4 Eutychos ille, tuum, Castrice, dulce latus.
 5 Hic tibi curarum socius blandumque levamen,
 6 hic amor, hic nostri vatis Alexis erat.
 7 Numquid te vitreis nudum lasciva sub undis
 8 vidit et Alcidae nympa remisit Hylan ?
 9 An dea femineum jam neglegit Hermaphroditum
 10 amplexu teneri sollicitata viri ?
 11 Quidquid id est, subitae quaecumque est causa rapinae,
 12 sit, precor, et tellus mitis et unda tibi.
- M6_69 v.1 Non miror quod potat aquam tua Bassa, Catulle :
 2 miror quod Bassae filia potet aquam.
- M6_70 v.1 Sexagesima, Marciane, messis
 2 acta est et, puto, jam secunda Cottae
 3 nec se taedia lectuli calentis
 4 expertum meminit die vel uno.
 5 Ostendit digitum, sed inpudicum,
 6 Alconti Dasioque Symmachoque.
 7 At nostri bene computentur anni
 8 et quantum tetricae tulere febres
 9 aut languor gravis aut mali dolores
 10 a vita meliore separetur :

- 11 infantes sumus et senes videmur.
 12 Aetatem Priamique Nestorisque
 13 longam qui putat esse, Marciane,
 14 multum decipiturque falliturque.
 15 Non est vivere, sed valere vita est.
- M6_71 v.1 Edere lascivos ad Baetica crumata gestus
 2 et Gaditanis ludere docta modis,
 3 tendere quae tremulum Pelian Hecubaeque maritum
 4 posset ad Hectoreos sollicitare rogos,
 5 urit et excruciat dominum Telethusa priorem :
 6 vendidit ancillam, nunc redimit dominam.
- M6_72 v.1 Fur notae nimium rapacitatis
 2 compilare Cilix volebat hortum,
 3 ingenti sed erat, Fabulle, in horto
 4 praeter marmoreum nihil Priapum.
 5 Dum non volt vacua manu redire,
 6 ipsum subripuit Cilix Priapum.
- M6_73 v.1 Non rudis indocta fecit me falce colonus :
 2 dispensatoris nobile cernis opus.
 3 Nam Caeretani cultor ditissimus agri
 4 hos Hilarus colles et juga laeta tenet.
 5 Aspice quam certo videar non ligneus ore
 6 nec devota focis inguinis arma geram,
 7 sed mihi perpetua numquam moritura cupresso
 8 Phidiaca rigeat mentula digna manu.
 9 Vicini, moneo, sanctum celebrate Priapum
 10 et bis septenis parcite jugeribus.
- M6_74 v.1 Medio recumbit imus ille qui lecto,
 2 calvam trifilem semitatus unguento,
 3 foditque tonsis ora laxa lentiscis,
 4 mentitur, Aefulane : non habet dentes.
- M6_75 v.1 Cum mittis turdumve mihi quadramve placentae,
 2 sive femur leporis sive quid his simile est,
 3 buccellas misisse tuas te, Pontia, dicis.
 4 Has ego non mittam, Pontia, sed nec edam.
- M6_76 v.1 Ille sacri lateris custos Martisque togati,
 2 credita cui summi castra fuere ducis,
 3 hic situs est Fuscus. Licet hoc, Fortuna, fateri :
 4 non timet hostilis jam lapis iste minas ;
 5 grande jugum domita Dacus cervice recepit
 6 et famulum victrix possidet umbra nemus.
- M6_77 v.1 Cum sis tam pauper quam nec miserabilis Iros,
 2 tam juvenis quam nec Parthenopaeus erat,
 3 tam fortis quam nec cum vinceret Artemidorus,
 4 quid te Cappadocum sex onus esse juvat ?
 5 Rideris multoque magis traduceris, Afer,
 6 quam nudus medio si spatiere foro.
 7 Non aliter monstratur Atlans cum compare ginno
 8 quaeque vehit similem belua nigra Libyn.
 9 Invidiosa tibi quam sit lectica requiris ?

- 10 Non debes ferri mortuus hexaphoro.
- M6_78 v.1 Potor nobilis, Aule, lumine uno
2 luscus Phryx erat alteroque lippus.
3 Huic Heras medicus "Bibas caveto :
4 vinum si biberis, nihil videbis."
5 Ridens Phryx oculo "Valebis" inquit.
6 Misceri sibi protinus deunces,
7 sed crebros jubet. Exitum requiris ?
8 Vinum Phryx, oculus bibit venenum.
- M6_79 v.1 Tristis es et felix. Sciat hoc Fortuna caveto :
2 ingratum dicet te, Lupe, si scierit.
- M6_80 v.1 Ut nova dona tibi, Caesar, Nilotica tellus
2 miserat hibernas ambitiosa rosas.
3 Navita derisit Pharios Memphiticus hortos,
4 urbis ut intravit limina prima tuae :
5 tantus veris honos et odorae gratia Florae
6 tantaque Paestani gloria ruris erat ;
7 sic, quacumque vagus gressumque oculosque ferebat,
8 tonsilibus sertis omne rubebat iter.
9 At tu Romanae jussus jam cedere brumae
10 mitte tuas messes, accipe, Nile, rosas.
- M6_81 v.1 Iratus tamquam populo, Charideme, lavis :
2 inguina sic toto subluis in solio.
3 Nec caput hic vellem sic te, Charideme, lavare.
4 Et caput ecce lavas : inguina malo laves.
- M6_82 v.1 Quidam me modo, Rufe, diligenter
2 inspectum, velut emptor aut lanista,
3 cum voltu digitoque subnotasset,
4 "Tune es, tune" ait "ille Martialis,
5 cujus nequitias jocosque novit
6 aurem qui modo non habet Batavam ?"
7 Subrisi modice, levique nutu
8 me quem dixerat esse non negavi.
9 "Cur ergo" inquit "habes malas lacernas ?"
10 Respondi : "quia sum malus poeta."
11 Hoc ne saepius accidat poetae,
12 mittas, Rufe, mihi bonas lacernas.
- M6_83 v.1 Quantum sollicito fortuna parentis Etrusco,
2 tantum, summe ducum, debet uterque tibi.
3 Nam tu missa tua revocasti fulmina dextra :
4 hos cuperem mores ignibus esse Jovis ;
5 si tua sit summo, Caesar, natura Tonanti,
6 utetur toto fulmine rara manus.
7 Muneris hoc utrumque tui testatur Etruscus,
8 esse quod et comiti contigit et reduci.
- M6_84 v.1 Octaphoro sanus portatur, Avite, Philippus.
2 Hunc tu si sanum credis, Avite, furis.
- M6_85 v.1 Editur en sextus sine te mihi, Rufe Camoni,
2 nec te lectorem sperat, amice, liber :

- 3 impia Cappadocum tellus et numine laevo
4 visa tibi cineres reddit et ossa patri.
5 Funde tuo lacrimas orbata Bononia Rufo,
6 et resonet tota planctus in Aemilia :
7 heu qualis pietas, heu quam brevis occidit aetas !
8 viderat Alpehi praemia quinta modo.
9 Pectore tu memori nostros evolvere lusus,
10 tu solitus totos, Rufe, tenere jocos,
11 accipe cum fletu maestis breve carmen amici
12 atque haec absentis tura fuisse puta.
- M6_86 v.1 Setinum dominaeque nives densique trientes,
2 quando ego vos medico non prohibente bibam ?
3 Stultus et ingratus nec tanto munere dignus
4 qui mavult heres divitis esse Midae.
5 Possideat Libycas messis Hermumque Tagumque,
6 et potet caldam, qui mihi livet, aquam.
- M6_87 v.1 Di tibi dent et tu, Caesar, quaecumque mereris :
2 di mihi dent et tu quae volo, si merui.
- M6_88 v.1 Mane salutavi vero te nomine casu
2 nec dixi dominum, Caeciliane, meum.
3 Quanta libertas constet mihi tanta requiris ?
4 Centum quadrantes abstulit illa mihi.
- M6_89 v.1 Cum peteret seram media jam nocte matellam
2 arguto madidus pollice Panaretus,
3 Spoletina data est, sed quam siccaverat ipse,
4 nec fuerat soli tota lagona satis.
5 Ille fide summa testae sua vina remensus
6 reddidit oenophori pondera plena sui.
7 Miraris, quantum biberat, cepisse lagonam ?
8 Desine mirari, Rufe : merum biberat.
- M6_90 v.1 Moechum Gellia non habet nisi unum.
2 Turpe est hoc magis : uxor est duorum.
- M6_91 v.1 Sancta ducis summi prohibet censura vetatque
2 moechari. Gaude, Zoile, non futuis.
- M6_92 v.1 Caelatus tibi cum sit, Anniane,
2 serpens in patera Myronos arte,
3 Vaticana bibis : bibis venenum.
- M6_93 v.1 Tam male Thais olet quam non fullonis avari
2 testa vetus media sed modo fracta via,
3 non ab amore recens hircus, non ora leonis,
4 non detracta cani transtiberina cutis,
5 pullus abortivo nec cum putrescit in ovo,
6 amphora corrupto nec vitiata garo.
7 Virus ut hoc alio fallax permutet odore,
8 deposita quotiens balnea veste petit,
9 psilothro viret aut acida latet oblita creta
10 aut tegitur pingui terque quaterque faba.
11 Cum bene se tutam per fraudes mille putavit,
12 omnia cum fecit, Thaida Thais olet.

- M6_94 v.1 Ponatur semper chrysendeta Calpetano
 2 sive foris seu cum cenat in urbe domi.
 3 Sic etiam in stabulo semper, sic cenat in agro.
 4 Non habet ergo aliud ? Non habet immo suum.
- M7_1 v.1 Accipe belligerae crudum thoraca Minervae,
 2 ipsa Medusaeae quem timet ira comae.
 3 Dum vacat, haec, Caesar, poterit lorica vocari :
 4 pectore cum sacro sederit, aegis erit.
- M7_2 v.1 Invia Sarmaticis domini lorica sagittis
 2 et Martis Getico tergore fida magis,
 3 quam vel ad Aetolae securam cuspidis ictus
 4 texuit innumeri lubricus unguis apri,
 5 felix sorte tua, sacrum cui tangere pectus
 6 fas erit et nostri mente calere dei.
 7 I comes et magnos inlaesa merere triumphos
 8 palmataeque ducem, sed cito, redde togae.
- M7_3 v.1 Cur non mitto meos tibi, Pontiliane, libellos ?
 2 Ne mihi tu mittas, Pontiliane, tuos.
- M7_4 v.1 Esset, Castrice, cum mali coloris,
 2 versus scribere coepit Oppianus.
- M7_5 v.1 Si desiderium, Caesar, populique patrumque
 2 respicis et Latiae gaudia vera togae,
 3 redde deum votis poscentibus. Invidet hosti
 4 Roma suo, veniat laurea multa licet :
 5 terrarum dominum propius videt ille tuoque
 6 terretur vultu barbarus et fruitur.
- M7_6 v.1 Ecquid Hyperboreis ad nos conversus ab oris
 2 Ausonias Caesar jam parat ire vias ?
 3 Certus abest auctor, sed vox hoc nuntiat omnis :
 4 credo tibi, verum dicere, Fama, soles.
 5 Publica victrices testantur gaudia chartae,
 6 Martia laurigera cusptide pila virent.
 7 Rursus, io, magnos clamat tibi Roma triumphos,
 8 invictusque tua, Caesar, in urbe sonas.
 9 Sed jam laetitiae quo sit fiducia major,
 10 Sarmaticae laurus nuntius ipse veni.
- M7_7 v.1 Hiberna quamvis Arctos et rudis Peuce
 2 et unguarum pulsibus calens Hister
 3 fractusque cornu jam ter inprobo Rhenus
 4 teneat domantem regna perfidae gentis
 5 te, summe mundi rector et parens orbis :
 6 abesse nostris non tamen potes votis.
 7 Illic et oculis et animis sumus, Caesar,
 8 adeoque mentes omnium tenes unus

- 9 ut ipsa magni turba nesciat Circi
10 utrumque currat Passerinus an Tigris.
- M7_8 v.1 Nunc hilares, si quando mihi, nunc ludite, Musae :
2 victor ab Odrysio redditur orbe deus.
3 Certa facis populi tu primus vota, December :
4 jam licet ingenti dicere voce "Venit !"
5 Felix sorte tua ! Poteras non cedere Jano,
6 gaudia si nobis quae dabit ille dares.
7 Festa coronatus ludet convicia miles,
8 inter laurigeros cum comes ibit equos.
9 Fas audire jocos levioraque carmina, Caesar,
10 et tibi, si lusus ipse triumphus amat.
- M7_9 v.1 Cum sexaginta numeret Cascellius annos,
2 ingeniosus homo est : quando disertus erit ?
- M7_10 v.1 Pedicatur Eros, fellat Linus : Ole, quid ad te
2 de cute quid faciant ille vel ille sua ?
3 Centenis futuit Matho milibus : Ole, quid ad te ?
4 Non tu propterea sed Matho pauper erit.
5 In lucem cenat Sertorius : Ole, quid ad te,
6 cum liceat tota stertere nocte tibi ?
7 Septingenta Tito debet Lupus : Ole, quid ad te ?
8 Assem ne dederis crediderisve Lupo.
9 Illud dissimulas ad te quod pertinet, Ole,
10 quodque magis curae convenit esse tuae.
11 Pro togula debes : hoc ad te pertinet, Ole.
12 Quadrantem nemo jam tibi credit : et hoc.
13 Uxor moecha tibi est : hoc ad te pertinet, Ole.
14 Poscit jam dotem filia grandis : et hoc.
15 Dicere quindecies poteram quod pertinet ad te :
16 sed quid agas ad me pertinet, Ole, nihil.
- M7_11 v.1 Cogis me calamo manuque nostra
2 emendare meos, Pudens, libellos.
3 O quam me nimium probas amasque
4 qui vis archetypas habere nugas !
- M7_12 v.1 Sic me fronte legat dominus, Faustine, serena
2 excipiatque meos qua solet aure jocos,
3 ut mea nec juste quos odit pagina laesit
4 et mihi de nullo fama rubore placet.
5 Quid prodest, cupiant cum quidam nostra videri,
6 si qua Lycambeo sanguine tela madent,
7 vipereumque vomat nostro sub nomine virus,
8 qui Phoebi radios ferre diemque negat ?
9 Ludimus innocui : scis hoc bene : juro potentis
10 per genium famae Castaliumque gregem
11 perque tuas aures, magni mihi numinis instar,
12 lector inhumana liber ab invidia.
- M7_13 v.1 Dum Tiburtinis albescere solibus audit
2 antiqui dentis fusca Lycoris ebur,
3 venit in Herculeos colles. Quid Tiburis alti
4 aura valet ! Parvo tempore nigra redit.

- M7_14 v.1 Accidit infandum nostrae scelus, Aule, puellae ;
 2 amisit lusus deliciasque suas :
 3 non quales teneri ploravit amica Catulli
 4 Lesbia, nequitiis passeris orba sui,
 5 vel Stellae cantata meo quas flevit Ianthis,
 6 cujus in Elysio nigra columba volat :
 7 lux mea non capitur nugis neque moribus istis
 8 nec dominae pectus talia damna movent :
 9 bis senos puerum numerantem perdidit annos,
 10 mentula cui nondum sesquipedalis erat.
- M7_15 v.1 Quis puer hic nitidis absistit Ianthidos undis ?
 2 Effugit dominam Naida numquid Hylas ?
 3 O bene quod silva colitur Tirynthius ista
 4 et quod amatrices tam prope servat aquas !
 5 Securus licet hos fontes, Argynne, ministres :
 6 nil facient Nymphae ; ne velit ipse cave.
- M7_16 v.1 Aera domi non sunt, superest hoc, Regule, solum
 2 ut tua vendamus munera : numquid emis ?
- M7_17 v.1 Ruris bibliotheca delicati,
 2 vicinam videt unde lector urbem,
 3 inter carmina sanctiora si quis
 4 lascivae fuerit locus Thaliae,
 5 hos nido licet inseras vel imo,
 6 septem quos tibi misimus libellos
 7 auctoris calamo sui notatos :
 8 haec illis pretium facit litura.
 9 At tu munere, delicata, parvo
 10 quae cantaberis orbe nota toto,
 11 pignus pectoris hoc mei tuere,
 12 Juli bibliotheca Martialis.
- M7_18 v.1 Cum tibi sit facies de qua nec femina possit
 2 dicere, cum corpus nulla litura notet,
 3 cur te tam rarus cupiat repetatque fututor
 4 miraris ? Vitium est non leve, Galla, tibi.
 5 Accessi quotiens ad opus mixtisque movemur
 6 inguinibus, cunnus non tacet, ipsa taces.
 7 Di facerent ut tu loquereris et ille taceret :
 8 offendor cunni garrulitate tui.
 9 Pedere te mallet : namque hoc nec inutile dicit
 10 Symmachus et risum res movet ista simul.
 11 Quis ridere potest fatui poppysmata cunni ?
 12 Cum sonat hic, cui non mentula mensque cadit ?
 13 Dic aliquid saltem clamosoque obstrepe cunno
 14 et, si adeo muta es, disce vel inde loqui.
- M7_19 v.1 Fragmentum quod vile putas et inutile lignum,
 2 haec fuit ignoti prima carina maris.
 3 Quam nec Cyanaeae quondam potuere ruinae
 4 frangere nec Scythici tristior ira freti.
 5 Saecula vicerunt : sed quamvis cesserit annis,
 6 sanctior est salva parva tabella rate.
- M7_20 v.1 Nihil est miserius neque gulosius Santra.

- 2 Rectam vocatus cum cucurrit ad cenam,
3 quam tot diebus noctibusque captavit,
4 ter poscit apri glandulas, quater lumbum,
5 et utramque coxam leporis et duos armos,
6 nec erubescit pejerare de turdo
7 et ostreorum rapere lividos cirros.
8 Buccis placentae sordidam linit mappam ;
9 illic et uvae conlocantur ollares
10 et Punicorum pauca grana malorum
11 et excavatae pellis indecens volvae
12 et lippa ficus debilisque boletus.
13 Sed mappa cum jam mille rumpitur furtis,
14 rosos tepenti spondylos sinu condit
15 et devorato capite turturem truncum.
16 Colligere longa turpe nec putat dextra
17 analecta quidquid et canes reliquerunt.
18 Nec esculenta sufficit gulae praeda :
19 mixto lagonam replet ad pedes vino.
20 Haec per ducentas cum domum tulit scalas
21 seque obserata clusit anxius cella
22 gulosus ille, postero die vendit.
- M7_21 v.1 Haec est illa dies, quae magni conscia partus
2 Lucanum populis et tibi, Polla, dedit.
3 Heu ! Nero crudelis nullaque invisior umbra,
4 debuit hoc saltem non licuisse tibi.
- M7_22 v.1 Vatis Apollinei magno memorabilis ortu
2 lux redivit : Aonidum turba, favete sacris.
3 Haec meruit, cum te terris, Lucane, dedisset,
4 mixtus Castaliae Baetis ut esset aquae.
- M7_23 v.1 Phoebe, veni, sed quantus eras cum bella tonanti
2 ipse dares Latiae plectra secunda lyrae.
3 Quid tanta pro luce preces ? Tu, Polla, maritum
4 saepe colas et se sentiat ille coli.
- M7_24 v.1 Cum Juvenale meo quae me committere temptas,
2 quid non audebis, perfida lingua, loqui ?
3 Te fingente nefas Pyladen odisset Orestes,
4 Thesea Pirithoi destituisset amor,
5 tu Siculos fratres et majus nomen Atridas
6 et Ledaе poteras dissociare genus.
7 Hoc tibi pro meritis et talibus inprecor ausis,
8 ut facias illud quod, puto, lingua, facis.
- M7_25 v.1 Dulcia cum tantum scribas epigrammata semper
2 et cerussata candidiora cute,
3 nullaue mica salis nec amari fellis in illis
4 gutta sit, o demens, vis tamen illa legi !
5 Nec cibus ipse juvat morsu fraudatus aceti,
6 nec grata est facies cui gelasinus abest.
7 Infanti melimela dato fatuasque mariscas :
8 nam mihi, quae novit pungere, Chia sapit.
- M7_26 v.1 Apollinarem conveni meum, scazon,
2 et si vacabit - ne molestus accedas, -

- 3 hoc quaecumque, cuius aliqua pars ipse est,
 4 dabis : haec facetum carmen inbuant aures.
 5 Si te receptum fronte videris tota,
 6 noto rogabis ut favore sustentet.
 7 Quanto mearum, scis, amore nugarum
 8 flagret : nec ipse plus amare te possum.
 9 Contra malignos esse si cupis tutus,
 10 Apollinarem conveni meum, scazon.
- M7_27 v.1 Tuscae glandis aper populator et ilice multa
 2 jam piger, Aetolae fama secunda ferae,
 3 quem meus intravit splendenti cuspide Dexter,
 4 praeda jacet nostris invidiosa focis.
 5 Pinguescant madido laeti nidore penates
 6 flagret et exciso festa culina jugo.
 7 Sed cocus ingentem piperis consumet acervum,
 8 addet et arcano mixta Falerna garo :
 9 ad dominum redeas, noster te non capit ignis,
 10 conturbator aper : vilis esurio.
- M7_28 v.1 Sic Tiburtinae crescat tibi silva Dianae
 2 et properet caesum saepe redire nemus,
 3 nec Tartesiaceis Pallas tua, Fusce, trapetis
 4 cedat et inmodici dent bona musta lacus ;
 5 sic fora mirentur, sic te Palatia laudent,
 6 excolat et geminas plurima palma fores :
 7 otia dum medius praestat tibi parva December,
 8 exige, sed certa, quos legis, aure jocos.
 9 "Scire libet verum ? Res est haec ardua." Sed tu
 10 Quod tibi vis dici dicere, Fusce, potes.
- M7_29 v.1 Thestyle, Victoris tormentum dulce Voconi,
 2 quo nemo est toto notior orbe puer,
 3 sic etiam positus formosus amere capillis
 4 et placeat vati nulla puella tuo :
 5 paulisper domini doctos sepone libellos,
 6 carmina Victori dum lego parva tuo.
 7 Et Maecenati, Maro cum cantaret Alexin,
 8 nota tamen Marsi fusca Melaenis erat.
- M7_30 v.1 Das Parthis, das Germanis, das, Caelia, Dacis,
 2 nec Cilicum spernis Cappadocumque toros ;
 3 et tibi de Pharia Memphiticus urbe fututor
 4 navigat, a rubris et niger Indus aquis ;
 5 nec recutitorum fugis inguina Judaeorum,
 6 nec te Sarmatico transit Alanus equo.
 7 Qua ratione facis, cum sis Romana puella,
 8 quod Romana tibi mentula nulla placet ?
- M7_31 v.1 Raucae chortis aves et ova matrum
 2 et flavas medio vapore Chias
 3 et fetum querulae rudem capellae
 4 nec jam frigoribus pares olivas
 5 et canum gelidis holus pruinis
 6 de nostro tibi missa rure credis ?
 7 O quam, Regule, diligenter erras !
 8 Nil nostri, nisi me, ferunt agelli.

- 9 Quidquid vilicus Umber aut colonus
10 aut rus marmore tertio notatum
11 aut Tusci tibi Tusculive mittunt,
12 id tota mihi nascitur Subura.
- M7_32 v.1 Attice, facundae renovas qui nomina gentis
 2 nec sinis ingentem conticuisse domum,
 3 te pia Cecropiae comitatur turba Minervae,
 4 te secreta quies, te sophos omnis amat.
 5 At juvenes alios fracta colit aure magister
 6 et rapit inmeritas sordidus unctor opes.
 7 Non pila, non follis, non te paganica thermis
 8 praeparat aut nudi stipitis ictus hebes,
 9 vara nec in lento ceromate bracchia tendis,
 10 non harpasta vagus pulverulenta rapis,
 11 sed curris niveas tantum prope Virginis undas
 12 aut ubi Sidonio taurus amore calet.
 13 Per varias artes, omnis quibus area servit,
 14 ludere, cum liceat currere, pigritia est.
- M7_33 v.1 Sordidior caeno cum sit toga, calceus autem
 2 candidior prima sit tibi, Cinna, nive :
 3 dejecto quid, inepte, pedes perfundis amictu ?
 4 Collige, Cinna, togam ; calceus ecce perit.
- M7_34 v.1 Quo possit fieri modo, Severe,
 2 ut vir pessimus omnium Charinus
 3 unam rem bene fecerit, requiris ?
 4 Dicam, sed cito. Quid Nerone pejus ?
 5 Quid thermis melius Neronianis ?
 6 Non dest protinus, ecce, de malignis
 7 qui sic rancidulo loquatur ore :
 8 "Quid tu tot domini deique nostri
 9 praefers muneribus ?" Neronianas
 10 thermas praefero balneis cinaedi.
- M7_35 v.1 Inguina succinctus nigra tibi servus aluta
 2 stat, quotiens calidis tota foveris aquis ;
 3 sed meus, ut de me taceam, Laecania, servus
 4 Judaicum nuda sub cute pondus habet,
 5 sed nudi tecum juvenesque senesque lavantur.
 6 An sola est servi mentula vera tui ?
 7 Ecquid femineos sequeris, matrona, recessus,
 8 secretusque tua, cunne, lavaris aqua ?
- M7_36 v.1 Cum pluvias madidumque Jovem perferre negaret
 2 et rudis hibernis villa nataret aquis,
 3 plurima, quae posset subitos effundere nimbos,
 4 muneribus venit tegula missa tuis.
 5 Horridus, ecce, sonat Boreae stridore December :
 6 Stella, tegis villam, non tegis agricolam.
- M7_37 v.1 Nosti mortiferum quaestoris, Castrice, signum ?
 2 Est operae pretium discere theta novum :
 3 exprimeret quotiens rorantem frigore nasum,
 4 letalem juguli jusserat esse notam.
 5 Turpis ab invisio pendebat stiria naso,

- 6 cum flaret media fauce December atrox :
7 collegae tenuere manus : quid plura requiris ?
8 Emungi misero, Castrice, non licuit.
- M7_38 v.1 Tantus es et talis, nostri Polypheme, Severi
2 ut te mirari possit et ipse Cyclops.
3 Sed nec Scylla minor. Quod si fera monstra duorum
4 junxeris, alterius fiet uterque timor.
- M7_39 v.1 Discursus varios vagumque mane
2 et fastus et have potentiorum
3 cum perferre patique jam negaret,
4 coepit fingere Caelius podagram.
5 Quam dum volt nimis adprobare veram
6 et sanas linit obligatque plantas
7 inceditque gradu laborioso,
8 - quantum cura potest et ars doloris !-
9 desit fingere Caelius podagram.
- M7_40 v.1 Hic jacet ille senex Augusta notus in aula,
2 pectore non humili passus utrumque deum ;
3 natorum pietas sanctis quem conjugis umbris
4 miscuit : Elysium possidet ambo nemus.
5 Occidit illa prior viridi fraudata juventa :
6 hic prope ter senas vixit Olympiadas.
7 Sed festinatis raptum tibi credidit annis,
8 aspexit lacrimas quisquis, Etrusce, tuas.
- M7_41 v.1 Cosmicos esse tibi, Semproni Tucce, videris.
2 Cosmica, Semproni, tam mala quam bona sunt.
- M7_42 v.1 Muneribus cupiat se quis contendere tecum,
2 audeat hic etiam, Castrice, carminibus.
3 Nos tenues in utroque sumus vincique parati :
4 inde sopor nobis et placet alta quies.
5 Tam mala cur igitur dederim tibi carmina, quaeris ?
6 Alcinoos nullum poma dedisse putas ?
- M7_43 v.1 Primum est ut praestes, si quid te, Cinna, rogabo ;
2 illud deinde sequens ut cito, Cinna, neges.
3 Diligo praestantem ; non odi, Cinna, negantem :
4 sed tu nec praestas nec cito, Cinna, negas.
- M7_44 v.1 Maximus ille tuus, Ovidi, Caesonius hic est,
2 cujus adhuc vultum vivida cera tenet.
3 Hunc Nero damnavit ; sed tu damnare Neronem
4 ausus es et profugi, non tua, fata sequi :
5 aequora per Scyllae magnus comes exulis isti,
6 qui modo nolueras consulis ire comes.
7 Si victura meis mandantur nomina chartis
8 et fas est cineri me superesse meo,
9 audiet hoc praesens venturaque turba fuisse
10 illi te, Senecae quod fuit ille suo.
- M7_45 v.1 Facundi Senecae potens amicus,
2 caro proximus aut prior Sereno,
3 hic est Maximus ille, quem frequenti

- 4 felix littera pagina salutat.
 5 Hunc tu per Siculas secutus undas,
 6 o nullis, Ovidi, tacende linguis,
 7 sprevisti domini furentis iras.
 8 Miretur Pyladen suum vetustas,
 9 haesit qui comes exuli parentis.
 10 Quis discrimina comparet duorum ?
 11 Haesisti comes exuli Neronis.
- M7_46 v.1 Commendare tuum dum vis mihi carmine munus
 2 Maeonioque cupis doctius ore loqui,
 3 excrucias multis pariter me teque diebus,
 4 et tua de nostro, Prisce, Thalia tacet.
 5 Divitibus poteris musas elegosque sonantes
 6 mittere : pauperibus munera Peza dato.
- M7_47 v.1 Doctorum Licini celeberrime Sura virorum,
 2 cujus prisca gravis lingua reduxit avos,
 3 redderis - heu, quanto factorum munere ! - nobis
 4 gustata Lethes paene remissus aqua.
 5 Perdiderant jam vota metum securaque flebat
 6 tristities lacrimis jamque peractus eras :
 7 non tulit invidiam taciti regnator Averni
 8 et ruptas Fatis reddidit ipse colus.
 9 Scis igitur quantas hominum mors falsa querellas
 10 moverit et frueris posteritate tua.
 11 Vive velut rapto fugitivaque gaudia carpe :
 12 perdiderit nullum vita reversa diem.
- M7_48 v.1 Cum mensas habeat fere trecentas,
 2 pro mensis habet Annius ministros :
 3 transcurrunt gabatae volantque lances.
 4 Has vobis epulas habete, lauti :
 5 nos offendimur ambulante cena.
- M7_49 v.1 Parva suburbani munuscula mittimus horti :
 2 faucibus ova tuis, poma, Severe, gylae.
- M7_50 v.1 Fons dominae, regina loci quo gaudet Ianthis,
 2 gloria conspicuae delictumque domus,
 3 cum tua tot niveis ornetur ripa ministris
 4 et Ganymedeo luceat unda choro,
 5 quid facit Alcides silva sacratus in ista ?
 6 Tam vicina tibi cur tenet antra deus ?
 7 Nunquid Nympharum notos observat amores,
 8 tam multi pariter ne rapiantur Hylae ?
- M7_51 v.1 Mercari nostras si te piget, Urbice, nugas
 2 et lasciva tamen carmina nosse libet,
 3 Pompeium quaeres - et nosti forsitan - Auctum ;
 4 Ultoris prima Martis in aede sedet :
 5 jure madens varioque togae limatus in usu
 6 non lector meus hic, Urbice, sed liber est.
 7 Sic tenet absentes nostros cantatque libellos
 8 ut pereat chartis littera nulla meis :
 9 denique, si vellet, poterat scripsisse videri ;
 10 sed famae mavult ille favere meae.

- 11 Hunc licet a decuma - neque enim satis ante vacabit -
 12 sollicites, capiet cenula parva duos ;
 13 ille leget, bibe tu ; nolis licet, ille sonabit :
 14 et cum "Jam satis est" dixeris, ille leget.
- M7_52 v.1 Gratum est quod Celeri nostros legis, Aucte, libellos,
 2 si tamen et Celerem quod legis, Aucte, juvat.
 3 Ille meas gentes et Celtas rexit Hiberos,
 4 nec fuit in nostro certior orbe fides.
 5 Major me tanto reverentia turbat et aures
 6 non auditoris, iudicis esse puto.
- M7_53 v.1 Omnia misisti mihi Saturnalibus, Umber,
 2 munera, contulerant quae tibi quinque dies :
 3 bis senos triplices et dentiscalpia septem ;
 4 his comes accessit spongea, mappa, calix,
 5 semodiusque fabae cum vimine Picenarum
 6 et Laletanae nigra lagona sapae ;
 7 parvaque cum canis venerunt cottana prunis
 8 et Libycae fici pondere testa gravis.
 9 Vix puto triginta nummorum tota fuisse
 10 munera, quae grandes octo tulere Syri.
 11 Quanto commodius nullo mihi ferre labore
 12 argenti potuit pondera quinque puer !
- M7_54 v.1 Semper mane mihi de me mera somnia narras,
 2 quae moveant animum sollicitentque meum.
 3 Jam prior ad faecem, sed et haec vindemia venit,
 4 exorat noctes dum mihi saga tuas ;
 5 consumpsi salsasque molas et turis acervos ;
 6 decrevere greges, dum cadit agna frequens ;
 7 non porcus, non chortis aves, non ova supersunt.
 8 Aut vigila aut dormi, Nasidiane, tibi.
- M7_55 v.1 Nulli munera, Chreste, si remittis,
 2 nec nobis dederis remiserisque :
 3 credam te satis esse liberalem.
 4 Sed si reddis Apicio Lupoque
 5 et Gallo Titioque Caesioque,
 6 linges non mihi - nam proba et pusilla est -
 7 sed quae de Solymis venit perustis
 8 damnatam modo mentulam tributis.
- M7_56 v.1 Astra polumque pia cepisti mente, Rabiri,
 2 Parrhasiam mira qui struis arte domum.
 3 Phidiaco si digna Jovi dare templa parabit,
 4 has petet a nostro Pisa Tonante manus.
- M7_57 v.1 Castora de Polluce Gabinia fecit Achillan :
 2 "pux agathos" fuerat, nunc erit "hippodamos".
- M7_58 v.1 Jam sex aut septem nupsisti, Galla, cinaedis,
 2 dum coma te nimium pexaque barba juvat ;
 3 deinde experta latus madidoque simillima loro
 4 inguina nec lassa stare coacta manu,
 5 deseris inbelles thalamos mollemque maritum,
 6 rursus et in similes decidis usque toros.

- 7 Quaere aliquem Curios semper Fabiosque loquentem,
8 hirsutum et dura rusticitate truce[m] :
9 invenies ; sed habet tristis quoque turba cinaedos :
10 difficile est vero nubere, Galla, viro.
- M7_59 v.1 Non cenat sine apro noster, Tite, Caecilianus :
2 bellum convivam Caecilianus habet.
- M7_60 v.1 Tarpeiae venerande rector aulae,
2 quem salvo duce credimus Tonantem,
3 cum votis sibi quisque te fatiget
4 et poscat dare quae dei potestis :
5 nil pro me mihi, Juppiter, petenti
6 ne suscensueris velut superbo.
7 Te pro Caesare debeo rogare :
8 pro me debeo Caesarem rogare.
- M7_61 v.1 Abstulerat totam temerarius institor urbem
2 inque suo nullum limine limen erat.
3 Jussisti tenuis, Germanice, crescere vicos,
4 et modo quae fuerat semita, facta via est.
5 Nulla catenatis pila est praecincta lagonis
6 nec praetor medio cogitur ire luto,
7 stringitur in densa nec caeca novacula turba
8 occupat aut totas nigra popina vias.
9 Tonsor, copo, cocus, lanus sua limina servant.
10 Nunc Roma est, nuper magna taberna fuit.
- M7_62 v.1 Reclusis foribus grandes percidis, Amille,
2 et te deprendi, cum facis ista, cupis,
3 ne quid liberti narrent servique paterni
4 et niger obliqua garrulitate cliens.
5 Non pedicari se qui testatur, Amille,
6 illud saepe facit quod sine teste facit.
- M7_63 v.1 Perpetui numquam moritura volumina Sili
2 qui legis et Latia carmina digna toga,
3 Pierios tantum vati placuisse recessus
4 credis et Aoniae Bacchica sarta comae ?
5 Sacra cothurnati non attigit ante Maronis
6 implevit magni quam Ciceronis opus :
7 hunc miratur adhuc centum gravis hasta virorum,
8 hunc loquitur grato plurimus ore cliens.
9 Postquam bis senis ingentem fascibus annum
10 rexerat adserto qui sacer orbe fuit,
11 emeritos Musis et Phoebos tradidit annos
12 proque suo celebrat nunc Heliconae foro.
- M7_64 v.1 Qui tonsor fueras tota notissimus urbe
2 et post hoc dominae munere factus eques,
3 Sicilianas urbes Aetnaeaeque regna petisti,
4 Cinname, cum fugeres tristia jura fori.
5 Qua nunc arte graves tolerabis inutilis annos ?
6 Quid facit infelix et fugitiva quies ?
7 Non rhetor, non grammaticus ludive magister,
8 non Cynicus, non tu Stoicus esse potes,
9 vendere nec vocem Siculis plausumque theatri :

- 10 quod superest, iterum, Cinname, tonsor eris.
- M7_65 v.1 Lis te bis decumae numerantem frigora brumae
 2 conterit una tribus, Gargiliane, foris.
 3 Ah miser et demens ! viginti litigat annis
 4 quisquam cui vinci, Gargiliane, licet ?
- M7_66 v.1 Heredem Fabius Labienum ex asse reliquit :
 2 plus meruisse tamen se Labienus ait.
- M7_67 v.1 Pedicat pueros tribas Philaenis
 2 et tentigine saevior mariti
 3 undenas dolat in die puellas.
 4 Harpasto quoque subligata ludit
 5 et flavescit haphe, gravesque draucis
 6 halteras facili rotat lacerto,
 7 et putri lutulenta de palaestra
 8 uncti verbere vapulat magistri :
 9 nec cenat prius aut recumbit ante
 10 quam septem vomuit meros deunces ;
 11 ad quos fas sibi tunc putat redire,
 12 cum coloephia sedecim comedit.
 13 Post haec omnia cum libidinatur,
 14 non fellat - putat hoc parum virile -,
 15 sed plane medias vorat puellas.
 16 Di mentem tibi dent tuam, Philaeni,
 17 cunnum lingere quae putas virile.
- M7_68 v.1 Commendare meas, Instanti Rufe, Camenas
 2 parce, precor, socero : seria forsam amat.
 3 Quod si lascivos admittit et ille libellos,
 4 haec ego vel Curio Fabricioque legam.
- M7_69 v.1 Haec est illa tibi promissa Theophila, Cani,
 2 cujus Cecropia pectora dote madent.
 3 Hanc sibi jure petat magni senis Atticus hortus,
 4 nec minus esse suam Stoica turba velit.
 5 Vivet opus quodcumque per has emiseric aures ;
 6 tam non femineum nec populare sapit.
 7 Non tua Pantaenis nimium se praeferat illi,
 8 quamvis Pierio sit bene nota choro.
 9 Carmina fingentem Sappho laudabat amatrix :
 10 castior haec et non doctior illa fuit.
- M7_70 v.1 Ipsarum tribadum tribas, Philaeni,
 2 recte, quam futuis, vocas amicam.
- M7_71 v.1 Ficosa est uxor, ficosus et ipse maritus,
 2 filia ficosa est et gener atque nepos,
 3 nec dispensator nec vilicus ulcere turpi
 4 nec rigidus fossor, sed nec arator eget.
 5 Cum sint ficosi pariter juvenesque senesque,
 6 res mira est, ficos non habet unus ager.
- M7_72 v.1 Gratus sic tibi, Paule, sit December
 2 nec vani triplices brevesque mappae
 3 nec turis veniant leves selibrae,

- 4 sed lances ferat et scyphos avorum
5 aut grandis reus aut potens amicus,
6 seu quod te potius juvat capitque ;
7 sic vincas Noviumque Publumque
8 mandris et vitreo latrone clusos ;
9 sic palmam tibi de trigone nudo
10 unctae det favor arbiter coronae
11 nec laudet Polybi magis sinistras :
12 si quisquam mea dixerit malignus
13 atro carmina quae madent veneno,
14 ut vocem mihi commodes patronam
15 et quantum poteris, sed usque, clames :
16 "Non scripsit meus ista Martialis."
- M7_73 v.1 Esquiliis domus est, domus est tibi colle Dianae,
2 et tua patricius culmina vicus habet ;
3 hinc viduae Cybeles, illinc sacraria Vestae,
4 inde novum, veterem prospicis inde Jovem.
5 Dic ubi conveniam, dic qua te parte requiram ;
6 quisquis ubique habitat, Maxime, nusquam habitat.
- M7_74 v.1 Cyllenes caelique decus, facunde minister,
2 aurea cui torto virga dracone viret :
3 sic tibi lascivi non desit copia furti,
4 sive cupis Paphien seu Ganymede cales ;
5 maternaeque sacris ornentur frondibus Idus
6 et senior parca mole prematur avus :
7 hunc semper Norbana diem cum conjuge Carpo
8 laeta colat, primis quo coiere toris.
9 Hic pius antistes sophiae sua dona ministrat,
10 hic te ture vocat fidus et ipse Jovi.
- M7_75 v.1 Vis futui gratis, cum sis deformis anusque.
2 Res perridicula est : vis dare nec dare vis.
- M7_76 v.1 Quod te diripiunt potentiores
2 per convivia, porticus, theatra,
3 et tecum, quotiens ita incidisti,
4 gestari juvat, et juvat lavari :
5 nolito nimium tibi placere.
6 Delectas, Philomuse, non amaris.
- M7_77 v.1 Exigis ut nostros donem tibi, Tucca, libellos.
2 Non faciam : nam vis vendere, non legere.
- M7_78 v.1 Cum Saxetani ponatur coda lacerti
2 et, bene si cenas, conchis inuncta tibi,
3 sumen, aprum, leporem, boletos, ostrea, mullos
4 mittis : habes nec cor, Papyle, nec genium.
- M7_79 v.1 Potavi modo consulare vinum.
2 Quaeris quam vetus atque liberale ?
3 Prisco consule conditum : sed ipse
4 qui ponebat erat, Severe, consul.
- M7_80 v.1 Quatenus Odrysios jam pax Romana triones
2 temperat et tetricae conticuere tubae,

- 3 hunc Marcellino poteris, Faustine, libellum
4 mittere : jam chartis, jam vacat ille jocis.
5 Sed si parva tui munuscula quaeris amici
6 commendare, ferat carmina nostra puer :
7 non qualis Geticae satiatus lacte juvencae
8 Sarmatica rigido ludit in amne rota,
9 sed Mitylenaei roseus mangonis ephebus
10 vel non caesus adhuc matre jubente Lacon.
11 At tibi captivo famulus mittetur ab Histro
12 qui Tiburtinas pascere possit oves.
- M7_81 v.1 Triginta toto mala sunt epigrammata libro."
2 Si totidem bona sunt, Lause, bonus liber est.
- M7_82 v.1 Menophili penem tam grandis fibula vestit
2 ut sit comoedis omnibus una satis.
3 Hunc ego credideram - nam saepe lavamur in unum -
4 sollicitum voci parcere, Flacce, suae :
5 dum ludit media populo spectante palaestra,
6 delapsa est misero fibula : verpus erat.
- M7_83 v.1 Eutrapelus tonsor dum circuit ora Luperci
2 expingitque genas, altera barba subit.
- M7_84 v.1 Dum mea Caecilio formatur imago Secundo
2 spirat et arguta picta tabella manu,
3 i, liber, ad Geticam Peucen Histrumque jacentem :
4 haec loca perdomitis gentibus ille tenet.
5 Parva dabis caro, sed dulcia, dona sodali :
6 certior in nostro carmine voltus erit ;
7 casibus hic nullis, nullis delebilis annis
8 vivet, Apelleum cum morietur opus.
- M7_85 v.1 Quod non insulse scribis tetrasticha quaedam,
2 disticha quod belle pauca, Sabelle, facis,
3 laudo nec admiror. Facile est epigrammata belle
4 scribere. Sed librum scribere difficile est.
- M7_86 v.1 Ad natalicias dapes vocabar,
2 essem cum tibi, Sexte, non amicus.
3 Quid factum est, rogo, quid repente factum est,
4 post tot pignora nostra, post tot annos
5 quod sum praeteritus vetus sodalis ?
6 Sed causam scio. Nulla venit a me
7 Hispani tibi libra pustulati
8 nec levis toga nec rudes lacernae.
9 Non est sportula quae negotiatur ;
10 pascis munera, Sexte, non amicos.
11 Jam dices mihi "Vapulet vocator."
- M7_87 v.1 Si meus aurita gaudet lagalopece Flaccus,
2 si fruitur tristi Canius Aethiope ;
3 Publius exiguae si flagrat amore catellae,
4 si Cronius similen cercopithecon amat ;
5 delectat Marium si perniciosus ichneumon,
6 pica salutatrix si tibi, Lause, placet ;
7 si gelidum collo nectit Cadilla draconem,

- 8 lusciniio tumulum si Telesilla dedit :
9 blanda Cupidinei cur non amet ora Labyrtae
10 qui videt haec dominis monstra placere suis ?
- M7_88 v.1 Fertur habere meos, si vera est fama, libellos
 2 inter delicias pulchra Vienna suas.
 3 Me legit omnis ibi senior juvenisque puerque,
 4 et coram tetrico casta puella viro.
 5 Hoc ego maluerim quam si mea carmina cantent
 6 qui Nilum ex ipso protinus ore bibunt ;
 7 quam meus Hispano si me Tagus impleat auro
 8 pascat et Hybla meas, pascat Hymettos apes.
 9 Non nihil ergo sumus nec blandae munere linguae
 10 decipimur : credam jam puto, Lause, tibi.
- M7_89 v.1 I, felix rosa, mollibusque sertis
 2 nostri cinge comas Apollinaris.
 3 Quas tu nectere candidas, sed olim,
 4 sic te semper amet Venus, memento.
- M7_90 v.1 Jactat inaequalem Matho me fecisse libellum :
 2 si verum est, laudat carminanostra Matho.
 3 Aequales scribit libros Calvinus et Umber :
 4 aequalis liber est, Cretice, qui malus est.
- M7_91 v.1 De nostro, facunde, tibi, Juvenalis, agello
 2 Saturnalicias mittimus, ecce, nuces.
 3 Cetera lascivis donavit poma puellis
 4 mentula custodis luxuriosa dei.
- M7_92 v.1 "Si quid opus fuerit, scis me non esse rogandum"
 2 uno bis dicis, Baccara, terque die.
 3 Appellat rigida tristis me voce Secundus :
 4 audis et nescis, Baccara, quid sit opus.
 5 Pensio te coram petitur clareque palamque :
 6 audis et nescis, Baccara, quid sit opus.
 7 Esse queror gelidasque mihi tritasque lacernas :
 8 audis et nescis, Baccara, quid sit opus.
 9 Hoc opus est, subito fias ut sidere mutus,
 10 dicere ne possis, Baccara "Si quid opus."
- M7_93 v.1 Narnia, sulphureo quam gurgite candidus amnis
 2 circuit, ancipiti vix adeunda jugo,
 3 quid tam saepe meum nobis abducere Quintum
 4 te juvat et lenta detinuisse mora ?
 5 Quid Nomentani causam mihi perdis agelli,
 6 propter vicinum qui pretiosus erat ?
 7 Sed jam parce mihi, nec abutere, Narnia, Quinto :
 8 perpetuo liceat sic tibi ponte frui.
- M7_94 v.1 Unguentum fuerat, quod onyx modo parva gerebat :
 2 olfecit postquam Papyrus, ecce, garum est.
- M7_95 v.1 Bruma est et riget horridus December,
 2 audes tu tamen osculo nivali
 3 omnes obvis hinc et hinc tenere
 4 et totam, Line, basiare Romam.

- 5 Quid posses graviusque saeviusque
6 percussus facere atque verberatus ?
7 Hoc me frigore basiet nec uxor
8 blandis filia nec rudis labellis,
9 sed tu dulcior elegantiorque,
10 cujus livida naribus caninis
11 dependet glacies rigetque barba,
12 qualem forficibus metit supinis
13 tonsor Cinyphio Cilix marito.
14 Centum occurrere malo cunnilingis
15 et Gallum timeo minus recentem.
16 Quare si tibi sensus est pudorque,
17 hibernas, Line, basiationes
18 in mensem rogo differas Aprilem.
- M7_96 v.1 Conditus hic ego sum Bassi dolor, Urbicus infans,
2 cui genus et nomen maxima Roma dedit.
3 Sex mihi de prima derant trieteride menses,
4 ruperunt tetricae cum male pensa deae.
5 Quid species, quid lingua mihi, quid profuit aetas ?
6 Da lacrimas tumulo, qui legis ista, meo :
7 sic ad Lethaeas, nisi Nestore senior, undas
8 non eat, optabis quem superesse tibi.
- M7_97 v.1 Nosti si bene Caesium, libelle,
2 montanae decus Umbriae Sabinum,
3 Auli municipem mei Pudentis,
4 illi tu dabis haec vel occupato.
5 Instent mille licet premantque curae,
6 nostris carminibus tamen vacabit.
7 Nam me diligit ille proximumque
8 Turni nobilibus legit libellis.
9 O quantum tibi nominis paratur !
10 O quae gloria ! Quam frequens amator ;
11 te convivia, te forum sonabit
12 aedes compita porticus tabernae.
13 Uni mitteris, omnibus legeris.
- M7_98 v.1 Omnia, Castor, emis. Sic fiet ut omnia vendas.
- M7_99 v.1 Sic placidum videas semper, Crispine, Tonantem
2 nec te Roma minus quam tua Memphis amet,
3 carmina Parrhasia si nostra legentur in aula,
4 (namque solent sacra Caesaris aure frui)
5 dicere de nobis ut lector candidus aude :
6 "Temporibus praestat non nihil iste tuis,
7 nec Marso nimium minor est doctoque Catullo."
8 Hoc satis est : ipsi cetera mando deo.
- M8_1 v.1 Laurigeros domini, liber, intrature penates
2 disce verecundo sanctius ore loqui.
3 Nuda recede Venus ; non est tuus iste libellus :

- 4 tu mihi, tu Pallas Caesariana, veni.
- M8_2 v.1 Fastorum genitor parensque Janus
2 victorem modo cum videret Histri,
3 tot vultus sibi non satis putavit
4 optavitque oculos habere plures :
5 et lingua pariter locutus omni
6 terrarum domino deoque rerum
7 promisit Pyliam quater senectam.
8 Addas, Jane pater, tuam rogamus.
- M8_3 v.1 Quinque satis fuerant : nam sex septemve libelli
2 est nimium : quid adhuc ludere, Musa, juvat ?
3 Sit pudor et finis : jam plus nihil addere nobis
4 fama potest : teritur noster ubique liber ;
5 et cum rupta situ Messallae saxa jacebunt
6 altaque cum Licini marmora pulvis erunt,
7 me tamen ora legent et secum plurimus hospes
8 ad patrias sedes carmina nostra feret."
9 Finieram, cum sic respondit nona sororum,
10 cui coma et unguento sordida vestis erat :
11 "Tune potes dulcis, ingrata, relinquere nugas ?
12 Dic mihi, quid melius desidiosus ages ?
13 An juvat ad tragicos soccum transferre coturnos
14 aspera vel paribus bella tonare modis,
15 praelegat ut tumidus rauca te voce magister
16 oderit et grandis virgo bonusque puer ?
17 Scribant ista graves nimium nimiumque severi,
18 quos media miseros nocte lucerna videt ;
19 at tu Romano lepidos sale tingue libellos :
20 adgnoscat mores vita legatque suos.
21 Angusta cantare licet videaris avena,
22 dum tua multorum vincat avena tubas."
- M8_4 v.1 Quantus, io, Latias mundi conventus ad aras
2 suscipit et solvit pro duce vota suo !
3 Non sunt haec hominum, Germanice, gaudia tantum,
4 sed faciunt ipsi nunc, puto, sacra dei.
- M8_5 v.1 Dum donas, Macer, anulos puellis,
2 desisti, Macer, anulos habere.
- M8_6 v.1 Archetypis vetuli nihil est odiosius Eucti
2 (ficta Saguntino cymbia malo luto),
3 argenti furiosa sui cum stemmata narrat
4 garrulus et verbis mucida vina facit :
5 "Laomedontea fuerant haec pocula mensae :
6 ferret ut haec, muros struxit Apollo lyra.
7 Hoc cratere ferox commisit proelia Rhoetus
8 cum Lapithis : pugna debile cernis opus.
9 Hi duo longaevo censentur Nestore fundi :
10 pollice de Pylio trita columba nitet.
11 Hic scyphus est in quo misceri jussit amicis
12 largius Aeacides vividiusque merum.
13 Hac propinavit Bitiae pulcherrima Dido
14 in patera, Phrygio cum data cena viro est."
15 Miratus fueris cum prisca toreumata multum,

- 16 in Priami calathis Astyanacta bibes.
- M8_7 v.1 Hoc agere est causas, hoc dicere, Cinna, diserte,
 2 horis, Cinna, decem dicere verba novem ?
 3 Sed modo clepsydras ingenti voce petisti
 4 quattuor. O quantum, Cinna, tacere potes !
- M8_8 v.1 Principium des, Jane, licet velocibus annis
 2 et renoves voltu saecula longa tuo,
 3 te primum pia tura rogent, te vota salutent,
 4 purpura te felix, te colat omnis honos ;
 5 tu tamen hoc mavis, Latiae quod contigit urbi
 6 mense tuo reducem, Jane, videre deum.
- M8_9 v.1 Solvere dodrantem nuper tibi, Quinte, volebat
 2 lippus Hylas, luscus vult dare dimidium.
 3 Accipe quam primum ; brevis est occasio lucri :
 4 si fuerit caecus, nil tibi solvet Hylas.
- M8_10 v.1 Emit lacernas milibus decem Bassus
 2 Tyrias coloris optimi. Lucri fecit.
 3 "Adeo bene emit ?" inquis. Immonon solvet.
- M8_11 v.1 Pervenisse tuam jam te scit Rhenus in urbem ;
 2 nam populi voces audit et ille tui :
 3 Sarmaticas etiam gentes Histrumque Getasque
 4 laetitiae clamor terruit ipse novae.
 5 Dum te longa sacro venerantur gaudia Circo,
 6 nemo quater missos currere sensit equos.
 7 Nullum Roma ducem, nec te sic, Caesar, amavit :
 8 te quoque jam non plus, ut velit ipsa, potest.
- M8_12 v.1 Uxorem quare locupletem ducere nolim
 2 quaeritis ? Uxori nubere nolo meae.
 3 Inferior matrona suo sit, Prisce, marito :
 4 non aliter fiunt femina virque pares.
- M8_13 v.1 Morio dictus erat : viginti milibus emi.
 2 Redde mihi nummos, Gargiliane : sapit.
- M8_14 v.1 Pallida ne Cilicum timeant pomaria brumam,
 2 mordeat et tenerum fortior aura nemus,
 3 hibernis objecta Notis specularia puros
 4 admittunt soles et sine faece diem.
 5 At mihi cella datur non tota clusa fenestra,
 6 in qua nec Boreas ipse manere velit.
 7 Sic habitare jubes veterem crudelis amicum ?
 8 arboris ergo tuae tutior hospes ero.
- M8_15 v.1 Dum nova Pannonici numeratur gloria belli,
 2 omnis et ad reducem dum litat ara Jovem,
 3 dat populus, dat gratus eques, dat tura senatus,
 4 et ditant Latias tertia dona tribus :
 5 hos quoque secretos memoravit Roma triumphos,
 6 nec minor ista tuae laurea pacis erat,
 7 quod tibi de sancta credis pietate tuorum.
 8 Principis est virtus maxima nosse suos.

- M8_16 v.1 Pistor qui fueras diu, Cypere,
2 causas nunc agis et ducena quaeris :
3 sed consumis et usque mutuaris.
4 A pistore, Cypere, non recedis :
5 et panem facis et facis farinam.
- M8_17 v.1 Egi, Sexte, tuam pactus duo milia causam :
2 misisti nummos quod mihi mille quid est ?
3 "Narrasti nihil" inquis "et a te perdita causa est."
4 Tanto plus debes, Sexte, quod erubui.
- M8_18 v.1 Si tua, Cerrini, promas epigrammata vulgo,
2 vel mecum possis vel prior ipse legi :
3 sed tibi tantus inest veteris respectus amici,
4 carior ut mea sit quam tua fama tibi.
5 Sic Maro nec Calabri temptavit carmina Flacci,
6 Pindaricos nosset cum superare modos,
7 et Vario cessit Romani laude cothurni,
8 cum posset tragico fortius ore loqui.
9 Aurum et opes et rura frequens donabit amicus :
10 qui velit ingenio cedere rarus erit.
- M8_19 v.1 Pauper videri Cinna vult ; et est pauper.
- M8_20 v.1 Cum facias versus nulla non luce ducenos,
2 Vare, nihil recitas. Non sapis, atque sapis.
- M8_21 v.1 Phosphore, redde diem : quid gaudia nostra moraris ?
2 Caesare venturo, Phosphore, redde diem.
3 Roma rogat. Placidi numquid te pigra Bootae
4 plaustra vehunt, lento quod nimis axe venis ?
5 Ledaeo poteris abducere Cyllaron astro :
6 ipse suo cedit nunc tibi Castor equo.
7 Quid cupidum Titana tenes ? Jam Xanthus et Aethon
8 frena volunt, vigilat Memnonis alma parens.
9 Tarda tamen nitidae non cedunt sidera luci,
10 et cupit Ausonium luna videre ducem.
11 Jam, Caesar, vel nocte veni : stent astra licebit,
12 non derit populo te veniente dies.
- M8_22 v.1 Invitas ad aprum, ponis mihi, Gallice, porcum :
2 hybrida sum, si das, Gallice, verba mihi.
- M8_23 v.1 Esse tibi videor saevus nimiumque gulosus,
2 qui propter cenam, Rustice, caedo cocum.
3 Si levis ista tibi flagrorum causa videtur,
4 ex qua vis causa vapulet ergo cocus ?
- M8_24 v.1 Si quid forte petam timido gracilique libello,
2 improba non fuerit si mea charta, dato.
3 Et si non dederis, Caesar, permittite rogari :
4 offendunt numquam tura precesque Jovem.
5 Qui fingit sacros auro vel marmore vultus,
6 non facit ille deos : qui rogat, ille facit.
- M8_25 v.1 Vidisti semel, Oppiane, tantum

- 2 aegrum me : male, saepe te videbo.
- M8_26 v.1 Non tot in Eois timuit Gangeticus arvis
2 raptor, in Hyrcano qui fugit albus equo,
3 quot tua Roma novas vidit, Germanice, tigres ;
4 delicias potuit nec numerare suas.
5 Vincit Erythraeos tua, Caesar, harena triumphos
6 et victoris opes divitiasque dei :
7 nam cum captivos ageret sub curribus Indos,
8 contentus gemina tigride Bacchus erat.
- M8_27 v.1 Munera qui tibi dat locupleti, Gaure, senique,
2 si sapis et sentis, hoc tibi ait "Morere."
- M8_28 v.1 Dic, toga, facundi gratum mihi munus amici,
2 esse velis cujus fama decusque gregis ?
3 Apula Ledaei tibi floruit herba Phalanthi,
4 qua saturat Calabris culta Galaesus aquis ?
5 An Tartesiacus stabuli nutritor Hiberi
6 Baetis in Hesperia te quoque lavit ove ?
7 An tua multifidum numeravit lana Timavum,
8 quem pius astrifero Cyllarus ore bibit ?
9 Te nec Amyclaeo decuit livere veneno
10 nec Miletos erat vellere digna tuo.
11 Lilia tu vincis nec adhuc delapsa ligustra
12 et Tiburtino monte quod alget ebur ;
13 Spartanus tibi cedit olor Paphiaeque columbae,
14 cedit Erythraeis eruta gemma vadis :
15 sed licet haec primis nivibus sint aemula dona,
16 non sunt Parthenio candidiora suo.
17 Non ego praetulerim Babylonos picta superbae
18 texta, Samiramia quae variantur acu ;
19 non Athamanteo potius me mirer in auro,
20 Aeolium dones si mihi, Phrixe, pecus.
21 O quantos risus pariter spectata movebit
22 cum Palatina nostra lacerna toga !
- M8_29 v.1 Disticha qui scribit, puto, vult brevitatem placere.
2 Quid prodest brevitatem, dic mihi, si liber est ?
- M8_30 v.1 Qui nunc Caesareae lusus spectatur harenae,
2 temporibus Bruti gloria summa fuit.
3 Aspicias ut teneat flammam poenaeque fruatur
4 fortis, et attonito regnet in igne manus ?
5 Ipse sui spectator adest et nobile dextrae
6 funus amat : totis pascitur illa sacris ;
7 quod nisi rapta foret nolenti poena, parabat
8 saevior in lassos ire sinistra focos.
9 Scire piget post tale decus quid fecerit ante :
10 quam vidi satis hanc est mihi nosse manum.
- M8_31 v.1 Nescio quid de te non belle, Dento, fateris,
2 conjugem qui ducta iura paterna petis.
3 Sed jam supplicibus dominum lassare libellis
4 desine et in patriam serus ab urbe redi :
5 nam dum tu longe deserta uxore diuque
6 tres quaeris natos, quattuor invenies.

- M8_32 v.1 Aera per tacitum delapsa sedentis in ipsos
 2 fluxit Aretullae blanda columba sinus.
 3 Luserat hoc casus, nisi inobservata maneret
 4 permissaque sibi nollet abire fuga.
 5 Si meliora piae fas est sperare sorori
 6 et dominum mundi flectere vota valent,
 7 haec a Sardois tibi forsitan exulis oris,
 8 fratre reversuro, nuntia venit avis.
- M8_33 v.1 De praetoricia folium mihi, Paule, corona
 2 mittis et hoc phialae nomen habere jubes.
 3 Hac fuerat nuper nebula tibi pegma perunctum,
 4 pallida quam rubri diluit unda croci ;
 5 an magis astuti derasa est ungue ministri
 6 brattea, de fulcro quam reor esse tuo ?
 7 Illa potest culicem longe sentire volantem
 8 et minimi pinna papilionis agi ;
 9 exiguae volitat suspensa vapore lucernae
 10 et leviter fuso rumpitur icta mero.
 11 Hoc linitur sputo Jani caryota Kalendis,
 12 quam fert cum parco sordidus asse cliens.
 13 Lenta minus gracili crescunt colocasia filo,
 14 plena magis nimio lilia sole cadunt ;
 15 nec vaga tam tenui discurrit aranea tela,
 16 tam leve nec bombyx pendulus urget opus.
 17 Crassior in facie vetulae stat creta Fabullae,
 18 crassior offensae bulla tumescit aquae ;
 19 fortior et tortos servat vesica capillos
 20 et mutat Latias spuma Batava comas.
 21 Hac cute Ledaeo vestitur pullus in ovo,
 22 talia lunata splenia fronte sedent.
 23 Quid tibi cum phiala, ligulam cum mittere possis,
 24 mittere cum possis vel cocleare mihi,
 25 (magna nimis loquimur), cocleam cum mittere possis,
 26 denique cum possis mittere, Paule, nihil ?
- M8_34 v.1 Archetypum Myos argentum te dicis habere.
 2 Quod sine te factum est hoc magis archetypum est ?
- M8_35 v.1 Cum sitis similes paresque vita,
 2 uxor pessima, pessimus maritus,
 3 miror non bene convenire vobis.
- M8_36 v.1 Regia pyramidum, Caesar, miracula ride ;
 2 jam tacet Eoum barbara Memphis opus :
 3 pars quota Parrhasiae labor est Mareoticus aulae ?
 4 Clarius in toto nil videt orbe dies.
 5 Septenos pariter credas adsurgere montes,
 6 Thessalicum brevior Pelion Ossa tulit ;
 7 aethera sic intrat nitidis ut conditus astris
 8 inferiore tonet nube serenus apex
 9 et prius arcano satietur numine Phoebi
 10 nascentis Circe quam videt ora patris.
 11 Haec, Auguste, tamen, quae vertice sidera pulsat,
 12 par domus est caelo sed minor est domino.

- M8_37 v.1 Quod Caietano reddis, Polycharme, tabellas,
2 milia te centum num tribuisse putas ?
3 "Debuit haec" inquis. Tibi habe, Polycharme, tabellas
4 et Caietano milia crede duo.
- M8_38 v.1 Qui praestat pietate pertinaci
2 sensuro bona liberalitatis,
3 captet forsitan aut vicem reposcat :
4 at si quis dare nomini relicto
5 post manes tumulumque perseverat,
6 quaerit quid nisi parcius dolere ?
7 Refert sis bonus an velis videri.
8 Praestas hoc, Melior, sciente fama,
9 qui sollemnibus anxius sepulti
10 nomen non sinis interire Blaesi.
11 Et de munifica profusus arca
12 ad natalicium diem colendum
13 scribarum memori piaequae turbae
14 quod donas, facis ipse Blaesianum.
15 Hoc longum tibi, vita dum manebit,
16 hoc et post cineres erit tributum.
- M8_39 v.1 Qui Palatinae caperet convivia mensae
2 ambrosiasque dapes, non erat ante locus :
3 hic haurire decet sacrum, Germanice, nectar
4 et Ganymedeae pocula mixta manu.
5 Esse velis, oro, serus conviva Tonantis :
6 at tu si properas, Juppiter, ipse veni.
- M8_40 v.1 Non horti neque palmitis beati
2 sed rari nemoris, Priape, custos,
3 ex quo natus es et potes renasci,
4 furaces, moneo, manus repellas
5 et silvam domini focus reserves :
6 si defecerit haec, et ipse lignum es.
- M8_41 v.1 "Tristis Athenagoras non misit munera nobis
2 quae medio brumae mittere mense solet."
3 An sit Athenagoras tristis, Faustine, videbo :
4 me certe tristem fecit Athenagoras.
- M8_42 v.1 Si te sportula major ad beatos
2 non corruperit, ut solet, licebit
3 de nostro, Matho, centies laveris.
- M8_43 v.1 Effert uxores Fabius, Chrestilla maritos,
2 funereamque toris quassat uterque facem.
3 Victores committe, Venus : quos iste manebit
4 exitus, una duos ut Libitina ferat.
- M8_44 v.1 Titulle, moneo, vive : semper hoc serum est ;
2 sub paedagogo coeperis licet, serum est.
3 At tu, miser Titulle, nec senex vivis,
4 sed omne limen conteris salutator
5 et mane sudas urbis osculis udus,
6 foroque triplici sparsus ante equos omnis
7 aedemque Martis et colosson Augusti

- 8 curris per omnis tertiasque quintasque.
 9 Rape, congere, aufer, posside : relinquendum est.
 10 Superba densis arca palleat nummis,
 11 centum explicentur paginae Kalendarum,
 12 jurabit heres te nihil reliquisse,
 13 supraque pluteum te jacente vel saxum,
 14 fartus papyro dum tibi torus crescit,
 15 flentes superbus basiabit eunuchos ;
 16 tuoque tristis filius, velis nolis,
 17 cum concubino nocte dormiet prima.
- M8_45 v.1 Priscus ab Aetnaeis mihi, Flacce, Terentius oris
 2 redditur : hanc lucem lactea gemma notet ;
 3 defluat et lento splendescat turbida lino
 4 amphora centeno consule facta minor.
 5 Continget nox quando meis tam candida mensis ?
 6 tam justo dabitur quando calere mero ?
 7 Cum te, Flacce, mihi reddet Cythereia Cypros,
 8 luxuriae fiet tam bona causa meae.
- M8_46 v.1 Quanta tua est probitas tanta est infantia formae,
 2 Ceste puer, puero castior Hippolyto.
 3 Te secum Diana velit doceatque natare,
 4 te Cybele totum mallet habere Phryge ;
 5 tu Ganymedeo poteris succedere lecto,
 6 sed durus domino basia sola dares.
 7 Felix, quae tenerum vexabit sponsa maritum
 8 et quae te faciet prima puella virum !
- M8_47 v.1 Pars maxillarum tonsa est tibi, pars tibi rasa est,
 2 pars vulsa est. Unum quis putet esse caput ?
- M8_48 v.1 Nescit cui dederit Tyriam Crispinus abollam,
 2 dum mutat cultus induiturque togam.
 3 Quisquis habes, umeris sua munera redde, precamur :
 4 non hoc Crispinus te, sed abolla rogat.
 5 Non quicumque capit saturatas murice vestes
 6 nec nisi deliciis convenit iste color.
 7 Si te praeda juvat foedique insania lucri,
 8 qua possis melius fallere, sume togam.
- M8_49 v.1 Formosam sane, sed caecus diligit Asper.
 2 Plus ergo, ut res est, quam videt Asper amat.
- M8_50 v.1 Quanta Gigantei memoratur mensa triumphi
 2 quantaque nox superis omnibus illa fuit,
 3 qua bonus accubuit genitor cum plebe deorum
 4 et licuit Faunis poscere vina Jovem :
 5 tanta tuas celebrant, Caesar, convivia laurus ;
 6 exhilarant ipsos gaudia nostra deos.
 7 Vescitur omnis eques tecum populusque patresque
 8 et capit ambrosias cum duce Roma dapes.
 9 Grandia pollicitus quanto majora dedisti !
 10 Promissa est nobis sportula, recta data est.
- M8_51 v.1 Quis labor in phiala ? Docti Myos anne Myronos ?
 2 Mentoris haec manus est an, Polyclite, tua ?

- 3 Livescit nulla caligine fusca nec odit
4 exploratores nubila massa focos.
5 Vera minus flavo radiant electra metallo
6 et niveum felix pustula vincit ebur.
7 Materiae non cedit opus : sic alligat orbem,
8 plurima cum tota lampade luna nitet.
9 Stat caper Aeolio Thebani vellere Phrixi
10 cultus : ab hoc mallet vecta fuisse soror ;
11 hunc nec Cinyphius tonsor violaverit et tu
12 ipse tua pasci vite, Lyaeae, velis.
13 Terga premit pecudis geminis amor aureus alis ;
14 Palladius tenero lotos ab ore sonat :
15 sic Methymnaeo gavisus Arione delphin
16 languida non tacitum per freta vexit onus.
17 Imbuat egregium digno mihi nectare munus
18 non grege de domini, sed tua, Ceste, manus ;
19 Ceste, decus mensae, misce Setina : videtur
20 ipse puer nobis, ipse sitire caper.
21 Det numerum cyathis Instanti littera Rufi :
22 auctor enim tanti muneris ille mihi :
23 si Telethusa venit promissaque gaudia portat,
24 servabor dominae, Rufe, triente tuo ;
25 si dubia est, septunce trahar ; si fallit amantem,
26 ut jugulem curas, nomen utrumque bibam.
- M8_52 v.1 Tonsorem puerum sed arte talem
2 qualis nec Thalamus fuit Neronis,
3 Drusorum cui contigere barbae,
4 aequandas semel ad genas rogatus
5 Rufo, Caediciane, commodavi.
6 Dum jussus repetit pilos eosdem,
7 censura speculi manum regente,
8 expingitque cutem facitque longam
9 detonsis epaphaeresin capillis,
10 barbatus mihi tonsor est reversus.
- M8_53 v.1 Formosissima quae fuere vel sunt,
2 sed vilissima quae fuere vel sunt,
3 o quam te fieri, Catulla, vellem
4 formosam minus aut magis pudicam !
- M8_54 v.1 Magna licet totiens tribuas, majora daturus
2 dona, ducum victor, victor et ipse tui,
3 diligentis populo non propter praemia, Caesar,
4 te propter populus praemia, Caesar, amat.
- M8_55 v.1 Auditur quantum Massyla per avia murmur,
2 innumero quotiens silva leone furit,
3 pallidus attonitos ad Poena mapalia pastor
4 cum revocat tauros et sine mente pecus,
5 tantus in Ausonia fremuit modo terror harena.
6 Quis non esse gregem crederet ? Unus erat ;
7 sed cujus tremere ipsi quoque jura leones,
8 cui diadema daret marmore picta Nomas.
9 O quantum per colla decus, quem sparsit honorem
10 aurea lunatae, cum stetit, umbra jubae !
11 Grandia quam decuit latum venabula pectus

- 12 quantaque de magna gaudia morte tulit !
 13 Unde tuis, Libye, tam felix gloria silvis ?
 14 A Cybeles numquid venerat ille jugo ?
 15 An magis Herculeo, Germanice, misit ab astro
 16 hanc tibi vel frater vel pater ipse feram ?
- M8_56 v.1 Temporibus nostris aetas cum cedat avorum
 2 creverit et major cum duce Roma suo,
 3 ingenium sacri miraris desse Maronis
 4 nec quemquam tanta bella sonare tuba.
 5 Sint Maecenates, non derunt, Flacce, Marones
 6 Vergiliumque tibi vel tua rura dabunt.
 7 Jugera perdiderat miserae vicina Cremonae
 8 flebat et abductas Tityrus aeger oves :
 9 risit Tuscus eques paupertatemque malignam
 10 reppulit et celeri jussit abire fuga.
 11 "Accipe divitias et vatum maximus esto ;
 12 tu licet et nostrum" dixit "Alexin ames."
 13 Adstabat domini mensis pulcherrimus ille
 14 marmorea fundens nigra Falerna manu,
 15 et libata dabat roseis carchesia labris
 16 quae poterant ipsum sollicitare Jovem.
 17 Excidit attonito pinguis Galatea poetae
 18 Thestylis et rubras messibus usta genas :
 19 protinus Italiam concepit et "Arma virumque,"
 20 qui modo vix Culicem fleverat ore rudi.
 21 Quid Varios Marsosque loquar ditataque vatum
 22 nomina, magnus erit quos numerare labor ?
 23 Ergo ero Vergilius, si munera Maecenatis
 24 des mihi ? Vergilius non ero, Marsus ero.
- M8_57 v.1 Tres habuit dentes, pariter quos expuit omnes,
 2 ad tumulum Picens dum sedet ipse suum ;
 3 collegitque sinu fragmenta novissima laxi
 4 oris et adgesta contumulavit humo.
 5 Ossa licet quondam defuncti non legat heres :
 6 hoc sibi jam Picens praestitit officium.
- M8_58 v.1 Cum tibi tam crassae sint, Artemidore, lacernae,
 2 possim te Sagarim jure vocare meo.
- M8_59 v.1 Aspicis hunc uno contentum lumine, cujus
 2 lippa sub adtrita fronte lacuna patet ?
 3 Ne contemne caput, nihil est furacius illo ;
 4 non fuit Autolycci tam piperata manus.
 5 Hunc tu convivam cautus servare memento :
 6 tunc furit atque oculo luscus utroque videt :
 7 pocula solliciti perdunt ligulasque ministri
 8 et latet in tepido plurima mappa sinu ;
 9 lapsa nec a cubito subducere pallia nescit
 10 et tectus laenis saepe duabus abit ;
 11 nec dormitantem vernam fraudare lucerna
 12 erubuit fallax, ardeat illa licet.
 13 Si nihil invasit, puerum tunc arte dolosa
 14 circuit et soleas subripit ipse suas.
- M8_60 v.1 Summa Palatini poteras aequare Colossi,

- 2 si fieres brevior, Claudia, sesquipede.
- M8_61 v.1 Livet Charinus, rumpitur, furit, plorat
 2 et quaerit altos unde pendeat ramos :
 3 non jam quod orbe cantor et legor toto,
 4 nec umbilicis quod decorus et cedro
 5 spargor per omnes Roma quas tenet gentes ;
 6 sed quod sub urbe rus habemus aestivum
 7 vehimurque mulis non ut ante conductis.
 8 Quid inprecabor, o Severe, liventi ?
 9 Hoc opto : mulas habeat et suburbanum.
- M8_62 v.1 Scribit in aversa Picens epigrammata charta,
 2 et dolet averso quod facit illa deo.
- M8_63 v.1 Thestylon Aulus amat sed nec minus ardet Alexin,
 2 forsitan et nostrum nunc Hyacinthon amat.
 3 I nunc et dubita vates an diligat ipsos,
 4 delicias vatium cum meus Aulus amet.
- M8_64 v.1 Ut poscas, Clyte, munus exigasque,
 2 uno nasceris octiens in anno
 3 et solas, puto, tresve quattuorve
 4 non natalicias habes Kalendas.
 5 Sit vultus tibi levior licebit
 6 tritis litoris aridi lapillis,
 7 sit moro coma nigrior caduco,
 8 vincas mollitia tremente plumas
 9 aut massam modo lactis alligati,
 10 et talis tumor excitet papillas
 11 qualis cruda viro puella servat,
 12 tu nobis, Clyte, jam senex videris :
 13 tam multos quis enim fuisse credat
 14 natalis Priamive Nestorisve ?
 15 Sit tandem pudor et modus rapinis.
 16 Quod si ludis adhuc semelque nasci
 17 uno jam tibi non sat est in anno,
 18 natum te, Clyte, nec semel putabo.
- M8_65 v.1 Hic ubi Fortunae Reducis fulgentia late
 2 templa nitent, felix area nuper erat :
 3 hic stetit Arctoi formosus pulvere belli
 4 purpureum fundens Caesar ab ore jubar ;
 5 hic lauru redimita comas et candida cultu
 6 Roma salutavit voce manuque ducem.
 7 Grande loci meritum testantur et altera dona :
 8 stat sacer et domitis gentibus arcus ovat.
 9 Hic gemini currus numerant elephanta frequentem,
 10 sufficit immensis aureus ipse jugis.
 11 Haec est digna tuis, Germanice, porta triumphis ;
 12 hos aditus urbem Martis habere decet.
- M8_66 v.1 Augusto pia tura victimasque
 2 pro vestro date Silio, Camenae.
 3 Bis senos jubet en redire fascas,
 4 nato consule, nobilique virga
 5 vatis Castaliam domum sonare

- 6 rerum prima salus et una Caesar.
7 Gaudenti superest adhuc quod optet,
8 felix purpura tertiusque consul.
9 Pompeio dederit licet senatus
10 et Caesar genero sacros honores,
11 quorum pacificus ter ampliavit
12 Janus nomina : Silius frequentes
13 mavult sic numerare consulatus.
- M8_67 v.1 Horas quinque puer nondum tibi nuntiat et tu
2 jam conviva mihi, Caeciliane, venis,
3 cum modo distulerint raucae vadimonia quartae
4 et Floralicias lasset harena feras.
5 Curre, age, et inlotos revoca, Calliste, ministros ;
6 sternantur lecti : Caeciliane, sede.
7 Caldam poscis aquam : nondum mihi frigida venit ;
8 alget adhuc nudo clusa culina foco.
9 Mane veni potius ; nam cur te quinta moretur ?
10 Ut jantes, sero, Caeciliane, venis.
- M8_68 v.1 Qui Corcyraei vidit pomaria regis,
2 rus, Entelle, tuae praeferet ille domus.
3 Invida purpureos urat ne bruma racemos
4 et gelidum Bacchi munera frigus edat,
5 condita perspicua vivit vindemia gemma
6 et tegitur felix nec tamen uva latet :
7 femineum lucet sic per bombycina corpus,
8 calculus in nitida sic numeratur aqua.
9 Quid non ingenio voluit natura licere ?
10 Autumnum sterilis ferre jubetur hiems.
- M8_69 v.1 Miraris veteres, Vacerra, solos
2 nec laudas nisi mortuos poetas.
3 Ignoscas petimus, Vacerra : tanti
4 non est, ut placeam tibi, perire.
- M8_70 v.1 Quanta quies placidi tantast facundia Nervae,
2 sed cohibet vires ingeniumque pudor.
3 Cum siccare sacram largo Permessida posset
4 ore, verecundam maluit esse sitim,
5 Pieriam tenui frontem redimire corona
6 contentus, famae nec dare vela suae.
7 Sed tamen hunc nostri scit temporis esse Tibullum,
8 carmina qui docti nota Neronis habet.
- M8_71 v.1 Quattuor argenti libras mihi tempore brumae
2 misisti ante annos, Postumiane, decem ;
3 speranti plures (nam stare aut crescere debent
4 munera) venerunt plusve minusve duae ;
5 tertius et quartus multo inferiora tulerunt ;
6 libra fuit quinto Septiciana quidem ;
7 besalem ad scutulam sexto pervenimus anno ;
8 post hunc in cotula rasa selibra data est ;
9 octavus ligulam misit sextante minorem ;
10 nonus acu levius vix cocleare tulit.
11 Quod mittat nobis decumus jam non habet annus :
12 quattuor ad libras, Postumiane, redi.

- M8_72 v.1 Nondum murice cultus asperoque
 2 morsu pumicis aridi politus
 3 Arcanum properas sequi, libelle,
 4 quem pulcherrima jam redire Narbo,
 5 docti Narbo Paterna Votieni,
 6 ad leges jubet annuosque fasces :
 7 votis quod paribus tibi petendum est,
 8 continget locus ille et hic amicus.
 9 Quam vellem fieri meus libellus !
- M8_73 v.1 Instanti, quo nec sincerior alter habetur
 2 pectore nec nivea simplicitate prior,
 3 si dare vis nostrae vires animosque Thaliae
 4 et victura petis carmina, da quod amem.
 5 Cynthia te vatem fecit, lascive Properti ;
 6 ingenium Galli pulchra Lycoris erat ;
 7 fama est arguti Nemesis formosa Tibulli ;
 8 Lesbia dictavit, docte Catulle, tibi :
 9 non me Paeligni nec spernet Mantua vatem,
 10 si qua Corinna mihi, si quis Alexis erit.
- M8_74 v.1 Oplomachus nunc es, fueras ophthalmicus ante.
 2 Fecisti medicus quod facis oplomachus.
- M8_75 v.1 Dum repetit sera conductos nocte penates
 2 Lingonus a Tecta Flaminiaque recens,
 3 expulit offenso vitiatum pollice talum
 4 et jacuit toto corpore fusus humi.
 5 Quid faceret Gallus, qua se ratione moveret ?
 6 Ingenti domino servulus unus erat,
 7 tam macer ut minimam posset vix ferre lacernam :
 8 succurrit misero casus openque tulit.
 9 Quattuor inscripti portabant vile cadaver,
 10 accipit infelix qualia mille rogos ;
 11 hos comes invalidus summissa voce precatur,
 12 ut quocumque velint corpus inane ferant :
 13 permutatur onus stipataque tollitur alte
 14 grandis in angusta sarcina sandapila.
 15 Hic mihi de multis unus, Lucane, videtur
 16 cui merito dici "mortue Galle" potest.
- M8_76 v.1 "Dic verum mihi, Marce, dic, amabo ;
 2 nil est quod magis audiam libenter."
 3 Sic et cum recitas tuos libellos,
 4 et causam quotiens agis clientis,
 5 oras, Gallice, me rogasque semper.
 6 Durum est me tibi quod petis negare.
 7 Vero verius ergo quid sit audi :
 8 verum, Gallice, non libenter audis.
- M8_77 v.1 Liber, amicorum dulcissima cura tuorum,
 2 Liber, in aeterna vivere digne rosa,
 3 si sapis, Assyrio semper tibi crinis amomo
 4 splendeat et cingant florea sarta caput ;
 5 candida nigrescant vetulo crystallae Falerno
 6 et caleat blando mollis amore torus.

- 7 Qui sic vel medio finitus vixit in aevo,
8 longior huic facta est quam data vita fuit.
- M8_78 v.1 Quos cuperet Phlegraea suos victoria ludos,
2 Indica quos cuperet pompa, Lyaeae, tuos,
3 fecit Hyperborei celebrator Stella triumphii,
4 o pudor ! o pietas ! et putat esse parum.
5 Non illi satis est turbato sordidus auro
6 Hermus et Hesperio qui sonat orbe Tagus.
7 Omnis habet sua dona dies : nec linea dives
8 cessat et in populum multa rapina cadit ;
9 nunc veniunt subitis lasciva nomismata nimbis,
10 nunc dat spectatas tessera larga feras,
11 nunc implere sinus securos gaudet et absens
12 sortitur dominos, ne laceretur, avis.
13 Quid numerem currus ter denaque praemia palmae,
14 quae dare non semper consul uterque solet ?
15 Omnia sed, Caesar, tanto superantur honore,
16 quod spectatorem te tua laurus habet.
- M8_79 v.1 Omnes aut vetulas habes amicas
2 aut turpis vetulisque foediores.
3 Has ducis comites trahisque tecum
4 per convivia porticus theatra.
5 Sic formosa, Fabulla, sic puella es.
- M8_80 v.1 Sanctorum nobis miracula reddis avorum
2 nec pateris, Caesar, saecula cana mori,
3 cum veteres Latiae ritus renovantur harenae
4 et pugnat virtus simpliciore manu.
5 Sic priscis servatur honos te praeside templis
6 et casa tam culto sub Jove numen habet ;
7 sic nova dum condis, revocas, Auguste, priora :
8 debentur quae sunt quaeque fuere tibi.
- M8_81 v.1 Non per mystica sacra Dindymenes
2 nec per Niliacae bovem juvencae,
3 nullos denique per deos deasque
4 jurat Gellia, sed per uniones.
5 Hos amplectitur, hos perosculatur,
6 hos fratres vocat, hos vocat sorores,
7 hos natis amat acrius duobus.
8 His si quo careat misella casu,
9 victuram negat esse se nec horam.
10 Eheu, quam bene nunc, Papiriane,
11 Annaei faceret manus Sereni !
- M8_82 v.1 Dante tibi turba querulos, Auguste, libellos
2 nos quoque quod domino carmina parva damus,
3 posse deum rebus pariter Musisque vacare
4 scimus et haec etiam sarta placere tibi.
5 Fer vates, Auguste, tuos : nos gloria dulcis,
6 nos tua cura prior deliciaeque sumus.
7 Non quercus te sola decet nec laurea Phoebi :
8 fiat et ex hedera civica nostra tibi.

- M9_1 v.1 Note, licet nolis, sublimi pectore vates,
 2 cui referet serus praemia digna cinis,
 3 hoc tibi sub nostra breve carmen imagine vivat,
 4 quam non obscuris jungis, Avite, viris :
 5 "Ille ego sum nulli nugarum laude secundus
 6 quem non miraris sed puto, lector, amas.
 7 Majores majora sonent : mihi parva locuto
 8 sufficit in vestras saepe redire manus."
- M9_1B v.1 Dum Janus hiemes, Domitianus autumnos,
 2 Augustus annis commodabit aestates,
 3 dum grande famuli nomen adseret Rheni
 4 Germanicarum magna lux Kalendarum,
 5 Tarpeia summi saxa dum patris stabunt,
 6 dum voce supplex dumque ture placabit
 7 matrona divae dulce Juliae numen :
 8 manebit altum Flaviae decus gentis
 9 cum sole et astris cumque luce Romana.
 10 Invicta quidquid condidit manus, caeli est.
- M9_2 v.1 Pauper amicitiae cum sis, Lupe, non es amicae
 2 et queritur de te mentula sola nihil.
 3 Illa siligineis pinguescit adultera cunnis,
 4 convivam pascit nigra farina tuum.
 5 Incensura nives dominae Setina liquantur,
 6 nos bibimus Corsi pulla venena cadi ;
 7 empta tibi nox est fundis non tota paternis,
 8 non sua desertus rura sodalis arat ;
 9 splendet Erythraeis perlucida moecha lapillis,
 10 ducitur addictus, te futuente, cliens ;
 11 octo Syris suffulta datur lectica puellae,
 12 nudum sandapilae pondus amicus erit.
 13 I nunc et miseros, Cybele, praecide cinaedos :
 14 haec erat, haec cultris mentula digna tuis.
- M9_3 v.1 Quantum jam superis, Caesar, caeloque dedisti
 2 si repetas et si creditor esse velis,
 3 grandis in aethereo licet auctio fiat Olympo
 4 coganturque dei vendere quidquid habent,
 5 conturbabit Atlans et non erit uncia tota
 6 decidat tecum qua pater ipse deum :
 7 pro Capitolinis quid enim tibi solvere templis,
 8 quid pro Tarpeiae frondis honore potest ?
 9 Quid pro culminibus geminis matrona Tonantis ?
 10 Pallada praetereo : res agit illa tuas.
 11 Quid loquar Alciden Phoebumque piosque Laconas ?
 12 addita quid Latio Flavia templa polo ?
 13 Expectes et sustineas, Auguste, necesse est :
 14 nam tibi quod solvat non habet arca Jovis.
- M9_4 v.1 Aureolis futui cum possit Galla duobus
 2 et plus quam futui, si totidem addideris :
 3 aureolos a te cur accipit, Aeschyle, denos ?

- 4 Non fellat tanti Galla. Quid ergo ? Tacet.
- M9_5 v.1 Tibi, summe Rheni domitor et parens orbis,
2 pudice princeps, gratias agunt urbes :
3 populos habebunt ; parere jam scelus non est.
4 Non puer avari sectus arte mangonis
5 virilitatis damna maeret ereptae,
6 nec quam superbus computet stipem leno
7 dat prostituto misera mater infanti.
8 Qui nec cubili fuerat ante te quondam,
9 pudor esse per te coepit et lupanari.
- M9_6 v.1 Dicere de Libycis reduci tibi gentibus, Afer,
2 continuis volui quinque diebus Have :
3 "Non vacat" aut "dormit" dictum est bis terque reverso.
4 Jam satis est : non vis, Afer, havere : vale.
- M9_7 v.1 Tamquam parva foret sexus injuria nostri
2 foedandos populo prostituisset mares,
3 jam cunae lenonis erant, ut ab ubere raptus
4 sordida vagitu posceret aera puer :
5 inmatura dabant infandas corpora poenas.
6 Non tulit Ausonius talia monstra pater,
7 idem qui teneris nuper succurrit ephebis,
8 ne faceret steriles saeva libido viros.
9 Dilexere prius pueri juvenesque senesque,
10 at nunc infantes te quoque, Caesar, amant.
- M9_8 v.1 Nil tibi legavit Fabius, Bithynice, cui tu
2 annua, si memini, milia sena dabas.
3 Plus nulli dedit ille : queri, Bithynice, noli :
4 annua legavit milia sena tibi.
- M9_9 v.1 Cenes, Canthare, cum foris libenter,
2 damas et maledicis et minaris.
3 Deponas animos truces monemus :
4 liber non potes et gulosus esse.
- M9_10 v.1 Nubere vis Prisco : non miror, Paula ; sapisti.
2 Ducere te non vult Priscus : et ille sapit.
- M9_11 v.1 Nomen cum violis rosisque natum,
2 quo pars optima nominatur anni,
3 Hyblam quod sapit Atticosque flores
4 quod nidos olet alitis superbae ;
5 nomen nectare dulcius beato,
6 quo mallet Cybeles puer vocari
7 et qui pocula temperat Tonanti,
8 quod si Parrhasia sones in aula,
9 respondent Veneres Cupidinesque ;
10 nomen nobile, molle, delicatum
11 versu dicere non rudi volebam :
12 sed tu syllaba contumax rebellas.
13 Dicunt Eiarinon tamen poetae,
14 sed Graeci quibus est nihil negatum
15 et quos "Ares Ares" decet sonare :
16 nobis non licet esse tam disertis

- 17 qui Musas colimus severiores.
- M9_12 v.1 Nomen habes teneri quod tempora nuncupat anni,
2 cum breve Cecropiae ver populantur apes :
3 nomen Acidalia meruit quod harundine pingi,
4 quod Cytherea sua scribere gaudet acu ;
5 nomen Erythraeis quod littera facta lapillis,
6 gemma quod Heliadum pollice trita notet ;
7 quod pinna scribente grues ad sidera tollant ;
8 quod decet in sola Caesaris esse domo.
- M9_13 v.1 Si daret autumnus mihi nomen, Oporinos essem,
2 horrida si brumae sidera, Chimerinos ;
3 dictus ab aestivo Therinos tibi mense vocarer :
4 tempora cui nomen verna dedere quis est ?
- M9_14 v.1 Hunc quem mensa tibi, quem cena paravit amicum
2 esse putas fidae pectus amicitiae ?
3 Aprum amat et mullos et sumen et ostrea, non te.
4 Tam bene si cenem, noster amicus erit.
- M9_15 v.1 Inscripsit tumulis septem scelerata virorum
2 "Se fecisse" Chloe. Quid pote simplicius ?
- M9_16 v.1 Consilium formae speculum dulcisque capillos
2 Pergameo posuit dona sacrata deo
3 ille puer tota domino gratissimus aula,
4 nomine qui signat tempora verna suo.
5 Felix quae tali censetur munere tellus !
6 Nec Ganymedeas mallet habere comas.
- M9_17 v.1 Latonae venerande nepos, qui mitibus herbis
2 Parcarum exoras pensa brevesque colos,
3 hos tibi laudatos domino, rata vota, capillos
4 ille tuus Latia misit ab urbe puer ;
5 addidit et nitidum sacratis crinibus orbem,
6 quo felix facies iudice tuta fuit.
7 Tu juvenale decus serva, ne pulchrior ille
8 in longa fuerit quam brevior coma.
- M9_18 v.1 Est mihi (sitque precor longum te praeside, Caesar)
2 rus minimum, parvi sunt et in urbe lares.
3 Sed de valle brevi quas det sitientibus hortis
4 curva laboratas antlia tollit aquas :
5 sicca domus queritur nullo se rore foveri,
6 cum mihi vicino Marcia fonte sonet.
7 Quam dederis nostris, Auguste, penatibus undam,
8 Castalis haec nobis aut Jovis imber erit.
- M9_19 v.1 Laudas balnea versibus trecentis
2 cenantis bene Pontici, Sabelle.
3 Vis cenare, Sabelle, non lavari.
- M9_20 v.1 Haec, quae tota patet tegiturque et marmore et auro,
2 infantis domini conscia terra fuit,
3 felix o, quantis sonuit vagitibus et quas
4 vidit reptantis sustinuitque manus :

- 5 hic steterat veneranda domus quae praestitit orbi
6 quod Rhodos astrifero, quod pia Creta polo.
7 Curetes texere Jovem crepitantibus annis,
8 semiviri poterant qualia ferre Phryges :
9 at te protexit superum pater et tibi, Caesar,
10 pro jaculo et parma fulmen et aegis erat.
- M9_21 v.1 Artemidorus habet puerum, sed vendidit agrum ;
2 agrum pro puero Calliodorus habet.
3 Dic uter ex istis melius rem gesserit, Aucte :
4 Artemidorus amat, Calliodorus arat.
- M9_22 v.1 Credis ob haec me, Pastor, opes fortasse rogare
2 propter quae populus crassaque turba rogat,
3 ut Setina meos consumat gleba ligones
4 et sonet innumera compede Tuscus ager ;
5 ut Mauri Libycis centum stent dentibus orbes
6 et crepet in nostris aurea lamna toris,
7 nec labris nisi magna meis crystalla terantur
8 et faciant nigras nostra Falerna nives ;
9 ut canusinatus nostro Surus assere sudet
10 et mea sit culto sella cliente frequens ;
11 aestuet ut nostro madidus conviva ministro,
12 quem permutatum nec Ganymede velis ;
13 ut lutulenta linat Tyrias mihi mula lacernas
14 et Massyla meum virga gubernet equum.
15 Est nihil ex istis : superos ac sidera testor.
16 Ergo quid ? Ut donem, Pastor, et aedificem.
- M9_23 v.1 O cui virgineo flavescere contigit auro,
2 dic ubi Palladium sit tibi, Care, decus.
3 Aspicias en domini fulgentes marmore vultus ?
4 Venit ad has ultro nostra corona comas."
5 Albanæ livere potest pia quercus olivæ,
6 cinxerit invictum quod prior illa caput.
- M9_24 v.1 Quis Palatinos imitatus imagine vultus
2 Phidiacum Latio marmore vicit ebur ?
3 Haec mundi facies, haec sunt Jovis ora sereni :
4 sic tonat ille deus cum sine nube tonat.
5 Non solam tribuit Pallas tibi, Care, coronam ;
6 effigiem domini, quam colis, illa dedit.
- M9_25 v.1 Dantem vina tuum quotiens aspeximus Hyllum,
2 lumine nos, Afer, turbidiore notas.
3 Quod, rogo, quod scelus est mollem spectare ministrum ?
4 Aspiciamus solem sidera, templa, deos.
5 Avertam vultus, tamquam mihi pocula Gorgon
6 porrigat atque oculos oraue nostra petat ?
7 Trux erat Alcides, et Hylan spectare licebat ;
8 ludere Mercurio cum Ganymede licet.
9 Si non vis teneros spectet conviva ministros,
10 Phineas invites, Afer, et Oedipodas.
- M9_26 v.1 Audet facundo qui carmina mittere Nervæ,
2 pallida donabit glaucina, Cosme, tibi,
3 Paestano violas et cana ligustra colono,

- 4 Hyblaeis apibus Corsica mella dabit :
5 sed tamen et parvae nonnulla est gratia Musae ;
6 appetitur posito vilis oliva lupo.
7 Nec tibi sit mirum modici quod conscia vatis
8 iudicium metuit nostra Thalia tuum :
9 ipse tuas etiam veritus Nero dicitur aures,
10 lascivum juvenis cum tibi lusit opus.
- M9_27 v.1 Cum depilatos, Chreste, coleos portas
2 et vulturino mentulam parem collo
3 et prostitutis levius caput culis,
4 nec vivat ullus in tuo pilus crure,
5 purgentque saevae cana labra volsellae ;
6 Curios, Camillos, Quintios, Numas, Ancos,
7 et quidquid umquam legimus pilosorum
8 loqueris sonasque grandibus minax verbis,
9 et cum theatris saeculoque rixaris.
10 Occurrit aliquis inter ista si draucus,
11 jam paedagogo liberatus et cujus
12 refibulavit turgidum faber penem,
13 nutu vocatum ducis, et pudet fari
14 Catoniana, Chreste, quod facis lingua.
- M9_28 v.1 Dulce decus scaenae, ludorum fama, Latinus
2 ille ego sum, plausus deliciaeque tuae,
3 qui spectatorem potui fecisse Catonem,
4 solvere qui Curios Fabriciosque graves.
5 Sed nihil a nostro sumpsit mea vita theatro
6 et sola tantum scaenicus arte feror :
7 nec poteram gratus domino sine moribus esse :
8 intenus mentes inspicit ille deus.
9 Vos me laurigeri parasitum dicite Phoebi,
10 Roma sui famulum dum sciat esse Jovis.
- M9_29 v.1 Saecula Nestoreae permensa, Philaeni, senectae
2 rapta es ad infernas tam cito Ditis aquas ?
3 Euboicae nondum numerabas longa Sibyllae
4 tempora : major erat mensibus illa tribus.
5 Heu quae lingua silet ! Non illam mille catastae
6 vincebant, nec quae turba Sarapin amat,
7 nec matutini cirrata caterva magistri,
8 nec quae Strymonio de grege ripa sonat
9 quae nunc Thessalico lunam deducere rhombo,
10 quae sciet hos illos vendere lena toros ?
11 Sit tibi terra levis mollique tegaris harena,
12 ne tua non possint eruere ossa canes.
- M9_30 v.1 Cappadocum saevis Antistius occidit oris
2 Rusticus. O tristi crimine terra nocens !
3 Rettulit ossa sinu cari Nigrina mariti
4 et questa est longas non satis esse vias ;
5 cumque daret sanctam tumulis, quibus invidet, urnam,
6 visa sibi est rapto bis viduata viro.
- M9_31 v.1 Cum comes Arctoïs haereret Caesaris armis
2 Velius, hanc Marti pro duce vovit avem ;
3 luna quater binos non tota peregerat orbes,

- 4 debita poscebat jam sibi vota deus :
5 ipse suas anser properavit laetus ad aras
6 et cecidit sanctis hostia parva focus.
7 Octo vides patulo pendere nomismata rostro
8 alitis ? Haec extis condita nuper erant :
9 quae litat argento pro te, non sanguine, Caesar,
10 victima jam ferro non opus esse docet.
- M9_32 v.1 Hanc volo quae facilis, quae palliolata vagatur,
 2 hanc volo quae puero jam dedit ante meo,
 3 hanc volo quam redimit totam denarius alter,
 4 hanc volo quae pariter sufficit una tribus.
 5 Poscentem nummos et grandia verba sonantem
 6 possideat crassae mentula Burdigalae.
- M9_33 v.1 Audieris in quo, Flacce, balneo plausum,
 2 Maronis illic esse mentulam scito.
- M9_34 v.1 Juppiter Idaei risit mendacia busti,
 2 dum videt Augusti Flavia templa poli,
 3 atque inter mensas largo jam nectare fusus,
 4 pocula cum Marti traderet ipse suo,
 5 respiciens Phoebum pariter Phoebique sororem,
 6 cum quibus Alcides et pius Arcas erat :
 7 "Gnosia vos" inquit "nobis monumenta dedistis :
 8 cernite quam plus sit Caesaris esse patrem."
- M9_35 v.1 Artibus his semper cenam, Philomuse, mereris,
 2 plurima dum fingis, sed quasi vera refers.
 3 Scis quid in Arsacia Pacorus deliberet aula,
 4 Rhenanam numeras Sarmaticamque manum,
 5 verba ducis Daci chartis mandata resignas,
 6 victricem laurum quam venit ante vides,
 7 scis quotiens Phario madeat Jove fusca Syene,
 8 scis quota de Libyco litore puppis eat,
 9 cujus Iuleae capiti nascantur olivae,
 10 destinet aetherius cui sua sarta pater.
 11 Tolle tuas artes ; hodie cenabis apud me
 12 hac lege, ut narres nil, Philomuse, novi.
- M9_36 v.1 Viderat Ausonium posito modo crine ministrum
 2 Phryx puer, alterius gaudia nota Jovis :
 3 "Quod tuus ecce suo Caesar permisit ephebo
 4 tu permittite tuo, maxime rector" ait ;
 5 "jam mihi prima latet longis lanugo capillis,
 6 jam tua me ridet Juno vocatque virum."
 7 Cui pater aetherius "Puer o dulcissime," dixit,
 8 "non ego quod poscis, res negat ipsa tibi :
 9 Caesar habet noster similis tibi mille ministros
 10 tantaque sidereos vix capit aula mares ;
 11 at tibi si dederit vultus coma tonsa viriles,
 12 quis mihi qui nectar misceat alter erit ?"
- M9_37 v.1 Cum sis ipsa domi mediaque ornere Subura,
 2 fiant absentes et tibi, Galla, comae,
 3 nec dentes aliter quam Serica nocte reponas,
 4 et jaceas centum condita pyxidibus,

- 5 nec tecum facies tua dormiat, innuis illo
6 quod tibi prolatum est mane supercilio,
7 et te nulla movet cani reverentia cunni,
8 quem potes inter avos jam numerare tuos.
9 Promittis sescenta tamen ; sed mentula surda est,
10 et sit lusca licet, te tamen illa videt.
- M9_38 v.1 Summa licet velox, Agathine, pericula ludas,
2 non tamen efficies ut tibi parma cadat.
3 Nolentem sequitur tenuisque reversa per auras
4 vel pede vel tergo, crine vel ungue sedet ;
5 lubrica Corycio quamvis sint pulpita nimbo
6 et rapiant celeres vela negata Noti,
7 securos pueri neglecta perambulat artus,
8 et nocet artifici ventus et unda nihil.
9 Ut peccare velis, cum feceris omnia, falli
10 non potes : arte opus est ut tibi parma cadat.
- M9_39 v.1 Prima Palatino lux est haec orta Tonanti,
2 optasset Cybele qua peperisse Jovem ;
3 hac et sancta mei genita est Caesonia Rufi :
4 plus debet matri nulla puella suae.
5 Laetatur gemina votorum sorte maritus,
6 contigit hunc illi quod bis amare diem.
- M9_40 v.1 Tarpeias Diodorus ad coronas
2 Romam cum peteret Pharo relictas,
3 vovit pro reditu viri Philaenis
4 illam lingeret ut puella simplex
5 quam castae quoque diligunt Sabinae.
6 Dispersa rate tristibus procellis
7 mersus fluctibus obrutusque ponto
8 ad votum Diodorus enatavit.
9 O tardus nimis et piger maritus !
10 Hoc in litore si puella votum
11 fecisset mea, protinus redissem.
- M9_41 v.1 Pontice, quod numquam futuis, sed paelice laeva
2 uteris et Veneri servit amica manus,
3 hoc nihil esse putas ? Scelus est, mihi crede, sed
ingens,
4 quantum vix animo concipis ipse tuo.
5 Nempe semel futuit, generaret Horatius ut tres ;
6 Mars semel, ut geminos Ilia casta daret.
7 Omnia perdiderat si masturbatus uterque
8 mandasset manibus gaudia foeda suis.
9 Ipsam crede tibi naturam dicere rerum :
10 "Istud quod digitis, Pontice, perdis, homo est."
- M9_42 v.1 Campis dives Apollo sic Myrinis,
2 sic semper senibus fruare cynis,
3 doctae sic tibi serviant sorores
4 nec Delphis tua mentiatur ulli,
5 sic Palatia te colant amentque :
6 bis senos cito te rogante fasces
7 det Stellae bonus adnuatque Caesar.
8 Felix tunc ego debitorque voti

- 9 casurum tibi rusticas ad aras
 10 ducam cornibus aureis juvencum.
 11 Nata est hostia, Phoebe ; quid moraris ?
- M9_43 v.1 Hic qui dura sedens porrecto saxa leone
 2 mitigat, exiguo magnus in aere deus,
 3 quaeque tulit spectat resupino sidera vultu,
 4 cujus laeva calet robore, dextra mero :
 5 non est fama recens nec nostri gloria caeli ;
 6 nobile Lysippi munus opusque vides.
 7 Hoc habuit numen Pellaei mensa tyranni,
 8 qui cito perdomito victor in orbe jacet ;
 9 hunc puer ad Libycas juraverat Hannibal aras ;
 10 jusserat hic Sullam ponere regna trucem.
 11 Offensus variae tumidis terroribus aulae
 12 privatos gaudet nunc habitare lares,
 13 utque fuit quondam placidi conviva Molorchi,
 14 sic voluit docti Vindicis esse deus.
- M9_44 v.1 Alciden modo Vindicis rogabam
 2 esset cujus opus laborque felix.
 3 Risit, nam solet hoc, levique nutu
 4 "Graece numquid" ait "poeta nescis ?
 5 inscripta est basis indicatque nomen."
 6 Lusippou lego, Phidiae putavi.
- M9_45 v.1 Miles Hyperboreos modo, Marcelline, triones
 2 et Getici tuleras sidera pigra poli :
 3 ecce Promethei rupes et fabula montis
 4 quam prope sunt oculis nunc adeunda tuis !
 5 Videris immensis cum conclamata querelis
 6 saxa senis, dices "Durior ipse fuit."
 7 Et licet haec addas : "Potuit qui talia ferre,
 8 humanum merito finxerat ille genus."
- M9_46 v.1 Gellius aedificat semper : modo limina ponit,
 2 nunc foribus claves aptat emitque seras,
 3 nunc has, nunc illas reficit mutatque fenestras :
 4 dum tantum aedificet, quidlibet ille facit,
 5 oranti nummos ut dicere possit amico
 6 unum illud verbum Gellius "Aedifico."
- M9_47 v.1 Democritos, Zenonas inexplicitosque Platonas
 2 quidquid et hirsutis squallet imaginibus,
 3 sic quasi Pythagorae loqueris successor et heres.
 4 Praependet sane nec tibi barba minor :
 5 sed, quod et hircosis serum est et turpe pilosis,
 6 in molli rigidam clune libenter habes.
 7 Tu, qui sectarum causas et pondera nosti,
 8 dic mihi, percidi, Pannyche, dogma quod est ?
- M9_48 v.1 Heredem cum me partis tibi, Garrice, quartae
 2 per tua jurares sacra caputque tuum,
 3 credidimus (quis enim damnet sua vota libenter ?)
 4 Et spem muneribus fovimus usque datis ;
 5 inter quae rari Laurentem ponderis aprum
 6 misimus : Aetola de Calydone putes.

- 7 At tu continuo populumque patresque vocasti ;
8 ructat adhuc aprum callida Roma meum :
9 ipse ego (quis credat ?) conviva nec ultimus haesi,
10 sed nec costa data est caudave missa mihi.
11 De quadrante tuo quid sperem, Garrice ? Nulla
12 de nostro nobis uncia venit apro.
- M9_49 v.1 Haec est illa meis multum cantata libellis,
2 quam meus edidicit lector amatque togam.
3 Partheniana fuit quondam, memorabile vatis
4 munus : in hac ibam conspiciendus eques,
5 dum nova, dum nitida fulgebat splendida lana,
6 dumque erat auctoris nomine digna sui :
7 nunc anus et tremulo vix accipienda tribuli,
8 quam possis niveam dicere jure tuo.
9 Quid non longa dies, quid non consumitis anni ?
10 Haec toga jam non est Partheniana, mea est.
- M9_50 v.1 Ingenium mihi, Gaure, probas sic esse pusillum,
2 carmina quod faciam quae brevitatem placent.
3 Confiteor. Sed tu bis senis grandia libris
4 qui scribis Priami proelia, magnus homo es ?
5 Nos facimus Bruti puerum, nos Langona vivum :
6 tu magnus luteum, Gaure, Giganta facis.
- M9_51 v.1 Quod semper superos invito fratre rogasti,
2 hoc, Lucane, tibi contigit, ante mori.
3 Invidet ille tibi ; Stygias nam Tullus ad umbras
4 optabat, quamvis sit minor, ire prior.
5 Tu colis Elysios nemorisque habitator amoeni
6 esse tuo primum nunc sine fratre cupis ;
7 et si jam nitidis alternus venit ab astris,
8 pro Polluce mones Castora ne redeat.
- M9_52 v.1 Si credis mihi, Quinte, quod mereris,
2 natalis, Ovidi, tuas Aprilis
3 ut nostras amo Martias Kalendas.
4 Felix utraque lux diesque nobis
5 signandi melioribus lapillis !
6 Hic vitam tribuit sed hic amicum.
7 Plus dant, Quinte, mihi tuae Kalendae.
- M9_53 v.1 Natali tibi, Quinte, tuo dare parva volebam
2 munera ; tu prohibes : inperiosus homo es.
3 Parendum est monitis, fiat quod uterque volumus
4 et quod utrumque juvat : tu mihi, Quinte, dato.
- M9_54 v.1 Si mihi Picena turdus palleret oliva,
2 tenderet aut nostras silva Sabina plagas,
3 aut crescente levis traheretur harundine praeda
4 pinguis et implicitas virga teneret avis :
5 cara daret sollemne tibi cognatio munus
6 nec frater nobis nec prior esset avus.
7 Nunc sturnos inopes fringillorumque querelas
8 audit et arguto passere vernat ager ;
9 inde salutatus picae respondet arator,
10 hinc prope summa rapax milvus ad astra volat.

- 11 Mittimus ergo tibi parvae munuscula chortis,
12 qualia si recipis, saepe propinquus eris.
- M9_55 v.1 Luce propinquorum, qua plurima mittitur ales,
2 dum Stellae turdos, dum tibi, Flacce, paro,
3 succurrit nobis ingens onerosaque turba,
4 in qua se primum quisque meumque putat.
5 Demeruisse duos votum est ; offendere plures
6 vix tutum ; multis mittere dona grave est.
7 Qua possum sola veniam ratione merebor :
8 nec Stellae turdos nec tibi, Flacce, dabo.
- M9_56 v.1 Spendophoros Libycas domini petit armiger urbis :
2 quae puero dones tela, Cupido, para,
3 illa quibus juvenes figis mollesque puellas :
4 sit tamen in tenera levis et hasta manu,
5 Loricam clypeumque tibi galeamque remitto ;
6 tutus ut invadat proelia, nudus eat :
7 non jaculo, non ense fuit laesusve sagitta,
8 casside dum liber Parthenopaeus erat.
9 Quisquis ab hoc fuerit fixus morietur amore.
10 O felix, si quem tam bona fata manent !
11 Dum puer es, redeas, dum vultu lubricus, et te
12 non Libye faciat, sed tua Roma virum.
- M9_57 v.1 Nil est tritius Hedyli lacernis :
2 non ansae veterum Corinthiorum,
3 nec crus compede lubricum decenni,
4 nec ruptae recutita colla mularum,
5 nec quae Flaminiam secant salebrae,
6 nec qui litoribus nitent lapilli,
7 nec Tusca ligo vinea politus,
8 nec pallens toga mortui tribulis,
9 nec pigri rota quassa mulionis,
10 nec rasum cavea latus visontis,
11 nec dens jam senior ferocis apri.
12 Res una est tamen : ipse non negabit,
13 culus tritior Hedyli lacernis.
- M9_58 v.1 Nympha sacri regina lacus, cui grata Sabinus
2 et mansura pio munere templa dedit,
3 sic montana tuos semper colat Umbria fontes
4 nec tua Baianas Sassina malit aquas :
5 excipe sollicitos placide, mea dona, libellos ;
6 tu fueris Musis Pegasis unda meis.
7 "Nympharum templis quisquis sua carmina donat,
8 quid fieri libris debeat ipse monet."
- M9_59 v.1 In Saeptis Mamurra diu multumque vagatus,
2 hic ubi Roma suas aurea vexat opes,
3 inspexit molles pueros oculisque comedit,
4 non hos quos primae prostituere casae,
5 sed quos arcanae servant tabulata catastae
6 et quos non populus nec mea turba videt.
7 Inde satur mensas et opertos exuit orbes
8 expositumque alte pingue poposcit ebur,
9 et testudineum mensus quater hexaclinon

- 10 ingemuit citro non satis esse suo.
 11 Consuluit nares an olerent aera Corinthon,
 12 culpavit statuas et, Polyclite, tuas,
 13 et turbata brevi questus crystallina vitro
 14 murrina signavit seposuitque decem.
 15 Expendit veteres calathos et si qua fuerunt
 16 pocula Mentorea nobilitata manu,
 17 et viridis picto gemmas numeravit in auro,
 18 quidquid et a nivea grandius aure sonat.
 19 Sardonychas vero mensa quaesivit in omni
 20 et pretium magnis fecit iaspidibus.
 21 Undecima lassus cum jam discederet hora,
 22 asse duos calices emit et ipse tulit.
- M9_60 v.1 Seu tu Paestanis genita es seu Tiburis arvis,
 2 seu rubuit tellus Tuscula flore tuo,
 3 seu Praenestino te vilica legit in horto,
 4 seu modo Campani gloria ruris eras :
 5 pulchrior ut nostro videare corona Sabino,
 6 de Nomentano te putet esse meo.
- M9_61 v.1 In Tartesiacis domus est notissima terris,
 2 qua dives placidum Corduba Baetin amat,
 3 vellera nativo pallent ubi flava metallo
 4 et linit Hesperium brattea viva pecus.
 5 Aedibus in mediis totos amplexa penates
 6 stat platanus densis Caesariana comis,
 7 hospitis invicti posuit quam dextera felix,
 8 coepit et ex illa crescere virga manu.
 9 Auctorem dominumque nemus sentire videtur :
 10 sic viret et ramis sidera celsa petit.
 11 Saepe sub hac madidi luserunt arbore Fauni,
 12 terrui et tacitam fistula sera domum ;
 13 dumque fugit solos nocturnum Pana per agros,
 14 saepe sub hac latuit rustica fronde Dryas ;
 15 atque oluere lares commissatore Lyaeo,
 16 crevit et effuso laetior umbra mero ;
 17 hesternisque rubens dejecta est herba coronis
 18 atque suas potuit dicere nemo rosas.
 19 O dilecta deis, o magni Caesaris arbor,
 20 ne metuas ferrum sacrilegosque focos.
 21 Perpetuos sperare licet tibi frondis honores :
 22 non Pompeianae te posuere manus.
- M9_62 v.1 Tinctis murice vestibibus quod omni
 2 et nocte utitur et die Philaenis,
 3 non est ambitiosa nec superba :
 4 delectatur odore, non colore.
- M9_63 v.1 Ad cenam invitant omnes te, Phoebe, cinaedi.
 2 Mentula quem pascit, non, puto, purus homo est.
- M9_64 v.1 Herculis in magni voltus descendere Caesar
 2 dignatus Latiae dat nova templa viae,
 3 qua Triviae nemorosa petit dum regna, viator
 4 octavum domina marmor ab urbe legit.
 5 Ante colebatur votis et sanguine largo,

- 6 majorem Alciden nunc minor ipse colit.
7 Hunc magnas rogat alter opes, rogat alter honores ;
8 illi securus vota minora facit.
- M9_65 v.1 Alcide, Latio nunc agnoscende Tonanti,
2 postquam pulchra dei Caesaris ora geris,
3 si tibi tunc isti vultus habitusque fuissent,
4 cesserunt manibus cum fera monstra tuis :
5 Argolico famulum non te servire tyranno
6 vidissent gentes saevaue regna pati,
7 sed tu jussisses Eurysthea ; nec tibi fallax
8 portasset Nessi perfida dona Lichas,
9 Oetaei sine lege rogi securus adisses
10 astra patris summi, quae tibi poena dedit ;
11 Lydia nec dominae traxisses pensa superbae
12 nec Styga vidisses Tartareumque canem.
13 Nunc tibi Juno favet, nunc te tua diligit Hebe ;
14 nunc te si videat Nympha, remittet Hylan.
- M9_66 v.1 Uxor cum tibi sit formosa, pudica, puella,
2 quo tibi natorum jura, Fabulle, trium ?
3 Quod petis a nostro supplex dominoque deoque
4 tu dabis ipse tibi, si potes arrigere.
- M9_67 v.1 Lascivam tota possedi nocte puellam,
2 cujus nequitias vincere nulla potest.
3 Fessus mille modis illud puerile poposci :
4 ante preces totas primaue verba dedit.
5 Inprobis quiddam ridensque rubensque rogavi :
6 pollicita est nulla luxuriosa mora.
7 Sed mihi pura fuit ; tibi non erit, Aeschyle, si vis
8 accipere hoc munus conditione mala.
- M9_68 v.1 Quid tibi nobiscum est, ludi scelerate magister,
2 invisum pueris virginibusque caput ?
3 Nondum cristati rupere silentia galli :
4 murmure jam saevo verberibusque tonas.
5 Tam grave percussis incudibus aera resultant,
6 causicum medio cum faber aptat equo :
7 mitior in magno clamor furit amphitheatro,
8 vincenti parmae cum sua turba favet.
9 Vicini somnum (non tota nocte) rogamus :
10 nam vigilare leve est, pervigilare grave est.
11 Discipulos dimitte tuos. Vis, garrule, quantum
12 accipis ut clames, accipere ut taceas ?
- M9_69 v.1 Cum futuis, Polycharme, soles in fine cacare.
2 Cum pedicaris, quid, Polycharme, facis ?
- M9_70 v.1 Dixerat "O mores ! O tempora !" Tullius olim,
2 sacrilegum strueret cum Catilina nefas,
3 cum gener atque socer diris concurreret armis
4 maestaue civili caede maderet humus.
5 Cur nunc "O mores !" cur nunc "O tempora !" dicis ?
6 Quod tibi non placeat, Caeciliane, quid est ?
7 Nulla ducum feritas, nulla est insania ferri ;
8 pace frui certa laetitiaque licet.

- 9 Non nostri faciunt tibi quod tua tempora sordent,
10 sed faciunt mores, Caeciliane, tui.
- M9_71 v.1 Massyli leo fama jugi pecorisque maritus
2 lanigeri mirum qua coiere fide.
3 Ipse licet videas, cavea stabulantur in una
4 et pariter socias carpit uterque dapes :
5 nec fetu nemorum gaudent nec mitibus herbis,
6 concordem satiat sed rudis agna famem.
7 Quid meruit terror Nemees, quid portitor Helles,
8 ut niteant celsi lucida signa poli ?
9 Sidera si possent pecudesque feraeque mereri,
10 hic aries astris, hic leo dignus erat.
- M9_72 v.1 Liber, Amyclaea frontem vittate corona,
2 qui quatis Ausonia verbera Graia manu,
3 clusa mihi texto cum prandia vimine mittas,
4 cur comitata dapes nulla lagona venit ?
5 Atqui digna tuo si nomine munera ferres,
6 scis, puto, debuerint quae mihi dona dari.
- M9_73 v.1 Dentibus antiquas solitus producere pelles
2 et mordere luto putre vetusque solum,
3 Praenestina tenes defuncti rura patroni,
4 in quibus indignor si tibi cella fuit ;
5 rumpis et ardenti madidus crystalla Falerno
6 et pruris domini cum Ganymede tui.
7 At me litterulas stulti docuere parentes :
8 quid cum grammaticis rhetoribusque mihi ?
9 Frange leves calamos et scinde, Thalia, libellos,
10 si dare sutori calceus ista potest.
- M9_74 v.1 Effigiem tantum pueri pictura Camoni
2 servat et infantis parva figura manet.
3 Florentes nulla signavit imagine voltus,
4 dum timet ora pius muta videre pater.
- M9_75 v.1 Non silice duro structilive caemento,
2 nec latere cocto, quo Samiramis longam
3 Babylona cinxit, Tucca balneum fecit :
4 sed strage nemorum pineaeque conpage,
5 ut navigare Tucca balneo possit.
6 Idem beatas lautus extruit thermas
7 de marmore omni, quod Carystos invenit,
8 quod Phrygia Synnas, Afra quod Nomas misit
9 et quod virenti fonte lavit Eurotas.
10 Sed ligna desunt : subice balneum thermis.
- M9_76 v.1 Haec sunt illa mei quae cernitis ora Camoni,
2 haec pueri facies primaque forma fuit.
3 Creverat hic vultus bis denis fortior annis
4 gaudebatque suas pingere barba genas,
5 et libata semel summos modo purpura cultros
6 sparserat. Invidit de tribus una soror
7 et festinatis incidit stamina pensis
8 absentemque patri rettulit urna rogam.
9 Sed ne sola tamen puerum pictura loquatur,

- 10 haec erit in chartis major imago meis.
- M9_77 v.1 Quod optimum sit disputat convivium
 2 facunda Prisci pagina,
 3 et multa dulci, multa sublimi refert,
 4 sed cuncta docto pectore.
 5 Quod optimum sit quaeritis convivium ?
 6 In quo choraules non erit.
- M9_78 v.1 Funera post septem nupsit tibi Galla virorum,
 2 Picentine : sequi vult, puto, Galla viros.
- M9_79 v.1 Oderat ante ducum famulos turbamque priorem
 2 et Palatinum Roma supercilium :
 3 at nunc tantus amor cunctis, Auguste, tuorum est
 4 ut sit cuique suae cura secunda domus.
 5 Tam placidae mentes, tanta est reverentia nostri,
 6 tam pacata quies, tantus in ore pudor.
 7 Nemo suos (haec est aulae natura potentis),
 8 sed domini mores Caesarianus habet.
- M9_80 v.1 Duxerat esuriens locupletem pauper anumque :
 2 uxorem pascit Gellius et futuit.
- M9_81 v.1 Lector et auditor nostros probat, Aule, libellos,
 2 sed quidam exactos esse poeta negat.
 3 Non nimium curo : nam cenae fercula nostrae
 4 malim convivis quam placuisse cocis.
- M9_82 v.1 Dixerat astrologus periturum te cito, Munna,
 2 nec, puto, mentitus dixerat ille tibi.
 3 Nam tu dum metuis ne quid post fata relinquis,
 4 hausisti patrias luxuriosus opes
 5 bisque tuum deciens non toto tabuit anno :
 6 dic mihi, non hoc est, Munna, perire cito ?
- M9_83 v.1 Inter tanta tuae miracula, Caesar, harenae,
 2 quae vincit veterum munera clara ducum,
 3 multum oculi, sed plus aures debere fatentur
 4 se tibi quod spectant qui recitare solent.
- M9_84 v.1 Cum tua sacrilegos contra, Norbane, furores
 2 staret pro domino Caesare sancta fides,
 3 haec ego Pieria ludebam tutus in umbra,
 4 ille tuae cultor notus amicitiae.
 5 Me tibi Vindelicis Raetus narrabat in oris
 6 nescia nec nostri nominis Arctos erat :
 7 o quotiens veterem non inficiatus amicum
 8 dixisti "Meus est iste poeta, meus !"
 9 Omne tibi nostrum quod bis trieteride juncta
 10 ante dabat lector, nunc dabit auctor opus.
- M9_85 v.1 Languidior noster si quando est Paulus, Atili,
 2 non se, convivas abstinet ille suos.
 3 Tu languore quidem subito fictoque laboras,
 4 sed mea porrexit sportula, Paule, pedes.

- M9_86 v.1 Festinata sui gemeret quod fata Severi
 2 Silius, Ausonio non semel ore potens,
 3 cum grege Pierio maestus Phoeboque querebar.
 4 "Ipse meum flevi" dixit Apollo "Linon ; "
 5 respexitque suam quae stabat proxima fratri
 6 Calliopen et ait : "Tu quoque vulnus habes.
 7 Aspice Tarpeium Palatinumque Tonantem :
 8 ausa nefas Lachesis laesit utrumque Jovem.
 9 Numina cum videas duris obnoxia fatis,
 10 invidia possis exonerare deos."
- M9_87 v.1 Septem post calices Opimiani
 2 denso cum jaceam triente blaesus,
 3 adfers nescio quas mihi tabellas
 4 et dicis "Modo liberum esse jussi
 5 Nastam - servulus est mihi paternus - ;
 6 signa." Cras melius, Luperce, fiet :
 7 nunc signat meus anulus lagonam.
- M9_88 v.1 Cum me captares, mittebas munera nobis :
 2 postquam cepisti, das mihi, Rufe, nihil.
 3 Ut captum teneas, capto quoque munera mitte,
 4 de cavea fugiat ne male pastus aper.
- M9_89 v.1 Lege nimis dura convivam scribere versus
 2 cogis, Stella ? "Licet scribere nempe malos."
- M9_90 v.1 Sic in gramine florido reclinis,
 2 qua gemmantibus hinc et inde rivis
 3 curva calculus excitatur unda,
 4 exclusis procul omnibus molestis,
 5 pertundas glaciem triente nigro,
 6 frontem sutilibus ruber coronis ;
 7 sic uni tibi sit puer cinaedus
 8 et castissima pruriat puella :
 9 infamem nimio calore Cypron
 10 observes moneo precorque, Flacce,
 11 messes area cum teret crepantis
 12 et fervens juba saeviet leonis.
 13 At tu, diva Paphi, remitte, nostris
 14 inlaesum juvenem remitte votis.
 15 Sic Martis tibi serviant Kalendae
 16 et cum ture meroque victimaque
 17 libetur tibi candidas ad aras
 18 secta plurima quadra de placenta.
- M9_91 v.1 Ad cenam si me diversa vocaret in astra
 2 hinc invitator Caesaris, inde Jovis,
 3 astra licet propius, Palatia longius essent,
 4 responsa ad superos haec referenda darem :
 5 "Quaerite qui malit fieri conviva Tonantis :
 6 me meus in terris Juppiter ecce tenet."
- M9_92 v.1 Quae mala sunt domini, quae servi commoda, nescis,
 2 Condyle, qui servum te gemis esse diu.
 3 Dat tibi securos vilis tegeticula somnos,
 4 pervigil in pluma Gaius ecce jacet.

- 5 Gaius a prima tremebundus luce salutatur
6 tot dominos, at tu, Condyle, nec dominum.
7 "Quod debes, Gai, redde" inquit Phoebus et illinc
8 Cinnamus : hoc dicit, Condyle, nemo tibi.
9 Tortorem metuis ? Podagra cheragraque secatur
10 Gaius et mallet verbera mille pati.
11 Quod nec mane vomis nec cunnum, Condyle, lingis,
12 non mavis quam ter Gaius esse tuus ?
- M9_93 v.1 Addere quid cessas, puer, immortale Falernum ?
2 Quadrantem duplica de seniore cado.
3 Nunc mihi dic, quis erit cui te, Calacisse, deorum
4 sex jubeo cyathos fundere ? "Caesar erit."
5 Sutilis aptetur deciens rosa crinibus, ut sit
6 qui posuit sacrae nobile gentis opus.
7 Nunc bis quina mihi da basia, fiat ut illud
8 nomen ab Odrysio quod deus orbe tulit.
- M9_94 v.1 Santonica medicata dedit mihi pocula virga :
2 os hominis ! mulsum me rogat Hippocrates.
3 Tam stupidus numquam nec tu, puto, Glauce, fuisti,
4 Khalkea donanti Chrusea qui dederas.
5 Dulce aliquis munus pro munere poscit amaro ?
6 Accipiat, sed si potat in elleboro.
- M9_95 v.1 Alphius ante fuit, coepit nunc Olphius esse,
2 uxorem postquam duxit Athenagoras.
- M9_95B v.1 Nomen Athenagorae quaeris, Callistrate, verum :
2 si scio, dispeream, qui sit Athenagoras.
3 Sed puto me verum, Callistrate, dicere nomen :
4 non ego sed vester peccat Athenagoras.
- M9_96 v.1 Clinicus Herodes trullam subduxerat aegro :
2 deprensus dixit "Stulte, quid ergo bibis ?"
- M9_97 v.1 Rumpitur invidia quidam, carissime Juli,
2 quod me Roma legit, rumpitur invidia.
3 Rumpitur invidia quod turba semper in omni
4 monstramur digito, rumpitur invidia.
5 Rumpitur invidia tribuit quod Caesar uterque
6 jus mihi natorum, rumpitur invidia.
7 Rumpitur invidia quod rus mihi dulce sub urbe est
8 parvaque in urbe domus, rumpitur invidia.
9 Rumpitur invidia quod sum jucundus amicis,
10 quod conviva frequens, rumpitur invidia.
11 Rumpitur invidia quod amamur quodque probamur :
12 rumpatur quisquis rumpitur invidia.
- M9_98 v.1 Vindemiarum non ubique proventus
2 cessavit, Ovidi ; pluvia profuit grandis.
3 Centum Coranus amphoras aquae fecit.
- M9_99 v.1 Marcus amat nostras Antonius, Attice, Musas,
2 charta salutatrix si modo vera refert :
3 Marcus Palladiae non infitianda Tolosae
4 gloria, quem genuit Pacis alumna Quies

- 5 tu qui longa potes dispendia ferre viarum,
 6 i, liber, absentis pignus amicitiae.
 7 Vilis eras, fateor, si te nunc mitteret emptor ;
 8 grande tui pretium muneris auctor erit :
 9 multum, crede mihi, refert a fonte bibatur
 10 quae fluit an pigro quae stupet unda lacu.
- M9_100 v.1 Denaris tribus invitas et mane togatum
 2 observare jubes atria, Basse, tua,
 3 deinde haerere tuo lateri, praecedere sellam,
 4 ad viduas tecum plus minus ire decem.
 5 Trita quidem nobis togula est vilisque vetusque :
 6 denaris tamen hanc non emo, Basse, tribus.
- M9_101 v.1 Appia, quam simili venerandus in Hercule Caesar
 2 consecrat, Ausoniae maxima fama viae,
 3 si cupis Alcidae cognoscere facta prioris,
 4 disce : Libyn domuit raraque poma tulit,
 5 peltatam Scythico discinxit Amazona nodo,
 6 addidit Arcadio terga leonis apro,
 7 aeripedem silvis cervum, Stympthalidas astris
 8 abstulit, a Stygia cum cane venit aqua,
 9 fecundam vetuit reparari mortibus hydram,
 10 Hesperias Tusco lavit in amne boves.
 11 Haec minor Alcides : major quae gesserit audi,
 12 sextus ab Albana quem colit arce lapis.
 13 Adseruit possessa malis Palatia regnis,
 14 prima suo gessit pro Jove bella puer ;
 15 solus Iuleas cum jam retineret habenas,
 16 tradidit inque suo tertius orbe fuit ;
 17 cornua Sarmatici ter perfida contudit Histri,
 18 sudantem Getica ter nive lavit equum ;
 19 saepe recusatos parcus duxisse triumphos
 20 victor Hyperboreo nomen ab orbe tulit ;
 21 templa deis, mores populis dedit, otia ferro,
 22 astra suis, caelo sidera, sarta Jovi.
 23 Herculeum tantis numen non sufficit actis :
 24 Tarpeio deus hic commodet ora patri.
- M9_102 v.1 Quadringentorum reddis mihi, Phoebe, tabellas :
 2 centum da potius mutua, Phoebe, mihi.
 3 Quaere alium cui te tam vano munere jactes :
 4 quod tibi non possum solvere, Phoebe, meum est.
- M9_103 v.1 Quae nova tam similis genuit tibi Leda ministros ?
 2 Quae capta est alio nuda Lacaena cycno ?
 3 Dat faciem Pollux Hiero, dat Castor Asylo,
 4 atque in utroque nitet Tyndaris ore soror.
 5 Ista Therapnaeis si forma fuisset Amyclis,
 6 cum vicere duas dona minora deas,
 7 mansisses, Helene, Phrygiamque redisset in Iden
 8 Dardanius gemino cum Ganymede Paris.

- M10_1 v.1 Si nimius videor seraque coronide longus
2 esse liber, legito pauca : libellus ero.
3 Terque quaterque mihi finitur carmine parvo
4 pagina : fac tibi me quam cupis ipse brevem.
- M10_2 v.1 Festinata prior, decimi mihi cura libelli
2 elapsum manibus nunc revocavit opus.
3 Nota leges quaedam, sed lima rasa recenti ;
4 pars nova major erit : lector, utrique fave,
5 lector, opes nostrae ; quem cum mihi Roma dedisset,
6 "Nil tibi quod demus majus habemus" ait ;
7 "pigra per hunc fugies ingratae flumina Lethes
8 et meliore tui parte superstes eris.
9 Marmora Messallae findit caprificus, et audax
10 dimidios Crispi mulio ridet equos :
11 at chartis nec furta nocent et saecula prosunt,
12 Solaque non norunt haec monumenta mori."
- M10_3 v.1 Vernaculorum dicta, sordidum dentem,
2 et foeda linguae probra circulatricis,
3 quae sulphurato nolit empta ramento
4 Vatiniorum proxeneta fractorum,
5 poeta quidam clancularius spargit
6 et volt videri nostra. Credis hoc, Prisce ?
7 Voce ut loquatur psittacus coturnicis
8 et concupiscat esse Canus ascaules ?
9 Procul a libellis nigra sit meis fama,
10 quos rumor alba gemmeus vehit pinna :
11 cur ego laborem notus esse tam prave,
12 constare gratis cum silentium possit ?
- M10_4 v.1 Qui legis Oedipoden caligantemque Thyesten,
2 Colchidas et Scyllas, quid nisi monstra legis ?
3 Quid tibi raptus Hylas, quid Parthenopaeus et Attis,
4 quid tibi dormitor proderit Endymion ?
5 exutusve puer pinnis labentibus ? aut qui
6 odit amatrices Hermaphroditus aquas ?
7 Quid te vana juvant miserae ludibria chartae ?
8 Hoc lege, quod possit dicere vita "Meum est."
9 Non hic Centauros, non Gorgonas Harpyiasque
10 invenies : hominem pagina nostra sapit.
11 Sed non vis, Mamurra, tuos cognoscere mores
12 nec te scire : legas Aetia Callimachi.
- M10_5 v.1 Quisquis stolaeve purpuraeve contemptor
2 quos colere debet, laesit impio versu,
3 erret per urbem pontis exul et clivi,
4 interque raucos ultimus rogatores
5 oret caninas panis improbi buccas.
6 Illi December longus et madens bruma
7 clususque fornix triste frigus extendat :
8 vocet beatos clamitetque felices
9 Orciniana qui feruntur in sponda.
10 At cum supremae fila venerint horae

- 11 diesque tardus, sentiat canum litem
 12 abigatque moto noxias aves panno.
 13 Nec finiantur morte supplicis poenae,
 14 sed modo severi sectus Aeaci loris,
 15 nunc inquieti monte Sisyphi pressus,
 16 nunc inter undas garruli senis siccus
 17 delasset omnis fabulas poetarum :
 18 et cum fateri Furia jusserit verum,
 19 prodente clamet conscientia "Scripsi."
- M10_6 v.1 Felices, quibus urna dedit spectare coruscum
 2 solibus Arctois sideribusque ducem.
 3 Quando erit ille dies, quo campus et arbor et omnis
 4 lucebit Latia culta fenestra nuru ?
 5 Quando morae dulces longusque a Caesare pulvis
 6 totaque Flaminia Roma videnda via ?
 7 Quando eques et picti tunica Nilotide Mauri
 8 ibitis, et populi vox erit una "Venit" ?
- M10_7 v.1 Nympharum pater amniumque, Rhene,
 2 quicumque Odrusias bibunt pruinas,
 3 sic semper liquidis fruaris undis,
 4 nec te barbara contumeliosi
 5 calcatum rota conterat bubulci ;
 6 sic et cornibus aureis receptis
 7 et Romanus eas utraque ripa :
 8 Trajanum populis suis et urbi,
 9 Thybris te dominus rogat, remittas.
- M10_8 v.1 Nubere Paula cupit nobis, ego ducere Paulam
 2 nolo : anus est. Vellem, si magis esset anus.
- M10_9 v.1 Undenis pedibusque syllabisque
 2 et multo sale nec tamen protervo
 3 notus gentibus ille Martialis
 4 et notus populis (quid invidetis ?)
 5 Non sum Andraemone notior caballo.
- M10_10 v.1 Cum tu, laurigeris annum qui fascibus intras,
 2 mane salutator limina mille teras,
 3 hic ego quid faciam ? quid nobis, Paule, relinquis,
 4 qui de plebe Numae densaque turba sumus ?
 5 qui me respiciet, dominum regemque vocabo ?
 6 Hoc tu (sed quanto blandius !) ipse facis.
 7 Lecticam sellamve sequar ? nec ferre recusas,
 8 per medium pugnas et prior ire lutum.
 9 Saepius adsurgam recitanti carmina ? tu stas
 10 et pariter geminas tendis in ora manus.
 11 Quid faciet pauper, cui non licet esse clienti ?
 12 Dimisit nostras purpura vestra togas.
- M10_11 v.1 Nil aliud loqueris, quam Thesea Pirithoumque,
 2 teque putas Pyladi, Calliodore, parem.
 3 Dispeream, si tu Pyladi praestare matellam
 4 dignus es aut porcos pascere Pirithoi.
 5 "Donavi tamen" inquis "amico milia quinque
 6 et lotam, ut multum, terve quaterve togam."

- 7 Quid quod nil unquam Pyladi donavit Orestes ?
8 qui donat quamvis plurima plura negat.
- M10_12 v.1 Aemiliae gentes et Apollineas Vercellas
2 et Phaethontei qui petis arva Padi,
3 ne vivam, nisi te, Domiti, dimitto libenter,
4 grata licet sine te sit mihi nulla dies :
5 sed desiderium tanti est, ut messe vel una
6 urbano releves colla perusta jugo.
7 I precor et totos avida cute combibe soles,
8 - o quam formosus, dum peregrinus eris !
9 Et venies albis non cognoscendus amicis
10 livebitque tuis pallida turba genis.
11 Sed via quem dederit, rapiet cito Roma colorem,
12 Niliaco redeas tu licet ore niger.
- M10_13 v.1 Ducit ad auriferas quod me Salo Celtiber oras,
2 pendula quod patriae visere tecta libet,
3 Tu mihi simplicibus, Mani, dilectus ab annis
4 et praetextata cultus amicitia,
5 tu facis ; in terris quo non est alter Hiberis
6 dulcior et vero dignus amore magis.
7 Tecum ego vel sicci Gaetula mapalia Poeni
8 et poteram Scythicas hospes amare casas.
9 Si tibi mens eadem, si nostri mutua cura est,
10 in quocumque loco Roma duobus erit.
- M10_14 v.1 Cum cathedrata litos portet tibi raeda ministros
2 et Libys in longo pulvere sudet eques,
3 strataque non unas cingant triclinia Baias
4 et Thetis unguento palleat uncta tuo,
5 candida Setini rumpant crystalla trientes,
6 dormiat in pluma nec meliore Venus :
7 ad nocturna jaces fastosae limina moechae
8 et madet heu ! lacrimis janua surda tuis,
9 urere nec miserum cessant suspiria pectus.
10 Vis dicam, male sit cur tibi, Cotta ? bene est.
- M10_15 v.1 Cedere de nostris nulli te dicis amicis :
2 sed, sit ut hoc verum, quid, rogo, Crispe, facis ?
3 Mutua cum peterem sestertia quinque, negasti,
4 non caperet nummos cum gravis arca tuos.
5 Quando fabae nobis modium farrisve dedisti,
6 cum tua Niliacus rura colonus aret ?
7 Quando brevis gelidae missa est toga tempore brumae ?
8 argenti venit quando selibra mihi ?
9 Nil aliud video, quo te credamus amicum,
10 quam quod me coram pedere, Crispe, soles.
- M10_16 v.1 Dotatae uxori cor harundine fixit acuta,
2 sed dum ludit Aper : ludere novit Aper.
- M10_17 v.1 Si donare vocas promittere nec dare, Gai,
2 vincam te donis muneribusque meis.
3 Accipe Callaicis quidquid fodit Astur in arvis,
4 aurea quidquid habet divitis unda Tagi,
5 quidquid Erythraea niger invenit Indus in alga,

- 6 quidquid et in nidis unica servat avis,
7 quidquid Agenoreo Tyros improba cogit aheno :
8 quidquid habent omnes, accipe, quomodo das.
- M10_18 v.1 Saturnalicio Macrum fraudare tributo
2 frustra, Musa, cupis : non licet : ipse petit ;
3 sollemnesque jocos nec tristia carmina poscit,
4 et queritur nugas obticuisse meas.
5 Mensorum longis sed nunc vacat ille libellis.
6 Appia, quid facies, si legit ista Macer ?
- M10_19 v.1 Nec vocat ad cenam Marius, nec munera mittit,
2 nec spondet, nec volt credere, sed nec habet.
3 Turba tamen non dest, sterilem quae curet amicum.
4 Eheu ! Quam fatuae sunt tibi, Roma, togae !
- M10_20 v.1 Nec doctum satis et parum severum,
2 sed non rusticulum tamen libellum
3 facundo mea Plinio Thalia,
4 i perfer : brevis est labor peractae
5 altum vincere tramitem Suburae.
6 Illic Orphea protinus videbis
7 udi vertice lubricum theatri
8 mirantisque feras avemque regis,
9 raptum quae Phryga pertulit Tonanti ;
10 illic parva tui domus Pedonis
11 caelata est aquilae minore pinna.
12 Sed ne tempore non tuo disertam
13 pulses ebria januam, videto :
14 totos dat tetricae dies Minervae,
15 dum centum studet auribus virorum
16 Hoc quod saecula posterique possint
17 Arpinis quoque comparare chartis.
18 Seras tutior ibis ad lucernas :
19 haec hora est tua, cum furit Lyaeus,
20 cum regnat rosa, cum madent capilli :
21 tunc me vel rigidi legant Catones.
- M10_21 v.1 Scribere te quae vix intellegat ipse Modestus
2 et vix Claranus, quid rogo, Sexte, juvat ?
3 Non lectore tuis opus est, sed Apolline libris :
4 judice te major Cinna Marone fuit.
5 Sic tua laudentur sane : mea carmina, Sexte,
6 grammaticis placeant, ut sine grammaticis.
- M10_22 v.1 Cur spleniato saepe prodeam mento
2 albave pictus sana labra cerussa,
3 Philaeni, quaeris ? Basiare te nolo.
- M10_23 v.1 Jam numerat placido felix Antonius aevo
2 quindecies actas Primus Olympiadas
3 Praeteritosque dies et tutos respicit annos
4 nec metuit Lethes jam propioris aquas.
5 Nulla recordanti lux est ingrata gravisque ;
6 nulla fuit, cujus non meminisse velit.
7 Ampliat aetatis spatium sibi vir bonus : hoc est
8 vivere bis, vita posse priore frui.

- M10_24 v.1 Natales mihi Martiae Kalendae,
 2 lux formosior omnibus Kalendis,
 3 qua mittunt mihi munus et puellae,
 4 Quinquagensima liba septimamque
 5 vestris addimus hanc focus acerram.
 6 His vos, si tamen expedit roganti,
 7 Annos addite bis precor novenos,
 8 ut nondum nimia piger senecta,
 9 sed vitae tribus areis peractis
 10 lucos Elysiae petam puellae.
 11 Post hunc Nestora nec diem rogabo.
- M10_25 v.1 In matutina nuper spectatus harena
 2 Mucius, inposuit qui sua membra focus,
 3 si patiens durusque tibi fortisque videtur,
 4 Abderitanae pectora plebis habes.
 5 Nam cum dicatur tunica praesente molesta
 6 "Ure manum," plus est dicere "Non facio."
- M10_26 v.1 Vare, Paraetonias Latia modo vite per urbes
 2 nobilis et centum dux memorande viris,
 3 at nunc Ausonio frustra promisse Quirino,
 4 Hospita Lagei litoris umbra jaces.
 5 Spargere non licuit frigentia fletibus ora,
 6 pingua nec maestis addere tura rogis.
 7 Sed datur aeterno victurum carmine nomen :
 8 numquid et hoc, fallax Nile, negare potes ?
- M10_27 v.1 Natali, Diodore, tuo conviva senatus
 2 accubat, et rarus non adhibetur eques,
 3 et tua tricenos largitur sportula nummos.
 4 Nemo tamen natum te, Diodore, putat.
- M10_28 v.1 Annorum nitidique sator pulcherrime mundi,
 2 publica quem primum vota precesque vocant,
 3 pervius exiguos habitabas ante penates,
 4 plurima qua medium Roma terebat iter :
 5 nunc tua Caesareis cinguntur limina donis,
 6 et fora tot numeras, Jane, quot ora geris.
 7 At tu, sancte pater, tanto pro munere gratus,
 8 ferrea perpetua claustra tuere sera.
- M10_29 v.1 Quam mihi mittebas Saturni tempore lancem,
 2 misisti dominae, Sextiliane, tuae ;
 3 et quam donabas dictis a Marte Kalendis,
 4 de nostra prasina est synthesis empta toga.
 5 Jam constare tibi gratis coepere puellae :
 6 muneribus futuis, Sextiliane, meis.
- M10_30 v.1 O temperatae dulce Formiae litus,
 2 vos, cum severi fugit oppidum Martis
 3 et inquietas fessus exiit curas,
 4 Apollinaris omnibus locis praefert.
 5 Non ille sanctae dulce Tibur uxoris,
 6 nec Tusculanos Algidosve secessus,
 7 Praeneste nec sic Antiumque miratur ;

- 8 non blanda Circe Dardanisve Caieta
 9 desiderantur, nec Marica nec Liris,
 10 nec in Lucrina lota Salmacis vena.
 11 Hic summa leni stringitur Thetis vento ;
 12 nec languet aequor, viva sed quies ponti
 13 pictam phaselon adjuvante fert aura,
 14 sicut puellae non amantis aestatem
 15 Mota salubre purpura venit frigus.
 16 Nec saeta longo quaerit in mari praedam,
 17 sed a cubili lectuloque jactatam
 18 spectatus alte lineam trahit piscis.
 19 Si quando Nereus sentit Aeoli regnum,
 20 ridet procellas tuta de suo mensa :
 21 piscina rhombum pascit et lupos vernas,
 22 natat ad magistrum delicata muraena,
 23 nomenclator mugilem citat notum,
 24 et adesse jussi prodeunt senes nulli.
 25 Frui sed istis quando Roma permittit ?
 26 Quot Formianos inputat dies annus
 27 negotiosis rebus urbis haerenti ?
 28 O janitores vilicique felices !
 29 dominis parantur ista, serviunt vobis.
- M10_31 v.1 Addixti servum nummis here mille ducentis,
 2 ut bene cenares, Calliodore, semel ;
 3 nec bene cenasti : nullus tibi quattuor emptus
 4 librarum cenae pompa caputque fuit.
 5 Exclamare libet : "Non est hic, inprobe, non est
 6 piscis : homo est ; hominem, Calliodore, comes."
- M10_32 v.1 Haec mihi quae colitur violis pictura rosisque,
 2 quos referat voltus, Caediciane, rogas ?
 3 Talis erat Marcus mediis Antonius annis
 4 Primus : in hoc juvenem se videt ore senex.
 5 Ars utinam mores animumque effingere posset !
 6 Pulchrior in terris nulla tabella foret.
- M10_33 v.1 Simplicior priscis, Munati Galle, Sabinis,
 2 Cecropium superas qui bonitate senem,
 3 sic tibi consoceri claros retinere penates
 4 perpetua natae det face casta Venus :
 5 ut tu, si viridi tinctos aerugine versus
 6 forte malus livor dixerit esse meos,
 7 ut facis, a nobis abigas, nec scribere quemquam
 8 talia contendas carmina, qui legitur.
 9 Hunc servare modum nostri novere libelli,
 10 parcere personis, dicere de vitiis.
- M10_34 v.1 Di tibi dent quidquid, Caesar Trajane, mereris
 2 et rata perpetuo quae tribuere velint :
 3 qui sua restituis spoliato jura patrono
 4 - libertis exul non erit ille suis -,
 5 dignus es, ut possis totum servare clientem :
 6 ut - liceat tantum vera probare - potes.
- M10_35 v.1 Omnes Sulpiciam legant puellae,
 2 uni quae cupiunt viro placere ;

- 3 omnes Sulpiciam legant mariti,
 4 uni qui cupiunt placere nuptae.
 5 Non haec Colchidos adserit furorem
 6 diri prandia nec refert Thyestae ;
 7 Scyllam, Byblida nec fuisse credit :
 8 sed castos docet et probos amores,
 9 lusus, delicias facetiasque.
 10 Cujus carmina qui bene aestimarit,
 11 nullam dixerit esse nequiolem,
 12 nullam dixerit esse sanctiorem.
 13 Tales Egeriae jocos fuisse
 14 udo crediderim Numae sub antro.
 15 Hac condiscipula vel hac magistra
 16 esses doctior et pudica, Sappho :
 17 sed tecum pariter simulque visam
 18 durus Sulpiciam Phaon amaret.
 19 Frustra : namque ea nec Tonantis uxor
 20 nec Bacchi nec Apollinis puella
 21 erepto sibi viveret Caleno.
- M10_36 v.1 Inproba Massiliae quidquid fumaria cogunt,
 2 accipit aetatem quisquis ab igne cadus,
 3 a te, Munna, venit : miseris tu mittis amicis
 4 per freta, per longas toxica saeva vias ;
 5 nec facili pretio, sed quo contenta Falerni
 6 testa sit aut cellis Setia cara suis.
 7 Non venias quare tam longo tempore Romam,
 8 haec puto causa tibi est, ne tua vina bibas.
- M10_37 v.1 Juris et aequarum cultor sanctissime legum,
 2 veridico Latium qui regis ore forum,
 3 municipi, Materne, tuo veterique sodali
 4 Callaicum mandas siquid ad Oceanum -.
 5 An Laurentino turpis in litore ranas
 6 et satius tenues ducere credis acus,
 7 ad sua captivum quam saxa remittere mullum,
 8 visus erit libris qui minor esse tribus ?
 9 et fatuam summa cenare pelorida mensa
 10 quosque tegit levi cortice concha brevis
 11 ostrea Baianis quam non liventia testis,
 12 quae domino pueri non prohibente vorent ?
 13 Hic olidam clamosus ages in retia volpem
 14 mordebitque tuos sordida praeda canes :
 15 illic piscoso modo vix educta profundo
 16 inpedient lepores umida lina meos. -
 17 (Dum loquor, ecce redit sporta piscator inani,
 18 venator capta maele superbus adest :
 19 omnis ab urbano venit ad mare cena macello.
 20 Callaicum mandas siquid ad Oceanum -.
- M10_38 v.1 O molles tibi quindecim, Calene,
 2 quos cum Sulpicia tua jugales
 3 indulsit deus et peregit annos !
 4 O nox omnis et hora, quae notata est
 5 caris litoris Indici lapillis !
 6 O quae proelia, quas utrimque pugnas
 7 felix lectulus et lucerna vidit

- 8 nimbis ebria Nicerotianis !
 9 Vixisti tribus, o Calene, lustris :
 10 aetas haec tibi tota computatur
 11 et solos numeras dies mariti.
 12 Ex illis tibi si diu rogatam
 13 lucem redderet Atropos vel unam,
 14 malles, quam Pyliam quater senectam.
- M10_39 v.1 Consule te Bruto quod juras, Lesbia, natam,
 2 mentiris. Nata es, Lesbia, rege Numa ?
 3 Sic quoque mentiris. Namque, ut tua saecula narrant,
 4 ficta Prometheo diceris esse luto.
- M10_40 v.1 Semper cum mihi diceretur esse
 2 secreto mea Polla cum cinaedo,
 3 inrupi, Lupe. Non erat cinaedus.
- M10_41 v.1 Mense novo Jani veterem, Proculeia, maritum
 2 deseris atque jubes res sibi habere suas.
 3 Quid, rogo, quid factum est ? Subiti quae causa doloris ?
 4 Nil mihi respondes ? Dicam ego, praetor erat :
 5 constatura fuit Megalensis purpura centum
 6 milibus, ut nimium munera parca dares,
 7 et populare sacrum bis milia dena tulisset.
 8 Discidium non est hoc, Proculeia : lucrum est.
- M10_42 v.1 Tam dubia est lanugo tibi, tam mollis, ut illam
 2 halitus et soles et levis aura terat.
 3 Celantur simili ventura Cydonea lana,
 4 pollice virgineo quae spoliata nitent.
 5 Fortius inpressi quotiens tibi basia quinque,
 6 barbatus labris, Dindyme, fio tuis.
- M10_43 v.1 Septima jam, Phileros, tibi conditur uxor in agro :
 2 plus nulli, Phileros, quam tibi, reddit ager.
- M10_44 v.1 Quinte Caledonios Ovidi visure Britannos
 2 et viridem Tethyn Oceanumque patrem,
 3 ergo Numae colles et Nomentana relinquis
 4 otia, nec retinet rusque focusque senem ?
 5 Gaudia tu differs, at non et stamina differt
 6 Atropos atque omnis scribitur hora tibi.
 7 Praestiteris caro (quis non hoc laudet ?) amico,
 8 ut potior vita sit tibi sancta fides ;
 9 sed reddare tuis tandem mansure Sabinis
 10 teque tuas numeres inter amicitias.
- M10_45 v.1 Si quid lene mei dicunt et dulce libelli,
 2 si quid honorificum pagina blanda sonat,
 3 hoc tu pingue putas et costam rodere mavis,
 4 ilia Laurentis cum tibi demus apri.
 5 Vaticana bibas, si delectaris aceto :
 6 non facit ad stomachum nostra lagona tuum.
- M10_46 v.1 Omnia vis belle, Matho, dicere. Dic aliquando
 2 et bene ; dic neutrum ; dic aliquando male.

- M10_47 v.1 Vitam quae faciant beatiorem,
 2 jucundissime Martialis, haec sunt :
 3 res non parta labore, sed relictas ;
 4 non ingratus ager, focus perennis ;
 5 lis numquam, toga rara, mens quieta ;
 6 vires ingenuae, salubre corpus ;
 7 prudens simplicitas, pares amici ;
 8 convictus facilis, sine arte mensa ;
 9 nox non ebria, sed soluta curis ;
 10 non tristis torus, et tamen pudicus ;
 11 somnus, qui faciat breves tenebras :
 12 quod sis esse velis nihilque malis ;
 13 summum nec metuas diem nec optes.
- M10_48 v.1 Nuntiat octavam Phariae sua turba juvencae,
 2 et pilata redit jamque subitque cohors.
 3 Temperat haec thermas, nimios prior hora vapores
 4 halat, et inmodico sexta Nerone calet.
 5 Stella, Nepos, Cani, Cerialis, Flacce, venitis ?
 6 septem sigma capit, sex sumus, adde Lupum.
 7 Exoneraturas ventrem mihi vilica malvas
 8 adtulit et varias, quas habet hortus, opes ;
 9 in quibus est lactuca sedens et tonsile porrum,
 10 nec dest ructatrix menta nec herba salax ;
 11 secta coronabunt rutatos ova lacertos
 12 et madidum thynni de sale sumen erit.
 13 Gustus in his ; una ponetur cenula mensa,
 14 haedus, inhumani raptus ab ore lupi,
 15 et quae non egeant ferro structoris ofellae
 16 et faba fabrorum prototomique rudes ;
 17 pullus ad haec cenisque tribus jam perna superstes
 18 addetur. Saturis mitia poma dabo,
 19 de Nomentana vinum sine faece lagona,
 20 quae bis Frontino consule trima fuit.
 21 Accedent sine felle joci nec mane timenda
 22 libertas et nil quod tacuisse velis :
 23 de prasino conviva meus venetoque loquatur,
 24 nec facient quemquam pocula nostra reum.
- M10_49 v.1 Cum potes amethystinos trientes
 2 et nigro madeas Opimiano,
 3 propinas modo conditum Sabinum
 4 et dicis mihi, Cotta, "Vis in auro ?"
 5 Quisquam plumbea vina volt in auro ?
- M10_50 v.1 Frangat Idumaeas tristis Victoria palmas,
 2 plange, Favor, saeva pectora nuda manu ;
 3 mutet Honor cultus, et iniquis munera flammis
 4 mitte coronatas, Gloria maesta, comas.
 5 Heu facinus ! prima fraudatus, Scorpe, juventa
 6 occidis et nigros tam cito jungis equos.
 7 Curribus illa tuis semper properata brevisque
 8 cur fuit et vitae tam prope meta tuae ?
- M10_51 v.1 Sidera jam Tyrius Phrixiei respicit agni
 2 Taurus, et alternum Castora fugit hiems ;
 3 ridet ager, vestitur humus, vestitur et arbor,

- 4 Ismarium paelex Attica plorat Ityn.
5 Quos, Faustine, dies, qualem tibi Roma, Ravennas,
6 abstulit ! o soles, o tunicata quies !
7 o nemus, o fontes solidumque madentis harenae
8 litus et aequoreis splendidus Anxur aquis,
9 et non unius spectator lectulus undae,
10 qui videt hinc puppes fluminis, inde maris !
11 Sed nec Marcelli Pompeianumque, nec illic
12 sunt triplices thermae, nec fora juncta quater,
13 nec Capitolini summum penetrale Tonantis,
14 quaeque nitent caelo proxima templa suo.
15 Dicere te lassum quotiens ego credo Quirino :
16 "Quae tua sunt, tibi habe : quae mea, redde mihi."
- M10_52 v.1 Thelyn viderat in toga spadonem :
2 damnatum Numa dixit esse moecham.
- M10_53 v.1 Ille ego sum Scorpis, clamosi gloria Circi,
2 plausus, Roma, tui deliciaeque breves,
3 invida quem Lachesis raptum trieteride nona,
4 dum numerat palmas, credidit esse senem.
- M10_54 v.1 Mensas, Ole, bonas ponis, sed ponis opertas.
2 Ridiculum est : possum sic ego habere bonas.
- M10_55 v.1 Arrectum quotiens Marulla penem
2 pensavit digitis diuque mensa est,
3 libras, scripula sextulasque dicit ;
4 idem post opus et suas palaestras
5 loro cum similis jacet remisso,
6 quanto sit levior Marulla dicit.
7 Non ergo est manus ista, sed statera.
- M10_56 v.1 Totis, Galle, jubes tibi me servire diebus
2 et per Aventinum ter quater ire tuum.
3 Eximit aut reficit dentem Cascellius aegrum,
4 infestos oculis uris, Hygiene, pilos ;
5 non secat et tollit stillantem Fannius uvam,
6 tristia saxorum stigmata delet Eros ;
7 enterocelarum fertur Podalirius Hermes :
8 qui sanet ruptos dic mihi, Galle, quis est ?
- M10_57 v.1 Argenti libram mittebas ; facta selibra est,
2 sed piperis. Tanti non emo, Sexte, piper.
- M10_58 v.1 Anxuris aequorei placidos, Frontine, recessus
2 et propius Baias litoreamque domum,
3 et quod inhumanae cancro fervente cicadae
4 non novere nemus, flumineosque lacus
5 dum colui, doctas tecum celebrare vacabat
6 Pieridas ; nunc nos maxima Roma terit.
7 Hic mihi quando dies meus est ? Jactamur in alto
8 Urbis, et in sterili vita labore perit,
9 dura suburbani dum jugera pascimus agri
10 vicinosque tibi, sancte Quirine, lares.
11 Sed non solus amat qui nocte dieque frequentat
12 limina nec vatem talia damna decent.

- 13 Per veneranda mihi Musarum sacra, per omnes
14 juro deos : et non officiosus amo.
- M10_59 v.1 Consumpta est uno si lemmate pagina, transis,
2 et breviora tibi, non meliora placent.
3 Dives et ex omni posita est instructa macello
4 cena tibi, sed te mattea sola juvat.
5 Non opus est nobis nimium lectore guloso ;
6 hunc volo, non fiat qui sine pane satur.
- M10_60 v.1 Jura trium petiit a Caesare discipulorum
2 adsuetus semper Munna docere duos.
- M10_61 v.1 Hic festinata requiescit Erotion umbra,
2 crimine quam fati sexta peremit hiems.
3 Quisquis eris nostri post me regnator agelli,
4 Manibus exiguis annua justa dato :
5 sic lare perpetuo, sic turba sospite solus
6 flebilis in terra sit lapis iste tua.
- M10_62 v.1 Ludi magister, parce simplici turbae :
2 sic te frequentes audiant capillati
3 et delicatae diligat chorus mensae,
4 nec calculator nec notarius velox
5 Majore quisquam circulo coronetur.
6 Albae leone flammeo calent luces
7 tostamque fervens Julius coquit messem.
8 Cirrata loris horridis Scythae pellis,
9 qua vapulavit Marsyas Celaenaes,
10 ferulaeque tristes, sceptrum paedagogorum,
11 cessent et Idus dormiant in Octobres :
12 aestate pueri si valent, satis discunt.
- M10_63 v.1 Marmora parva quidem, sed non cessura, viator,
2 Mausoli saxi pyramidumque legis.
3 Bis mea Romano spectata est vita Tarento
4 et nihil extremos perdidit ante rogos :
5 quinque dedit pueros, totidem mihi Juno puellas,
6 cluserunt omnes lumina nostra manus.
7 Contigit et thalami mihi gloria rara fuitque
8 una pudicitiae mentula nota meae.
- M10_64 v.1 Contigeris regina meos si Polla libellos,
2 non tetrica nostros excipe fronte jocos.
3 Ille tuus vates, Heliconis gloria nostri,
4 Pieria caneret cum fera bella tuba,
5 non tamen erubuit lascivo dicere versu
6 "Si nec pedicor, Cotta, quid hic facio ?"
- M10_65 v.1 Cum te municipem Corinthiorum
2 jactes, Charmention, negante nullo,
3 cur frater tibi dicor, ex Hiberis
4 et Celtis genitus Tagique civis ?
5 An vultu similes videmur esse ?
6 tu flexa nitidus coma vagaris,
7 Hispanis ego contumax capillis ;
8 levis dropace tu cotidiano,

- 9 hirsutis ego cruribus genisque ;
 10 os blaesum tibi debilisque lingua est,
 11 nobis ilia fortius loquetur :
 12 tam dispar aquilae columba non est,
 13 nec dorcas rigido fugax leoni.
 14 Quare desine me vocare fratrem,
 15 ne te, Charmenion, vocem sororem.
- M10_66 v.1 Quis, rogo, tam durus, quis tam fuit ille superbus
 2 qui iussit fieri te, Theopompe, cocum ?
 3 hanc aliquis faciem nigra violare culina
 4 sustinet, has uncto polluit igne comas ?
 5 quis potius cyathos aut quis crystalla tenebit ?
 6 qua sapient melius mixta Falerna manu ?
 7 Si tam sidereos manet exitus iste ministros,
 8 Juppiter utatur jam Ganymede coco.
- M10_67 v.1 Pyrrhae filia, Nestoris noverca,
 2 quam vidit Niobe puella canam,
 3 Laertes aviam senex vocavit,
 4 nutricem Priamus, socrum Thyestes,
 5 jam cornicibus omnibus superstes,
 6 hoc tandem sita prurit in sepulchro
 7 calvo Plutia cum Melanthis.
- M10_68 v.1 Cum tibi non Ephesos nec sit Rhodos aut Mitylene,
 2 sed domus in vico, Laelia, patricio,
 3 deque coloratis numquam lita mater Etruscis,
 4 durus Aricina de regione pater ;
 5 Kurie Mou, Meli Mou, Psuche Mou congeris usque,
 6 pro pudor ! Hersiliae civis et Egeriae.
 7 Lectulus has voces, nec lectulus audiat omnis,
 8 sed quem lascivo stravit amica viro.
 9 Scire cupis quo casta modo matrona loquaris ?
 10 Numquid, cum crisas, blandior esse potes ?
 11 Tu licet ediscas totam referasque Corinthon,
 12 non tamen omnino, Laelia, Lais eris.
- M10_69 v.1 Custodes das, Polla, viro, non accipis ipsa :
 2 hoc est uxorem ducere, Polla, virum.
- M10_70 v.1 Quod mihi vix unus toto liber exeat anno,
 2 desidia tibi sum, docte Potite, reus.
 3 Justius at quanto mirere, quod exeat unus,
 4 labantur toti cum mihi saepe dies.
 5 Non resalutantis video nocturnus amicos,
 6 gratulor et multis ; nemo, Potite, mihi.
 7 Nunc ad luciferam signat mea gemma Dianam,
 8 nunc me prima sibi, nunc sibi quinta rapit.
 9 Nunc consul praetorve tenet reducesque choreae,
 10 auditur toto saepe poeta die.
 11 Sed nec causidico possis inpune negare,
 12 nec si te rhetor grammaticusve rogent.
 13 Balnea post decumam lasso centumque petuntur
 14 quadrantes. Fiet quando, Potite, liber ?
- M10_71 v.1 Quisquis laeta tuis et sera parentibus optas

2 fata, brevem titulum marmoris hujus ama.
 3 "Condidit hac caras tellure Rabirius umbras ;
 4 nulli sorte jacent candidiore senes :
 5 bis sex lustra tori nox mitis et ultima clusit,
 6 arserunt uno funera bina rogo.
 7 Hos tamen ut primis raptos sibi quaerit in annis."
 8 Inprobis nihil his fletibus esse potest.

M10_72 v.1 Frustra, Blanditiae, venitis ad me
 2 attritis miserabiles labellis :
 3 dicturus dominum deumque non sum.
 4 Jam non est locus hac in urbe vobis ;
 5 ad Parthos procul ite pilleatos
 6 et turpes humilesque supplicesque
 7 pictorum sola basiate regum.
 8 Non est hic dominus, sed imperator,
 9 sed justissimus omnium senator,
 10 per quem de Stygia domo reducta est
 11 siccis rustica veritas capillis.
 12 Hoc sub principe, si sapis, caveto
 13 verbis, Roma, prioribus loquaris.

M10_73 v.1 Littera facundi gratum mihi pignus amici
 2 pertulit, Ausoniae dona severa togae,
 3 qua non Fabricius, sed vellet Apicius uti,
 4 vellet Maecenas Caesarianus eques.
 5 Vilior haec nobis alio mittente fuisset ;
 6 non quacumque manu victima caesa litat :
 7 a te missa venit : possem nisi munus amare,
 8 Marce, tuum, poteram nomen amare meum.
 9 Munere sed plus est et nomine gratius ipso
 10 officium docti iudiciumque viri.

M10_74 v.1 Jam parce lasso, Roma, gratulatori,
 2 lasso clienti. Quamdiu salutator
 3 anteambulones et togatulos inter
 4 centum merebor plumbeos die toto,
 5 cum Scorpis una quindecim graves hora
 6 ferventis auri victor auferat saccos ?
 7 Non ego meorum praemium libellorum
 8 (quid enim merentur ?) Apulos velim campos ;
 9 non Hybla, non me spicifer capit Nilus,
 10 nec quae paludes delicata Pomptinas
 11 ex arce clivi spectat uva Setini.
 12 Quid concupiscam quaeris ergo ? Dormire.

M10_75 v.1 Milia viginti quondam me Galla poposcit
 2 et, fateor, magno non erat illa nimis.
 3 Annus abit : "Bis quina dabis sestertia," dixit.
 4 Poscere plus visa est quam prius illa mihi.
 5 Jam duo poscenti post sextum milia mensem
 6 mille dabam nummos. Noluit accipere.
 7 Transierant binae forsitan trinaeve Kalendae,
 8 aureolos ultro quattuor ipsa petit.
 9 Non dedimus. Centum jussit me mittere nummos ;
 10 sed visa est nobis haec quoque summa gravis.
 11 Sportula nos junxit quadrantibus arida centum ;

- 12 hanc voluit : puero diximus esse datam.
 13 Inferius numquid potuit descendere ? fecit.
 14 Dat gratis, ultro dat mihi Galla : nego.
- M10_76 v.1 Hoc, Fortuna, tibi videtur aequum ?
 2 Civis non Syriaeve Parthiaeve,
 3 nec de Cappadocis eques catastis,
 4 sed de plebe Remi Numaeque verna,
 5 jucundus, probus, innocens amicus,
 6 lingua doctus utraque, cujus unum est,
 7 sed magnum vitium, quod est poeta,
 8 pullo Mevius alget in cucullo,
 9 cocco mulio fulget Incitatus.
- M10_77 v.1 Nequius a Caro nihil umquam, Maxime, factum est,
 2 quam quod febre perit : fecit et illa nefas.
 3 Saeva nocens febris saltem quartana fuisses !
 4 servari medico debuit ille suo.
- M10_78 v.1 Ibis litoreas, Macer, Salonas,
 2 ibit rara fides amorque recti
 3 et quae, cum comitem trahit pudorem,
 4 semper pauperior redit potestas :
 5 felix auriferae colone terrae,
 6 rectorem vacuo sinu remittes
 7 optabisque moras, et exeuntem
 8 udo Dalmata gaudio sequeris.
 9 Nos Celtas, Macer, et truces Hiberos
 10 cum desiderio tui petemus.
 11 Sed quaecumque tamen feretur illinc
 12 piscosi calamo Tagi notata,
 13 Macrum pagina nostra nominabit :
 14 sic inter veteres legar poetas,
 15 nec multos mihi praeferas priores,
 16 uno sed tibi sim minor Catullo.
- M10_79 v.1 Ad lapidem Torquatus habet praetoria quartum ;
 2 ad quartum breve rus emit Otacilius.
 3 Torquatus nitidas vario de marmore thermas
 4 extruxit ; cucumam fecit Otacilius.
 5 Disposuit daphnona suo Torquatus in agro ;
 6 castaneas centum sevit Otacilius.
 7 Consule Torquato vici fuit ille magister,
 8 non minor in tanto visus honore sibi.
 9 Grandis ut exiguum bos ranam ruperat olim,
 10 sic, puto, Torquatus rumpet Otacilium.
- M10_80 v.1 Plorat Eros, quotiens maculosae pocula murræ
 2 inspicit aut pueros nobilivse citrum,
 3 et gemitus imo ducit de pectore, quod non
 4 tota miser coemat Saepa feratque domum.
 5 Quam multi faciunt, quod Eros, sed lumine sicco !
 6 Pars major lacrimas ridet et intus habet.
- M10_81 v.1 Cum duo venissent ad Phyllida mane fututum
 2 et nudam cuperet sumere uterque prior,
 3 promisit pariter se Phyllis utrique daturam,

- 4 et dedit : ille pedem sustulit, hic tunicam.
- M10_82 v.1 Si quid nostra tuis adicit vexatio rebus,
2 mane vel a media nocte togatus ero
3 Stridentesque feram flatus aquilonis iniqui
4 et patiar nimbos excipiamque nives.
5 Sed si non fias quadrante beatior uno
6 per gemitus nostros ingenuasque cruces,
7 parce, precor, fesso vanosque remitte labores,
8 qui tibi non prosunt et mihi, Galle, nocent.
- M10_83 v.1 Raros colligis hinc et hinc capillos
2 et latum nitidae, Marine, calvae
3 campum temporibus tegis comatis ;
4 sed moti redeunt jubente vento
5 reddunturque sibi caputque nudum
6 cirris grandibus hinc et inde cingunt :
7 inter Spendophorum Telesphorumque
8 Cydae stare putabis Hermerotem.
9 Vis tu simplicius senem fateri,
10 ut tandem videaris unus esse ?
11 Calvo turpius est nihil comato.
- M10_84 v.1 Miraris, quare dormitum non eat Afer ?
2 Accumbat cum qua, Caediciane, vides.
- M10_85 v.1 Jam senior Ladon Tiberinae nauta carinae
2 proxima dilectis rura paravit aquis.
3 Quae cum saepe vagus premeret torrentibus undis
4 Thybris et hiberno rumperet arva lacu,
5 emeritam puppem, ripa quae stabat in alta,
6 inplevit saxis obposuitque vadis.
7 Sic nimias avertit aquas. Quis credere posset ?
8 auxilium domino mersa carina tulit.
- M10_86 v.1 Nemo nova caluit sic inflammatus amica
2 flagravit quanto Laurus amore pilae.
3 Sed qui primus erat lusor dum floruit aetas,
4 nunc postquam desit ludere, prima pila est.
- M10_87 v.1 Octobres age sentiat Kalendas
2 facundi pia Roma Restituti :
3 linguis omnibus et favete votis ;
4 natalem colimus, tacete lites.
5 Absit cereus aridi clientis,
6 et vani triplices brevesque mappae
7 expectent gelidi jocos Decembris.
8 Certent muneribus beatiores :
9 Agrippae tumidus negotiator
10 Cadmi municipes ferat lacernas ;
11 pugnorum reus ebriaeque noctis
12 cenatoria mittat advocato ;
13 infamata virum puella vicit,
14 veros sardonychas, sed ipsa tradat ;
15 mirator veterum senex avorum
16 donet Phidiaci toreuma caeli ;
17 venator leporem, colonus haedum,

- 18 piscator ferat aequorum rapinas.
 19 Si mittit sua quisque, quid poetam
 20 missurum tibi, Restitute, credis ?
- M10_88 v.1 Omnes persequeris praetorum, Cotta, libellos ;
 2 accipis et ceras. Officiosus homo es.
- M10_89 v.1 Juno labor, Polyclite, tuus et gloria felix,
 2 Phidiacae cuperent quam meruisse manus,
 3 ore nitet tanto, quanto superasset in Ide
 4 iudice convictas non dubitante deas.
 5 Junonem, Polyclite, suam nisi frater amaret,
 6 Junonem poterat frater amare tuam.
- M10_90 v.1 Quid vellis vetulum, Ligeia, cunnum ?
 2 quid busti cineres tui lacessis ?
 3 tales munditiae decent puellas
 4 (nam tu jam nec anus potes videri) ;
 5 istud, crede mihi, Ligeia, belle
 6 non mater facit Hectoris, sed uxor.
 7 Erras, si tibi cunus hic videtur,
 8 ad quem mentula pertinere desit.
 9 Quare si pudor est, Ligeia, noli
 10 barbam vellere mortuo leoni.
- M10_91 v.1 Omnes eunuchos habet Almo nec arrigit ipse :
 2 et queritur, pariat quod sua Polla nihil.
- M10_92 v.1 Marri, quietae cultor et comes vitae,
 2 quo cive prisca gloriatur Atina,
 3 has tibi gemellas barbari decus luci
 4 conmodo pinus ilicesque Faunorum
 5 et semidocta vilici manu structas
 6 Tonantis aras horridique Silvani,
 7 quas pinxit agni saepe sanguis aut haedi,
 8 dominamque sancti virginem deam templi,
 9 et quem sororis hospitem vides castae
 10 Martem mearum principem Kalendarum,
 11 et delicatae laureum nemus Florae,
 12 in quod Priapo persequente confugit.
 13 Hoc omne agelli mite parvuli numen
 14 seu tu cruore sive ture placabis :
 15 "Ubicumque vester Martialis est," dices,
 16 "hac, ecce, mecum dextera litat vobis
 17 absens sacerdos ; vos putate praesentem
 18 et date duobus quidquid alter optabit."
- M10_93 v.1 Si prior Euganeas, Clemens, Helicaonis oras
 2 pictaque pampineis videris arva jugis,
 3 perfer Atestinae nondum vulgata Sabinae
 4 carmina, purpurea sed modo culta toga.
 5 Ut rosa delectat, metitur quae pollice primo,
 6 sic nova nec mento sordida charta juvat.
- M10_94 v.1 Non mea Massylus servat pomaria serpens,
 2 regius Alcinoi nec mihi servit ager,
 3 sed Nomentana securus germinat hortus

- 4 arbore, nec furem plumbea mala timent.
5 Haec igitur media quae sunt modo nata Subura
6 mittimus autumni cerea poma mei.
- M10_95 v.1 Infantem tibi vir, tibi, Galla, remisit adulter.
2 Hi, puto, non dubie se futuisse negant.
- M10_96 v.1 Saepe loquar nimium gentes quod, Avite, remotas,
2 miraris, Latia factus in urbe senex,
3 auriferumque Tagum sitiam patriumque Salonem
4 et repetam saturae sordida rura casae.
5 Illa placet tellus in qua res parva beatum
6 me facit et tenues luxuriantur opes :
7 pascitur hic, ibi pascit ager ; tepet igne maligno
8 hic focus, ingenti lumine lucet ibi ;
9 hic pretiosa fames conturbatorque macellus,
10 mensa ibi divitiis ruris operta sui ;
11 quattuor hic aestate togae pluresve teruntur,
12 autumnis ibi me quattuor una tegit.
13 I, cole nunc reges, quidquid non praestat amicus
14 cum praestare tibi possit, Avite, locus.
- M10_97 v.1 Dum levis arsura struitur Libitina papyro,
2 dum murram et casias flebilis uxor emit,
3 jam scrobe, jam lecto, jam pollinctore parato
4 heredem scripsit me Numa : convaluit.
- M10_98 v.1 Addat cum mihi Caecubum minister
2 Idaeo resolutior cinaedo,
3 quo nec filia cultior nec uxor
4 nec mater tua nec soror recumbit,
5 vis spectem potius tuas lucernas
6 aut citrum vetus Indicosque dentes ?
7 Suspectus tibi ne tamen recumbam,
8 praesta de grege sordidaque villa
9 tonsos, horridulos, rudes, pusillos
10 hircosi mihi filios subulci.
11 Perdet te dolor hic : habere, Publi,
12 mores non potes hos et hos ministros.
- M10_99 v.1 Si Romana forent haec Socratis ora, fuissent
2 Julius in Saturis qualia Rufus habet.
- M10_100 v.1 Quid, stulte, nostris versibus tuos misces ?
2 Cum litigante quid tibi, miser, libro ?
3 Quid congregare cum leonibus volpes
4 aquilisque similes facere noctuas quaeris ?
5 Habeas licebit alterum pedem Ladae,
6 inepte, frustra crure ligneo cures.
- M10_101 v.1 Elysio redeat si forte remissus ab agro
2 ille suo felix Caesare Gabba vetus,
3 qui Capitolinum pariter Gabbamque jocantes
4 audierit, dicet : "Rustice Gabba, tace."
- M10_102 v.1 Qua factus ratione sit requiris,
2 qui numquam futuit, pater Philinus ?

3 Gaditanus, Avite, dicat istud,
4 qui scribit nihil et tamen poeta est.

M10_103 v.1 Municipipes Augusta mihi quos Bilbilis acri
2 monte creat, rapidis quem Salo cingit aquis,
3 ecquid laeta juvat vestri vos gloria vatis ?
4 nam decus et nomen famaue vestra sumus,
5 nec sua plus debet tenui Verona Catullo
6 meque velit dici non minus illa suum.
7 Quattuor accessit tricesima messibus aestas,
8 ut sine me Cereri rustica liba datis,
9 moenia dum colimus dominae pulcherrima Romae :
10 mutavere meas Itala regna comas.
11 Excipitis placida reducem si mente, venimus ;
12 aspera si geritis corda, redire licet.

M10_104 v.1 I nostro comes, i libelle, Flavo
2 longum per mare, sed faventis undae,
3 et cursu facili tuisque ventis
4 Hispanae pete Tarraconis arces :
5 illinc te rota tollet et citatus
6 altam Bilbilin et tuum Salonem
7 quinto forsitan essedo videbis.
8 Quid mandem tibi quaeris ? Ut sodales
9 paucos, sed veteres et ante brumas
10 triginta mihi quattuorque visos
11 ipsa protinus a via salutes
12 et nostrum admoneas subinde Flavum
13 jucundos mihi nec laboriosos
14 secessus pretio paret salubri,
15 qui pigrum faciant tuum parentem.
16 Haec sunt. Jam tumidus vocat magister
17 castigatque moras, et aura portum
18 laxavit melior. Vale, libelle :
19 navem, scis, puto, non moratur unus.

M11_1 v.1 Quo tu, quo, liber otiose, tendis
2 cultus Sidone non cotidiana ?
3 numquid Parthenium videre ? Certe ;
4 vadas et redeas inevolutus :
5 libros non legit ille sed libellos ;
6 nec Musis vacat, aut suis vacaret.
7 Ecquid te satis aestimas beatum,
8 contingunt tibi si manus minores ?
9 Vicini pete porticum Quirini :
10 turbam non habet otiosiore
11 Pompeius vel Agenoris puella,
12 vel primae dominus levis carinae.
13 Sunt illic duo tresve qui revolvant
14 nostrarum tineas ineptiarum,
15 sed cum sponsio fabulaeque lassae

- 16 de Scorpo fuerint et Incitato.
- M11_2 v.1 Triste supercilium durique severa Catonis
2 frons et aratoris filia Fabricii
3 et personati fastus et regula morum,
4 quidquid et in tenebris non sumus, ite foras.
5 Clamant ecce mei "io Saturnalia" versus :
6 et licet et sub te praeside, Nerva, libet.
7 Lectores tetrici salebrosum ediscite Santram :
8 nil mihi vobiscum est : iste liber meus est.
- M11_3 v.1 Non urbana mea tantum Pimpleide gaudent
2 otia, nec vacuis auribus ista damus
3 sed meus in Geticis ad Martia signa pruinis
4 a rigido teritur centurione liber,
5 dicitur et nostros cantare Britannia versus.
6 Quid prodest ? nescit sacculus ista meus.
7 At quam victuras poteramus pangere chartas
8 quantaque Pieria proelia flare tuba,
9 cum pia reddiderint Augustum numina terris,
10 et Maecenatem si tibi, Roma, darent !
- M11_4 v.1 Sacra laresque Phrygum, quos Trojae maluit heres
2 quam rapere arsuras Laomedontis opes,
3 scriptus et aeterno nunc primum Juppiter auro
4 et soror et summi filia tota patris,
5 et qui purpureis jam tertia nomina fastis,
6 Jane, refers Nervae, vos precor ore pio :
7 hunc omnes servate duces, servate senatum ;
8 moribus hic vivat principis, ille suis.
- M11_5 v.1 Tanta tibi est recti reverentia, Caesar, at aequi
2 quanta Numae fuerat : sed Numa pauper erat.
3 Ardua res haec est, opibus non tradere mores
4 et, cum tot Croesos viceris, esse Numam.
5 Si redeant veteres, ingentia nomina, patres,
6 Elysium liceat si vacuare nemus :
7 te colet invictus pro libertate Camillus,
8 aurum Fabricius te tribuente volet ;
9 te duce gaudebit Brutus, tibi Sulla cruentus
10 imperium tradet, cum positurus erit ;
11 et te privato cum Caesare Magnus amabit,
12 donabit totas et tibi Crassus opes.
13 Ipse quoque infernis revocatus Ditis ab umbris
14 si Cato reddatur, Caesarianus erit.
- M11_6 v.1 Unctis falciferi senis diebus,
2 regnator quibus imperat fritillus,
3 versu ludere non laborioso
4 permittis, puto, pilleata Roma.
5 Risisti ; licet ergo, non vetamur.
6 Pallentes procul hinc abite curae ;
7 quidquid venerit obvium loquamur
8 morosa sine cogitatione.
9 Misce dimidios, puer, trientes,
10 quales Pythagoras dabat Neroni,
11 misce, Dindyme, sed frequentiores :

- 12 possum nil ego sobrius ; bibenti
 13 succurrent mihi quindecim poetae.
 14 Da nunc basia, sed Catulliana :
 15 quae si tot fuerint quot ille dixit,
 16 donabo tibi Passerem Catulli.
- M11_7 v.1 Jam certe stupido non dices, Paula, marito,
 2 ad moechum quotiens longius ire voles,
 3 "Caesar in Albanum jussit me mane venire,
 4 Caesar Circeios." Jam strophæ talis abit.
 5 Penelopæ licet esse tibi sub principe Nerva :
 6 sed prohibet scabies ingeniumque vetus.
 7 Infelix, quid ages ? Aegram simulabis amicam ?
 8 Haerebit dominae vir comes ipse suae,
 9 ibit et ad fratrem tecum matremque patremque.
 10 Quas igitur fraudes ingeniosa paras ?
 11 Diceret hystericam se forsitan altera moecha
 12 in Sinuessano velle sedere lacu.
 13 Quanto tu melius, quotiens placet ire fututum,
 14 quae verum mavis dicere, Paula, viro !
- M11_8 v.1 Lassa quod hesterni spirant opobalsama dracti,
 2 ultima quod curvo quae cadit aura croco ;
 3 poma quod hiberna maturescentia capsæ,
 4 arbole quod verna luxuriosus ager ;
 5 de Palatinis dominae quod Serica prelis,
 6 sucina virginea quod regelata manu ;
 7 amphora quod nigri, sed longe, fracta Falerni,
 8 quod qui Sicanias detinet hortus apes ;
 9 quod Cosmi redolent alabastra focique deorum,
 10 quod modo divitibus lapsa corona comis :
 11 singula quid dicam ? non sunt satis ; omnia misce :
 12 hoc fragrant pueri basia mane mei.
 13 Scire cupis nomen ? Si propter basia, dicam.
 14 Jurasti. Nimum scire, Sabine, cupis.
- M11_9 v.1 Clarus fronde Jovis, Romani fama coturni,
 2 spirat Apellea redditus arte Memor.
- M11_10 v.1 Contulit ad saturas ingentia pectora Turnus.
 2 Cur non ad Memoris carmina ? Frater erat.
- M11_11 v.1 Tolle, puer, calices tepidique toreumata Nili
 2 et mihi securo pocula trade manu
 3 trita patrum labris et tonso pura ministro ;
 4 anticus mensis restituatur honor.
 5 Te potare decet gemma, qui Mentora frangis
 6 in scaphium moechæ, Sardanapalle, tuæ.
- M11_12 v.1 Jus tibi natorum vel septem, Zoile, detur,
 2 dum matrem nemo det tibi, nemo patrem.
- M11_13 v.1 Quisquis Flaminiam teris, viator,
 2 noli nobile præterire marmor.
 3 Urbis deliciae salesque Nili,
 4 ars et gratia, lusus et voluptas,
 5 Romani decus et dolor theatri

- 6 atque omnes Veneres Cupidinesque
7 hoc sunt condita, quo Paris, sepulchro.
- M11_14 v.1 Heredes, nolite brevem sepelire colonum :
2 nam terra est illi quantulacumque gravis.
- M11_15 v.1 Sunt chartae mihi quas Catonis uxor
2 et quas horribiles legant Sabinae :
3 hic totus volo rideat libellus
4 et sit nequior omnibus libellis.
5 Qui vino madeat nec erubescat
6 pingui sordidus esse Cosmiano,
7 ludat cum pueris, amet puellas,
8 nec per circuitus loquatur illam,
9 ex qua nascimur, omnium parentem,
10 quam sanctus Numa mentulam vocabat.
11 Versus hos tamen esse tu memento
12 Saturnalicios, Apollinaris :
13 mores non habet hic meos libellus.
- M11_16 v.1 Qui gravis es nimium, potes hinc jam, lector, abire
2 quo libet : urbanae scripsimus ista togae ;
3 jam mea Lampsacio lascivit pagina versu
4 et Tartesiaca concrepat aera manu.
5 O quotiens rigida pulsabis pallia vena,
6 sis gravior Curio Fabricioque licet !
7 Tu quoque nequitas nostri lususque libelli
8 uda, puella, leges, sis Patavina licet.
9 Erubuit posuitque meum Lucretia librum,
10 sed coram Bruto ; Brute, recede : leget.
- M11_17 v.1 Non omnis nostri nocturna est pagina libri :
2 invenies et quod mane, Sabine, legas.
- M11_18 v.1 Donasti, Lupe, rus sub urbe nobis ;
2 sed rus est mihi majus in fenestra.
3 Rus hoc dicere, rus potes vocare ?
4 In quo ruta facit nemus Dianae,
5 argutae tegit ala quod cicadae,
6 quod formica die comedit uno,
7 clusae cui folium rosae corona est ;
8 in quo non magis invenitur herba
9 quam Cosmi folium piperve crudum ;
10 in quo nec cucumis jacere rectus
11 nec serpens habitare tota possit.
12 Urucam male pascit hortus unam,
13 consumpto moritur culix salicto,
14 et talpa est mihi fossor atque arator.
15 Non boletus hiare, non mariscae
16 ridere aut violae patere possunt.
17 Finis mus populatur et colono
18 tamquam sus Calydonius timetur,
19 et sublata volantibus ungue Procnes
20 in nido seges est hirundinino ;
21 et cum stet sine falce mentulaque,
22 non est dimidio locus Priapo.
23 Vix implet cocleam peracta messis,

- 24 et mustum nuce condimus picata.
 25 Errasti, Lupe, littera sed una :
 26 nam quo tempore praedium dedisti,
 27 mallet tu mihi prandium dedisses.
- M11_19 v.1 Quaeris cur nolim te ducere, Galla ? Diserta es
 2 saepe soloecismum mentula nostra facit.
- M11_20 v.1 Caesaris Augusti lascivos, livide, versus
 2 sex lege, qui tristis verba Latina legis :
 3 "Quod futuit Glaphyran Antonius, hanc mihi poenam
 4 Fulvia constituit, se quoque uti futuam.
 5 Fulviam ego ut futuam ? Quod si me Manius oret
 6 pedicem, faciam ? non puto, si sapiam."
 7 - Aut futue, aut pugnemus" ait. - Quid quod mihi vita
 8 carior est ipsa mentula ? Signa canant !"
 9 Absolvis lepidos nimirum, Auguste, libellos,
 10 qui scis Romana simplicitate loqui.
- M11_21 v.1 Lydia tam laxa est equitis quam culus aeni,
 2 quam celer arguto qui sonat aere trochus,
 3 quam rota transmisso totiens inpacta petauro,
 4 quam vetus a crassa calceus udus aqua,
 5 quam quae rara vagos expectant retia turdos,
 6 quam Pompeiano vela negata Noto,
 7 quam quae de pthisico lapsa est armilla cinaedo,
 8 culcita Leuconico quam viduata suo,
 9 quam veteres braciae Brittonis pauperis, et quam
 10 turpe Ravennatis guttur onocrotali.
 11 Hanc in piscina dicor futuisse marina :
 12 nescio ; piscinam me futuisse puto.
- M11_22 v.1 Mollia quod nivei duro teris ore Galaesi
 2 basia, quod nudo cum Ganymede jaces,
 3 - quis negat ? - hoc nimium est. Sed sit satis ; inguina
 saltem
 4 parce fututrici sollicitare manu.
 5 Levibus in pueris plus haec quam mentula peccat
 6 et faciunt digiti praecipitantque virum :
 7 inde tragus celeresque pili mirandaque matri
 8 barba nec in clara balnea luce placent.
 9 Divisit natura marem : pars una puellis,
 10 una viris genita est. Utere parte tua.
- M11_23 v.1 Nubere Sila mihi nulla non lege parata est ;
 2 sed Silam nulla ducere lege volo.
 3 Cum tamen instaret, "Deciens mihi dotis in auro
 4 sponsa dabis" dixi ; "quid minus esse potest ?
 5 nec futuam quamvis prima te nocte maritus,
 6 communis tecum nec mihi lectus erit ;
 7 complectarque meam, nec tu prohibebis, amicam,
 8 ancillam mittes et mihi iussa tuam.
 9 Te spectante dabit nobis lasciva minister
 10 basia, sive meus sive erit ille tuus.
 11 Ad cenam venies, sed sic divisa recumbes
 12 ut non tangantur pallia nostra tuis.
 13 Oscula rara dabis nobis et non dabis ultro,

- 14 nec quasi nupta dabis sed quasi mater anus.
15 Si potes ista pati, si nil perferre recusas,
16 invenies qui te ducere, Sila, velit."
- M11_24 v.1 Dum te prosequor et domum reduco,
2 aurem dum tibi praesto garrienti,
3 et quidquid loqueris facisque laudo,
4 quot versus poterant, Labulle, nasci !
5 Hoc damnum tibi non videtur esse,
6 si quod Roma legit, requirit hospes,
7 non deridet eques, tenet senator,
8 laudat causidicus, poeta carpit,
9 propter te perit ? Hoc, Labulle, verum est ?
10 Hoc quisquam ferat ? ut tibi tuorum
11 sit major numerus togatulorum,
12 librorum mihi sit minor meorum ?
13 Triginta prope jam diebus una est
14 nobis pagina vix peracta. Sic fit
15 cum cenare domi poeta non vult.
- M11_25 v.1 Illa salax nimium nec paucis nota puellis
2 stare Lino desit mentula. Lingua, cave.
- M11_26 v.1 O mihi grata quies, o blanda, Telesphore, cura,
2 qualis in amplexu non fuit ante meo,
3 basia da nobis vetulo, puer, uda Falerno,
4 pocula da labris facta minora tuis.
5 Addideris super haec Veneris si gaudia vera,
6 esse negem melius cum Ganymede Jovi.
- M11_27 v.1 Ferreus es, si stare potest tibi mentula, Flacce,
2 cum te sex cyathos orat amica gari,
3 vel duo frustra rogat cybii tenuemve lacertum
4 nec dignam toto se botryone putat ;
5 cui portat gaudens ancilla paropside rubra
6 allecem, sed quam protinus illa voret ;
7 aut cum perfricuit frontem posuitque pudorem,
8 sucida palliolo vellera quinque petit.
9 At mea me libram foliati poscat amica,
10 aut virides gemmas sardonychasve pares,
11 nec nisi prima velit de Tusco Serica vico
12 aut centum aureolos sic velut aera roget.
13 Nunc tu velle putas haec me donare puellae ?
14 Nolo, sed his ut sit digna puella volo.
- M11_28 v.1 Invasit medici Nasica phreneticus Eucti
2 et percidit Hylan. Hic, puto, sanus erat.
- M11_29 v.1 Languida cum vetula tractare virilia dextra
2 coepisti, jugulor pollice, Phylli, tuo :
3 nam cum me murem, cum me tua lumina dicis,
4 horis me refici vix puto posse decem.
5 Blanditias nescis : "Dabo" dic "tibi milia centum
6 et dabo Setini jugera certa soli ;
7 accipe vina, domum, pueros, chrysendeta, mensas."
8 Nil opus est digitis : sic mihi, Phylli, frica.

- M11_30 v.1 Os male caucidicis et dicis olere poetis :
2 sed fellatori, Zoile, pejus olet.
- M11_31 v.1 Atreus Caecilius cucurbitarum :
2 sic illas quasi filios Thyestae
3 in partes lacerat secatque mille.
4 Gustu protinus has edes in ipso,
5 has prima feret alteraque cena,
6 has cena tibi tertia reponet,
7 hinc seras epidipnidas parabit.
8 Hinc pistor fatuas facit placentas,
9 hinc et multiplices struit tabellas
10 et notas caryotidas theatri.
11 Hinc exit varium coco minutal,
12 hinc lentem positam fabamque credas ;
13 boletos imitatur et botellos,
14 et caudam cybii brevesque maenas.
15 Hinc bellarius experitur artes,
16 ut condat vario vafer sapore
17 in rutae folium Capelliana.
18 Sic implet gabatas paropsidesque,
19 et leves scutulas cavasque lances.
20 Hoc lautum vocat, hoc putat venustum,
21 unum ponere ferculis tot assem.
- M11_32 v.1 Nec toga nec focus est nec tritus cimice lectus
2 nec tibi de bibula sarta palude teges,
3 nec puer aut senior, nulla est ancilla nec infans,
4 nec sera nec clavis nec canis atque calix.
5 Tu tamen affectas, Nestor, dici atque videri
6 pauper et in populo quaeris habere locum.
7 Mentiris vanoque tibi blandiris honore.
8 Non est paupertas, Nestor, habere nihil.
- M11_33 v.1 Saepius ad palmam prasinus post fata Neronis
2 pervenit et victor praemia plura refert.
3 I nunc, livor edax, dic te cessisse Neroni :
4 vicit nimirum non Nero, sed prasinus.
- M11_34 v.1 Aedes emit Aper, sed quas nec noctua vellet
2 esse suas ; adeo nigra vetusque casa est.
3 Vicinos illi nitidos Maro possidet hortos.
4 Cenabit belle, non habitabit Aper.
- M11_35 v.1 Ignotos mihi cum voces trecentos,
2 quare non veniam vocatus ad te
3 miraris quererisque litigasque.
4 Solus ceno, Fabulle, non libenter.
- M11_36 v.1 Gaius hanc lucem gemma mihi Julius alba
2 signat, io, votis redditus ecce meis :
3 desperasse juvat veluti jam rupta sororum
4 fila ; minus gaudent qui timere nihil.
5 Hypne, quid expectas, piger ? Immortale Falernum
6 funde, senem poscunt talia vota cadum ;
7 quincunces et sex cyathos besemque bibamus,
8 "Gaius" ut fiat "Julius" et "Proculus."

- M11_37 v.1 Zoile, quid tota gemmam praecingere libra
2 te juvat et miserum perdere sardonicha ?
3 Anulus iste tuis fuerat modo cruribus aptus :
4 non eadem digitis pondera conveniunt.
- M11_38 v.1 Mulio viginti venit modo milibus, Aule.
2 Miraris pretium tam grave ? Surdus erat.
- M11_39 v.1 Cunarum fueras motor, Charideme, mearum
2 et pueri custos assiduusque comes.
3 Jam mihi nigrescunt tonsa sudaria barba
4 et queritur labris puncta puella meis ;
5 sed tibi non crevi : te noster vilicus horret,
6 te dispensator, te domus ipsa pavet.
7 Ludere nec nobis nec tu permittis amare ;
8 nil mihi vis et vis cuncta licere tibi.
9 Corripis, observas, quereris, suspiria ducis,
10 et vix a ferulis temperat ira tua.
11 Si Tyrios sumpsit cultus unxive capillos,
12 exclamas "Numquam fecerat ista pater" ;
13 et numeras nostros astricta fronte trientes,
14 tamquam de cella sit cadus ille tua.
15 Desine ; non possum libertum ferre Catonem.
16 Esse virum jam me dicet amica tibi.
- M11_40 v.1 Formosam Glyceran amat Lupercus
2 et solus tenet imperatque solus.
3 Quam toto sibi mense non fututam
4 cum tristis quereretur et roganti
5 causam reddere vellet Aeliano,
6 respondit Glycerae dolere dentes.
- M11_41 v.1 Indulget pecori nimium dum pastor Amyntas
2 et gaudet fama luxuriaque gregis,
3 cedentes oneri ramos silvamque fluentem
4 vicit, concussas ipse secutus opes.
5 Triste nemus dirae vetuit superesse ruinae
6 damnavitque rogis noxia ligna pater.
7 Pingues, Lygde, sues habeat vicinus Iollas :
8 te satis est nobis annumerare pecus.
- M11_42 v.1 Vivida cum poscas epigrammata, mortua ponis
2 lemmata. Qui fieri, Caeciliane, potest ?
3 Mella jubes Hyblaea tibi vel Hymettia nasci,
4 et thyma Cecropiae Corsica ponis api !
- M11_43 v.1 Deprensus in puero tetricis me vocibus, uxor,
2 corripis et culum te quoque habere refers.
3 Dixit idem quotiens lascivo Juno Tonanti !
4 ille tamen grandi cum Ganymede jacet.
5 Incurvabat Hylan posito Tirynthius arcu :
6 tu Megaran credis non habuisse natis ?
7 Torquebat Phoebum Daphne fugitiva : sed illas
8 Oebalium flammam jussit abire puer.
9 Briseis multum quamvis aversa jaceret,
10 Aeacidae propior levis amicus erat.

- 11 Parce tuis igitur dare mascula nomina rebus
12 teque puta cunnos, uxor, habere duos.
- M11_44 v.1 Orbus es et locuples et Bruto consule natus :
2 esse tibi veras credis amicitias ?
3 Sunt verae, sed quas juvenis, quas pauper habebas.
4 Qui novus est, mortem diligit ille tuam.
- M11_45 v.1 Intrasti quotiens inscriptae limina cellae,
2 seu puer arrisit sive puella tibi,
3 contentus non es foribus veloque seraque,
4 secretumque jubes grandius esse tibi :
5 oblinitur minimae si qua est suspicio rimae
6 punctaque lasciva quae terebrantur acu.
7 Nemo est tam teneri tam sollicitique pudoris
8 qui vel pedicat, Canthare, vel futuit.
- M11_46 v.1 Jam nisi per somnum non arrigis et tibi, Mevi,
2 incipit in medios meiere verpa pedes,
3 truditur et digitis pannucea mentula lassis
4 nec levat extinctum sollicitata caput.
5 Quid miseros frustra cunnos culosque laccessis ?
6 summa petas : illic mentula vivit anus.
- M11_47 v.1 Omnia femineis quare dilecta catervis
2 balnea devitat Lattara ? Ne futuat.
3 Cur nec Pompeia lentus spatiatur in umbra
4 nec petit Inachidos limina ? Ne futuat.
5 Cur Lacedaemonio luteum ceromate corpus
6 perfundit gelida Virgine ? Ne futuat.
7 Cum sic feminei generis contagia vitet,
8 cur lingit cunnum Lattara ? Ne futuat.
- M11_48 v.1 Silius haec magni celebrat monumenta Maronis,
2 jugera facundi qui Ciceronis habet.
3 Heredem dominumque sui tumulive larisve
4 non alium mallet nec Maro nec Cicero.
- M11_49 v.1 Nulla est hora tibi qua non me, Phylli, furentem
2 despolies : tanta calliditate rapis.
3 Nunc plorat speculo fallax ancilla relicto,
4 gemma vel a digito vel cadit aure lapis ;
5 nunc furtiva lucrifieri bombycina possunt,
6 profertur Cosmi nunc mihi siccus onyx ;
7 amphora nunc petitur nigri cariosa Falerni,
8 expiet ut somnos garrula saga tuos ;
9 nunc ut emam grandemve lupum mullumve bilibrem,
10 indixit cenam dives amica tibi.
11 Sit pudor et tandem veri respectus et aequi :
12 nil tibi, Phylli, nego ; nil mihi, Phylli, nega.
- M11_50 v.1 Jam prope desertos cineres et sancta Maronis
2 nomina qui coleret pauper et unus erat.
3 Silius optatae succurrere censuit umbrae,
4 Silius et vatem, non minor ipse, colit.
- M11_51 v.1 Tanta est quae Titio columna pendet

- 2 quantam Lampsaciae colunt puellae.
 3 Hic nullo comitante nec molesto
 4 thermis grandibus et suis lavatur.
 5 Anguste Titius tamen lavatur.
- M11_52 v.1 Cenabis belle, Juli Cerialis, apud me ;
 2 condicio est melior si tibi nulla, veni.
 3 Octavam poteris servare ; lavabimur una :
 4 scis quam sint Stephani balnea juncta mihi.
 5 Prima tibi dabitur ventri lactuca movendo
 6 utilis, et porris fila resecta suis,
 7 mox vetus et tenui major cordyla lacerto,
 8 sed quam cum rutae frondibus ova tegant ;
 9 altera non deerunt leni versata favilla,
 10 et Velabrensi massa coacta foco,
 11 et quae Picenum senserunt frigus olivae.
 12 Haec satis in gustu. Cetera nosse cupis ?
 13 Mentiar, ut venias : pisces, coloepia, sumen,
 14 et chortis saturas atque paludis aves,
 15 quae nec Stella solet rara nisi ponere cena.
 16 Plus ego polliceor : nil recitabo tibi,
 17 ipse tuos nobis relegas licet usque Gigantas,
 18 rura vel aeterno proxima Vergilio.
- M11_53 v.1 Claudia caeruleis cum sit Rufina Britannis
 2 edita, quam Latiae pectora gentis habet !
 3 quale decus formae ! Romanam credere matres
 4 Italides possunt, Atthides esse suam.
 5 Di bene quod sancto peperit fecunda marito,
 6 quod sperat generos quodque puella nurus.
 7 Sic placeat superis ut conjuge gaudeat uno
 8 et semper natis gaudeat illa tribus.
- M11_54 v.1 Unguenta et casias et olentem funera murram
 2 turaque de medio semicremata rogo
 3 et quae de Stygio rapuisti cinnama lecto,
 4 improbe, de turpi, Zoile, redde sinu.
 5 A pedibus didicere manus peccare protervae.
 6 Non miror furem, qui fugitivus eras.
- M11_55 v.1 Hortatur fieri quod te Lupus, Urbice, patrem,
 2 ne credas ; nihil est quod minus ille velit.
 3 Ars est captandi quod nolis velle videri ;
 4 ne facias optat quod rogat ut facias.
 5 Dicat praegnantem tua se Cosconia tantum :
 6 pallidior fiet jam pariente Lupus.
 7 At tu consilio videaris ut usus amici,
 8 sic morere ut factum te putet esse patrem.
- M11_56 v.1 Quod nimium mortem, Chaeremon Stoice, laudas,
 2 vis animum mirer suspiciamque tuum ?
 3 Hanc tibi virtutem fracta facit urceus ansa,
 4 et tristis nullo qui tepet igne focus,
 5 et teges et cimex et nudi sponda grabati,
 6 et brevis atque eadem nocte dieque toga.
 7 O quam magnus homo es, qui faece rubentis aceti
 8 et stipula et nigro pane carere potes !

- 9 Leuconicis agedum tumeat tibi culcita lanis
 10 constringatque tuos purpura pexa toros,
 11 dormiat et tecum, modo qui dum Caecuba miscet
 12 convivas roseo torserat ore puer :
 13 o quam tu cupies ter vivere Nestoris annos
 14 et nihil ex ulla perdere luce voles !
 15 Rebus in angustis facile est contemnere vitam :
 16 fortiter ille facit qui miser esse potest.
- M11_57 v.1 Miraris docto quod carmina mitto, Severe,
 2 ad cenam cum te, docte Severe, vocem ?
 3 Juppiter ambrosia satur est et nectare vivit ;
 4 nos tamen exta Jovi cruda merumque damus.
 5 Omnia cum tibi sint dono concessa deorum,
 6 si quod habes non vis, ergo quid accipies ?
- M11_58 v.1 Cum me velle vides tentumque, Telesphore, sentis,
 2 magna rogas (puta me velle negare : licet ?)
 3 et nisi juratus dixi "dabo", subtrahis illas,
 4 permittunt in me quae tibi multa, natis.
 5 Quid si me tonsor, cum stricta novacula supra est,
 6 tunc libertatem divitiasque roget ?
 7 Promittam ; neque enim rogat illo tempore tonsor,
 8 latro rogat ; res est imperiosa timor :
 9 sed fuerit curva cum tuta novacula theca,
 10 frangam tonsori crura manusque simul.
 11 At tibi nil faciam, sed lota mentula lana
 12 Laikazein cupidae dicet avaritiae.
- M11_59 v.1 Senos Charinus omnibus digitis gerit
 2 nec nocte ponit anulos
 3 nec cum lavatur. Causa quae sit quaeritis ?
 4 Dactyliothecam non habet.
- M11_60 v.1 Sit Phlogis an Chione Veneri magis apta requiris ?
 2 Pulchrior est Chione ; sed Phlogis ulcus habet ;
 3 ulcus habet Priami quod tendere possit alutam
 4 quodque senem Pelian non sinat esse senem ;
 5 ulcus habet quod habere suam vult quisque puellam,
 6 quod sanare Criton, non quod Hygia potest :
 7 at Chione non sentit opus nec vocibus ullis
 8 adjuvat, absentem marmoreamve putes.
 9 Exorare, dei, si vos tam magna liceret
 10 et bona velletis tam pretiosa dare,
 11 hoc quod habet Chione corpus faceretis haberet
 12 ut Phlogis, et Chione quod Phlogis ulcus habet.
- M11_61 v.1 Lingua maritus, moechus ore Nanneius,
 2 Summemmianis inquinatior buccis,
 3 quem cum fenestra vidit a Suburana
 4 obscena nudum Leda fornicem cludit
 5 mediumque mavult basiare quam summum ;
 6 modo qui per omnes viscerum tubos ibat
 7 et voce certa consciaque dicebat
 8 puer an puella matris esset in ventre,
 9 (gaudete cunni ; vestra namque res acta est)
 10 arrigere linguam non potest fututricem.

- 11 Nam dum tumentis mersus haeret in vulva
 12 et vagientes intus audit infantes,
 13 partem gulosam solvit indecens morbus.
 14 Nec purus esse nunc potest nec impurus.
- M11_62 v.1 Lesbia se jurat gratis numquam esse fututam.
 2 Verum est. Cum futui vult, numerare solet.
- M11_63 v.1 Spectas nos, Philomuse, cum lavamur,
 2 et quare mihi tam mutuniati
 3 sint leves pueri subinde quaeris.
 4 Dicam simpliciter tibi roganti :
 5 pedicant, Philomuse, curiosos.
- M11_64 v.1 Nescio tam multis quid scribas, Fauste, puellis :
 2 hoc scio, quod scribit nulla puella tibi.
- M11_65 v.1 Sescenti cenant a te, Justine, vocati
 2 lucis ad officium quae tibi prima fuit.
 3 Inter quos, memini, non ultimus esse solebam ;
 4 nec locus hic nobis invidiosus erat.
 5 Postera sed festae reddis sollemnia mensae :
 6 sescentis hodie, cras mihi natus eris.
- M11_66 v.1 Et delator es et calumniator,
 2 et fraudator es et negotiator,
 3 et fellator es et lanista. Miror
 4 quare non habeas, Vacerra, nummos.
- M11_67 v.1 Nil mihi das vivus ; dicis post fata daturum.
 2 Si non es stultus, scis, Maro, quid cupiam.
- M11_68 v.1 Parva rogas magnos ; sed non dant haec quoque magni.
 2 Ut pudeat levius, tu, Matho, magna roga.
- M11_69 v.1 Amphitheatrales inter nutrita magistros
 2 venatrix, silvis aspera, blanda domi,
 3 Lydia dicebar, domino fidissima Dextro,
 4 qui non Erigones mallet habere canem,
 5 nec qui Dictaea Cephalum de gente secutus
 6 luciferae pariter venit ad astra deae.
 7 Non me longa dies nec inutilis abstulit aetas,
 8 qualia Dulichio fata fuere cani :
 9 fulmineo spumantis apri sum dente perempta,
 10 quantus erat, Calydon, aut, Erymanthe, tuus.
 11 Nec queror infernas quamvis cito rapta sub umbras :
 12 non potui fato nobiliore mori.
- M11_70 v.1 Vendere, Tucca, potes centenis milibus emptos ?
 2 Plorantis dominos vendere, Tucca, potes ?
 3 nec te blanditiae, nec verba rudesve querelae,
 4 nec te dente tuo saucia colla movent ?
 5 ah facinus ! tunica patet inguen utrimque levata,
 6 inspiciturque tua mentula facta manu.
 7 Si te delectat numerata pecunia, vende
 8 argentum, mensas, murrina, rura, domum ;
 9 vende senes servos, ignoscent, vende paternos :

- 10 ne pueros vendas, omnia vende miser.
 11 Luxuria est emere hos (quis enim dubitatve negatve ?)
 12 Sed multo major vendere luxuria est.
- M11_71 v.1 Hystericam vetulo se dixerat esse marito
 2 et queritur futui Leda necesse sibi ;
 3 sed flens atque gemens tanti negat esse salutem
 4 seque refert potius proposuisse mori.
 5 Vir rogat ut vivat virides nec deserat annos,
 6 et fieri quod jam non facit ipse sinit.
 7 Protinus accedunt medici medicaeque recedunt,
 8 tollunturque pedes. O medicina gravis !
- M11_72 v.1 Drauci Natta sui vocat pipinam,
 2 collatus cui Gallus est Priapus.
- M11_73 v.1 Venturum juras semper mihi, Lygde, roganti
 2 constituisque horam constituisque locum.
 3 Cum frustra jacui longa prurigine tentus,
 4 succurrit pro te saepe sinistra mihi.
 5 Quid precer, o fallax, meritis et moribus istis ?
 6 Umbellam luscae, Lygde, feras dominae.
- M11_74 v.1 Curandum penem commisit Baccara Raetus
 2 rivali medico. Baccara Gallus erit.
- M11_75 v.1 Theca tectus ahenea lavatur
 2 tecum, Caelia, servus ; ut quid, oro,
 3 non sit cum citharoedus aut choraules ?
 4 Non vis, ut puto, mentulam videre.
 5 Quare cum populo lavaris ergo ?
 6 Omnes an tibi nos sumus spadones ?
 7 Ergo, ne videaris invidere,
 8 servo, Caelia, fibulam remitte.
- M11_76 v.1 Solvere, Paete, decem tibi me sestertia cogis,
 2 perdiderit quoniam Bucco ducenta tibi.
 3 Ne noceant, oro, mihi non mea crimina : tu qui
 4 bis centena potes perdere, perde decem.
- M11_77 v.1 In omnibus Vacerra quod conclavibus
 2 consumit horas et die toto sedet,
 3 cenaturit Vacerra, non cacaturit.
- M11_78 v.1 Utere femineis complexibus, utere, Victor,
 2 ignotumque sibi mentula discat opus.
 3 Flammea texuntur sponsae, jam virgo paratur,
 4 tondebit pueros jam nova nupta tuos.
 5 Pedicare semel cupido dabit illa marito,
 6 dum metuit teli vulnera prima novi :
 7 saepius hoc fieri nutrix materque vetabunt
 8 et dicent : "Uxor, non puer, ista tibi est."
 9 Heu quantos aestus, quantos patiēre labores,
 10 si fuerit cunnus res peregrina tibi !
 11 Ergo Suburanae tironem trade magistrae.
 12 Illa virum faciet ; non bene virgo docet.

- M11_79 v.1 Ad primum decima lapidem quod venimus hora,
2 arguimur lentae crimine pigritiae.
3 Non est ista viae, non est mea, sed tua culpa est,
4 misisti mulas qui mihi, Paete, tuas.
- M11_80 v.1 Litus beatae Veneris aureum Baias,
2 Baias superbae blanda dona Naturae,
3 ut mille laudem, Flacce, versibus Baias,
4 laudabo digne non satis tamen Baias.
5 Sed Martialem malo, Flacce, quam Baias.
6 Optare utrumque pariter improbi votum est.
7 Quod si deorum munere hoc mihi detur,
8 quid gaudiorum est Martialis et Baiae !
- M11_81 v.1 Cum sene communem vexat spado Dindymus Aeglen
2 et jacet in medio sicca puella toro.
3 Viribus hic, operi non est hic utilis annis :
4 ergo sine effectu prurit utriusque labor.
5 Supplex illa rogat pro se miserisque duobus,
6 hunc juvenem facias, hunc, Cytherea, virum.
- M11_82 v.1 A Sinuessanis conviva Philostratus undis
2 conductum repetens nocte jubente larem
3 paene imitatus obit saevis Elpenora fatis,
4 praeceps per longos dum ruit usque gradus.
5 Non esset, Nymphae, tam magna pericula passus
6 si potius vestras ille bibisset aquas.
- M11_83 v.1 Nemo habitat gratis nisi dives et orbis apud te.
2 Nemo domum pluris, Sosibiane, locat.
- M11_84 v.1 Qui nondum Stygias descendere quaerit ad umbras
2 tonsorem fugiat, si sapit, Antiochum.
3 Alba minus saevis lacerantur bracchia cultris,
4 cum furit ad Phrygios enthea turba modos ;
5 mitior implicitas Alcon secat enterocelas
6 fractaque fabrili dedolat ossa manu.
7 Tondeat hic inopes Cynicos et Stoica menta
8 collaque pulvereae nudet equina juba.
9 Hic miserum Scythica sub rupe Promethea radat,
10 carnificem nudo pectore poscet avem ;
11 ad matrem fugiet Pentheus, ad Maenadas Orpheus,
12 Antiochi tantum barbara tela sonent.
13 Haec quaecumque meo numeratis stigmata mento,
14 in vetuli pyctae qualia fronte sedent,
15 non iracundis fecit gravis unguibus uxor :
16 Antiochi ferrum est et scelerata manus.
17 Unus de cunctis animalibus hircus habet cor :
18 barbatus vivit, ne ferat Antiochum.
- M11_85 v.1 Sidere percussa est subito tibi, Zoile, lingua,
2 dum lingis. Certe, Zoile, nunc futues.
- M11_86 v.1 Leniat ut fauces medicus, quas aspera vexat
2 assidue tussis, Parthenopaeae, tibi,
3 mella dari nucleosque jubet dulcesque placentas
4 et quidquid pueros non sinit esse truces.

- 5 At tu non cessas totis tussire diebus.
6 Non est haec tussis, Parthenopaeae, gula est.
- M11_87 v.1 Dives eras quondam : sed tunc pedico fuisti
2 et tibi nulla diu femina nota fuit.
3 Nunc sectaris anus. O quantum cogit egestas !
4 Illa fututorem te, Charideme, facit.
- M11_88 v.1 Multis jam, Lupe, posse se diebus
2 pedicare negat Carisianus.
3 Causam cum modo quaererent sodales,
4 ventrem dixit habere se solutum.
- M11_89 v.1 Intactas quare mittis mihi, Polla, coronas ?
2 A te vexatas malo tenere rosas.
- M11_90 v.1 Carmina nulla probas molli quae limite currunt,
2 sed quae per salebras altaque saxa cadunt,
3 et tibi Maeonio quoque carmine majus habetur,
4 "Lucili columella hic situ Metrophanes" ;
5 attonitusque legis "terrai frugiferai",
6 Accius et quidquid Pacuviusque vomunt.
7 Vis imiter veteres, Chrestille, tuosque poetas ?
8 Dispeream ni scis mentula quid sapiat.
- M11_91 v.1 Aeolidos Canace jacet hoc tumulata sepulchro,
2 ultima cui parvae septima venit hiems.
3 Ah scelus, ah facinus ! properas qui flere, viator,
4 non licet hic vitae de brevitatem queri :
5 tristius est leto leti genus : horrida vultus
6 abstulit et tenero sedit in ore lues,
7 ipsaque crudeles ederunt oscula morbi
8 nec data sunt nigris tota labella rogis.
9 Si tam praecipiti fuerant ventura volatu,
10 debuerant alia fata venire via.
11 Sed mors vocis iter properavit cludere blandae,
12 ne posset duras flectere lingua deas.
- M11_92 v.1 Mentitur qui te vitiosum, Zoile, dicit.
2 Non vitiosus homo es, Zoile, sed vitium.
- M11_93 v.1 Pierios vatis Theodori flamma penates
2 abstulit. Hoc Mysis et tibi, Phoebe, placet ?
3 O scelus, o magnum facinus crimenque deorum,
4 non arsit pariter quod domus et dominus !
- M11_94 v.1 Quod nimium lives nostris et ubique libellis
2 detrahis, ignosco : verpe poeta, sapis.
3 Hoc quoque non curo, quod cum mea carmina carpas,
4 compilas : et sic, verpe poeta, sapis.
5 Illud me cruciat, Solymis quod natus in ipsis
6 pedicas puerum, verpe poeta, meum.
7 Ecce negas jurasque mihi per templa Tonantis.
8 Non credo : jura, verpe, per Anchialum.
- M11_95 v.1 Incideris quotiens in basia fellatorum,
2 in solium puta te mergere, Flacce, caput.

- M11_96 v.1 Marcia, non Rhenus, salit hic, Germane : quid obstas
2 et puerum prohibes divitis imbre lacus ?
3 Barbare, non debet, summoto cive ministro,
4 captivam victrix unda levare sitim.
- M11_97 v.1 Una nocte quater possum : sed quattuor annis
2 si possum, peream, te Telesilla semel.
- M11_98 v.1 Effugere non est, Flacce, basiatores.
2 Instant, morantur, persecuntur, occurrunt
3 et hinc et illinc, usquequaque, quacumque.
4 Non ulcus acre pusulaeve lucentes,
5 nec triste mentum sordidique lichenes,
6 nec labra pingui delibuta cerato,
7 nec congelati gutta proderit nasi.
8 Et aestuantem basiant et algentem,
9 et nuptiale basium reservantem.
10 Non te cucullis asseret caput tectum,
11 lectica nec te tuta pelle veloque,
12 nec vindicabit sella saepibus clusa :
13 rimas per omnis basiator intrabit.
14 Non consulatus ipse, non tribunatus
15 senive fasces nec superba clamosi
16 lictoris abiget virga basiatorem :
17 sedeas in alto tu licet tribunali
18 et e curuli jura gentibus reddas,
19 ascendet illa basiator atque illa.
20 Febricitantem basiabit et flentem,
21 dabit oscitanti basium natantique,
22 dabit cacanti. Remedium mali solum est,
23 facias amicum basiare quem nolis.
- M11_99 v.1 De cathedra quotiens surgis (jam saepe notavi),
2 pedicant miserae, Lesbia, te tunicae.
3 Quas cum conata es dextra, conata sinistra
4 vellere, cum lacrimis eximis et gemitu :
5 sic constringuntur gemina Symplegade culi
6 et nimias intrant Cyaneasque natis.
7 Emendare cupis vitium deforme ? Docebo :
8 Lesbia, nec surgas censeo nec sedeas.
- M11_100 v.1 Habere amicum nolo, Flacce, subtilem,
2 cujus lacertos anuli mei cingant,
3 quae clune nudo radat et genu pungat,
4 cui serra lumbis, cuspis eminent culo :
5 sed idem amicum nolo mille librarum.
6 Carnarius sum, pinguiarius non sum.
- M11_101 v.1 Thaida tam tenuem potuisti, Flacce, videre ?
2 Tu, puto, quod non est, Flacce, videre potes.
- M11_102 v.1 Non est mentitus qui te mihi dixit habere
2 formosam carnem, Lydia, non faciem.
3 Est ita, si taceas et si tam muta recumbas
4 quam silet in cera vultus et in tabula.
5 Sed quotiens loqueris, carnem quoque, Lydia, perdis

- 6 et sua plus nulli quam tibi lingua nocet.
7 Audiatur aedilis ne te videaturque caveto :
8 portentum est, quotiens coepit imago loqui.
- M11_103 v.1 Tanta tibi est animi probitas orisque, Safroni,
2 ut mirer fieri te potuisse patrem.
- M11_104 v.1 Uxor, vade foras aut moribus utere nostris :
2 non sum ego nec Curius nec Numa nec Tadius.
3 Me jucunda juvant tractae per pocula noctes :
4 tu properas pota surgere tristis aqua.
5 Tu tenebris gaudes : me ludere teste lucerna
6 et juvat admissa rumpere luce lateris.
7 Fascia te tunicaeque obscuraque pallia celant :
8 at mihi nulla satis nuda puella jacet.
9 Basia me capiunt blandas imitata columbas :
10 tu mihi das aviae qualia mane soles.
11 Nec motu dignaris opus nec voce juvare
12 nec digitis, tamquam tura merumque pares :
13 masturbabantur Phrygii post ostia servi,
14 Hectoreo quotiens sederat uxor equo,
15 et quamvis Ithaco stertente pudica solebat
16 illic Penelope semper habere manum.
17 Pedicare negas : dabat hoc Cornelia Graccho,
18 Julia Pompeio, Porcia, Brute, tibi ;
19 dulcia Dardanio nondum miscente ministro
20 pocula Juno fuit pro Ganymede Jovi.
21 Si te delectat gravitas, Lucretia toto
22 sis licet usque die : Laida nocte volo.
- M11_105 v.1 Mittebas libram, quadrantem, Garrice, mittis.
2 Saltem semissem, Garrice, solve mihi.
- M11_106 v.1 Vibi Maxime, si vacas havere,
2 hoc tantum lege : namque et occupatus
3 et non es nimium laboriosus.
4 Transis hos quoque quattuor ? Sapisti.
- M11_107 v.1 Explicitum nobis usque ad sua cornua librum
2 et quasi perlectum, Septiciane, refers.
3 Omnia legisti. Credo, scio, gaudeo, verum est.
4 Perlegi libros sic ego quinque tuos.
- M11_108 v.1 Quamvis tam longo possis satur esse libello,
2 lector, adhuc a me disticha pauca petis.
3 Sed Lupus usuram puerique diaria poscunt.
4 Lector, solve. Taces dissimulasque ? Vale.
- M12_1 v.1 Retia dum cessant latratoresque Molossi
2 et non invento silva quiescit apro,
3 otia, Prisce, brevi poteris donare libello.
4 Hora nec aestiva est nec tibi tota perit.

- M12_2 v.1 Ad populos mitti qui nuper ab Urbe solebas,
 2 ibis, io, Romam nunc peregrine liber
 3 auriferi de gente Tagi tetricique Salonis,
 4 dat patrios amnes quos mihi terra potens.
 5 Non tamen hospes eris, nec jam potes advena dici,
 6 cujus habet fratres tot domus alta Remi.
 7 Jure tuo veneranda novi pete limina templi,
 8 reddita Pierio sunt ubi tecta choro.
 9 Vel si malueris, prima gradiere Subura ;
 10 atria sunt illic consulis alta mei :
 11 laurigeros habitat facundus Stella penatis,
 12 clarus Hyanteae Stella sititor aquae ;
 13 fons ibi Castalius vitreo torrente superbit,
 14 unde novem dominas saepe bibisse ferunt :
 15 ille dabit populo patribusque equitique legendum
 16 nec nimium siccis perleget ipse genis.
 17 Quid titulum poscis ? Versus duo tresve legantur,
 18 clamabunt omnes te, liber, esse meum.
- M12_3 v.1 Quod Flacco Varioque fuit summoque Maroni
 2 Maecenas, atavis regibus ortus eques,
 3 gentibus et populis, hoc te mihi, Prisce Terenti,
 4 fama fuisse loquax chartaque dicet anus.
 5 Tu facis ingenium, tu, si quid posse videmur ;
 6 tu das ingenuae jus mihi pigritiae.
 7 Macte animi, quem rarus habes, morumque tuorum,
 8 quos Numa, quos hilaris possit habere Cato.
 9 Largiri, praestare, breves extendere census,
 10 et dare quae faciles vix tribuere dei,
 11 nunc licet et fas est. Sed tu sub principe duro
 12 temporibusque malis ausus es esse bonus.
- M12_4 v.1 Longior undecimi nobis decimique libelli
 2 artatus labor est et breve rasit opus.
 3 Plura legant vacui, quibus otia tuta dedisti :
 4 haec lege tu, Caesar ; forsan et illa leges.
- M12_5 v.1 Quae modo litoreos ibatis carmina Pyrgos,
 2 ite sacra (jam non pulverulenta) via.
 3 Contigit Ausoniae procerum mitissimus aulae
 4 Nerva : licet toto nunc Helicone frui :
 5 recta Fides, hilaris Clementia, cauta Potestas
 6 jam redeunt ; longi terga dedere Metus.
 7 Hoc populi gentesque tuae, pia Roma, precantur :
 8 dux tibi sit semper talis, et iste diu.
- M12_7 v.1 Toto vertice quot gerit capillos
 2 annos si tot habet Ligeia, trima est.
- M12_8 v.1 Terrarum dea gentiumque Roma,
 2 cui par est nihil et nihil secundum,
 3 Trajani modo laeta cum futuros
 4 tot per saecula computaret annos,
 5 et fortem juvenemque Martiumque
 6 in tanto duce militem videret,
 7 dixit praeside gloriosa tali :

- 8 "Parthorum proceres ducesque Serum,
9 Thraces, Sauromatae, Getae, Britanni,
10 possum ostendere Caesarem ; venite."
- M12_9 v.1 Palma regit nostros, mitissime Caesar, Hiberos,
2 et placido fruitur pax peregrina jugo.
3 Ergo agimus laeti tanto pro munere grates :
4 misisti mores in loca nostra tuos.
- M12_10 v.1 Habet Africanus miliens, tamen captat.
2 Fortuna multis dat nimis, satis nulli.
- M12_11 v.1 Parthenio dic, Musa, tuo nostroque salutem :
2 nam quis ab Aonio largius amne bibit ?
3 cujus Pipleo lyra clarior exit ab antro ?
4 quem plus Pierio de grege Phoebus amat ?
5 Et si forte (sed hoc vix est sperare) vacabit,
6 tradat ut ipse duci carmina nostra, roga,
7 quattuor et tantum timidumque brevemque libellum
8 commendet verbis "Hunc tua Roma legit."
- M12_12 v.1 Omnia promittis, cum tota nocte bibisti ;
2 mane nihil praestas. Pollio, mane bibe.
- M12_13 v.1 Genus, Aucte, lucri divites habent iram :
2 odisse quam donare vilius constat.
- M12_14 v.1 Parcius utaris, moneo, rapiente veredo,
2 Prisce, nec in lepores tam violentus eas.
3 Saepe satisfecit praedae venator et acri
4 decidit excussus nec rediturus equo.
5 Insidias et campus habet : nec fossa nec agger
6 nec sint saxa licet, fallere plana solent.
7 Non derit qui tanta tibi spectacula praestet,
8 invidia fati sed levioe cadat.
9 Si te delectant animosa pericula, Tuscis
10 (tutior est virtus) insidiamur apris.
11 Quid te frena juvant temeraria ? saepius illis,
12 Prisce, datum est equitem rumpere quam leporem.
- M12_15 v.1 Quidquid Parrhasia nitebat aula
2 donatum est oculis deisque nostris.
3 Miratur Scythicas virentis auri
4 flammis Juppiter, et stupet superbi
5 regis delicias gravesque lusus :
6 haec sunt pocula, quae decent Tonantem,
7 haec sunt quae Phrygium decent ministrum.
8 Omnes cum Jove nunc sumus beati ;
9 at nuper (pudet, ah pudet fateri)
10 omnes cum Jove pauperes eramus.
- M12_16 v.1 Addixti, Labiene, tres agellos ;
2 emisti, Labiene, tres cinaedos :
3 pedicas, Labiene, tres agellos.
- M12_17 v.1 Quare tam multis a te, Laetine, diebus
2 non abeat febris, quaeris et usque gemis.

- 3 Gestatur tecum pariter pariterque lavatur ;
 4 cenat boletos, ostrea, sumen, aprum ;
 5 ebria Setino fit saepe et saepe Falerno
 6 nec nisi per niveam Caecuba potat aquam ;
 7 circumfusa rosis et nigra recumbit amomo,
 8 dormit et in pluma purpureoque toro.
 9 Cum recubet pulchre, cum tam bene vivat apud te,
 10 ad Damam potius vis tua febris eat ?
- M12_18 v.1 Dum tu forsitan inquietus erras
 2 clamosa, Juvenalis, in Subura,
 3 aut collem dominae teris Dianae ;
 4 dum per limina te potentiorum
 5 sudatrix toga ventilat vagumque
 6 major Caelius et minor fatigant :
 7 me multos repetita post Decembres
 8 accepit mea rusticumque fecit
 9 auro Bilbilis et superba ferro.
 10 Hic pigri colimus labore dulci
 11 Boterdum Plateamque (Celtiberis
 12 haec sunt nomina crassiora terris) :
 13 ingenti fruor inproboque somno
 14 quem nec tertia saepe rumpit hora,
 15 et totum mihi nunc repono quidquid
 16 ter denos vigilaveram per annos.
 17 Ignota est toga, sed datur petenti
 18 rupta proxima vestis a cathedra.
 19 Surgentem focus excipit superba
 20 vicini strue cultus iliceti,
 21 multa vilica quem coronat olla.
 22 Venator sequitur, sed ille quem tu
 23 secreta cupias habere silva ;
 24 dispensat pueris rogatque longos
 25 levis ponere vilicus capillos.
 26 Sic me vivere, sic juvat perire.
- M12_19 v.1 In thermis sumit lactucas, ova, lacertum,
 2 et cenare domi se negat Aemilius.
- M12_20 v.1 Quare non habeat, Fabulle, quaeris
 2 Uxorem Themison ? Habet sororem.
- M12_21 v.1 Municipem rigidi quis te, Marcella, Salonis
 2 et genitam nostris quis putet esse locis ?
 3 tam rarum, tam dulce sapis. Palatia dicent,
 4 audierint si te vel semel, esse suam ;
 5 nulla nec in media certabit nata Subura
 6 nec Capitolini collis alumna tibi ;
 7 nec cito ridebit peregrini gloria partus,
 8 Romanam deceat quam magis esse nurum.
 9 Tu desiderium dominae mihi mitius urbis
 10 esse jubes : Romam tu mihi sola facis.
- M12_22 v.1 Quam sit lusca Philaenis indecenter,
 2 vis dicam breviter tibi, Fabulle ?
 3 Esset caeca decentior Philaenis.

- M12_23 v.1 Dentibus atque comis (nec te pudet) uteris emptis.
2 Quid facies oculo, Laelia ? non emitur.
- M12_24 v.1 O jucunda, covinne, solitudo,
2 carruca magis essedoque gratum
3 facundi mihi munus Aeliani !
4 Hic mecum licet, hic, Juvate, quidquid
5 in buccam tibi venerit loquaris :
6 non rector Libyci niger caballi,
7 succinctus neque cursor antecedit ;
8 nusquam est mulio : mannuli tacebunt.
9 O si conscius esset hic Avitus,
10 aurem non ego tertiam timerem.
11 Totus quam bene sic dies abiret !
- M12_25 v.1 Cum rogo te nummos sine pignore, "non habeo" inquis ;
2 idem, si pro me spondet agellus, habes :
3 quod mihi non credis veteri, Telesine, sodali,
4 credis coliculis arboribusque meis.
5 Ecce reum carus te detulit : adsit agellus.
6 Exilii comitem quaeris : agellus eat.
- M12_26 v.1 A latronibus esse te fututam
2 dicis, Saenia : sed negant latrones.
- M12_27 v.1 Poto ego sextantes, tu potas, Cinna, deunces :
2 et quereris quod non, Cinna, bibamus idem ?
- M12_28 v.1 Hermogenes tantus mapparum, Castrice, fur est,
2 quantus nummorum vix, puto, Massa fuit ;
3 tu licet observes dextram teneasque sinistram,
4 inveniet mappam qua ratione trahat :
5 cervinus gelidum sorbet sic halitus anguem,
6 casuras alte sic rapit Iris aquas.
7 Nuper cum Myrino peteretur missio laeso,
8 subduxit mappas quattuor Hermogenes ;
9 cretatam praetor cum vellet mittere mappam,
10 praetori mappam surpuit Hermogenes.
11 Attulerat mappam nemo, dum furta timentur :
12 mantele a mensa surpuit Hermogenes.
13 Hoc quoque si deerit, medios discingere lectos
14 mensarumque pedes non timet Hermogenes.
15 Quamvis non modico caleant spectacula sole,
16 vela reducuntur, cum venit Hermogenes.
17 Festinant trepidi substringere carbasa nautae,
18 ad portum quotiens paruit Hermogenes.
19 Linigeri fugiunt calvi sistrataque turba,
20 inter adorantes cum stetit Hermogenes.
21 Ad cenam Hermogenes mappam non attulit unquam,
22 a cena semper rettulit Hermogenes.
- M12_29 v.1 Sexagena teras cum limina mane senator,
2 esse tibi videor desidiosus eques,
3 quod non a prima discurram luce per urbem
4 et referam lassus basia mille domum.
5 Sed tu, purpureis ut des nova nomina fastis
6 aut Nomadum gentes Cappadocumve petas :

- 7 at mihi, quem cogis medios abrumpere somnos
8 et matutinum ferre patique lutum,
9 quid petitur ? Rupta cum pes vagus exit aluta
10 et subitus crassae decidit imber aquae
11 nec venit ablatis clamatus verna lacernis,
12 accedit gelidam servus ad auriculam
13 et "Rogat ut secum cenes Laetorius" inquit.
14 Viginti nummis ? non ego : malo famem,
15 quam sit cena mihi, tibi sit provincia merces,
16 et faciamus idem nec mereamur idem.
- M12_30 v.1 Siccus, sobrius est Aper ; quid ad me ?
2 servum sic ego laudo, non amicum.
- M12_31 v.1 Hoc nemus, hi fontes, haec textilis umbra supini
2 palmitis, hoc riguae ductile flumen aquae,
3 prataque nec bifero cessura rosaria Paesto,
4 quodque viret Jani mense nec alget holus,
5 quaeque natat clusis anguilla domestica lymphis,
6 quaeque gerit similes candida turris aves
7 munera sunt dominae : post septima lustra reverso
8 has Marcella domos parvaque regna dedit.
9 Si mihi Nausicaa patrios concederet hortos,
10 Alcinoos possem dicere "Malo meos."
- M12_32 v.1 O Juliarum dedecus Kalendarum,
2 vidi, Vacerra, sarcinas tuas, vidi ;
3 quas non retentas pensione pro bima
4 portabat uxor rufa crinibus septem
5 et cum sorore cana mater ingenti.
6 Furias putavi nocte Ditis emersas.
7 Has tu priores frigore et fame siccus
8 et non recenti pallidus magis buxo
9 Irus tuorum temporum sequebaris.
10 Migrare clivum crederes Aricinum.
11 Ibat tripes grabatus et bipes mensa,
12 et cum lucerna corneoque cratere
13 matella curto rupta latere meiebat ;
14 foco virenti suberat amphorae cervix ;
15 fuisse gerres aut inutiles maenas
16 odor inpudicus urcei fatebatur,
17 qualis marinae vix sit aura piscinae.
18 Nec quadra deerat casei Tolosatis,
19 quadrima nigri nec corona pulei
20 calvaeque restes alioque cepisque,
21 nec plena turpi matris olla resina,
22 Summemmianae qua pilantur uxores.
23 Quid quaeris aedes vilicosque derides,
24 habitare gratis, o Vacerra, cum possis ?
25 Haec sarcinarum pompa convenit ponti.
- M12_33 v.1 Ut pueros emeret Labienus vendidit hortos :
2 nil nisi ficetum nunc Labienus habet.
- M12_34 v.1 Triginta mihi quattuorque messes
2 tecum, si memini, fuere, Juli ;
3 quarum dulcia mixta sunt amaris

- 4 sed jucunda tamen fuere plura ;
 5 et si calculus omnis huc et illuc
 6 diversus bicolorque digeratur,
 7 vincet candida turba nigriorem.
 8 Si vitare velis acerba quaedam
 9 et tristis animi cavere morsus,
 10 nulli te facias nimis sodalem :
 11 gaudebis minus et minus dolebis.
- M12_35 v.1 Tamquam simpliciter mecum, Callistrate, vivas,
 2 dicere percisum te mihi saepe soles.
 3 Non es tam simplex, quam vis, Callistrate, credi :
 4 nam quisquis narrat talia plura tacet.
- M12_36 v.1 Libras quattuor aut duas amico
 2 argentemque togam brevemque laenam,
 3 interdum aureolos manu crepantis,
 4 possint ducere qui duas Kalendas,
 5 quod nemo, nisi tu, Labulle, donas,
 6 non es, crede mihi, bonus. Quid ergo ?
 7 Ut verum loquar, optimus malorum es.
 8 Pisones Senecasque Memmiosque
 9 et Crispos mihi redde, sed priores :
 10 fies protinus ultimus bonorum.
 11 Vis cursu pedibusque gloriari ?
 12 Tigrim vince levemque Passerinum :
 13 nulla est gloria praeterire asellos.
- M12_37 v.1 Nasutus nimium cupis videri :
 2 nasutum volo, nolo polyposum.
- M12_38 v.1 Hunc qui femineis noctesque diesque cathedris
 2 incedit tota notus in urbe nimis,
 3 crine nitens, niger unguento, perlucidus ostro,
 4 ore tener, latus pectore, crure glaber,
 5 uxori qui saepe tuae comes improbus haeret,
 6 non est quod timeas, Candide : non futuit.
- M12_39 v.1 Odi te, quia bellus es, Sabelle.
 2 Res est putida bellus et Sabellus,
 3 bellum denique malo, quam Sabellum.
 4 Tabescas utinam, Sabelle belle !
- M12_40 v.1 Mentiris, credo : recitas mala carmina, laudo :
 2 cantas, canto : bibis, Pontiliane, bibo :
 3 pedis, dissimulo : gemma vis ludere, vincor :
 4 res una est, sine me quam facis, et taceo.
 5 Nil tamen omnino praestas mihi. "Mortuus," inquis,
 6 "accipiam bene te." Nil volo : sed morere.
- M12_41 v.1 Non est, Tucca, satis, quod es gulosus :
 2 et dici cupis et cupis videri.
- M12_42 v.1 Barbatus rigido nupsit Callistratus Afro
 2 hac qua lege viro nubere virgo solet.
 3 Praeluxere faces, velarunt flammea vultus,
 4 nec tua defuerunt verba, Talasse, tibi.

- 5 Dos etiam dicta est. Nondum tibi, Roma, videtur
6 hoc satis ? expectas numquid ut et pariat ?
- M12_43 v.1 Facundos mihi de libidinosi
2 legisti nimium, Sabelle, versus,
3 quales nec Didymi sciunt puellae
4 nec molles Elephantidos libelli.
5 Sunt illic Veneris novae figurae,
6 quales perditus audeat fututor,
7 praestent et taceant quid exoleti,
8 quo symplegmate quinque copulentur,
9 qua plures teneantur a catena,
10 extinctam liceat quid ad lucernam.
11 Tanti non erat esse te disertum.
- M12_44 v.1 Unice, cognato junctum mihi sanguine nomen
2 qui geris et studio corda propinqua meis ;
3 carmina cum facias soli cedentia fratri,
4 pectore non minor es, sed pietate prior.
5 Lesbia cum lepido te posset amare Catullo,
6 te post Nasonem blanda Corinna sequi.
7 nec deerant zephyri, si te dare vela juvaret ;
8 sed tu litus amas. Hoc quoque fratris habes.
- M12_45 v.1 Haedina tibi pelle contegenti
2 nudae tempora verticemque calvae,
3 festive tibi, Phoebe, dixit ille
4 qui dixit caput esse calceatum.
- M12_46 v.1 Difficilis facilis, jucundus acerbus es idem :
2 nec tecum possum vivere, nec sine te.
- M12_47 v.1 Vendunt carmina Gallus et Lupercus :
2 sanos, Classice, nunc nega poetas.
- M12_48 v.1 Boletos et aprum si tamquam vilia ponis
2 et non esse putas haec mea vota, volo :
3 si fortunatum fieri me credis et heres
4 vis scribi propter quinque Lucrina, vale.
5 Lautam tamen cenam est : fateor, lautissima, sed cras
6 nil erit, immo hodie, protinus immo nihil,
7 quod sciat infelix damnatae spongia virgae
8 vel quicumque canis junctaque testa viae :
9 mullorum leporumque et suminis exitus hic est,
10 sulphureusque color carnificesque pedes.
11 Non Albana mihi sit comissatio tanti
12 nec Capitolinae pontificumque dapes ;
13 inputet ipse deus nectar mihi, fiet acetum
14 et Vaticani perfida vappa cadi.
15 Convivas alios cenarum quaere magister,
16 quos capiant mensae regna superba tuae :
17 me meus ad subitas invitet amicus ofellas :
18 haec mihi, quam possum reddere, cena placet.
- M12_49 v.1 Crinitae Line paedagoge turbae,
2 rerum quem dominum vocat suarum
3 et credit cui Postumilla dives

- 4 gemmas, aurea, vina, concubinos :
 5 sic te perpetua fide probatum
 6 nulli non tua praeferat patrona :
 7 succurras misero, precor, furori
 8 et serves aliquando negligenter
 9 illos qui male cor meum perurunt,
 10 quos et noctibus et diebus opto
 11 in nostro cupidus sinu videre,
 12 formosos, niveos, pares, gemellos,
 13 grandes, non pueros, sed uniones.
- M12_50 v.1 Daphnonas, platanonas et arios pityonas
 2 et non unius balnea solus habes,
 3 et tibi centenis stat porticus alta columnis
 4 calcatusque tuo sub pede lucet onyx,
 5 pulvereumque fugax hippodromon ungula plaudit
 6 et pereuntis aquae fluctus ubique sonat ;
 7 atria longa patent. Sed nec cenantibus usquam
 8 nec somno locus est. Quam bene non habitas !
- M12_51 v.1 Tam saepe nostrum decipi Fabullinum
 2 miraris, Aule ? Semper homo bonus tiro est.
- M12_52 v.1 Tempora Pieria solitus redimire corona,
 2 nec minus attonitis vox celebrata reis,
 3 hic situs est, hic ille tuus, Sempronia, Rufus,
 4 cujus et ipse tui flagrat amore cinis.
 5 Dulcis in Elysio narraris fabula campo
 6 et stupet ad raptus Tyndaris ipsa tuos :
 7 tu melior quae deserto raptore redisti,
 8 illa virum voluit nec repetita sequi.
 9 Ridet et Iliacos audit Menelaus amores :
 10 absolvit Phrygium vestra rapina Parim.
 11 Accipient olim cum te loca laeta piorum,
 12 non erit in Stygia notior umbra domo :
 13 non aliena videt sed amat Proserpina raptas :
 14 iste tibi dominam conciliabit amor.
- M12_53 v.1 Nummi cum tibi sint opesque tantae
 2 quantas civis habet, Paterne, rarus,
 3 largiris nihil incubasque gazae
 4 ut magnus draco quem canunt poetae
 5 custodem Scythici fuisse luci.
 6 Sed causa, ut memoras et ipse jactas,
 7 dirae filius est rapacitatis.
 8 Ecquid tu fatuos rudesque quaeris
 9 inludas quibus auferasque mentem ?
 10 Huic semper vitio pater fuisti.
- M12_54 v.1 Crine ruber, niger ore, brevis pede, lumine laesus,
 2 rem magnam praestas, Zoile, si bonus es.
- M12_55 v.1 Gratis qui dare vos jubet, puellae,
 2 insulsissimus improbissimusque est.
 3 Gratis ne date, basiate gratis.
 4 Hoc Aegle negat, hoc avara vendit
 5 - sed vendat : bene basiare quantum est ! -

- 6 hoc vendit quoque nec levi rapina :
7 aut libram petit illa Cosmiani
8 aut binos quater a nova moneta,
9 ne sint basia muta, ne maligna,
10 ne clusis aditum neget labellis.
11 Humane tamen hoc facit, sed unum :
12 gratis quae dare basium recusat,
13 gratis lingere non recusat, Aegle.
- M12_56 v.1 Aegrotas uno decies aut saepius anno,
2 nec tibi, sed nobis hoc, Polycharme, nocet :
3 nam quotiens surgis, soteria poscis amicos.
4 Sit pudor : aegrota jam, Polycharme, semel.
- M12_57 v.1 Cur saepe sicci parva rura Nomenti
2 laremque villae sordidum petam, quaeris ?
3 Nec cogitandi, Sparse, nec quiescendi
4 in urbe locus est pauperi. Negant vitam
5 ludi magistri mane, nocte pistorum,
6 aerariorum marculi die toto ;
7 hinc otiosus sordidam quatit mensam
8 Neroniana nummularius massa,
9 illinc balucis malleator Hispanae
10 tritum nitenti fuste verberat saxum ;
11 nec turba cessat entheata Bellonae,
12 nec fasciato naufragus loquax trunco,
13 a matre doctus nec rogare Judaeus,
14 nec sulphuratae lippus institor mercis.
15 Numerare pigri damna quis potest somni ?
16 Dicit quot aera verberent manus urbis,
17 cum secta Colcho Luna vapulat rhombo.
18 Tu, Sparse, nescis ista, nec potes scire,
19 Petilianis delicatus in regnis,
20 cui plana summos despicit domus montis
21 et rus in urbe est vinitorque Romanus
22 - nec in Falerno colle major autumnus -
23 intraque limen latus essedo cursus,
24 et in profundo somnus et quies nullis
25 offensa linguis, nec dies nisi admissus.
26 Nos transeuntis risus excitat turbae,
27 et ad cubile est Roma. Taedio fessis
28 dormire quotiens libuit, imus ad villam.
- M12_58 v.1 Ancillariolum tua te vocat uxor, et ipsa
2 lecticariola est : estis, Alauda, pares.
- M12_59 v.1 Tantum dat tibi Roma basiorum
2 post annos modo quindecim reverso,
3 quantum Lesbia non dedit Catullo.
4 Te vicinia tota, te pilosus
5 hircoso premit osculo colonus ;
6 hinc instat tibi textor, inde fullo,
7 hinc sutor modo pelle basiata,
8 hinc menti dominus periculosi,
9 hinc et dexiocholus, inde lippus,
10 fellatorque recensque cunnilingus.
11 Jam tanti tibi non fuit redire.

- M12_60 v.1 Martis alumne dies, roseam quo lampada primum
 2 magnaue siderei vidimus ora dei,
 3 si te rure coli viridisque pudebit ad aras,
 4 qui fueras Latia cultus in urbe mihi :
 5 da veniam servire meis quod nolo Kalendis
 6 et qua sum genitus vivere luce volo.
 7 Natali pallere suo, ne calda Sabello
 8 desit ; et ut liquidum potet Alauda merum,
 9 turbida sollicito transmittersse Caecuba sacco ;
 10 atque inter mensas ire redire suas ;
 11 excipere hos illos et tota surgere cena
 12 marmora calcantem frigidiora gelu :
 13 quae ratio est, haec sponte sua perferre patique,
 14 quae te si jubeat rex dominusque, neges ?
- M12_61 v.1 Versus et breve vividumque carmen
 2 in te ne faciam, times, Ligurra,
 3 et dignus cupis hoc metu videri.
 4 Sed frustra metuis cupisque frustra.
 5 In tauros Libyci ruunt leones,
 6 non sunt papilionibus molesti.
 7 Quaeras, censeo, si legi laboras,
 8 nigri fornicis ebrium poetam,
 9 qui carbone rudi putrique creta
 10 Scribit carmina quae legunt cacantes.
 11 Frons haec stigmatum non meo notanda est.
- M12_62 v.1 Antiqui rex magne poli mundique prioris,
 2 sub quo pigra quies nec labor ullus erat,
 3 nec regale nimis fulmen nec fulmine digni,
 4 scissa nec ad Manes, sed sibi dives humus :
 5 laetus ad haec facilisque veni sollempnia Prisci
 6 gaudia : cum sacris te decet esse tuis.
 7 Tu reducem patriae sexta, pater optime, bruma
 8 pacifici Latia reddis ab urbe Numae.
 9 Cernis ut Ausonio similis tibi pompa macello
 10 pendeat et quantus luxurietur honos ?
 11 Quam non parca manus largaeque nomismata mensae,
 12 quae, Saturne, tibi pernumerentur opes ?
 13 utque sit his pretium meritis et gratia major,
 14 et pater et frugi sic tua sacra colit.
 15 At tu sancte (tuo sic semper amere Decembri)
 16 hos illi jubeas saepe redire dies.
- M12_63 v.1 Uncto Corduba laetior Venafro,
 2 Histra nec minus absoluta testa,
 3 Albi quae superas oves Galaesi
 4 nullo murice nec cruore mendax,
 5 sed tinctis gregibus colore vivo :
 6 dic vestro, rogo, sit pudor poetae
 7 nec gratis recitet meos libellos.
 8 Ferrem, si faceret bonus poeta,
 9 cui possem dare mutuos dolores.
 10 Corruptis sine talione caelebs,
 11 caecus perdere non potest quod aufert :
 12 nil est deterius latrone nudo :

- 13 nil securius est malo poeta.
- M12_64 v.1 Vincentem roseos facieque comaque ministros
2 Cinna cocum fecit. Cinna, gulosus homo es.
- M12_65 v.1 Formosa Phyllis nocte cum mihi tota
2 se praestitisset omnibus modis largam,
3 et cogitarem mane quod darem munus,
4 utrumne Cosmi, Nicerotis an libram,
5 an Baeticarum pondus acre lanarum,
6 an de moneta Caesaris decem flavos :
7 amplexa collum basioque tam longo
8 blandita quam sunt nuptiae columbarum,
9 rogare coepit Phyllis amphoram vini.
- M12_66 v.1 Bis quinquagenis domus est tibi milibus empta,
2 vendere quam summa vel brevior cupis.
3 Arte sed emptorem vafra corrumpis, Amoene,
4 et casa divitiis ambitiosa latet.
5 Gemmantes prima fulgent testudine lecti
6 et Maurusiaci pondera rara citri ;
7 argentum atque aurum non simplex Delphica portat ;
8 stant pueri dominos quos precer esse meos.
9 Deinde ducenta sonas et ais non esse minoris.
10 Instructam vili vendis, Amoene, domum.
- M12_67 v.1 Maiaie Mercurium creastis Idus,
2 Augustis redit Idibus Diana,
3 Octobres Maro consecravit Idus.
4 Idus saepe colas et has et illas,
5 qui magni celebras Maronis Idus.
- M12_68 v.1 Matutine cliens, urbis mihi causa relictæ,
2 atria, si sapias, ambitiosa colas.
3 Non sum ego causidicus, nec amaris litibus aptus,
4 sed piger et senior Pieridumque comes ;
5 otia me somnusque juvant, quæ magna negavit
6 Roma mihi : redeo, si vigilatur et hic.
- M12_69 v.1 Sic tanquam tabulas scyphosque, Paule,
2 omnes archetypos habes amicos.
- M12_70 v.1 Linthea ferret Apro vatius cum vernula nuper
2 et supra togulam lusca sederet anus
3 atque olei stillam daret enterocelicus unctor,
4 udorum tetricus censor et asper erat :
5 frangendos calices effundendumque Falernum
6 clamabat biberet quod modo lotus eques.
7 A sene sed postquam patruo venere trecenta,
8 sobrius a thermis nescit abire domum.
9 O quantum diatretra valent et quinque comati !
10 tunc, cum pauper erat, non sitiebat Aper.
- M12_71 v.1 Nil non, Lygde, mihi negas roganti :
2 at quondam mihi, Lygde, nil negabas.
- M12_72 v.1 Jugera mercatus prope busta latentis agelli

- 2 et male compactae culmina fulta casae,
 3 deseris urbanas, tua praedia, Pannyche, lites
 4 parvaque, sed tritae praemia certa togae.
 5 Frumentum, milium tisanamque fabamque solebas
 6 vendere pragmaticus, nunc emis agricola.
- M12_73 v.1 Heredem tibi me, Catulle, dicis.
 2 Non credam, nisi legero, Catulle.
- M12_74 v.1 Dum tibi Niliacus portat crystalla catapulus,
 2 accipe de circo pocula Flaminio.
 3 Hi magis audaces, an sunt qui talia mittunt
 4 munera ? Sed gemmis vilibus usus inest :
 5 nullum sollicitant haec, Flacce, toreumata furem
 6 et nimium calidis non vitiantur aquis.
 7 Quid quod securo potat conviva ministro
 8 et casum tremulae non timuere manus ?
 9 Hoc quoque non nihil est, quod propinabis in istis,
 10 frangendus fuerit si tibi, Flacce, calix.
- M12_75 v.1 Festinat Polytimus ad puellas ;
 2 invitus puerum fatetur Hypnus ;
 3 pastas glande natis habet Secundus ;
 4 mollis Dindymus est, sed esse non vult ;
 5 Amphion potuit puella nasci.
 6 Horum delicias superbiamque
 7 et fastus querulos, Avite, malo
 8 quam dotis mihi quinquies ducena.
- M12_76 v.1 Amphora vigesis, modius datur aere quaterno.
 2 Ebrius et crudus, nil habet agricola.
- M12_77 v.1 Multis dum precibus Jovem salutat
 2 stans summos resupinus usque in unguis
 3 Aethon in Capitolio, pepedit.
 4 Riserunt homines, sed ipse divom
 5 offensus genitor, trinociali
 6 adfecit domicenio clientem.
 7 Post hoc flagitium misellus Aethon,
 8 cum vult in Capitolium venire,
 9 sellas ante petit Paterclianas
 10 et pedit deciesque viciesque.
 11 Sed quamvis sibi caverit crepando,
 12 compressis natibus Jovem salutat.
- M12_78 v.1 Nil in te scripsi, Bithynice. Credere non vis
 2 et jurare jubes ? Malo satis facere.
- M12_79 v.1 Donavi tibi multa, quae rogasti ;
 2 donavi tibi plura, quam rogasti :
 3 non cessas tamen usque me rogare.
 4 Quisquis nil negat, Atticilla, fellat.
- M12_80 v.1 Ne laudet dignos, laudat Callistratus omnes.
 2 Cui malus est nemo, quis bonus esse potest ?
- M12_81 v.1 Brumae diebus feriisque Saturni

- 2 mittebat Umber aliculam mihi pauper ;
3 nunc mittit alicam : factus est enim dives.
- M12_82 v.1 Effugere in thermis et circa balnea non est
2 Menogenen, omni tu licet arte velis.
3 Captabit tepidum dextra laevaue trigonem,
4 inputet acceptas ut tibi saepe pilas.
5 Colliget et referet laxum de pulvere follem,
6 et si jam lotus, jam soleatus erit.
7 Lintea si sumes, nive candidiora loquetur,
8 sint licet infantis sordidiora sinu.
9 Exiguos secto comentem dente capillos
10 dicet Achilleas disposuisse comas.
11 Fumosae feret ipse propin de faece lagonae
12 frontis et umorem colliget usque tuae.
13 Omnia laudabit, mirabitur omnia, donec
14 peressus dicas taedia mille "Veni !"
- M12_83 v.1 Derisor Fabianus hirnearum,
2 omnes quem modo colei timebant
3 dicentem tumidas in hydrocelas,
4 quantum nec duo dicerent Catulli,
5 in thermis subito Neronianis
6 vidit se miser, et tacere coepit.
- M12_84 v.1 Nolueram, Polytime, tuos violare capillos,
2 sed juvat hoc precibus me tribuisse tuis.
3 Talis eras, modo tonse Pelops, positisque nitebas
4 Crinibus, ut totum sponsa videret ebur.
- M12_85 v.1 Pediconibus os olere dicis.
2 Hoc si, sicut ais, Fabulle, verum est,
3 quid tu credis olere cunnilingis ?
- M12_86 v.1 Triginta tibi sunt pueri totidemque puellae :
2 una est nec surgit mentula. Quid facies ?
- M12_87 v.1 Bis Cotta soleas perdidisse se questus,
2 dum neglegentem ducit ad pedes vernam,
3 qui solus inopi praestat et facit turbam,
4 excogitavit (homo sagax et astutus)
5 ne facere posset tale saepius damnum :
6 excalceatus ire coepit ad cenam.
- M12_88 v.1 Tongilianus habet nasum : scio, non nego. Sed jam
2 nil praeter nasum Tongilianus habet.
- M12_89 v.1 Quod lana caput alligas, Charine,
2 non aures tibi, sed dolent capilli.
- M12_90 v.1 Pro sene, sed clare, votum Maro fecit amico,
2 cui gravis et fervens hemitritaeos erat,
3 si Stygias aeger non esset missus ad umbras,
4 ut caderet magno victima grata Jovi.
5 Coeperunt certam medici spondere salutem.
6 Ne votum solvat, nunc Maro vota facit.

- M12_91 v.1 Communis tibi cum viro, Magulla,
2 cum sit lectulus et sit exoletus,
3 quare, dic mihi, non sit et minister.
4 Suspiras ; ratio est, times lagonam.
- M12_92 v.1 Saepe rogare soles, qualis sim, Prisce, futurus,
2 si fiam locuples simque repente potens.
3 Quemquam posse putas mores narrare futuros ?
4 Dic mihi, si fias tu leo, qualis eris ?
- M12_93 v.1 Qua moechum ratione basiaret
2 coram conjuge, repperit Fabulla.
3 Parvum basiat usque morionem ;
4 hunc multis rapit osculis madentem
5 Moechus protinus, et suis repletum
6 ridenti dominae statim remittit.
7 Quanto morio major est maritus !
- M12_94 v.1 Scribebamus epos ; coepisti scribere : cessi,
2 aemula ne starent carmina nostra tuis.
3 Transtulit ad tragicos se nostra Thalia coturnos :
4 aptasti longum tu quoque syrma tibi.
5 Fila lyrae movi Calabris exculpta Camenis :
6 plectra rapis nobis, ambitiose, nova.
7 Audemus saturas : Lucilius esse laboras.
8 Ludo levis elegos : tu quoque ludis idem.
9 Quid minus esse potest ? Epigrammata fingere coepi :
10 hinc etiam petitur jam mea palma tibi.
11 Elige, quid nolis (quis enim pudor, omnia velle ?)
12 et si quid non vis, Tucca, relinque mihi.
- M12_95 v.1 Musseti pathicissimos libellos,
2 qui certant Sybariticis libellis,
3 et tinctas sale pruriente chartas
4 Instanti lege Rufe ; sed puella
5 sit tecum tua, ne talassionem
6 indicas manibus libidinosi
7 et fias sine femina maritus.
- M12_96 v.1 Cum tibi nota tui sit vita fidesque mariti
2 nec premat ulla tuos sollicitetve toros,
3 quid quasi paelicibus torqueris inepta ministris,
4 in quibus et brevis est et fugitiva Venus ?
5 Plus tibi quam domino pueros praestare probabo :
6 hi faciunt, ut sis femina sola viro ;
7 hi dant quod non vis uxor dare. "Do tamen," inquis,
8 "ne vagus a thalamis conjugis erret amor."
9 Non eadem res est : Chiam volo, nolo mariscam :
10 ne dubites quae sit Chia, marisca tua est.
11 Scire suos fines matrona et femina debet :
12 cede sua pueris, utere parte tua.
- M12_97 v.1 Uxor cum tibi sit puella, qualem
2 votis vix petat improbus maritus,
3 dives, nobilis, erudita, casta,
4 rumpis, Basse, latus, sed in comatis,
5 uxoris tibi dote quos parasti.

- 6 Et sic ad dominam reversa languet
7 multis mentula milibus redempta ;
8 sed nec vocibus excitata blandis,
9 molli pollice nec rogata surgit.
10 Sit tandem pudor, aut eamus in jus.
11 Non est haec tua, Basse : vendidisti.
- M12_98 v.1 Baetis olivifera crinem redimite corona,
2 aurea qui nitidis vellera tinguis aquis ;
3 quem Bromius, quem Pallas amat ; cui rector aquarum
4 Albula navigerum per freta pandit iter :
5 ominibus laetis vestras Instantius oras
6 intret, et hic populis ut prior annus eat.
7 Non ignorat, onus quod sit succedere Macro :
8 qui sua metitur pondera, ferre potest
- M13_1 v.1 Ne toga cordylis et paenula desit olivis
2 aut inopem metuat sordida blatta famem,
3 perditte Niliacas, Musae, mea damna, papyros :
4 postulat ecce novos ebria bruma sales.
5 Non mea magnanimo depugnat tessera telo
6 senio nec nostrum cum cane quassat ebur :
7 haec mihi charta nuces, haec est mihi charta fritillus :
8 alea nec damnum nec facit ista lucrum.
- M13_2 v.1 Nasutus sis usque licet, sis denique nasus,
2 quantum noluerat ferre rogatus Atlans,
3 et possis ipsum tu deridere Latinum :
4 non potes in nugas dicere plura meas
5 ipse ego quam dixi. Quid dentem dente juvabit
6 rodere ? Carne opus est, si satur esse velis.
7 Ne perdas operam : qui se mirantur, in illos
8 virus habe, nos haec novimus esse nihil.
9 Non tamen hoc nimium nihil est, si candidus aure
10 nec matutina si mihi fronte venis.
- M13_3 v.1 Omnis in hoc gracili Xeniorum turba libello
2 constabit nummis quattuor empta tibi.
3 Quattuor est nimium ? Poterit constare duobus,
4 et faciat lucrum bibliopola Tryphon.
5 Haec licet hospitibus pro munere disticha mittas,
6 si tibi tam rarus quam mihi nummus erit.
7 Addita per titulos sua nomina rebus habebis :
8 praetereas, si quid non facit ad stomachum.
- Tus
- M13_4 v.1 Serus ut aetheriae Germanicus imperet aulae
2 utque diu terris da pia tura Jovi.
- Piper
- M13_5 v.1 Cerea quae patulo lucet ficedula lumbo,
2 cum tibi sorte datur, si sapis, adde piper.

			Alica
M13_6	v.1	Nos alicam, poterit mulsum tibi mittere dives.	
	2	Si tibi noluerit mittere dives, emes.	
			Faba
M13_7	v.1	Si spumet rubra conchis tibi pallida testa,	
	2	lautorum cenis saepe negare potes.	
			Far
M13_8	v.1	Inbue plebeias Clusinis pultibus ollas,	
	2	ut satur in vacuis dulcia musta bibas.	
			Lens
M13_9	v.1	Accipe Niliacam, Pelusia munera, lentem :	
	2	vilior est alica, carior illa faba.	
			Simila
M13_10	v.1	Nec dotes simillae possis numerare nec usus,	
	2	pistori totiens cum sit et apta coco.	
			Hordeum
M13_11	v.1	Mulio quod non det tacituris, accipe, mulis.	
	2	Haec ego coponi, non tibi, dona dedi.	
			Frumentum
M13_12	v.1	Tercentum Libyci modios de messe coloni	
	2	sume, suburbanus ne moriatur ager.	
			Betae
M13_13	v.1	Ut sapiant fatuae, fabrorum prandia, betae,	
	2	o quam saepe petet vina piperque cocus !	
			Lactucae
M13_14	v.1	Cludere quae cenas lactuca solebat avorum,	
	2	dic mihi, cur nostras inchoat illa dapes ?	
			Ligna acapna
M13_15	v.1	Si vicina tibi Nomento rura coluntur,	
	2	ad villam moneo, rustice, ligna feras.	
			Rapa
M13_16	v.1	Haec tibi brumali gaudentia frigore rapa	
	2	quae damus, in caelo Romulus esse solet.	
			Fascis coliculi
M13_17	v.1	Ne tibi pallentes moveant fastidia caules,	
	2	nitratu viridis brassica fiat aqua.	
			Porri sectivi
M13_18	v.1	Fila Tarentini graviter redolentia porri	
	2	edisti quotiens, oscula clusa dato.	
			Porri capitati
M13_19	v.1	Mittit praecipuos nemoralis Aricia porros :	
	2	in niveo virides stipite cerne comas.	

- Napi
- M13_20 v.1 Hos Amiternus ager felicibus educat hortis :
2 Nursinas poteris parcius esse pilas.
- Asparagi
- M13_21 v.1 Mollis in aequorea quae crevit spina Ravenna
2 non erit incultis gratior asparagis.
- Uvae duracinae
- M13_22 v.1 Non habilis cyathis et inutilis uva Lyaeo,
2 sed non potanti me tibi nectar ero.
- Ficus Chiae
- M13_23 v.1 Chia seni similis Baccho, quem Setia misit,
2 ipsa merum secum portat et ipsa salem.
- Cydonea
- M13_24 v.1 Si tibi Cecropio saturata Cydonea melle
2 ponentur, dicas : "Haec melimela placent".
- Nuces pinae
- M13_25 v.1 Poma sumus Cybeles : procul hinc discede, viator,
2 ne cadat in miserum nostra ruina caput.
- Sorba
- M13_26 v.1 Sorba sumus, molles nimium tendentia ventres :
2 aptius haec puero quam tibi poma dabis.
- Petalium caryotarum
- M13_27 v.1 Aurea porrigitur Jani caryota Kalendis ;
2 sed tamen hoc munus pauperis esse solet.
- Vas cottanorum
- M13_28 v.1 Haec tibi quae torta venerunt condita meta,
2 si majora forent cottana, ficus erat.
- Vas Damascenorum
- M13_29 v.1 Pruna peregrinae carie rugosa senectae
2 sume : solent duri solvere ventris onus.
- Caseus Lunensis
- M13_30 v.1 Caseus Etruscae signatus imagine Lunae
2 praestabit pueris prandia mille tuis.
- Caseus Vestinus
- M13_31 v.1 Si sine carne voles jentacula sumere frugi,
2 haec tibi Vestino de grege massa venit.
- Caseus fumosus
- M13_32 v.1 Non quemcumque focum nec fumum caseus omnem,
2 sed Velabrensem qui bibit, ille sapit.
- Casei Trebulani
- M13_33 v.1 Trebula nos genuit ; commendat gratia duplex,
2 sive levi flamma sive domamur aqua.

- Bulbi
- M13_34 v.1 Cum sit anus conjunx et sint tibi mortua membra,
2 nil aliud bulbis quam satur esse potes.
- Lucanicae
- M13_35 v.1 Filia Picenae venio Lucanica porcae :
2 pultibus hinc niveis grata corona datur.
- Cistella olivarum
- M13_36 v.1 Haec quae Picenis venit subducta trapetis
2 inchoat atque eadem finit oliva dapes.
- Mala citrea
- M13_37 v.1 Aut Corcyraei sunt haec de frondibus horti,
2 aut haec Massyli poma draconis erant.
- Colustrum
- M13_38 v.1 Subripuit pastor quae nondum stantibus haedis
2 de primo matrum lacte colustra damus.
- Haedus
- M13_39 v.1 Lascivum pecus et viridi non utile Baccho
2 det poenas ; nocuit jam tener ille deo.
- Ova
- M13_40 v.1 Candida si croceos circumfluit unda vitellos,
2 Hesperius scombri temperet ova liquor.
- Porcellus lactans
- M13_41 v.1 Lacte mero pastum pigrae mihi matris alumnum
2 ponat, et Aetolo de sue dives edat.
- Apyrina et tubures
- M13_42 v.1 Non tibi de Libycis tubures et apyrina ramis,
2 de Nomentanis sed damus arboribus.
- Idem
- M13_43 v.1 Lecta suburbanis mittuntur apyrina ramis
2 et vernae tubures. Quid tibi cum Libycis ?
- Sumen
- M13_44 v.1 Esse putes nondum sumen ; sic ubere largo
2 et fluit et vivo lacte papilla tumet.
- Pulli gallinacei
- M13_45 v.1 Si Libycae nobis volucres et Phasides essent,
2 acciperes, at nunc accipe chortis aves.
- Persica praecocia
- M13_46 v.1 Vilia maternis fueramur Persica ramis :
2 nunc in adoptivis Persica cara sumus.
- Panis Picentini
- M13_47 v.1 Picentina Ceres niveo sic nectare crescit
2 ut levis accepta spongea turget aqua.

- Boleti
- M13_48 v.1 Argentum atque aurum facilest laenamque togamque
2 mittere ; boletos mittere difficile est.
- Ficedulae
- M13_49 v.1 Cum me ficus alat, cum pascar dulcibus uvis,
2 cur potius nomen non dedit uva mihi ?
- Terrae tubera
- M13_50 v.1 Rumpimus altricem tenero quae vertice terram
2 tubera, boletis poma secunda sumus.
- Turdorum decuria
- M13_51 v.1 Texta rosis fortasse tibi vel divite nardo,
2 at mihi de turdis facta corona placet.
- Anates
- M13_52 v.1 Tota quidem ponatur anas, sed pectore tantum
2 et cervice sapit : cetera redde coco.
- Turtures
- M13_53 v.1 Cum pinguis mihi turtur erit, lactuca valebis ;
2 et cocleas tibi habe. Perdere nolo famem.
- Perna
- M13_54 v.1 Cerretana mihi fiat vel missa licebit
2 de Menapis : lauti de petasone vorent.
- Petaso
- M13_55 v.1 Musteus est : propera, caros nec differ amicos.
2 Nam mihi cum vetulo sit petasone nihil.
- Volva
- M13_56 v.1 Te fortasse magis capiat de virgine porca ;
2 me materna gravi de sue volva capit.
- Colocasia
- M13_57 v.1 Niliacum ridebis holus lanasque sequaces,
2 inproba cum morsu fila manaque trahes.
- Jecur anserinum
- M13_58 v.1 Aspice quam tumeat magno jecur anseris majus !
2 Miratus dices : "Hoc, rogo, crevit ubi"
- Glires
- M13_59 v.1 Tota mihi dormitur hiems et pinguior illo
2 tempore sum quo me nil nisi somnus alit.
- Cuniculi
- M13_60 v.1 Gaudet in effossis habitare cuniculus antris.
2 Monstravit tacitas hostibus ille vias.
- Attagenae
- M13_61 v.1 Inter sapes fertur alitum primus
2 Ionicarum gustus attagenarum.

- Galinae altilis
- M13_62 v.1 Pascitur et dulci facilis gallina farina,
2 pascitur et tenebris. Ingeniosa gula est.
- Caponis
- M13_63 v.1 Ne nimis exhausto macresceret inguine gallus,
2 amisit testes. Nunc mihi gallus erit.
- Idem
- M13_64 v.1 Succumbit sterili frustra gallina marito.
2 Hunc matris Cybeles esse decebat avem.
- Perdices
- M13_65 v.1 Ponitur Ausoniis avis haec rarissima mensis :
2 hanc in piscina ludere saepe soles.
- Columbini
- M13_66 v.1 Ne violes teneras perjuro dente columbas,
2 tradita si Gnidiae sunt tibi sacra deae.
- Palumbi
- M13_67 v.1 Inguina torquati tardant hebetantque palumbi :
2 non edat hanc volucrum qui cupit esse salax.
- Galbuli
- M13_68 v.1 Galbina decipitur calamis et retibus ales,
2 turgit adhuc viridi cum rudis uva mero.
- Cattae
- M13_69 v.1 Pannonicas nobis numquam dedit Umbria cattas :
2 mavult haec domino mittere dona Pudens.
- Pavones
- M13_70 v.1 Miraris, quotiens gemmantis explicat alas,
2 et potes hunc saevo tradere, dure, coco ?
- Phoenicopteri
- M13_71 v.1 Dat mihi pinna rubens nomen, sed lingua gulosis
2 nostra sapit. Quid si garrula lingua foret ?
- Phasianae
- M13_72 v.1 Argoa primum sum transportata carina :
2 ante mihi notum nil nisi Phasis erat.
- Numidicae
- M13_73 v.1 Ansere Romano quamvis satur Hannibal esset,
2 ipse suas numquam barbarus edit aves.
- Anseres
- M13_74 v.1 Haec servavit avis Tarpei templa Tonantis.
2 Miraris ? Nondum fecerat illa deus.
- Grues
- M13_75 v.1 Turbabis versus nec littera tota volabit,
2 unam perdidit si Palamedis avem.

- Rusticulae
- M13_76 v.1 Rustica sim an perdix quid refert, si sapor idem est ?
2 Carior est perdix. Sic sapit illa magis.
- Cycni
- M13_77 v.1 Dulcia defecta modulatur carmina lingua
2 cantator cycnus funeris ipse sui.
- Porphyrones
- M13_78 v.1 Nomen habet magni volucris tam parva gigantis ?
2 Et nomen prasini Porphyrionis habet.
- Mulli vivi
- M13_79 v.1 Spirat in advecto, sed jam piger, aequore mullus ;
2 languescit. Vivum da mare : fortis erit.
- Murenae
- M13_80 v.1 Quae natat in Siculo grandis murena profundo,
2 non valet exustam mergere sole cutem.
- Rhombi
- M13_81 v.1 Quamvis lata gerat patella rhombum,
2 rhombus latior est tamen patella.
- Ostrea
- M13_82 v.1 Ebria Baiano veni modo concha Lucrino :
2 nobile nunc sitio luxuriosa garum.
- Squillae
- M13_83 v.1 Caeruleus nos Liris amat, quem silva Maricae
2 protegit : hinc squillae maxima turba sumus.
- Scarus
- M13_84 v.1 Hic scarus, aequoreis qui venit adesus ab undis,
2 visceribus bonus est, cetera vile sapit.
- Coracinus
- M13_85 v.1 Princeps Niliaci raperis, coracine, macelli :
2 Pellaeae prior est gloria nulla gulae.
- Echini
- M13_86 v.1 Iste licet digitos testudine pungat acuta,
2 cortice deposita mollis echinus erit.
- Murices
- M13_87 v.1 Sanguine de nostro tinctas, ingrate, lacernas
2 induis, et non est hoc satis, esca sumus.
- Gobii
- M13_88 v.1 In Venetis sint lauta licet convivium terris,
2 principium cenae gobius esse solet.
- Lupus
- M13_89 v.1 Laneus Euganei lupus excipit ora Timavi,
2 aequoreo dulces cum sale pastus aquas.

- Aurata
- M13_90 v.1 Non omnis laudes pretiumque aurata meretur,
2 sed cui solus erit concha Lucrina cibus.
- Acipensis
- M13_91 v.1 Ad Palatinas acipensem mittite mensas :
2 ambrosias ornent munera rara dapes.
- Lepores
- M13_92 v.1 Inter aves turdus, si quid me iudice certum est,
2 inter quadripedes mattea prima lepus.
- Aper
- M13_93 v.1 Qui Diomedeis metuendus saetiger agris
2 Aetola cecidit cuspidem, talis erat.
- Dammae
- M13_94 v.1 Dente timetur aper, defendunt cornua cervum :
2 inbelles dammae quid nisi praeda sumus ?
- Oryx
- M13_95 v.1 Matutinarum non ultima praeda ferarum
2 saevus oryx constat quot mihi morte canum !
- Cervus
- M13_96 v.1 Hic erat ille tuo domitus, Cyparisse, capistro.
2 An magis iste tuus, Silvia, cervus erat ?
- Lalisio
- M13_97 v.1 Dum tener est onager solaque lalisio matre
2 pascitur, hoc infans sed breve nomen habet.
- Caprea
- M13_98 v.1 Pendentem summa capream de rupe videbis :
2 casuram speres ; despicit illa canes.
- Dorcas
- M13_99 v.1 Delicium parvo donabis dorcada nato :
2 jactatis solet hanc mittere turba togis.
- Onager
- M13_100 v.1 Pulcher adest onager : mitti venatio debet
2 dentis Erythraei : jam removete sinus.
- Oleum Venafrum
- M13_101 v.1 Hoc tibi Campani sudavit baca Venafri :
2 unguentum quotiens sumis, et istud olet.
- Garum sociorum
- M13_102 v.1 Exspirantis adhuc scombri de sanguine primo
2 accipe fastosum, munera cara, garum.
- Amphora muriae
- M13_103 v.1 Antipolitani, fateor, sum filia thynni :
2 essem si scombri, non tibi missa forem.

- Tarraconense
- M13_118 v.1 Tarraco, Campano tantum cessura Lyaeo
2 haec genuit Tuscis aemula vina cadis.
- Nomentanum
- M13_119 v.1 Nomentana meum tibi dat vindemia Bacchum :
2 si te Quintus amat, commodiora bibes.
- Spoletinum
- M13_120 v.1 De Spoletinis quae sunt cariosa lagonis
2 malueris quam si musta Falerna bibas.
- Paelignum
- M13_121 v.1 Marsica Paeligni mittunt turbata coloni :
2 non tu, libertus sed bibat illa tuus.
- Acetum
- M13_122 v.1 Amphora Niliaci non sit tibi vilis aceti :
2 esset cum vinum, vilior illa fuit.
- Massilitanum
- M13_123 v.1 Cum tua centenos expunget sportula civis,
2 fumea Massiliae ponere vina potes.
- Caeretanum
- M13_124 v.1 Caeretana Nepos ponat, Setina putabis.
2 Non ponit turbae, cum tribus illa bibit.
- Tarentinum
- M13_125 v.1 Nobilis et lanis et felix vitibus Aulon
2 det pretiosa tibi vellera, vina mihi.
- Unguentum
- M13_126 v.1 Unguentum heredi numquam nec vina relinquant.
2 Ille habeat nummos, haec tibi tota dato.
- Coronae roseae
- M13_127 v.1 Dat festinatas, Caesar, tibi bruma coronas :
2 quondam veris erat, nunc tua facta rosa est.
- M14_1 v.1 Synthesibus dum gaudet eques dominusque senator
2 dumque decent nostrum pillea sumpta Jovem ;
3 nec timet aedilem moto spectare fritillo,
4 cum videat gelidos tam prope verna lacus :
5 divitis alternas et pauperis accipe sortes :
6 praemia convivae dent sua quisque suo.
7 "Sunt apinae tricaeque et si quid vilis istis."
8 Quis nescit ? vel quis tam manifesta negat ?
9 Sed quid agam potius madidis, Saturne, diebus,
10 quos tibi pro caelo filius ipse dedit ?
11 Vis scribam Thebas Trojamve malasve Mycenae ?
12 "Lude," inquit "nucibus". Perdere nolo nuces.

- M14_2 v.1 Quo vis cumque loco potes hunc finire libellum :
2 versibus explicitumst omne duobus opus.
3 Lemmata si quaeris cur sint adscripta, docebo :
4 ut, si malueris, lemmata sola legas.
- Pugillares citrei
- M14_3 v.1 Secta nisi in tenues essemus ligna tabellas,
2 essemus Libyci nobile dentis onus.
- Quinquiplices
- M14_4 v.1 Caede juvencorum domini calet area felix,
2 quinquiplici cera cum datur altus honos.
- Pugilares eborei
- M14_5 v.1 Languida ne tristes obscurent lumina cerae,
2 nigra tibi niveum littera pingat ebur.
- Triplices
- M14_6 v.1 Tunc triplices nostros non vilia dona putabis,
2 cum se venturam scribet amica tibi.
- Pugilares membranei
- M14_7 v.1 Esse puta ceras, licet haec membrana vocetur :
2 delebis, quotiens scripta novare voles.
- Vitelliani
- M14_8 v.1 Nondum legerit hos licet puella,
2 novit quid cupiant Vitelliani.
- Idem
- M14_9 v.1 Quod minimos cernis, mitti nos credis amicae.
2 Falleris : et nummos ista tabella rogat.
- Chartea epistolares
- M14_10 v.1 Seu leviter noto, seu caro missa sodali
2 omnes ista solet charta vocare suos.
- Loculi eborei
- M14_12 v.1 Hos nisi de flava loculos implere moneta
2 non decet : argentum vilia ligna ferant.
- Loculi lignei
- M14_13 v.1 Si quid adhuc superest in nostri faece locelli,
2 munus erit. Nihil est : ipse locellus erit.
- Tali eborei
- M14_14 v.1 Cum steterit nullus vultu tibi talus eodem,
2 munera me dices magna dedisse tibi.
- Tesserae
- M14_15 v.1 Non sim talorum numero par tessera, dum sit
2 major quam talis alea saepe mihi.
- Turricula
- M14_16 v.1 Quae scit compositos manus improba mittere talos,
2 si per me misit, nil nisi vota feret.

- Tabula lusoria
- M14_17 v.1 Hac mihi bis seno numeratur tessera puncto ;
2 calculus hac gemino discolor hoste perit.
- Calculi
- M14_18 v.1 Insidiosorum si ludis bella latronum,
2 gemmeus iste tibi miles et hostis erit.
- Nuces
- M14_19 v.1 Alea parva nuces et non damnosa videtur ;
2 saepe tamen pueris abstulit illa natis.
- Theca libraria
- M14_20 v.1 Sortitus thecam calamis armare memento :
2 cetera nos dedimus, tu leviora para.
- Graphiarium
- M14_21 v.1 Haec tibi erunt armata suo graphiaria ferro :
2 si puero dones, non leve munus erit.
- Dentiscalpium
- M14_22 v.1 Lentiscum melius : sed si tibi frondea cuspis
2 defuerit, dentes pinna levare potest.
- Auriscalpium
- M14_23 v.1 Si tibi morosa prurigine verminat auris,
2 arma damus tantis apta libidinibus.
- Acus aurea
- M14_24 v.1 Splendida ne madidi violent bombycina crines,
2 figat acus tortas sustineatque comas.
- Pectines
- M14_25 v.1 Quid faciet nullos hic inventura capillos
2 multifido buxus quae tibi dente datur ?
- Crines
- M14_26 v.1 Chattica Teutonicos accendit spuma capillos :
2 captivis poteris cultior esse comis.
- Sapo
- M14_27 v.1 Si mutare paras longaevos cana capillos,
2 accipe Mattiacas (quo tibi calva ?) pilas.
- Umbella
- M14_28 v.1 Accipe quae nimios vincant umbracula soles :
2 sit licet et ventus, te tua vela tegent.
- Causea
- M14_29 v.1 In Pompeiano tecum spectabo theatro :
2 Mandatus populo vela negare solet.
- Venabula
- M14_30 v.1 Excipient apros expectabuntque leones,
2 intrabunt ursos, sit modo firma manus.

- Culter venatorius
- M14_31 v.1 Si dejecta gemas longo venabula rostro,
2 hic brevis ingentem cominus ibit aprum.
- Parazonium
- M14_32 v.1 Militiae decus hoc gratique erit omen honoris,
2 arma tribunicium cingere digna latus.
- Pugio
- M14_33 v.1 Pugio, quem curva signat brevis orbita vena,
2 stridentem gelidis hunc Salo tinxit aquis.
- Falx
- M14_34 v.1 Pax me certa ducis placidos curvavit in usus.
2 Agricola nunc sum, militis ante fui.
- Securicula
- M14_35 v.1 Cum fieret tristis solvendis auctio nummis,
2 haec quadringentis milibus empta fuit.
- Ferramenta tonsoria
- M14_36 v.1 Tondendis haec arma tibi sunt apta capillis ;
2 unguibus hic longis utilis, illa genis.
- Scrinium
- M14_37 v.1 Selectos nisi das mihi libellos,
2 admittam tineas trucesque blattas.
- Fasces calamorum
- M14_38 v.1 Dat chartis habiles calamos Memphitica tellus ;
2 texantur reliqua tecta palude tibi.
- Lucerna cubicularis
- M14_39 v.1 Dulcis conscia lectuli lucerna,
2 quidquid vis facias licet, tacebo.
- Cicindela
- M14_40 v.1 Ancillam tibi sors dedit lucernae,
2 totas quae vigil exigit tenebras.
- Lucerna polymyxos
- M14_41 v.1 Inlustrem cum tota meis convivia flammis
2 totque geram myxos, una lucerna vocor.
- Cereus
- M14_42 v.1 Hic tibi nocturnos praestabit cereus ignes :
2 subducta est puero namque lucerna tuo.
- Candelabrum Corinthium
- M14_43 v.1 Nomina candelae nobis antiqua dederunt :
2 non norat parcos uncta lucerna patres.
- Candelabrum ligneum
- M14_44 v.1 Esse vides lignum ; servas nisi lumina, fiet
2 de candelabro magna lucerna tibi.

- Pila paganica
- M14_45 v.1 Haec quae difficili turget paganica pluma,
2 folle minus laxa est et minus arta pila.
- Pila trigonalis
- M14_46 v.1 Si me nobiles scis expulsare sinistris,
2 sum tua. Tu nescis ? Rustice, redde pilam.
- Follis
- M14_47 v.1 Ite procul, juvenes : mitis mihi convenit aetas :
2 folle decet pueros ludere, folle senes.
- Harpasta
- M14_48 v.1 Haec rapit Antaei velox in pulvere draucus,
2 grandia qui vano colla labore facit.
- Halteres
- M14_49 v.1 Quid pereunt stulto fortes haltere lacerti ?
2 exercet melius vinea fossa viros.
- Galericulum
- M14_50 v.1 Ne lutet inmundum nitidos ceroma capillos,
2 hac poteris madidas condere pelle comas.
- Strigiles
- M14_51 v.1 Pergamon has misit. Curvo destringere ferro :
2 non tam saepe teret lintea fullo tibi.
- Gutus corneus
- M14_52 v.1 Gestavit modo fronte me juvenis :
2 verum rhinoceros me putabas.
- Rhinoceros
- M14_53 v.1 Nuper in Ausonia domini spectatus harena,
2 hic erit ille tibi, cui pila taurus erat.
- Crepitacillum
- M14_54 v.1 Si quis plorator collo tibi vernula pendet,
2 haec quatiat tenera garrula sinistra manu.
- Flagellum
- M14_55 v.1 Proficies nihil hoc, caedas licet usque, flagello,
2 si tibi purpureo de grege currit equus.
- Dentifricium
- M14_56 v.1 Quid mecum est tibi ? Me puella sumat :
2 emptos non soleo polire dentes.
- Myrobalanum
- M14_57 v.1 Quod nec Vergilius nec carmine dicit Homerus,
2 hoc ex unguento constat et ex balano.
- Aphronitrum
- M14_58 v.1 Rusticus es ? Nescis, quid Graeco nomine dicar :
2 spuma vocor nitri. Graecus es ? aphronitrum.

- Opobalsama
- M14_59 v.1 Balsama me capiunt, haec sunt unguenta virorum :
2 delicias Cosmi vos redolete, nurus.
- Lomentum
- M14_60 v.1 Gratum munus erit scisso nec inutile ventri,
2 si clara Stephani balnea luce petes.
- Lanterna cornea
- M14_61 v.1 Dux lanterna viae clusis feror aurea flammis,
2 et tuta est gremio parva lucerna meo.
- Lanterna de vesica
- M14_62 v.1 Cornea si non sum, numquid sum fuscior ? aut me
2 vesicam, contra qui venit, esse putat ?
- Tibiae
- M14_63 v.1 Ebria nos madidis rumpit tibicina buccis :
2 saepe duas pariter, saepe monaulon habet.
- Fistula
- M14_64 v.1 Quid me compactam ceris et harundine rides ?
2 quae primum structa est fistula talis erat.
- Soleae lanatae
- M14_65 v.1 Defuerit si forte puer soleasque libebit
2 sumere, pro puero pes erit ipse sibi.
- Mamillare
- M14_66 v.1 Taurino poteris pectus constringere tergo :
2 nam pellis mammas non capit ista tuas.
- Muscarium pavoninum
- M14_67 v.1 Lambere quae turpes prohibet tua prandia muscas,
2 alitis eximiae cauda superba fuit.
- Muscarium bubulum
- M14_68 v.1 Sordida si flavo fuerit tibi pulvere vestis,
2 colligat hunc tenui verbere cauda levis.
- Copta Rhodiaca
- M14_69 v.1 Peccantis famuli pugno ne percute dentes :
2 clara Rhodos coptam quam tibi misit edat.
- Priapus siligineus
- M14_70 v.1 Si vis esse satur, nostrum potes esse Priapum :
2 ipsa licet rodas inguina, purus eris.
- Porcus
- M14_71 v.1 Iste tibi faciet bona Saturnalia porcus,
2 inter spumantes ilice pastus apros.
- Botulus
- M14_72 v.1 Qui venit botulus mediae tibi tempore brumae,
2 Saturni septem venerat ante dies.

- Psittacus
- M14_73 v.1 Psittacus a vobis aliorum nomina discam :
2 hoc didici per me dicere "Caesar Have".
- Corvus
- M14_74 v.1 Corve salutator, quare fellator haberis ?
2 In caput intravit mentula nulla tuum.
- Luscinia
- M14_75 v.1 Flet Philomela nefas incesti Tereos, et quae
2 muta puella fuit, garrula fertur avis.
- Pica
- M14_76 v.1 Pica loquax certa dominum te voce saluto :
2 si me non videas, esse negabis avem.
- Cavea eborea
- M14_77 v.1 Si tibi talis erit, qualem dilecta Catullo
2 Lesbia plorabat, hic habitare potest.
- Narthecium
- M14_78 v.1 Artis ebur medicae narthecia cernis : habebis
2 munera, quae cuperet Paccius esse sua.
- Flagra
- M14_79 v.1 Ludite lascivi, sed tantum ludite, servi :
2 haec signata mihi quinque diebus erunt.
- Ferulae
- M14_80 v.1 Invisae nimium pueris grataeque magistris,
2 clara Prometheo munere ligna sumus.
- Pera
- M14_81 v.1 Ne mendica ferat barbati prandia nudi
2 dormiat et tetrico cum cane, pera rogat.
- Scopae
- M14_82 v.1 In pretio scopas testatur palma fuisse :
2 otia sed scopis nunc analecta dedit.
- Scalptorium eboreum
- M14_83 v.1 Defendet manus haec scapulas mordente molesto
2 pulice, vel si quid pulice sordidius.
- Manuale
- M14_84 v.1 Ne toga barbatus faciat vel paenula libros,
2 haec abies chartis tempora longa dabit.
- Lectus pavoninus
- M14_85 v.1 Nomina dat spondae pictis pulcherrima pinnis
2 nunc Junonis avis, sed prius Argus erat.
- Ephippium
- M14_86 v.1 Stragula succincti venator sume veredi :
2 nam solet a nudo surgere ficus equo.

- Stibadia
- M14_87 v.1 Accipe lunata scriptum testudine sigma.
2 Octo capit ; veniat quisquis amicus erit.
- Gustatorium
- M14_88 v.1 Femineam nobis cherson si credis inesse,
2 deciperis : pelagi mascula praeda sumus.
- Mensa citrea
- M14_89 v.1 Accipe felices, Atlantica munera, silvas :
2 aurea qui dederit dona, minora dabit.
- Mensa acerna
- M14_90 v.1 Non sum crispa quidem nec silvae filia Maurae,
2 sed norunt lautas et mea ligna dapes.
- Dentes eborei
- M14_91 v.1 Grandia taurorum portant qui corpora, quaeris
2 an Libycas possint sustinuisse trabes ?
- Quinquepedal
- M14_92 v.1 Puncta notis ilex et acuta cuspide clusa
2 saepe redemptoris prodere furta solet.
- Pocula archetypha
- M14_93 v.1 Non est ista recens nec nostri gloria caeli :
2 primus in his Mentor, dum facit illa, bibit.
- Calices audaces
- M14_94 v.1 Nos sumus audacis plebeia toreumata vitri,
2 nostra neque ardenti gemma feritur aqua.
- Phiala aurea caelata
- M14_95 v.1 Quamvis Callaico rubeam generosa metallo,
2 gloriator arte magis : nam Myos iste labor.
- Calices Vatinii
- M14_96 v.1 Vilia sutoris calicem monimenta Vatini
2 accipe ; sed nasus longior ille fuit.
- Lances chrysendetae
- M14_97 v.1 Grandia ne viola parvo chrysendeta mullo :
2 ut minimum, libras debet habere duas.
- Vasa Arretina
- M14_98 v.1 Arretina nimis ne spernas vasa monemus :
2 lautus erat Tuscis Porsena fictilibus.
- Bascauda
- M14_99 v.1 Barbara de pictis veni bascauda Britannis,
2 sed me jam mavolt dicere Roma suam.
- Panaca
- M14_100 v.1 Si non ignota est docti tibi terra Catulli,
2 potasti testa Raetica vina mea.

- Boletaria
- M14_101 v.1 Cum mihi boleti dederint tam nobile nomen,
2 prototomis (pudet heu !) servio coliculis.
- Calices Surrentini
- M14_102 v.1 Accipe non vili calices de pulvere natos,
2 sed Surrentinae leve toreuma rotae.
- Colum nivarium
- M14_103 v.1 Setinos, moneo, nostra nive frange trientes :
2 pauperiore mero tingere lina potes.
- Saccus nivarius
- M14_104 v.1 Attenuare nives norunt et lintea nostra :
2 frigidior colo non salit unda tuo.
- Urceoli ministratorii
- M14_105 v.1 Frigida non deerit, non deerit calda petenti :
2 sed tu morosa ludere parce siti.
- Urceus fictilis
- M14_106 v.1 Hic tibi donatur panda ruber urceus ansa.
2 Stoicus hoc gelidam Fronto petebat aquam.
- Calathi
- M14_107 v.1 Nos Satyri, nos Bacchus amat, nos ebria tigris,
2 perfusos domini lambere docta pedes.
- Calices Saguntini
- M14_108 v.1 Quae non sollicitus teneat servetque minister,
2 sume Saguntino pocula facta luto.
- Calices gemmati
- M14_109 v.1 Gemmatum Scythicis ut luceat ignibus aurum,
2 aspice. Quot digitos exuit iste calix !
- Ampulla potoria
- M14_110 v.1 Hac licet in gemma, servat quae nomina Cosmi,
2 luxuriose, bibas, si foliata sitis.
- Crystallina
- M14_111 v.1 Frangere dum metuis, franges crystallina : peccant
2 securae nimium sollicitaeque manus.
- Nimbus vitreus
- M14_112 v.1 A Jove qui veniet, miscenda ad pocula largas
2 fundet nimbus aquas : hic tibi vina dabit.
- Murrina
- M14_113 v.1 Si caldum potas, ardenti murra Falerno
2 convenit et melior fit sapor inde mero.
- Patella Cumana
- M14_114 v.1 Hanc tibi Cumano rubicundam pulvere testam
2 municipem misit casta Sibylla suam.

- Calices vitrei
- M14_115 v.1 Aspicias ingenium Nili : quibus addere plura
2 dum cupit, a quotiens perdidit auctor opus !
- Lagona nivaria
- M14_116 v.1 Spoletina bibis vel Marsis condita cellis :
2 quo tibi decoctae nobile frigus aquae ?
- Idem
- M14_117 v.1 Non potare nivem, sed aquam potare recentem
2 de nive commenta est ingeniosa sitis.
- Idem
- M14_118 v.1 Massiliae fumos miscere nivalibus undis
2 parce, puer, constet ne tibi pluris aqua.
- Matella fictilis
- M14_119 v.1 Dum poscor crepitu digitorum et verna moratur,
2 o quotiens paelex culcita facta mea est !
- Ligula argentea
- M14_120 v.1 Quamvis me ligulam dicant equitesque patresque,
2 dicor ab indoctis lingula grammaticis.
- Coclearia
- M14_121 v.1 Sum cocleis habilis, sed nec minus utilis ovis.
2 Numquid scis, potius cur cocleare vocer ?
- Anuli
- M14_122 v.1 Ante frequens, sed nunc rarus nos donat amicus.
2 Felix cui comes est non alienus eques.
- Dactyliotheca
- M14_123 v.1 Saepe gravis digitis elabatur anulus unctis,
2 tuta mea fiet sed tua gemma fide.
- Toga
- M14_124 v.1 Romanos rerum dominos gentemque togatam
2 ille facit, magno qui dedit astra patri.
- Idem
- M14_125 v.1 Si matutinos facilest tibi perdere somnos,
2 attrita veniet sportula saepe toga.
- Endromis
- M14_126 v.1 Pauperis est munus, sed non est pauperis usus :
2 hanc tibi pro laena mittimus endromida.
- Canusinae fuscae
- M14_127 v.1 Haec tibi turbato Canusina simillima mulso
2 munus erit. Gaude : non cito fiet anus.
- Bardocucullus
- M14_128 v.1 Gallia Santonico vestit te bardocucullo.
2 Cercopithecorum paenula nuper erat.

- Canusinae rufae
M14_129 v.1 Roma magis fuscis vestitur, Gallia rufis,
2 et placet hic pueris militibusque colos.
- Paenula scortea
M14_130 v.1 Ingrediare viam caelo licet usque sereno,
2 ad subitas numquam scortea desit aquas.
- Lacernae coccineae
M14_131 v.1 Si veneto prasinove faves, quid coccina sumes ?
2 Ne fias ista transfuga sorte vide.
- Pilleum
M14_132 v.1 Si possem, totas cuperem misisse lacernas :
2 nunc tantum capiti munera mitto tuo.
- Lacernae Baeticae
M14_133 v.1 Non est lana mihi mendax, nec mutor aheni.
2 Sic placeant Tyriae : me mea tinxit ovis.
- Fascia pectoralis
M14_134 v.1 Fascia, crescentes dominae compesce papillas,
2 ut sit quod capiat nostra tegatque manus.
- Lacernae albae
M14_135 v.1 Amphitheatrali nos commendamus ab usu,
2 cum teget argentes alba lacerna togas.
- Cenatoria
M14_136 v.1 Nec fora sunt nobis nec sunt vadimonia nota :
2 Hoc opus est, pictis accubuisse toris.
- Focale
M14_137 v.1 Si recitaturus dederō tibi forte libellum,
2 hoc focale tuas adserat auriculas.
- Laena
M14_138 v.1 Tempore brumali non multum levia prosunt :
2 calfaciunt villi pallia vestra mei.
- Mantele
M14_139 v.1 Nobilius villosa tegant tibi lintea citrum :
2 orbibus in nostris circulus esse potest.
- Cuculli Liburnici
M14_140 v.1 Jungere nescisti nobis, o stulte, lacernas :
2 indueras albas, exue callainas.
- Udones Cilicii
M14_141 v.1 Non hos lana dedit, sed olentis barba mariti :
2 Cinyphio poterit planta latere sinu.
- Synthesis
M14_142 v.1 Dum toga per quinas gaudet requiescere luces,
2 hos poteris cultus sumere jure tuo.

- Tunicae Patavinae
- M14_143 v.1
2 Vellera consumunt Patavinae multa trilices,
et pingues tunicas serra secare potest.
- Spongea
- M14_144 v.1
2 Haec tibi sorte datur tergendis spongia mensis
utilis, expresso cum levis imbre tumet.
- Paenula gausapina
- M14_145 v.1
2 Is mihi candor inest, villorum gratia tanta,
ut me vel media sumere messe velis.
- Cervical
- M14_146 v.1
2 Tingue caput Cosmi folio, cervical olebit :
perdidit unguentum cum coma, pluma tenet.
- Cubilaria gausapina
- M14_147 v.1
2 Stragula purpureis lucent villosa tapetis.
Quid prodest, si te congelat uxor anus ?
- Lodices
- M14_148 v.1
2 Nudo stragula ne toro paterent,
junctae nos tibi venimus sorores.
- Amictorium
- M14_149 v.1
2 Mammosas metuo ; tenerae me trade puellae,
ut possint niveo pectore lina frui.
- Cubicularia polymita
- M14_150 v.1
2 Haec tibi Memphis tellus dat munera : victa est
pectine Niliaco jam Babylonos acus.
- Zona
- M14_151 v.1
2 Longa satis nunc sum ; dulci sed pondere venter
si tumeat, fiam tunc tibi zona brevis.
- Gausapum quadratum
- M14_152 v.1
2 Lodices mittet docti tibi terra Catulli :
nos Helicaonia de regione sumus.
- Semicinctium
- M14_153 v.1
2 Det tunicam locuples : ego te praecingere possum.
Essem si locuples, munus utrumque darem.
- Lanae amethystinae
- M14_154 v.1
2 Ebria Sidoniae cum sim de sanguine conchae,
non video, quare sobria lana vocer.
- Lanae albae
- M14_155 v.1
2 Velleribus primis Apulia, Parma secundis
nobilis ; Altinum tertia laudat ovis.
- Lanae Tyriae
- M14_156 v.1
2 Nos Lacedaemoniae pastor donavit amicae :
deterior Ledae purpura matris erat.

- Lanae Pollentinae
- M14_157 v.1 Non tantum pullo lugentes vellere lanas,
2 sed solet et calices haec dare terra suos.
- Idem
- M14_158 v.1 Lana quidem tristis, sed tonsis nata ministris,
2 quales non primo de grege mensa citat.
- Tomentum Leuconicum
- M14_159 v.1 Oppressae nimium vicina est fascia plumae ?
2 Vellera Leuconicis accipe rasa sagis.
- Tomentum Circense
- M14_160 v.1 Tomentum concisa palus Circense vocatur.
2 Haec pro Leuconico stramina pauper emit.
- Pluma
- M14_161 v.1 Lassus Amyclaea poteris requiescere pluma,
2 interior cycni quam tibi lana dedit.
- Faenum
- M14_162 v.1 Fraudata tumeat fragilis tibi culcita mula :
2 non venit ad duros pallida cura toros.
- Tintinabulum
- M14_163 v.1 Redde pilam : sonat aes thermarum. Ludere pergis ?
2 Virgine vis sola lotus abire domum.
- Discus
- M14_164 v.1 Splendida cum volitant Spartani pondera disci,
2 este procul, pueri : sit semel ille nocens.
- Cithara
- M14_165 v.1 Reddidit Eurydicen vati : sed perdidit ipse,
2 dum sibi non credit nec patienter amat.
- Idem
- M14_166 v.1 De Pompeiano saepe est ejecta theatro
2 quae duxit silvas detinuitque feras.
- Plectrum
- M14_167 v.1 Fervida ne trito tibi pollice pusula surgat,
2 exornent docilem candida plectra lyram.
- Trochus
- M14_168 v.1 Inducenda rota est : das nobis utile munus :
2 iste trochus pueris, at mihi cantus erit.
- Idem
- M14_169 v.1 Garrulus in laxo cur anulus orbe vagatur ?
2 Cedat ut argutis obvia turba trochis.
- Signum Victoriae aureum
- M14_170 v.1 Haec illi sine sorte datur, cui nomina Rhenus
2 vera dedit. Deciens adde Falerna, puer.

- "Broutou Paidion" fictile
M14_171 v.1 Gloria tam parvi non est obscura sigilli :
2 istius pueri Brutus amator erat.
- Sauroctonos Corinthius
M14_172 v.1 Ad te reptanti, puer insidiose, lacertae
2 parce : cupit digitis illa perire tuis.
- Hyacinthus in tabula pictus
M14_173 v.1 Flectit ab invisio morientia lumina disco
2 Oebalius, Phoebi culpa dolorque, puer.
- Hermaphroditus marmoreus
M14_174 v.1 Masculus intravit fontis, emersit utrumque :
2 pars est una patris, cetera matris habet.
- Danae picta
M14_175 v.1 Cur a te pretium Danae, regnator Olympi,
2 accepit, gratis si tibi Leda dedit ?
- Persona Germana
M14_176 v.1 Sum figuli lusus russi persona Batavi.
2 Quae tu derides, haec timet ora puer.
- Hercules Corinthius
M14_177 v.1 Elidit geminos infans nec respicit anguis.
2 Jam poterat teneras hydra timere manus.
- Hercules fictilis
M14_178 v.1 Sum fragilis : sed tu, moneo, ne sperne sigillum :
2 non pudet Alciden nomen habere meum.
- Minerva argentea
M14_179 v.1 Dic mihi, virgo ferox, cum sit tibi cassis et hasta,
2 quare non habeas aegida. "Caesar habet."
- Europe picta
M14_180 v.1 Mutari melius tauro, pater optime divum,
2 tunc poteras, Io cum tibi vacca fuit.
- Leandros marmoreus
M14_181 v.1 Clamabat tumidis audax Leandros in undis :
2 "Mergite me, fluctus, cum rediturus ero."
- Sigillum gibberis fictile
M14_182 v.1 Ebrius haec fecit terris, puto, monstra Prometheus :
2 Saturnalicio lusit et ipse luto.
- Homeri Batrachomachia
M14_183 v.1 Perlege Maeonio cantatas carmine ranas
2 et frontem nugis solvere disce meis.
- Homerus in pugillaribus membraneis
M14_184 v.1 Ilias et Priami regnis inimicus Ulixes
2 multiplici pariter condita pelle latent.

- Asturco
- M14_199 v.1 Hic brevis ad numeros rapidum qui colligit unguem,
2 venit ab auriferis gentibus Astur equus.
- Canis vertragus
- M14_200 v.1 Non sibi sed domino venatur vertragus acer,
2 inlaesum leporem qui tibi dente feret.
- Palaestrita
- M14_201 v.1 Non amo quod vincat, sed quod succumbere novit
2 et didicit melius Ten Epiklinopalen.
- Simius
- M14_202 v.1 Callidus emissas eludere simius hastas,
2 si mihi cauda foret, cercopithecus eram.
- Puella Gaditana
- M14_203 v.1 Tam tremulum crisat, tam blandum prurit, ut ipsum
2 masturbatorem fecerit Hippolytum.
- Cymbala
- M14_204 v.1 Aera Celaenaeos lugentia matris amores
2 esuriens Gallus vendere saepe solet.
- Puer
- M14_205 v.1 Sit nobis aetate puer, non pumice levis,
2 propter quem placeat nulla puella mihi.
- Cestos
- M14_206 v.1 Collo necte, puer, meros amores,
2 Ceston de Veneris sinu calentem.
- Idem
- M14_207 v.1 Sume Cytheriaco medicatum nectare ceston :
2 ussit amatorem balteus iste Jovem.
- Notarius
- M14_208 v.1 Currant verba licet, manus est velocior illis :
2 nondum lingua suum, dextra peregit opus.
- Concha
- M14_209 v.1 Levis ab aequorea cortex Mareotica concha
2 fiat : inoffensa curret harundo via.
- Morio
- M14_210 v.1 Non mendax stupor est, nec fingitur arte dolosa.
2 Quisquis plus justo non sapit, ille sapit.
- Caput vervecinum
- M14_211 v.1 Mollia Phrixei secuisti colla mariti.
2 Hoc meruit tunicam qui tibi, saeve, dedit ?
- Pumilius
- M14_212 v.1 Si solum spectes hominis caput, Hectors credas :
2 si stantem videas, Astyanacta putes.

- Parma
- M14_213 v.1 Haec, quae saepe solet vinci, quae vincere raro,
2 parma tibi, scutum pumilionis erit.
- Comoedi pueri
- M14_214 v.1 Non erit in turba quisquam Misoumenos ista :
2 sed poterit quivis esse Dis Exapaton.
- Fibula
- M14_215 v.1 Dic mihi simpliciter, comoedis et citharoedis,
2 fibula, quid praestas ? "Carius ut futuant."
- Auceps
- M14_216 v.1 Non tantum calamis sed cantu fallitur ales,
2 callida dum tacita crescit harundo manu.
- Accipiter
- M14_217 v.1 Praedo fuit volucrum : famulus nunc aucupis idem
2 decipit et captas non sibi maeret aves.
- Opsonator
- M14_218 v.1 Dic quotus et quanti cupias cenare nec unum
2 addideris verbum : cena parata tibi est.
- Cor bubulum
- M14_219 v.1 Pauper causidicus nullos referentia nummos
2 carmina cum scribas, accipe cor, quod habes.
- Cocus
- M14_220 v.1 Non satis est ars sola coco : servire palatum
2 nolo : cocus domini debet habere gulam.
- Craticula cum veribus
- M14_221 v.1 Rara tibi curva craticula sudet ofella ;
2 spumeus in longa cuspidate fumet aper.
- Pistor dulciarius
- M14_222 v.1 Mille tibi dulces operum manus ista figuras
2 extruet : huic uni parca laborat apis.
- Adipata
- M14_223 v.1 Surgite : jam vendit pueris jentacula pistor
2 cristataeque sonant undique lucis aves.